

柳亞子主編

南社詞集

第一冊



南社詞集第一冊目次

一	丁以布 展庵詞	一
二	丁三在 不識詞	一
三	王德鍾 大覺詞	六
四	王漢章 吉樂詞	八
五	王 橫 瘦月詞	九
六	王鍾麒 毛生詞	一〇
七	王蕤章 蓮農詞	一六
八	古 直 公愚詞	六八
九	白 炎 中壘詞	七〇
一〇	朱 霞 劍鋒詞	七三
一一	朱慕家 劍芒詞	七四
一二	朱錫梁 梁任詞	七七

一三	朱 璽	鷓鴣詞	七八
一四	余 一	十眉詞	七九
一五	余壽頤	救饑詞	八一
一六	吳有章	漫庵詞	八四
一七	吳 梅	癡童詞	八五
一八	吳 虞	又陵詞	九六
一九	吳清庠	眉孫詞	九九
二〇	吳志伊	天民詞	一〇〇
二一	吳碧城	遁天詞	一〇一
二二	宋一鴻	癡評詞	一〇六
二三	成本璞	瑞如詞	一〇八
二四	李 凡	息霜詞	一一二
二五	李 拙	康弼詞	一四

二六	李養夢	小白詞	一四
二七	林 羲	仲宓詞	一六
二八	汪文溥	鬪臯詞	一七
二九	汪兆銘	精衛詞	二〇
三〇	沈次約	劍霜詞	二二
三一	沈宗畸	南雅詞	二三
三二	沈昌眉	眉若詞	三〇
三三	沈汝謹	石友詞	三三
三四	沈 雲	秋凡詞	三三
三五	沈 礪	道非詞	三五
三六	沈毓清	詠雙詞	三八
三七	狄 膺	君武詞	三九
三八	周宗澤	景瞻詞	四〇

- 三九 周 亮 天石詞……………一四一
- 四〇 周偉仁 人菊詞……………一四六
- 四一 周 斌 芷畦詞……………一四六
- 四二 周 雲 酒痴詞……………一五一
- 四三 周 實 實丹詞……………一五二
- 四四 易 象 梅僧詞……………一五八
- 四五 林之夏 秋葉詞……………一五九
- 四六 林百舉 一厂詞……………一五九
- 四七 林學衡 浚南詞……………一六二
- 四八 邱志貞 梅白詞……………一六五
- 四九 邵瑞彭 次公詞……………一六六
- 五〇 金光弼 夢真詞……………二一五
- 五一 金 燕 翼謀詞……………二一六

五二	俞 鏗 劍華詞	二一七
五三	姚 光 石子詞	二五八
五四	姚肖堯 民哀詞	二五九
五五	姚錫鈞 經籬詞	二六〇
五六	姜胎石 參關詞	二七三
五七	姜 崙 杏癡詞	二七六
五八	柳棄疾 亞子詞	二八四
五九	洪 兔 董父詞	三〇〇
六〇	洪爲藩 白蘋詞	三〇四
六一	胡先驪 步曾詞	三〇五
六二	胡穎之 栗長詞	三一四
六三	胡韞玉 樓座詞	三三九
六四	胡懷琛 寄塵詞	三四一

六五	孫景賢	龍尾詞	三四三
六六	徐自華	懺慧詞	三四四
六七	徐蘊華	小淑詞	三五〇
六八	徐珂	仲可詞	三五五
六九	徐夢	半夢詞	三六〇
七〇	浦軍年	醒華詞	三六二
七一	馬駿聲	小進詞	三六三
七二	高燮	吹萬詞	三六四
七三	高旭	天梅詞	三七一
七四	高增	佛子詞	三八八
七五	張光厚	荔丹詞	三九四
七六	張光蕙	穉蘭詞	三九六
七七	張長	心無詞	三九七
七八	張昭漢	默君詞	三九八
七九	張啓漢	平子詞	三九九

一 丁以布展庵詞

少年遊爲春航題名小青慕作，用慮尊韻。

蘭因詩記管夫人，一夢悟前身。（錢塘陳文述室人管筠題蘭因集詩註云：家慈夢大士攜

青衣垂髻女子，持雙頭蓮花而生予，說者以小青後身解之。）霜促幽芳；風欺弱質，恨事泣花神。
荒墳殘碣孤山路，冷月夜歸魂。環珮三更；氍毹一曲，疑假更疑真。

雙紅豆題龍丁社友春秋愁怨詩

春復秋，怨更愁，可奈年光似水流，紅顏易白頭！
綠楊樓，白蘋洲，欲泛扁舟故故留，人生幾

樂游！

二 丁三在不識詞

少年遊爲春航題名小青慕作，用慮尊韻。

碧氈氈上現真真，同是夢中人。我本鄉親，卿非異姓，何必問前身。花開花落年年恨，酌水奠香魂，蝴蝶飛灰；杜鵑啼血，今古此傷神！

前調前詞意有未盡，重拈一闋，仍用慮尊韻。拉雜之語，在所不免。

傳奇彷彿再來人，（小青傳奇清初曾一演于吳下，陳臥子李舒章均以彷彿行記之。）又覩舞腰身。血淚雙行，心香一瓣，我弔女兒魂。鍾情爭說虞山事，（見列朝詩集小傳）簫鼓欲離真。譚子讓名牧齋無賴，唐突藐姑神。

減蘭爲佩絃題荀郎小影

宜嗔宜喜，省識春風圖畫裏。滿月年華，開到人間第一花。紅牙按拍，望斷江南空冀北。問姓香薰，小字分明解受辛。

前調題吹萬亞子石子暨眷屬三潭泛舟照片，次吹萬韻。

輕舟穩坐，叢竹橫空搖翠个。笑把蘭篙，刺入新荷傍小橋。三家仙侶，添個高郎豪自許。素月流波，對影飛觴爾我他。

一痕沙題武林同遊照片，次吹萬韻。

醉夢生生死死，今昨非非是是；大地劫塵餘，此身殊。
喜得相携成串，放浪酒邊吟畔；招隱
有名山，待君還。

浣溪紗題西泠雅集照片，次吹萬韻。

君慣牢愁我鬱思，酒痕和淚影差差；莫嗟邂逅十年遲。
鏡裏蛾眉修黛色，畫中蟬鬢引烏

絲；
明湖回首暮春時。

羅敷媚題亞子虛尊越流春航小雲清波弄影照片

明湖游客分湖侶，潦倒名場；點綴歡場，同調元方與季方。
鶯簧柳浪聲聞寂，敷粉何郎；燕

麝荀郎，一水盈盈鏡裏妝。

菩薩蠻借絳士蘇新恨生亞父冥飛展庵三潭夜泛

半規朝月雙枝槳，瓜皮恰受人三兩。瑣瑣話平生，王門不作伶。
相逢疑舊雨，莫漫分賓主。

長嘯印潭心，交情水比深。

淒淒切切聽蟲語，螢鏡數點隨風去。一味趁朝涼，天涯易斷腸。
花香人意靜，人影敬花影，

欲折並頭蓮，分開水底天。

相見歡湖上對月調冥飛

窺他半面嫦娥，恨偏多；只恨張郎不與畫雙蛾。無情緒，聽私語，隔銀河，應悔廣寒歸去奈

嬌何！

羅敷媚寄懷春航

秋風容易吹人老，郎未歌殘；儂已吟殘。燭影搖紅淚墨乾。記曾共泛西泠櫂，相見何難；乍別尤難。月子彎彎兩度看。

減蘭贈春柳劇場鏡若絳士蘇新鏡澄諸子

現身說法，粉墨淋漓言笑狎。游戲人間，狡獪神通見一斑。中年哀樂，一例鸞飄嗟鳳泊。優孟衣冠，莫作尋常鞞部觀。

采桑子贈恨生爲冥飛作

西泠無那銷魂處，來也匆匆，去也匆匆。飄泊天涯類轉蓬！柔情顛倒張公子，笑也春風，罵也春風。一霎雲遮鏡裏容。

浣溪紗贈恨生

兩岸雲山十里波，兒家生小住瀾河。萍踪海上轉愁多。南國親栽紅豆子，西湖低唱碧蓮歌。夜深可奈月明何！

西子妝爲醉儂題化妝西湖采蓮小影用夢窗韻

初日顏酡，曉山眉翠，微帶一痕輕霧。畫船破浪采蓮來，戰風荷第三橋堍。香迷蝶舞，飛向玉搔頭住。悄含情，問雙雙鷓鴣，夢深幾許？當年誤，嬌小西施，偏向吳宮去。蓮房露冷浣紗溪，惹相思依稀秦樹。羊王斷句，采蓮歌始于羊祜，采蓮賦始于王勃。最蕭瑟江關詞賦。漫悲秋，留聽殘聲夜雨。

邁陂塘題風木竇鼻戲池

棟花風一江水煖，雙雙鳥影飛渡。方塘半畝清如許，留得碧毛雛鷺。煙際樹，對垂柳澄波，春草斜陽暮。棠梨深處，有反哺慈烏。歸來野鶴，俯仰浮生悟。茅庵古，翠竹蒼松雲護。當年吾祖廬墓，紅羊歷劫灰猶熱，一霎感深霜露。今非（作仄）故。儘大千世界，無地盟鷗鷺。六州錯鑄，看弱羽隨流；妖鱗跋浪，阻絕仙源路。

滅蘭題戲貓圖

吳鹽品咬，聘得烏圓嬌更小。細語喃喃，那野狐禪莫漫參。倘逢裴語，至畢兒貓誰是主。一味癡頑，嬾臥花磚放蝶還。

霜毛柔美，戲劈紅絨穿嫩耳。午夢驚銷，指爪輕輕背上搔。荷香深處，倚遍闌干愁日暮。對

影團圓，一證前因喚阿蘭。

南歌子 自題三潭對影照片

倒影湖心暈，閒身水面漚。叔兮弟也賦同游，添個張鸞天地寄蜉蝣。明月空潭淨，斜陽斷塔收。亭亭外引清流，宛在中央一色水天收。

鵲橋仙 七夕悼亡

月蟾學拜，星螢輕撲，兒女癡情難已。流年默數渡河期，怕暗地催人老矣。金梭空擲，銀針虛度，六六韶光彈指。畫屏無寐聽殘更。問久別天孫知否？

三 王德鍾大覺詞

點絳脣題拈花微笑圖

小立花叢，花光人面紅相照。香風輕裊，纖手將花拗。一事問郎：花與儂顏較，爲誰好？欲言羞了，只是拈花笑。

擣練子題踏雪尋梅圖

雲霧暮，霰霏霏，偶憶瓊姿映小溪。踏雪尋來翻不識，紅梅頭白白梅肥。

念奴嬌題十眉瓜山憶夢圖

綺樓香散，月無聲，剩有烟翠鴉語。記得瓊筵銀燭下，喚酒尋春幾度。翠袖封香，花鈿鬪媚，影事無憑據。滄桑花下，春衫紅淚如許！待欲貰酒重來，拱宸橋下，金粉依然否？聞說西泠花月夜，已是月斜花腐。舊夢重提，新愁萬疊，翦幅生綃寓。小簾虛閣，是君醉墨題處。

訴衷情題十眉南泓尋詩圖

馬鳴庵畔罨垂楊，疎雨稻花香。秋來蓼汀紅樹，收拾付詩囊。寒渚外，鏡湖旁，盡文章。半堤荻雪，一笛漁風，十里湖光。

六么令題芷畦柳溪竹枝詞

畫橋茅店，今日如何矣？忍聽草枝水調，人去簫聲死。重訪翠巖鳴竹，衰草斜陽裏。賺人清淚，
 勝南漁婦，猶採菱花插螺髻。虧他風月舊主，管領江山氣。閒譜一卷新聲，當作鄉風誌。秋老雀
 肥蟹大，重續旗亭事。邀朋歡醉，柳溪吟夕，隔浦烟冥歌聲起。

滴滴金 寄酒社諸友

笑儂小隱漁邨久，採池菱，刈山韭；細算工夫幾曾有，酒債頻番負。寄聲梨里諸良友：莫相
 思！莫相咎！待得中秋會相覲，罰我千盃酒。

四 王漢章吉樂詞

生查子

聞某君有安重根傳之作，隨意諷詠，得句數四，適合此調，因略竄數字以協律。

三韓俠少年，異世留侯也。漫道大功成，却共蟲沙化。華表鶴歸來，石上藤蘿謝。隻手挽狂
 瀾，莫補江河下。

前調題藝業肖像，并寄之都門。

憶昔義陽遊，三載隨緣住。吾去汝東歸，汝送吾南去。前，想見當時處。

無聊展寫真，依舊葵園路。花發草堂

前調送衡甫東歸

黎侯胡不歸，屈子悲天問。文豹隱南山，故里堪肥遯。梅，君報江南信。

長安不易居，人遠天涯近。我寄嶺頭

前調漫書

珠簾春恨長，禪榻茶烟裊。書劍在風塵，最是知音少。書，祇道江南好。

尊前感慨深，眼底河山小。裁答故人

五 王橫瘦月詞

踏莎行裙帶

簾外春寒；深閨香冷，羅衫低漾青絲影。兩行斜束柳腰柔，波紋如水飄還整。未必牽愁；偏能鎮恨，綠窗人邇天涯迥。短長怕向去時量，近來消息同誰省。

前調補韻

舞榭翻紅；歌筵拂翠，深深掩護宮砂臂。離愁堆壓上眉尖，夜來常教承香淚。不肯孤懸；居然雙綴，密絨錦字私藏蔽。晚來倚竹怯單寒，盈盈款擺因風吹。

六 王鍾麒 无生詞

摸魚兒 題自撰血淚痕傳奇

又無端幾番惆悵，阿誰寫入粉牒。賺儂多少酸辛淚，灑向西風黃葉。君聽徹，君不見行間都是鴛鴦血，聲聲淒切。有一縷幽魂，飛來卷裏，一讀一嗚咽。中心事，待與何人細說。看子頭上冰雪，霎時驚醒黃梁夢，猛換舊時宮闕。愁欲絕，但私祝根株莫被風吹折。芳菲未歇，願年少男兒，誓心恢復，努力補天缺。

如夢令

攜手畫簾深處，風送口脂香度，說到兩情癡，低睇一聲佯怒。佯怒佯怒，又把秋波偷顧。

蝶戀花

睡鴨香殘天欲暮，一出中門，便是離亭路。私祝西風休作雨，將儂吹上橫塘浦。贈汝明珠

猶記否？便是重逢，已把華年誤。昨夜夢中曾見汝，可憐夢也無尋處！

前調爲人題團扇

新製齊紈橫素月，僥倖終朝，纖手長親接。物尙如斯人竟別，何時乞得坤靈牒？只恐芳菲

容易歇；簾外西風，簾裏先愁絕。出入中懷殊皎潔，道儂爭惡輕拋擲。

鳳凰臺上憶吹簫

花種將離，弦彈錄別，休將舊事重提。剩墜懽如夢，夢也悽迷。不是長亭風雨，是別淚灑向臨歧。腸斷矣！夕陽無語，芳草斜堤。淒淒懽場回首，又誰料而今死別生離。道一聲珍重，宛轉嬌啼。儂便經過萬劫，也難望素手重攜。料今宵，明月多情還照樓西。

賀新涼

指點離亭路：問今宵月斜人定，汝眠何處？此去長途須珍重！正是炎風送暑，問更有阿誰調護？縱使程途千里隔，算相思只有儂和汝。翻則悔，重逢誤。朝來相送江干路，強回頭道聲珍重，淚花如注。便欲與辭，渾不忍，淚眼頻頻偷顧；早一步一回凝佇。休道今生緣分淺，有夢魂長繞橫塘浦。無限事，向誰訴？

滿江紅 藤花血傳奇題詞

如此江山，問世事從何說起？看門外銅駝無恙，夕陽如矢。慘霧橫空燐火碧，西風撲地芙蓉紫。猛回頭換了小朝廷，心如死。家國恨，空羞恥！身尚在，差堪喜。似鬼神來告，吾仇至矣。把劍傷心聊一哭，投杯壯志仍千里。看等閑譚笑起風雲，空餘子。

蝶戀花

山上藤蘿山下路，欲訴相思，沒個相逢處。軟語告君君莫誤，蛾眉總被秋娘妬。淚眼留春留不住，連理枝頭，只有儂和汝。繞遍天涯千萬樹，儂心還比蓮心苦。

菩薩蠻

綠羅掩口金釵顫，幾回夢裏分明見；夢醒却如何？淚沾紅被窠。殘燈光若豆，月出人還瘦；

扶病剔殘燈，天兒還未明。

念奴嬌 手帕

一方鮫帕，問可能化作坤靈扇牒？記得將離猶未忍，擲向懷中送別。多少啼珠，背人偷搵，痕迹應難滅。深情萬種，道儂爭忍拋撇。記否携手叮嚀？勸儂珍重，無異相親接。無奈幾番思拂拭，又怕離愁重疊。薄命憐卿，多愁誤我，一樣真痴絕。不知今夕，夢魂可化蝴蝶？

滿江紅 贈謝無量

如此江山，歎大地南風烈烈！滿眼是銅駝荆棘，一襟清血。羌笛吹殘周雅樂，胡塵飛滿唐宮闕。愧不才未報國民恩，空悲切！鼙鼓死，英雄歇。家國恨，休重說。歎夕陽無恙，金甌久缺。痛哭天津橋上路，行吟揚子江頭月。莫等閒負了好頭顱，成奇傑。

金縷曲 寄無量

謝子平安否？念年時歸來相見，匆匆握手。抵掌痛談國家恨，門外霜華如斗。願壯志終期不朽。寶劍如虹人似玉，更一杯痛飲黃龍酒。君去已，莫回首。年來我亦飄零久，賸終朝談棋說劍，評花問柳。欲謝浮名渾未得，漸近中年以後，只萬事蹉跎如舊。縱有文章驚海內，但無端騰笑妻

擘口。歌一曲，淚沾袖。

摸魚兒贈人

又無端幾番惆悵，是誰將我留住？十年一覺揚州夢，憔悴江南風雨。須記取，偏量了明珠，來作畫中語。萬般辛苦，趁涼月三更，痴魂一縷，化作杜鵑去。珠簾外，紅豆東風如故。殷勤說與遲暮，深情一往真愁絕，相見怎能細訴。卿莫誤，歎故我頻年，結習無尋處。低聲囑咐，倘絕業成時，名山藏就，金屋定深護。

鷓鴣天有憶

雲作衣裳玉作身，一回相見一銷魂。敢言花貌能傾國，但解憐才合感恩。心裏事，夢中人，羅衾生受幾黃昏。千金欲覓崑崙客，又恐紅裙意不真。

齊天樂金詞子

一重隔斷溫柔界，風流倩他遮護。盡玉凹梨，堆瓊發菽，都被輕輕兜住，何堪更注。尙環約銀鈎，帶拖金縷。汗顆嬌融，爲誰芳暈竟如許？年時卿定記取！縱狂郎在抱，歡境初遇，翠袖微揚，羅襦私解，纖手摩挲偷度，魂消不處。記春夜橫陳，艷懷全露。皓體鮮妍，片紅添媚嫵。

鷓鴣天紀事

月暗花梢露氣濃，輕開畫榻兩三重。口含密意先神會，畫尙銷魂况夜逢？
 儂人半晌太匆匆。明朝衆裏分明見，別樣矜嚴更不同。 纖手顫，淚珠融。

鳳凰臺上憶吹簫客感

瘦月篩愁；纖雲織恨，匆匆又是秋深。嘆沈郎腰瘦，不耐羅衾。眼底人兒千里，問今宵誰共登臨？
 只贏得：拋殘紅豆；散盡黃金。惺惺，爲誰淪落？卻病臥江干，憔悴而今。使還家有夢，夢也無憑。
 昨夜乘鸞歸去，被西風一霎吹醒；強披衣，獨步瑤階，露濕羅襟。

摸魚兒秋感

聽城頭鳴鳴畫角，馬前風色催暮。十年枉作文章伯，贏得江湖羈旅。來又去，只破帽西風踏遍臺城路。教人痴妬，看同學少年，五陵裘馬，光彩耀門少。
 年來事，別有心情誰訴？聰明惜把人誤，一錢不值張三影，更有阿誰知汝？君且住，君不見昔時管鮑，今塵土。痴懷說與，願鏡裏量珠，舟中載酒，兩兩入山去。

七 王蘊章專農詞

貂裘換酒題劍霖鴻影樓詩記

辜負屠龍手，怪吹來商音一片，雨傷風倦。比似江南腸斷句，贏得秦青石瘦，渾不記玉膚碧袖。忽憶海棠花下誓，賸綠章難上通明奏。鬱韻杏，忍回首。三生舊恨君知否？儘當年蘭茗翡翠，神縈劉柳。瑄朗分明憐始影，莫問鴛池春皺。但插盡相思紅豆，散作華鬢零粉絮，也瑤裝笙鶴安排就。釵鈿約，好重遘。

如許春痕瘦，甚東風縹將愁至，落江溼透。玉局中心彈未了，訴出芝焚巫岫，有榭達前塵遙逗。小劫梨雲驚噩夢，擁金屏獨繫香囊肘。花魄碎，淚珠溜。新詩三復渾如繡，只些些瑤思瑤想，也難消受。衝炷燒殘松霧冷，鳳返秦樓還又。况更有詞緘荳蔻，好句儘刪長恨集，證蘭因依舊成佳耦。君應笑，一開口。

買陂塘

劍霜遺稿付印四兩月而竣，感逝懷人，復填此解，玉筍雲羅，牙琴弦澀，言愁我始愁。

矣。

悵無端西風黃葉，嘔將心事如許。詞人去後春情減，難忘昔年韋杜。秋又暮，算撇箇山陽不是江南路，搖雲散雨。問柳訪秦淮；花看吳苑，舊約記何處？銷魂事，總付旗亭後侶，阿誰款段歸去。十年蕭瑟鄉關夢，也只登樓能賦。身已誤，更怨粉啼香零落金荃譜。閑愁且住，道有箇今徐，翦茸補毳，一笑爲君舞。

貂裘換酒追悼馮沼清

昆陵馮沼清中表，先余六日生。幼從京邸歸寓余家者一載。又嘗同學吳門滄浪橫舍，風晨雨夕，細語心期。君銳於任事，龍性難馴，不免圭角太露，余時規之，君亦含笑不余辨也。既鬱鬱不得志，乃創辦蘇蘇女校。奔走數年，成效卓著，其學益純，其志益堅，其行事益深沉篤實，余方以大任期君，而君竟以感暑染疫離此五濁世界去矣！時艱日亟，根觸百端，追溯舊遊，猶昨日事。旅窗秋雨，以詞哭之。沼清有知，當復云何？

夢冷塵臺路，記當時健兒快馬，酒龍詩虎。小別相思吟未了，報道先生歸去，便負却頭顱如許。地下埋憂原不恨，恨神州殘局共誰主？賸匣劍，盤空舞。魂歸莫漫羈荆楚，駕長車燕雲十六，

爲謀前箸。血種自由花正好，造就英雄無數。看年少黃皮縛袴，只我飄零渾似昨。莽天涯何處尋君語？淚一掬，灑秋雨。

菩薩蠻 漱藥庵戲酬

貼鬢花串熏瓊押，裙鴛雙證刀環約。酒半粉渦紅，挨郎團扇風。七香金勒馬，偷放嬉春假。信手弄青梅，心酸知爲誰！

蝶戀花

敲斷燕釵彈燭鳳，頃刻花開，淚作紅冰凍。流水歡場聲替送，深心各有江州慟。杯酒暗催離笛動，斂費平章，醉與愁爭寵。一枕癡魂新樣重，不關寒到人無夢。

菩薩蠻

梨花颺作晴天雪，罌罌低似銀潢隔。蝴蝶趕春忙，飛來總一雙。蕉香心事裏，不許風吹破。新綠又成陰，舊歡無處尋。

醉花陰

冷澈情根冰穢剗，可惜尋春晚。縱不病懨懨，閑落由他，人比番風懶。征衣消盡看花眼，醉

倒流霞。還說未曾愁，瞥地空梁，燕語聞長歎。

高陽臺念劬招集秦淮燈舫，卽席賦別。

借淚酬春，將心託月，哀箏擗作清商。楚尾尊開，歡期開了壺觴。蘭烟淡抹瓊枝影，問飛花甚處家鄉。莫逢場，又唱當年，金縷衣裳。紅麩舊約留情地，有宮鷄瞥見，密意端相。證說萍飄，蝶魂扶下釵梁。板橋恨不通潮汐，也如人九曲迴腸。儘思量，說與南朝，幾樹垂楊。

乳燕飛題風洞山傳奇

一滴真元血，是天空撐持世界，作成豪杰。猿鶴沙蟲秋燼化，了却中原半壁，生不幸謀人家國。欲乞黃冠歸里去，聽桃花扇底嬌鶯泣。抽佩劍，四空擊。靡笄獨抱孤臣節，儘昏昏終朝醉夢，草間偷活。柱木焉能支大廈，萬丈靈光照澈，灰冷透昆明殘劫。徧地皆非乾淨土，莽青山何苦收遺骨。休更向，老僧說。

摸魚兒

亞子出示春郎小影，觸緒興懷，愴然成賦。頻伽所云：「我亦江南賀梅子」願爲影中人進一解也。

唱新詞曉風殘月，箇儂血淚會賦。紅梨替寫三生影，依約舊時眉嫵。重看取，記一度銷魂，一度相逢處，相思最苦。問玉貌何哉，郎當舞曲，幽恨向誰訴？江關客，我亦歌場倦顧，人生容易遲暮。王門作伎非長策，况更簫愁劍怒。卿信否？便千萬商量，千萬依分付，留春且住。好笛倚雙聲，花扶四壁，一棹五湖去。

江城梅花引

梳煙縫月柳千條，傍風橋，拂蘭橈，依約瑩娘眉嫵楚娘腰。却憶去年今夕事，酬白墜，寫黃庭，譜綠么。綠么綠么，謂最嬌，燈又挑，魂又消。喚也喚也，喚不轉舊日雲翹，孤負新詞一曲小紅簫。閒殺嫩涼天氣好，還問道，肯來麼？勝昨宵。

水龍吟

候蛩酸雁驚秋，紛紛又逐秋魂墜。將低仍颺，欲明還暗，一簾星碎。漢苑仙移，雷塘劫換，者般身世。正輕羅小扇，撲他不住，暮照徹人蕉萃。便是浮生容易，怎年年草黏花綴。描愁有影，懺情無語，夜寒如此。漫舞銀屏，漫穿粧閣，漫縈池水。伴朝來點點飛紅，都化作相思淚。

疎簾淡月

錦箏斜落。腕玉柱塵飛。此身何托。寫箇伊人。竟遍斜陽紅薄。相思莫羨填河鵲。是年年、稻梁謀錯。一繩來晚，酸酸楚楚，訴儂飄泊。經幾度荒寒陳作，誤蘆雪鷗村，柳梭鷗箔。故國驚心，煙景付他猿鶴。芙蓉縱有秋江約，又西風歸夢非昨。從教去也，銜不闕，那時忘却。

柳梢青和微波詞

拚得銷魂，影兒瘦了，獨自溫存。一遼吹殘，一鐙紅小，一個人顰。櫻桃花落重門，種多少愁根病根。昨夜星辰，今宵明月，立盡黃昏。

謁金門擬孫光憲

行不得，行也不知消息；消息經年春事寂，東風無氣力。應是看朱成碧，夢入梨雲明白，滴向花叢雙淚赤，不眠窗又黑。

醉花間擬毛文錫

愁春去，送春去，春去留難住。去也忒怱忙，夢繞天涯路。問郎相信否？骨出祇爲汝。真個似飛龍，判把佳期誤。

休相望，怕相望，相望添惆悵。作意畫雙蛾，不似橫雲樣。舊歡知何往，那更新愁釀。花落一

庭秋，小影心頭葬。

河傳

春遠人怨，馬踏驕，水國山椒路遙。畫船夕陽紅暮潮，魂消，玉人何處簫？料得雲囊香霧溼，寒猶力，夢也和誰說？草開簾，且窺奩，眉尖，愁痕添未添。

霜葉飛

七月二十四日之夕，高昌廟血戰劇烈時，大顛書來，媵以畫扇一柄，取「紅樹青山好放船」詩意，荒亭落葉，秋思可憐。書中有「砲聲隆隆中，有迂妄似我者乎？」等語，率倚此調奉答，微吟三嘆，時正窗外月痕如水，驚颺挾飛彈而過也。顛公見之，倘亦許爲同調，相視而笑乎？時客上海嵩山路寓廬。

陣雲飛繞，哀笳咽涼風，吹下林表。七華團扇試糜丸，伴客窻吟悄。還打疊思歸舊稿，螺鬟青抹芙蓉小。襯颿影鷗程，更剪取吳淞，半幅亂霞紅照。回憶賭酒旗亭，桃根桃葉，渡頭雙漿春好。海天無那戰秋聲，奈畫中人老。况皂帽緇塵，澆了么絃，愁譜江南調。認墮霜丹楓冷，恨血斑斑，又添多少。

貂裘換酒

壽袁母薛太夫人六十，漸西村人。爽秋先生之德配，慰農先生之女侄也。

六十平頭矣！喜麻姑滄桑兩鬢蒼蒼如此。語繡鞶帨尋常有，難得清芬門第，更不僅女師而已。夫婿孤忠壽銑社，記當年浩氣留天地。名字在汗青史。才華原是君家事，應不羨佳兒玉樹，紛紛青紫。况有雪花誇柳絮，不讓梅兄繫弟。斬綰綽漸西村裏，裝就三山婉妗錄，看人間爭寶瑤華字。先寫付玉川婢。

臺城路

檳榔嶼山水清淑，僑商率於此營菟裘。地以檳榔名，近日椰子移植後，植可百年，製瓢製油，其用甚廣。渭川千畝，無往非椰，屋角檳榔，轉有憔悴可憐態。天南寄跡，兩度停驂，薄醉孤吟，藉抒胸臆，不僅爲椰林寫照也。

碧雲篩破斜陽影，婆娑畫成秋意。病葉空山，孤根海角，愁入故園詩思，亭亭自喜。只月黑桃榔，輸他蕉萃。三匝鳥飛，一枝尋遍也難寄。春風漫誇桃李，有天廚玉露，佳果同嗜。心緒膏煎，生涯瓢飲，暗老滄桑身世。樹猶如此。問酒熟椰兒，倦魂醒未？瓠落年年，棟梁渾坐棄。

綠意

檳榔嶼公園環兩山之中，萬綠如水，飛流一道，瀦爲清泉，全嶼自來水源也。陳君匪石既賦水龍吟咏之，余亦繼聲。

春來曲徑似修蛇，屈折綠飛雪頂。如此園林，付與猿鼯啼徹。柳昏花暝，青袍草色，漫相妒，總輸了天涯芳信。却憐他翠袖單寒，暗汲轆轤金井。休記銀瓶舊事，酒潮也流夢一樣淒哽。泉水無端，淚織絞綃流出，亂山還肯。魚書自有溪前約，瘦只瘦菱花雙影。問何時爲浣塵襟，回首夕陽紅冷。

長亭怨慢 壬子雪蘭義七夕

已過了清明寒食，倦客天涯，斷腸今夕。似水佳期，璇閨幾處，怨離別。雙星何許，怕難問支機石。故國又秋風，總換却針樓消息。回憶拜闌干，膠語風露盈盈欲濕。鵲橋一度，便巧也何曾乞得。算挽將萬頃銀河，浣不盡亂愁千疊。怎眉月多情，還照那時顏色。

菩薩蠻 癸丑秋詞

綠章夜奏蒼宮曉，紫皇一笑飛青鳥。遮莫唱鈞天，笛聲聽可憐。星榆看歷歷，一片傷心白。

龍種與人殊，挽將金僕姑。

聘錢終古黃姑誤，璇宮也唱公無渡。織得一杼愁，銀河無限秋。蘭情歸水盼，彈指朱顏變。負了隔年期，空將情訴伊。

金縷曲

鸚鵡偏能語，苦爰居沈沈長夜，享他鐘鼓。秋雁一行心萬里，劫換蟲沙還苦。看細燕輕狸無主，喚起銅駝醒也未，鶴歸來城郭都非故。行不得，鷓鴣住。冤禽精衛漫思補，海茫茫魚龍涌起。波翻雲舞。鴉背夕陽紅正好，一棹鷗夷何處。算生作號寒原誤，咽盡枯蟬衣早斷，織西風絡緯愁如許。且讓與，候蛩訴。

滿江紅

緬甸金塔叢立如筆，緬俗佞佛，相傳昔英兵據緬時，緬王猶膜拜塔下也。最著者爲大光塔，西人遊覽者履聲囊囊，華人則必跣而後入，不則以爲污褻佛地，山僧且呵斥及之矣。

筆立蒼茫，寫不盡驚人詩句。却付與塔鈴愁絕，聲聲淒訴。如此樓台天不管，任他風雨春無

主。聽殘僧指點說滄桑，今非古。叢林迥，雲飛駐。江影落，山痕聚。算莊嚴三寶，登臨難許。佛寺宵深紅燭淚，故宮花老斜陽怒。問何如帶礪奠山河？金甌補。

琵琶仙 三度太平，車外見夾岸池荷，搖落盡矣，感成一解。

越女重來，驚換了一幅秋容如畫。貼鏡看足田田，凌波阻遙夜。料應怨西風嫁與，心最苦舞衣紅卸。露立前宵，蓮房夢斷，鉛淚偷瀉。記當日聽雨珠簾，渾不管江南舊遊冶。三十六陂無恙，冷香魂先化。便灑亂菰蒲萬點，更葦蒼暗占亭榭。愁煞花底鴛鴦，怎時醒也。

如此江山

香港太平山厓崩壁立，西人置機山巔，設軌敷練，曳兩車轆轤而上。山中樓台如畫，繡球杜鵑之花，遍植皆是。天風吹衣，海波如鏡，殊有清都咫尺想。凝眺徘徊，愴然成賦。

天梯石棧鈎連上，盪胸白雲來去。山蘸眉青，波揩鏡碧，紅襯斜陽無主。岑樓燕語，似辛苦銜泥，負他前度。恨煞鶯花，春光如許等閒誤。塵海頓驚倦旅，登臨無限好，只是遲暮。萬籟停風，一鈎墮月，漸有魚龍起舞。羈懷漫訴，捫尺五星辰，寄愁何處。獨立蒼茫，幾聲啼杜宇。

浣溪紗 太平公園絕似揚州紅橋風景，賦此爲故鄉鷗鳥問。

春色灣頭泊畫橈，東風愁損楚娘腰；二分明月最魂銷。漫托行雲依碧樹，浪傳消息到紅橋。禁他酒醒又今朝。

虞美人 薄遊芙蓉，牆角一枝紅豔，鏡檻中小影也。寵之以詞。

新妝宜面殘紅印，樓與花雙稱。涉江渾欲懺相思，添了些兒心事，沒人知。柳枝不共天涯老，（海南無柳）門掩秋風悄。多情算有月初三，更畫入時眉樣，憶江南。

如此江山

辛亥之春，吳烈士綬卿偕同里南湖寒厓諸君在京師小萬柳堂作寒食酒酣錄，其東省籌邊諸作，頃刻數十紙，江南老畫師吳觀岱卽席繪西城寒食圖，萬柳夫人題「墨林星鳳」四字。烈士殉國後，南湖輯其西征戍延二草，並此圖寄錢君子泉爲作詩序。子泉出圖相示，並索題詞，篝鐙展翫，愴成此解，不自知其涕之何從也。

英雄不向沙場死，披圖更添嗚咽。故國驚心，山川滿目，舊事那堪重說。西城寒食，認萬柳堂深，茶烟颯碧。潑墨淋漓，一襟猶染酒波溼。並世還存史筆，竹如意在否，者番敲缺。我亦能狂，公

乎何處，鼙鼓聲聲聽徹，龍城春寂。夢鴨綠松花，也無顏色。譜入伊涼，淚痕都化血。

金縷曲 桃源逝矣，洛陽銅駝，重有荆棘之慨，國魂何在？詞以招之。

天半罡風卷，者神州避秦何處，此情難遣。漫道本初真健者，熱淚絲絲江沔。磨盾鼻花飛墨，繭，毛卵鉤鬚驚夢幻，却滄桑一度還嫌淺。醫國手，問誰展？

諸公袞袞京華顯。好家居織兒撞壞，堪題禁扁。綵鳳鍛鸞尋常事，況有狺狺桀犬。獨憔悴斯人豈免，閱盡新朝鈞黨史，五千年無此共。和典。長劍倚，虜氛翦。

西子粧 西湖晚眺，和夢窗白度腔。

花暖斜陽，烟籠霧縠，畫出凌波新樣。遠山眉意綠無心，換羅衣淺描霞絳。漁娃漫唱，驚葉底鴛鴦偷傍。燕飛回，只守梅孤鶴，如今誰放？

雙枝槩，買個瓜舫，恰受人三兩。韓紋劃碎不成圓，聚鏡角淚痕紅釀。垂楊低颺，又輕把離愁吹上。待重來，悄對東風凝想。

玉漏遲 癸丑中秋月蝕，和半塘老人中秋雨中扶病視姬人抱賢拜月韻。

素娥粧鏡懶，盈盈風露，者般悽惋。鬥罷嬋娟，碧落銖衣寒翦。莫問佳期三五，料天上人間難遣。蟾影遠，紫雲唱後，綵鸞清怨。

知他幾度團圓？便輕輕負今宵，月明花燦。秋思誰家，聽足不情隣。

管待挽銀河淨洗，怕空付深深深願。雙袖偃，闌干淚痕紅泫。

水龍吟

眉月眷夕，秋魂獨招，倚聲及此，不知詞之所以然。比之竹山和稼軒之作，世說靡耶？
六朝險耶？世有毛子，定復絕倒。

駕兮虬白螭蒼些，紛兮入修門些。君毋去此，無南無北，秋風寒些。若有人兮，嬋娟秋水，泝空明些。衆芳兮都歇，蹇修爲理，思君采芙蓉些。晞髮兮陽阿些，御風兮盍歸來些。歸來兮爲我，呼龍種草，琪花紅些。夕降咸池，雲旗五色，卜筮箠些。巫陽兮莫至，魂兮愉悅，哀江南些。

綺羅香膽瓶中插晚香玉數枝，凌波羅襪，顧影生憐，詞以寵之。

雪豔描痕，雲癡簇影，葉葉羅衣青翦。淺立亭亭，新睡起來還嫩。似玉奴花骨搓酥，比珠孃粉肌無汗。伴黃昏燕罷都梁，退紅衫薄那時見。紗幮涼約細記，喚作素馨也稱，蕊宮仙眷。莫是蘭姨，淪滴上清幽怨。儘香薰拜月眠遲，防露冷踏波歸晚。更憐他碎摘南強，上頭釵鳳顫。

換巢鸞鳳

偶借蠶紅過寒香樓，美人已遠，落花不春，猶記其樓中一聯云：「香雪海中懷舊尉；

長生殿裏話今宵。一墜歡追拾，殊不勝情。用梅溪平仄互叶體詠之，復堂所謂調易墮曲，須以沈著大雅出之者也。

何處今宵？記馱來細馬，月冷溪橋。梳蟬棲綠鬢，釵燕蹀紅翹。琳腴初試喚黃嬌，賦殘醉東風扶柳腰。歸休也，聽漏滴蓮壺聲悄。重到花事了。春去鳳窠，嫁得雲英早。小市長陵，偷歌阿子，苦憶小紅還小，便許王昌住墻東，雁箏彈盡淒涼調。看文牕，寄蘭情待倩青鳥。

金縷曲

題胡石子近遊圖，劉武陵之到處虺隤；郭櫟陽之所如枳棘，遐想所結，正復相同，不止慨念三徑之荒也。

落拓江湖味，劇相憐煙霞濁浪，避秦無地。猿鶴笑人忙未了，重理浮家生計。又滄海揚塵久矣，咫尺何須論萬里，只杜陵自灑傷時淚。行不得，且休耳。胸中邱壑如君幾，證閒身鵝溪一幅，吳綾半臂。隱几翛然游物外，位置羲皇堪擬。應也勝軟紅遊戲。添個團瓢都不惡，算他年我亦漁兄弟。僮約在，畫圖裏。

霓裳中序第一

游惠山某氏園，見亡友秦劍霜遺墨，回憶曩時文燕之歡，倏忽十年矣。

春衫妒艸碧，楚潤雙行研麝墨，圖就宣城主客。記鏡檻邀涼，鐙船盪月，重來盡別，曠夕陽鴉
 舅紅溼。東風冷十年影事，付與杜鵑說。淒絕！碧紗塵蹊。認粉壁、絳痕字蝕，題襟人更闕寂。玉筍
 雲蘊，金尊露泣。歡游成意怯，怕聽到陽關幾聲。歸來也，高樓何處，哀怨一聲笛。

洞仙歌

相逢一笑，記鈿車南陌，鬥草歸來那時節。向海紅簾底，惹汝蓮儂，渾未覺劃到爐灰成雪。
 魚鱗充使去，菊影梅魂，標格人天本清絕。見了也尋常，不見些時，又萬種相思難說。怕此意蕭郎
 未曾知，還鉛淚蟾蜍，背人偷滴。

蘭期初七，正黃昏時候，新月娟娟比人瘦。向雙星拜了，欲說還休，悄不覺心事檀奴猜透。
 斷紅雙頰語，如此良宵，肯惹天孫笑人否。纖手繫香囊，囊底鴛鴦買得，香絲替親繡。待咫尺銀河
 隔三橋，還密誓深盟，玉鵝屏後。

紅絨睡罷，把簾鉤放了，翡翠琉璃寫來悄。說詩人子野，合配兜娘，都寫入小小烏闌詩稿。
 鄉親原不惡，蘇小前身，家計商量不嫌早。買個五湖船，隨處浮家，看粗服亂頭都好。便修到梅花

算今生，博流睇無言，夜闌雙笑。

黯然別也，報斑騅駕矣，欲慰雲英，總無計。聽炎洋絕域，萬里書沉，愁未了，相對冷清清地。

聲聲行不得，軟語丁寧，轉問歸期定還未？容易又秋風，秋以爲期，莫老了秋娘，與世更蟬翼新粧。送郎行，便藥店飛龍，也都忘記。

歸來無恙，有舊歡難續，一笛吹殘，落梅曲。認紅樓那角，樓外垂楊，却少個昔日倚樓人獨。

幽蘭墜露泣，圖畫春風，描上生綃展蛾綠。從此走天涯，芳艸相思，算只有離騷堪讀。又拂袂天花，伴維摩，記心上溫磨，個人如玉。

黃金縷

從良牧處借錄梅縣吳蘭修桐華閣詞，竟卽仿其集中體，成小詞四闋，借抒古詠，用寫新愁，不自知其音之悽戾也。時癸丑六月初六夜。

不信今生長似夢，別淚絲絲，識得春無縫。纔得春來春忍送，一聲也只郎珍重。裙腰綠帶，釵頭鳳，瘦不禁銷，病與愁爭寵。花外忽驚歸玉鞵，回頭卻罵鸚哥弄。

燕子不來鶯語澀，紅豆東風，嵌透相思骨。病過花朝無氣力，杏鈿莫問春消息。平蕪一夜

江南北，綠慘紅愁，都是傷心色。解道愁多非是策。天涯我亦傷心客。

記得良宵明月墮，小膽惺忪，花影吟難妥。殺粉調鉛原計左，曲高那合巴人和。而今翻說

成真個，鏡裏蛾眉，總被朱顏澆。一枕梨雲吹夢破，罡風力大春魂簸。

幾日棲香眠未穩，淺試羅衣，立軟東風影。乞借春陰春縱肯，淒涼無奈年時病。洛陽不信

花如錦，隨例飄零，萬紫千紅盡。蛺蝶雙雙飛不定，小紅樓畔斜陽冷。

鶯啼序 題堦子填詞圖

磨崖不書露布，取洞簾作諡，借絲竹收拾才名，碧紗籠住霞蕊。斷腸處，凌雲賦後，春風覓句
 閒門閉。誤前身青兕封侯，鬢絲如此。最憶當時，旗亭畫壁，寫相思風紙。膩檀撥細搯香痕，那知
 花被英氣。壓征衫縑塵撲面，剪銀燭烏絲吟字。趁良宵，蓮漏笙調，個人雙髻。吳天鴈影，梵渡鷗
 盟，問詞流有幾。早又是移宮換羽，舞倦歌歇，一例滄桑，頓成秋意。鴛鴦催綠暗，鶉啼紅藕，如今贏得
 魂消矣。更江湖滿地風波起，扁舟散髮，何時乞取通仙，玉笛喚醒龍睡。寶洲夢好，竹屋情痴，解
 鷓鴣酒貫。儘讓與江東獨秀，絕世翩翩，層巒成塵，碎瓊作淚，劉郎且自重修花譜，千卿何事春水
 縵。訴淒涼都付尊前記，年來白石風懷，琢就新詞，小紅唱未。（君近詞仿白石譜四聲甚工）

虞美人 遲菊影雙清別墅不至，賦此奏記粧閣。

輕烟澹粉春如畫，新月初三夜。彎彎月子恰如鉤，鉤起一絲楊柳，一絲愁。疎香小豔東風冷，比著人兒病。病來怕瘦舊梨雲，且倚藥爐花砌，當香薰。

小庭花落無人管，點點春愁糝。落花不肯作香泥，早又亂雅銜過，粉墻西。曲闌覓句敲難穩，載著春愁等。愁來還說不相思，忘了滿身風露，立多時。

酌江月 偶感鈕玉樵觚贖紅桃事，譜香桃骨樂府，竟記之以詞。

客何爲者，怪頭顱如許，不傳青史。卿本佳人，胡作賊，應嘆生逢叔世。紅拂憐才，黃衫任俠，別樹漢家幟。男兒南八，笑他碌碌餘子。我是斫地王郎，酒杯借得，炙一行銀字。塊磊胸中，澆不盡，芒角森森而起。塞外琵琶，尊前桴鼓，幾灑滄桑淚。吹簫擊劍，不知知己誰是？

桃源憶故人

藥子仿鈕玉樵律詩，嵌「雨絲風片烟波畫船」八字入詞，則東坡鄭莊好客體也。書來索和，倚此答之。

雨淋鈴唱銷魂句，絲淚也無乾處。風捲落紅春誤，片綠迷朱戶。烟蕪遮斷垂楊渡，波蘼亂

山難數。畫得舊時眉嬾，船壓愁痕聚。

雨聲點點將愁送，絲髻也驚霜重。風笛暗侵簾縫，片玉梅花弄。烟蕪三月春如夢，波蘸鵝兒黃。捧畫卷書牀雙擁，船載春人共。

洞仙歌題菊影風簾讀曲圖

珍珠簾捲，把紅牙按了，聽得紅鵲也聲啞。怕歌殘金縷，老矣秋娘，悄學著顛倒鴛鴦親寫。曲名佯不說，扇底桃花，比似輕顰與姚冶。雙髻伴吹簫，十四松陵，問何日詞仙堪亞。只欲唱新詩，又無題，瓣一片心香，向伊低拜。

摸魚子亞子有子美集之輯，書來索題，爲賦此解。

問人生寄愁何處？琵琶訴出幽恨。淺斟低唱君家事，重理消魂詩本。春夢冷，怕血淚江南，不似閒金粉。滄桑小影，只畫壁雙鬟，康郎三百，說與舊遊俊。紅牙拍，怨入秋娘翠髻，天涯淒斷芳訊。歌姬乞食參軍舞，賸有六朝風韻。還細認，認十五容顏，纔可新粧靚。封侯未穩，且料理琴尊，銀箏顧曲，今夜酒初醒。

憶江南和高劍公

鈍劍以和鴛鴦寺主詞十四闕寄示極納蘭生所謂煙水淒迷之致言愁欲愁倚聲和之共得五解。

春去也，秋士總悲秋。滿目新亭餘涕淚，幾時同上五湖舟？殘照正當樓。

虞美人

忽忽又送春歸了，花落知多少；一行鴈字小屏風，一霎鵲魂啼瘦，小樓中。香車鈿轂依然在，只是鴛盟改。遠山眉黛疊新愁，山外大江無語，只東流。

浪淘沙

心事劇堪哀！愁與安排。明宵風露立空階，過盡征鴻飛盡鴈，消息誰來？無地把憂埋，一片蒿萊。黃花從此不須開。（黃花岡紀念日燦子賦惜黃花詞欲和韻而未果）起陸龍蛇安在也？莽莽長淮。

應天長

菩提非樹臺非鏡，落絮游絲斜還整。紅塵靜，紅樓迴，軟語商量渾不定。起來窺繡筵，無奈銀瓶金井。月落烏啼酒醒，愁多忘却病。

蝶戀花

芳艸無情迷故步，不讀離騷，也合傷遲暮。中坐波濤留不住，子規苦苦催人去。轉綠迴黃知幾度？數遍佳期，欲語何堪語。識得亂愁千萬緒，天涯有淚無乾處。

南鄉子 題楚僧分湖弔夢圖

覓遍返生香，半碣寒塘認夕陽。得似當時眉樣否？思量，一硯櫻桃細雨涼。故國早滄桑，剩有垂虹百尺長。我亦分湖頻入夢，鴛鴦，秋水蘆花更斷腸。（葉蕙綱有鴛鴦夢樂府）

邁坡塘 題金侶卿先生桐陰覓句圖爲辟疆園主作

是何人科頭散帶，一襟染上幽翠。狂歌獨酌高梧下，大有六朝風味。花影細，只少個銀筓，少個人雙髻。二分月底，趁丹鳳棲遲，烏龍眠熟，叱起琴高鯉。休重問，竹屋鐙窗影事，春風當日曾寄。（先生館辟疆園中者一載）藜牀分得東坡筆，（善蘇書）媿對龍門知己。離別易，看卅載滄桑，爨下桐焦矣。披圖且喜，喜秀苗孫枝，豪吟祭酒，容我醉題字。（先生孫覺孫出圖索題，前有吳郁生題詩甚工。）

貂裘換酒 徐子彥寬自海陵監製署寄詞相訊，倚此和之。

不見徐生久，別些時月殘風曉，怎生消受。聞道鹽梅纔小試，潦倒箠牀歌袖，也只爲饑寒奔走。却喜禪參梅子熟，譜夔洲新得屠龍手。是秦七，是黃九。豪情湖海應還有，總莫學清歌子野，奈何時候。雞犬淮南仙去後，不少英雄屠狗。爲我訪東皋亭堠，水繪三吾無恙在，問紫雲乞取還能否？拚一醉，爲君壽。

前調和徐彥寬

孺子胡爲者？數平生游梁入洛，尙居人下。處士虛聲原盜得，今日虛聲都假，只我亦依人作嫁。真得名山容嘯傲，算眼前此外何求也。思往事，淚如瀉。黃鐘毀矣爭釜瓦，只少個岑牟單綫，漁陽參打。老去汪倫情何似，同調年來漸寡。零落盡尖叉吟社，（汪丈含生工書善奕，客春君致書紹介，夏間相見於柏福寓廬，清簾疎簾，手談竟日而罷。嗣以春燕詩和坡公尖叉韻見惠，未及屬和，而丈歸道山矣。）脈望食殘青殺未，據胡牀且當牛心炙。（君方有叢書之刊，搜羅名人未刻稿本及不經見之書，已得十餘種。）言不盡，意難寫。

憶舊遊

槩子書來道有明聖湖之遊，回憶去年今日，正偕懺紅買醉樓外樓時也。賦此索槩。

子和。

趁紅酣蝶瘦；綠嫩鶯肥，影落西湖。一角尋詩地，怕斜陽換了，烟雨模糊。載得江南春去，（樂子近詞有「船載江南恨」句。）船放總宜無。且約訂鷗邊；行吟楚客，側帽騎驢。愁余舊遊處，早踏遍梅花，鶴怨山孤。問訊蘇堤柳，只絲絲綰恨，卷畫平蕪。打槳渡頭重認，還憶酒家胡。待乞琴尊，宵來夢驚鷓鴣。

瑤華賦六三園綠櫻花，同徐丈仲可作。

玲瓏梅雪；葱蘢梨雲，試鸞綃紅潑。亭亭小立，粧竟也一角水晶簾捲。露寒仙袂，好淡掃華清嬌面。似那時珠箔銀屏，喚起九華人嬾。絲絲綠繭低垂，伴炷紫嫣紅，不勝清怨。移恨何處？只悵望三島蓬萊春遠。明光舊曲，早換了看花心眼。對玉窗鳳髻重簪，吟入鄭家魂斷。

淒涼犯

歲已酉，刊亡友秦劍霜遺詩，求其哭明陵稿不可得，去冬倪丈無齋始從篋衍中錄以相示，因譜霜花影樂府四齣以志梗概。徐子彥寬書來，備致獎借，且媵以金縷曲二解，賦此奉答，兼約西湖之遊，用白石詠合肥秋柳仙呂調犯商調原韻。

畫簾影寫霜花碎，雲襟六載蕭索。（劍霜歿六載矣）玉簫咽恨，春歸甚處，數聲哀角。東風又惡。望翠館紅橋夢薄，賸當時鸞殘象筆，秋思賦塵漠。休問垂虹路，蠟屐詩尋，墊中遊樂。（惠山河塘寶帶橋本名垂虹橋，距劍霜殯宮纔十數步）鶴飛去也，滿江潭柳枝搖落。且放扁舟，向西子湖頭繫著，莫青衫溼了客淚，負俊約。

鷓鴣天 西風樹樹言愁欲愁，偶拈此解奉和夢坡丈禮查感事之作。

消息無端誤謝橋，痴雲閣雨暗通潮。不知秋思誰家好，祇覺春情隔座銷。翻白紵，妬青袍，相看俱是鬢蕭蕭。窺簾試認雙棲影，燕別雕梁營幕巢。

玉雁秋高語欲酸，西風戰夢到更殘。疏花著雨無心媚，病葉驚霜作意寒。繫別緒，憶前歡，江山如此莫憑闌。吟尊記吸蓬萊淺，又種紅桑幾度看。

秋宵吟

此白石自度曲也。萬紅友疑爲雙拽頭，改爲三疊，戈順卿引玉田詞源朱子儀禮經傳通解證爲越調；且云白石原詞古簾空至箭壺催曉；與下引涼颺至暮煙帆草，句法既同，旁譜亦無少異。前曉字用六上四，後草字亦用六上四，可悟六字爲殺聲兼

上四，畢曲與石湖仙同調，其中平仄無一字可移動，叶韻皆用上聲，諸去聲字尤爲吃緊，考訂音律，可謂精審。獨怪戈氏廣川書屋之作，仍與白石原譜多所出入。秋宵坐雨，萬感如潮，倚聲及此，敢云石帚之遺，聊正翠微之失，卽呈龐二孺子陳大隄石，並索同賦。

暝蛩啼，病鶴語，換了天涯芳序。華年短，漸思冷銀林，恨裁金縷。掃開階，澹繡圃，竟夕秋聲無主。徘徊久，正悴葉辭枝，暗塵侵柱。賦擬江南，忍更說珠歌翠舞。懺紅花褪，蘸碧雲輕，影瘦舊眉嫵。消息青鸞阻，那角屏山，心事細數。待何時夢，奚西窗，棋局簫局話夜雨。

如此江山 題秦滌塵淮海先生詩詞叢話

斷腸誰唱江南句，方回祇今難問。孤館鶻聲，驛橋魚素，覓遍桃源無分。黨碑名姓，付山抹微雲，自傳幽恨。喚起紅紅，古香片片袖紅搵。籤勝閒徵往事，風流原未墜，舊家疏俊。鳳紙言愁，烏絲界淚，賸有鶯花消領。(芮國器鶯花亭懷古詩云：「一人言多伎亦多窮，隨意文章要底工，淮海秦郎天下士，一生懷抱百憂中。」郭十三最賞之)蟾蜍研潤，更說與蘆洲，雅談堪並。門掩春寒，玉簫還譜韻。

貂裘換酒

鈍根老友，遁迹山中，憔悴可念。日前以紅薇感舊記案題，率成此解，以爲他日相思張本。鈍根見之，當知余懷之渺渺也。

脫帽悲歌起，數平生一簫一劍，更無知己。不是揚州狂杜牧，十載墜歡重理，只贏得鬢星星矣！駿馬美人，都去也，莽乾坤，合爲多情死。負汝者，有如水。狂言忽發，君須記，遍相思，靈均香草，澧蘭沅芷。結客他年公事了，還我傾城名士。更碌碌，嗤他餘子，痛哭山中閒日月，肯如今短了英雄氣？浮大白，拚沈醉。

太常引題亞子分湖舊隱圖

五湖歸計太無聊，鄉思落輕橈。魂也不禁銷，看畫裏溪山路遙。松陵十四，碧城十二，吹瘦小紅簫。酒醒又今宵，有自琢新詞最嬌。

鵲踏花翻題天梅變雅樓三十年詩徵

古意斟愁，新聲變雅，自拈一瓣心香。無端彈淚滄桑，鐵笛淒涼，怒潮捲夢風流歇。龍泉祝罷可成灰，低頭悄向花前說。（君有花前說劍圖）眼底，多少珍聞誰惜？亂山聽斷紅鵲泣，幾遍冷

吟閒醉，羈才遲暮，付與春風筆。卅年詩史不勝悲，輪囷酒膽森寒碧。

好事近

四明周氏仿日人六三園風景，築學圃于靜安寺南。夢坡約同滌塵，匪石及予往遊，首賦五古一章紀事。滌塵以邁陂塘詞和之，余亦繼聲。

叢桂解留人，塵外客襟紅滌。一樣小橋流水，問蓬萊清淺。維摩丈室畫玲瓏，花影媚秋苑。園中密室，構築精絕。認取詩痕著處，聽隣鐘敲緩。

點絳脣 孫北蕙肇圻以所集定公句曰綴珍珠細。紅紅記，銀筍

小擘吟牋，一簫一劍平生意。蟾蜍清淚，總爲悲秋費。無縫天衣，字綴珍珠細。紅紅記，銀筍花底，付與人雙髻。

淺醉閒吟，亂愁壓夢濃於染。觥船飛滿，中有山河換。菊影梅魂，我亦商量遍。無人管，羽琫山畔，喚取春風轉。

減字木蘭花 題武進莊繁詩女士手寫楚辭

紅絲小研，散雪團香都不羨。竟體芳蘭，人在靈均香草間。彩鸞唐韻，甲帳風流零落盡。涼

意如潮，欲託微波寫楚騷。

偷聲木蘭花

題樂閒翁寫生小冊。冊中畫狸奴雙睡，饑鼠竊食盤中殮，蟲蟻蠕蠕行，爭欲分其餘潤。翁自題樂府短章，至有思理。

西風吹冷斜陽老，一卷秋心秋也笑。欲食無魚，鼠汝何功客不如。登場重觸杯羹戀，苦竹桃笙閒莫管。子母銜蟬，悄臥花墩蝶夢圓。

湘月 星洲秋感寄滬上諸友

秋風海國，做飄零詞客，飄零天氣。大好湖山剛換得，滿斛蟾蜍清淚。猿鶴輸他，鷓鴣笑我，世事今如此！還君一劍，雙龍嘯破秋水。思欲南走扶餘，東窮日出，更西行歐美。萬里投荒消滅盡，當日豪遊情味。擊筑聲雌，吹簫曲怒，鬢影星星矣！夜來多謝，玉蟲開作如意。

邁陂塘 帆影

送扁舟秋風容易，亂山飛破明鏡。縠紋不暖鴛鴦渡，付與中流漂梗。鷗夢醒，膽點點相思，畫出滄桑影。斜陽舞冷，待着意尋他，魚龍斂了，暈合翠煙暝。浮家去，五兩輕凌萬頃，桃源應也難。

問霜濃露飽天涯遠，月底瓊簫無分。愁暗省，倩雁落寒沙，寫個伊人認。歸期未穩，算見了還休，爭如不見，莫再紅樓凭。

喝火令

寶瑟棲塵冷，闌干倚月斜；愁痕幅幅影窗紗，輸與紅襟雙燕早還家。狸婢輕翻局，鸚哥低

喚茶，記得門前一樹馬櫻花；記得馬櫻花下同上七香車。

虞美人

新霜昨夜迎秋到，九月窺人笑；聽風聽水又今宵，載了離愁不載，木蘭橈。薰爐衣潤薰還罷，我已魂銷也；玉蟲底事不銷魂，紅寫一簾花影，顫黃昏。

高陽臺

病葉敲秋，孤燈眷客，嫩寒初上桃笙。能幾番留，別來三見紅櫻。絲絲蕉雨渾無賴，隔窗兒偏要人聽。更無情，雁影些些，蛩語聲聲。天涯我已飄零慣，只秋心著處，棋局難平。白騎西風，問他蝶舞何曾。琵琶替訴春前恨，爲愁多說也零星。數殘更，亭短亭長，夢裏歸程。

金縷曲贈仰光楊子貞，用蔣竹山韻。

好把平原繡，乍相逢。驪歌又唱，離魂消透。細疊征衫塵欲遍，莫問天寒翠袖。算閒却龍蛇筆走，正值神州新造日，挽神州漫逐諸公後。飄泊感，等蒲柳。仰江一雨渾其舊，只鄉音聽來難似。音含罄口。藥我微疴贈我語，遣我高情逾阜。縮海水壽君杯酒；一語還期金石記，者風雲故國神傷否。珍重此，回天手！

鳳凰臺上憶吹簫用漱玉韻

麝帕香盟，鸞衾粉誓，水晶簾看梳頭。倩紅兒低唱，點損春鉤。多事鸚哥錯報，掩湘函一笑還休。魂銷否？嬌波醉酒，軟語醫秋。休休！無端別也，便打起黃鶯，夢也難留。願化爲明鏡，長傍妝樓。位置琴臺棋局，好替我鎮日凝眸。愁如織，是鄉不老，何處銷愁？

祝英臺近

怨紅綃，愁綠綺，絲淚欺明鏡。覓遍天涯，不見春風影。怪他海燕歸來，雕梁軟語，也直恁商量不定。盼芳訊，過了，下九初三，消息總難準。采筆情拈，還自背人問。早知一笑無端，別時怎易，悔那日畫樓雙恁。

水調歌頭星洲步月

鐵笛一聲起，破浪逐長風。幾人塵海驚醒，障住百川東。看徹浮雲西北，付與寒潮月上，淨洗萬愁空。莫更愁如織，并剪剪吳淞。 踏芳洲，尋繡景，與誰同？是他繁星點點，電火隔江紅。便欲踏茅江上，又恐魚龍起舞，秋色冷芙蓉。極望烟波闊，劍氣忽成虹。

醉太平 乞玉梅花道人作西湖尋夢行看子

爐烟一窗，瓶花一牀；更添十里湖光，對南屏晚妝。藕風氣香，竹風韻涼；等他月照迴廊，浴

鴛鴦一雙。

采桑子

東風不伴愁人住，病過花潮。閒卻蘭橈，雁齒紅潮第幾橋。 愁多酒薄澆無力，待不魂銷。又

減字木蘭花

簫殘劍怒，如此天涯儂慣住。心事箋天，一角紅牆路幾千。 韶光餘幾，容易秋風秋老矣。舊

約西湖，有個扁舟載得無？

南鄉子

雙髻罷調笙，羅幃花陰濕未曾。西下夕陽東下月，無情，不爲愁人且暫停。小膽怯春醒，影瘦黃花作麼生？換了羅衣無氣力，難聽，時有歸鴻一兩聲。

清平樂

別情難說，付與南飛翼。繡罷鴛鴦心更怯，半臂裝綿無力。軟風吹綠窗紗，春人只隔天涯，怪底天涯飄泊，一春不見楊花。

疏影讀樊榭秋聲詞，悄然有感，倚此和之。

簫啼劍泣，織尊前鬢影，一絲絲白。戚戚淒淒，瑟瑟蕭蕭，瘦到花魂詩骨。枯荷留得秋風緊，早掃盡一樓殘葉。似伊人玉佩歸來，驚醒西園蝴蝶。便伴微吟悄喚，也應喚不轉鈿車消息。酸透青梅，濕透紅蕤，心字幾行明滅。清商逗徹霜華紫，換滿目池塘白碧。算相思千里應同，冷對半彎明月。

踏莎美人寒夜放言

澤畔行吟，市門貨殖，更無位置英雄地。蠹魚字悔蝕神仙，茂陵誰識凌雲氣。紅友消除，青奴遊戲，五湖無恙吾歸矣。職方如狗尉羊頭，笑他袞袞風塵裏。

臺城路登惠山雲起樓題壁

十年慣賦登樓句，吟來萬峯都笑。檐角華明，鏡波香軟，時節還驚春早。勞人草草。試吹笛梅邊，訴懷懷抱。何必羅浮，翠禽飛破凍雲峭。愁心坐凝孤悄。俊遊零落盡，誰是同調。淺酌紅霞，轉寒碧落，絕頂茅茨會到。倪迂畫藁，認驢背荒寒，尋詩橋小。如此溪山，不如歸去好。

清平樂菊影樓小坐口占

拋殘紅豆，正是愁時候。一枕梨雲春也瘦，強起梳頭否？簾痕月抱花腰，可憐如此良宵。記得良宵如此，去年雙按瓊簫。

祝英臺近題錢警笙玉烟珠淚詞

藥鑪薰，桃竹碎，玉暈篆煙紫。鷓鴣聲聲，花落已無奈。更憐燕子歸來，似曾相識，又夢逐彩雲飛矣。鏡鸞對，人生如月華年，一例付流水。蘭姊環姨，此事那堪記；便教記得星星，吟箋小擘，也捲入淚痕紅膩。

摸魚兒珍珠菜，汕俗宴客多用之。

盪晴篙，麴塵波軟，冷香飛上寒翠。吳娘綽約前溪去，人與碧雲無際。菱唱起，又拾菜歸來，劃

破靴紋細。盤飧小試，好淺蘸螯黃；輕分鴨綠，略帶粉痕膩。尊羹外品到蘆芽、菰米，故園無此風味。采蕭采萼，年年慣，只隔相思千里。儂也記，記春色灣頭，舊有三弓地；旅遊倦矣，問何日江鄉，誅茅抱甕，老我煙波裏？

百字令借懺紅游雙清別墅聯句

絲鞭席帽，指紅樓那角，冷清清地。蕉葉初肥鶯語懶，種種瘦人天氣。燕柳烟黃，穆桐乳碧，瘦得春如此。夕陽西去，東風吹縹緲水。不過石漏穿雲；廊虛抱月，位置清幽耳。一局殘棋敲竹院，眼底更無餘子。卯酒催詩；丁簾煮夢，徒倚忘歸矣。疎蟬送客，曳杖唱出秋意。

踏莎行裙帶

慵襯榴紅，條牽柳翠，臨風恰稱凌波細。天吳紫鳳鬥輕鸞，秋千打罷流蘇理。結綰同心，繡成如意，酒翻血色從頭記。昨宵嬉子夢雙飛，羅襦低解心先喜。

前調袖籠

雙束柔荑，圓翻子麤，妝成倦繡盈盈捧。熏殘鳧藻欲生皴，（鳧藻馮小憐手爐名，見清異錄。）效顰醫可，心頭凍。甲鳳春藏，窩貂暖擁，平分翠袖殷勤寵。畫闌接手莫輕拋，雪花起粟新寒重。

前調裙帶

步拂蓮低，腰繫柳細，錦泥蝶簇春如意。同心結了又重分，拈來引得貓兒戲。玉珮紛垂，金鈴緊繫，盼他嬉夢今宵遞。驚鴻翩若蝶凌波，霓裳舊製懷妃子。

前調袖籠

貂錦胎分，鵝絨孔細，個中深貯溫柔意。漢宮春暖玉玲瓏，問誰慣作藏鈎戲？翠袖雙籠，紅絲圓繫，泥郎親手風前遞。捧心樣自學西妝，效顰休笑東家子。

前調裙帶

燕翦輕翻，鸞鈴悄扣，錦泥蝶舞留仙縷。霓裳一曲結同心，也從別後腰肢瘦。幅幅生蓮，弓纖柳，消魂舊約西陵又。昨宵嬉子好風吹，驕驄陌上歸來驟。

前調袖籠

貂膝粧成，麝臍香孕，雙攜翠袖還嫌冷。暝他小婢忒嬌癡，玉葱自把金釵整。懶拂冰絃，慵擎露茗，捧心別有維摩病。薄寒半臂要親添，暫時呵凍爲郎肯。

蘇幕遮

太倉陳丈玉筆寶書，有才女曰佩護，吟詠而外，兼工繪事。嘗繪清綠梅花小幅，其女登王君慧言顏曰紅情綠意圖，遍徵題詠，筆紅箋暖，活色生香，韻人韻事，如青鳥翡翠之婉孌矣。用紅友體詠之。

剪紅情，裁綠意。滑笏生綃，滑笏生綃膩。有個微雲秦女婿，夢繞羅浮，夢繞羅浮翠。染瓊枝，描粉蕊。吹氣如蘭，吹氣如蘭醉。竹外誰家雙袖倚，修到梅花，修到梅花來。

壽樓春題烏程張鈞衡德配徐夫人韞玉樓遺稿

尋圓妾仙鄉，憶簫吹玉女，眉畫張郎。正好三春烟柳，一門宮商。花作屋，琴爲牀，補玉臺新詩題將。判福慧雙脩，溫柔終老，笙鶴駐瑤裝。芳年短，相思長，寄伊人綠字，那角紅牆。忍見簾旌敲斷，燕歸淒涼。金絡駕，銀河旁，認彩雲前身寒簧。贖唐韻書成，蘅蕪夢殘瑤帳香。

洞仙歌

芻尼卜罷，又佳期新換，卅六魚鱗寄蓬苑。恁招來燕子，喚起花魂，也省識十二碧城天遠。

高樓當日事，鳳紙烏絲，句寫生綃舊紈扇。紈扇未經秋，難道今生，總不見春風人面。待斜倚熏籠欲眠時，聽隔巷誰家，舞葱歌舊。

無俗念

徐文仲可。有才女曰新華，工書法，擅文筆，平居喜讀佛家言，守貞不字，有北宮嬰兒子之風。甲寅四月，以侍母病，憂勞成疾，母愈而女竟不起，年僅二十有一。僕曾披柔翰，目眇芳華。近觀遺真，心傷馨逸。感采雲之易散，問觀星而已移。率製蕪詞，藉伸哀誄云爾。

飛瓊警影，嘆芝焚蕙刈，古今如此。寸草春暉無恙在，翻遣紅心先死。翡翠晨吟，琉璃暝寫，明月前身是。玉簫吹夢，玉臺佳句堪記。最念唐韻未成，蒼茫獨立，虎背荒山倚。應爲情多纒學佛，五濁浮提輕棄。世盡言愁，才原非福，一現優曇耳。拈花歸也，姓名早注仙史。

玲瓏四犯

梅郎蘭芳玉歌珠舞，弁冕一時。來滬未久，旋復北行，滬之人勿能忘也。汪君蘭皋有蘭芳集之輯，槩子鴛鴦雜楚僧諸君斐然有作，余亦繼聲。

璧月夢圓，瓊枝春笑，消魂絕。作平。代如許。五湖歸計早，料理扁舟去，何郎又添別緒，最難忘。玉簫吟苦，一集金荃，一聲河滿，商略莫遲暮。宜南舊會遊處，記青吳紫鳳，歌徧神女。曲終人

不見，認取雙眉嫵。鸞牋試訴情深淺，有潭水桃花能賦。教說與重來，約成連俊侶。（梅郎來海上，時與王鳳卿偕）

醉江月題宋夢仙女士遺畫清英草堂圖

百城南面，辨隱囊塵尾，此中長住。略約斜通無客到，靜鑲滿庭香雨。花韻催詩，茶煙養夢，謾說松風雨。天寒有鶴，翠筇劃遍涼句。却念半臂吳綾，飛來天籟，不爲人間駐。自向飛瓊留姓氏，早又乘風歸去。小閣吟商，吳波蘸影，寫入秋聲苦。遙山一抹，披圖還認眉嫵。

點絳脣乙卯上巳修禊隨庵招飲惜春粧閣分韻得在字

爲惜春歸，看花擲取芳蘭佩。曲江飛蓋，花事今宵最。一院鶯聲，喚起春如海。春無賴，薄粧蛾黛，贏得春愁在。

減字木蘭花題南通徐澹廬梅花山館讀書圖

紫琅山畔，山色窺簾閒不捲。紅袖香溫，疏影橫斜月到門。春風筆底，細嚼梅花梅熟矣。我亦天涯，老樹秋根苦憶家。

浣溪紗題雲間宋夢仙女士遺畫爲許幻園賦

半夢吳綾禁曉寒，玉樓殘夢最難圓。好嬉倒印淚闌干。
慧業都從天上種，愁痕還向畫中看，爲伊惆悵寫銀紈。

醉太平 傾城夫人拗風廊圖爲寒瓊題

香消酒醒，參斜斗橫。蘆簾紙閣雙聲，修梅花幾生。
前身玉京，仙山紫清。閒來寫入丹青，曙
傾城小名。

惜紅衣

灑南李公祠池荷特盛，池後小山，曲徑迴環，幽秀尤絕。乙卯晚秋，余偕徐丈仲可往遊，花事凋零，空梁泥落，合肥銅像仆於辛亥之役，劫後重建，金碧淒黯，亦非復曩觀矣。感愴成吟，和石帚韻。

澹柳扶煙，零花熨日，做秋無力。淨洗池塘，西風換愁碧。青銅瘦影，還問訊淮南仙客。岑寂，鵲語斷紅，說春歸消息。黃沙怒陌，玉壘浮雲，香塵半狼藉。滄波費淚，帝國夢魂北。喜有小山叢桂，且共詞人登歷。看陣驚寒雁，飛破一痕霜色。

浣溪紗 題芷畦柳溪柳枝詞

絕妙才華絕妙詞，幾聲水調足相思；竹枝唱後又桃枝。襟上淚痕濃似酒，客中愁緒細於絲，最難風曉月殘時。

跪地柔條爾許長，江南何處不斜陽？西風樹樹儘思量。粉本如披圖蛺蝶，權歌好繼湖鴛鴦，移家擬傍水雲鄉。

花犯 春音社第一集賦櫻花，依清真四聲。

數繁華，番風第幾？仙山豔雲錦；嫩陰催暝，憐潤洗蠻姿，輕換芳信。軟塵占舞淩波穩，鵲魂愁未醒。鬪曉色一天霞綺，滄洲餘淚影。尋春問春在誰家如今，望斷否，蓬萊金粉。香夢淺，扶殘醉，膩妝嬌困。窺牆慣賦情最苦，容易到斜陽花外冷。但記取玉函人杏，啼紅心事近。

眉嫵 春音社二集賦河東君妝鏡拓本

算香留舊史，影落蛾池，鸞紙麝塵擣，記賦催妝句。芙蓉舫，（錢柳結襦於芙蓉舫）圓姿春豔雙笑。絳雲燼了，認遠山螺黛曾掃。漫回首，弱映臨風柳，問眉樣誰好？（牧齋詩：當風弱柳臨妝鏡，罨水新荷照畫堂。）重照，當年巾帽。（鏡背有詩云：官看巾帽整，妾映點妝成。）想暈潮紅膩，彈淚多少。南國鉛華謝，藤蕪畫，紅心淒斷花貌。細斂舊稿，（柳星窗映朱鳥）牧齋定情詩：「從

今不用窺牛女，只向窗前候柳星。一帳金粉烟消臺玉冷，守蟾悄。

高山流水春音社三集賦宋徽宗琴

風池一勺嘯龍寒，膩紅灰彈淚春殘。書畫伴宸遊，春雷響答星壇。宮聲犯，碎玉流泉。餘音付，織指新橙破了，唱徹家山。有南薰解愠，日日醉花前。還憐，胡沙譜秋雁，香撥斷哀感君絃。回首問，霓裳舊曲，天上人間。恨匆匆揮手，南冠。徹塵冷，愁入梅花楚弄，玉笛淒然。（徽宗蒙塵後，月夜聞笛，同欽宗作詞，有「家山何處？忍聽羌笛吹徹梅花」之句。見宣和遺事。）曠清真絕調，（琴今歸烏程周夢坡）寥落幾千年。（坡詩：「千年寥落獨琴在」）

霜花腴春音社四集賦菊花

晚香傲客，澹圃容重逢晉代衣冠。南國霜多，西風人瘦，東籬避世都難。帶圍儘寬，認淚痕猶溼花前。誤年時舊約餐英，變騷聲動楚江寒。消息故園如夢，又聞塔葉落，唱徹哀蟬。搖日分黃移雲栽紫，新來恨墨盈牋。待歸繫船，料兩開清影娟娟。過重陽幾誤佳期，卷簾還怕看。

燭影搖紅春音社五集賦唐花

春冷瑤天，化工偷換繁華主。眼前紅紫總承恩，金屋深深護。翻盡洛陽舊譜，試新妝濃薰如

霧。幾番梳洗；著意溫存，霎時塵土。榮落無端，最憐身世冬烘誤。淒涼羯鼓說開元，香夢成今古。愁殺煙寒院宇，駐韶顏東風未許。馬塍塘畔，（唐花一名塘花出馬塍塘見癸辛雜誌）芳訊匆匆，花魂醒否？

高陽臺

瓦硯一長尺半，闊八寸，中爲瓢形，背隱起六隸字，甚清勁，曰「建安十五年造」與容齋續筆所載相同。明都元敬大書「銅臺漢瓦」四字於上。兩旁鐫銘云：「昔爲瓦，藏歌童，及舞馬，今爲硯，侑圖史，承鉛槧。」烏乎！其爲瓦也，不知其爲硯也。然則千百年後，安知其不復爲瓦也，蓋英雄武人不得而有之，子墨客卿固得而有之也。吾是以喟然有感於物也。乙卯冬日，得於海上。春音社六集擬賦。

賦逼琴紋，（偃曝談餘銅雀瓦硯，真者上有油紋，曰琴紋，又有白花，曰錫花）潤蒸雨氣，（何春渚詠雀臺瓦硯詩：「錫花封雨苔。」又宋无詩：「墨池蒸雨出滄溟。」）隔林翡翠宵寒，化作鴛魂，東風野火燒殘。蒼苔玉匣前朝字，夢瑤臺搗麝成團，伴吟毫，橫槊豪情，翫墨餘歡。（河朔訪古記雀臺北爲冰井臺，藏石墨可書，又甃之難盡。）一抔可是西陵土，但香分螺黛，怨訴糜丸，淚

滴蟾蜍向微凹處沈瀾。紅絲不繫珊瑚網，認鑄華金薤依然。（鐵網珊瑚金薤琳琅均元敬著，七
硯俱見著錄）鎮依人賦寫登樓，詩寫江關。

思佳客

題武林丁松生先生丙風木齋圖，齋燬於紅羊之劫，今先生之哲嗣和甫丈重建於
西溪。

卜築藤蘿意自閒，西溪風雨夜來寒。十年堂構完先澤，一室芸香理古懽。松夢冷，（松生
先生之著書處曰松夢寮。）菊吟殘，（菊邊吟稿爲松生先生遺著。）劫灰還向畫中看。思親我
亦頻揮淚，（齋中有亭曰思親。）楊柳閭門屋數間。（用夢窗句。余幼隨先大夫僦寓吳趨坊畔，
泉魚之痛，忽忽十年矣。）

慶清朝題徐仲可女公子新華遺畫

跨月乘鸞，夢雲化鳳，碧城人去迢迢。玉映當年，紅絲小研親調。畫取仙山一角，黛螺分影上
生綃。含毫慣，綠窗清課，想見垂髫。比似吳綾半臂，共西河都講，茗玉名瑤。洗盡鉛華，還留墨淚
痕飄。爲問生來慧業，春風筆底斷魂招。傷心處，純飛香偈，譜入瓊簫。

桃源憶故人。邈初三周忌日，匪石賦詞追悼，予亦繼聲。

三年碧化東門眼，草拔卷蘼心短。殘淚銅仙紅濺，斜照烟蕪滿。歸遼神鶴何時返，杜宇聲聲愁喚。只有春魂不轉，冷笑問鶯絕。

喝火令 丙辰三月廿一日作

蝶夢還圓否？龍飛出骨無？窺簾燕子錯相呼。怎地空房小膽，耽鬧繡工夫。對面嫌人逼，回身倩影扶，含羞寄與十眉圖；試問而今果否悔當初？試問而今，便把當初悔了又何如？

入聲甘州

別侯大戢齋久矣，今春兩見於里門，并爲介於凌大伯昇，同登東橫山梅園望太湖，取道惠麓，買醉泉亭而歸。翌日，又爲春申江之行，賦此却寄。

又京風吹我落天涯，相逢鬢絲蒼。料山靈笑客，倦遊何處，不傍鷗鄉。斫地長歌誰識，未減少年狂。且住爲佳耳，小酌壺觴。七十二峯無語，盪鱗波萬頃，淺暈眉妝。怕魚龍睡穩，一例夢滄桑。莫再向梅邊譜笛，換悲笳四野正淒涼。歸休也，倚闌干處，總是斜陽。

臨江仙

灑甯車中所見滿地皆菜花楊柳中時露春旗一角則戒嚴聲中之防務也。懺紅內

史曰：「農事荒矣，子盍爲詞紀之。」感成一解。

幾日平蕪愁滿眼，灌園誰傍高城？黃金鑄淚太縱橫，宮袍還妬否？布穀已無聲。自是羣芳

吹欲盡，只餘此色分明，休將憔悴問蒼生。裙腰青斷了，寒角起孤營。

六醜丙辰春盡日作

開東風底事，送笛裏梅魂輕別。采芳後期，花開誰勸惜？一謝難折。幾誤仙源路，洞迷香雨，蘸絳波千尺。玉驄待指青蕪國，燕絮殘泥，鶻啼剩血，紅心淚痕同色。但斜陽烟柳，愁緒催織。江南消息。有庾郎賦筆，夢繞哀笳起，啼恨墨。懷中錦段非昔。換年時秀句，看朱成碧。高樓望，陣雲西北。不堪是擲徧金錢買了，好春無迹。繁華盡，還戀瑤席。怎兩番鼓吹池塘外，昏蛙鬧夕。

瑞鶴仙題李抱眞殘硯硯作半月形陳白沙製銘屈翁山題識爲武林馬彞初賦

半規殘月小，映霜華涼寫，鬢淺淒調。璞（平）浣錦溪少，認冰絲紅膩，淚盈孤抱。朱衣管帽，

（抱眞平居管甯帽朱子深衣。）墨痕飛南雲嶺嶠。補琳腴不補媧天，鳩眼暗窺春老。誰草陶泓佳傳，（宋詩）要與陶泓作佳傳，老癯松液寫黃庭。石友無言，矜窗愁悄，風泉夜嘯。持重畫，滄桑

稿。南海躡湛若有大風吹夜泉硯。想縹緲京國，江花深夢，圓合湖鷗醒了。翦山眉一角西樵，向人自好。

探芳信

先秋三日，夢坡招同次公也。詩散步學圃，回憶去年七夕，同社爲瀾尹介壽於此，分詠晚香玉詞，歌嘯極樂。今槩子墓草宿矣；芳事成塵，墜歡難拾，江潭憔悴之感，有不能已於言者。明日次公又爲春明之行，倚弁陽老人均賦別，兼詢陳大倦健消息。

戀芳晝，記醉玉題香，延秋喚酒；數尊前歡事，襟痕未全舊。重來愁溼看花眼，人比春還瘦。最銷凝燕去塵梁，鴛迷烟整。隄外錦驄驟，正鈿轂流波，宮眉描岫。斷羽天涯，如今倦遊否？梅邊聽徹江關怨，萬感空回首。黯離懷，恰似西風病柳。

徵招寒夜

麝熏香篆爐灰雪，雲窗暗驚寒驟。醉也不成歡，問尊前紅袖，青衫無恙否？騰雙淚對花消受。隨處天涯，月殘風曉，酒醒還又。西北憶高樓，秋聲戰葉，葉亂翻鴛鴦。夜坐鎮悽吟，只新詞爭秀。玉簫休更奏，帕容易湘波吹縵。倚闌看，鈿轂塵飛，奈卷簾人瘦。

雪梅香春感

卷珠箔，望中一髮繫神京。乍輕陰天際，危樓怨笛飛聲。宮柳青殘，銷烟色，野棠紅發，帶風情。費詞筆，曾杳明朝，愁喚誰醒。蘭成最多感，十載江關，夢語還驚。粉陌羅窗，依前亂落繁櫻。病葉齏香，誤棲蝶，隔花吹雨，怯啼鶯。銷凝又闌千萬里，斜照新亭。

綠意荷花生日

文漪淨植，引闌江豔唱，杯飲筍碧。雪藕絲縈，吹葉香題，年芳自怨瑤瑟。西風不醒，問歌舞，但采綠人來愁絕。蘸幾枝玉戲驚魚，恨萼粉雲南北。回首霓裳水殿，夢華賜漢，醑塵麝席。掣海波翻，泣露根移，換了淒涼今夕。田田一望，疑無路，總莫問青墩消息。漫貯將半篋秋心，譜入語烟簫笛。

渡江雲秋夕餞別次公

河橋攜手處，畫斂句覓，綺夢繞雲屏。送君從此去，小繫斑駁，按拍動離情。吳姬勸客，漸換却當日狂名。還悵望，隔江烽火，費淚飲新亭。堪驚，緇衣塵化，素鬢霜多，但淒然說餅，知幾時仙槎風引，銀海銷兵。吹寒又聽空城角，早進入一片秋聲。秋未老，長安亂葉愁生。

憶舊遊題番禺沈太侔楸陰感舊圖

記看雲洗眼，排日遨頭，來聽疏鐘。京洛風流舊，慣題香牒，種草呼龍。酒波訴起離恨，滴滴比愁濃。只天外、觚稜佛前瓶盞，尙識遊蹤。忽忽最難遣，是送得春歸，不駐殘紅。灑淚花無語，但秋生南國，人瘦西風。（君自號瘦腰生）心情老去如水，雙袖拂龍鍾。又夢碾輕雷，誰家鈿轂飛玉聽。

金縷曲

東莞鄧爾雅以余有洄雪畸人緣綺臺傳奇之作，郵贈此琴。墨脫琴故明武宗物，上距唐武德二年製，閱歲千有三百。首尾略有殘缺。爾雅工琴，此琴由琴師楊子彥許轉輾得之。余於壬子遊南洋羣島，道出粵東，恨未與爾雅訂交，賦此報謝，兼爲他日訪戴張本。

袖墨蒼龍嘯，恍絲桐冷然善也。梁塵飛繞，凝碧荒荒神州淚，書記平安誰報贖？東市朝衣憑弔。太息麤音曾入聽，只美人帳下稱英妙。歌一闋，絕弦了。雅詞白雪廣同調，恨年時刺船徑去，神山未到。守缺抱殘吾輩事，俗耳箏琶淨掃。問詩卷牛腰多少，海水天風溫昔夢，要移情爲鼓成。

連操。棋沈醉，玉山倒。

四犯翦梅花題葉中冷和玉田夢窗詠物詞卷

嬌塵霏麝，鼎雙聲紙閣，女兒牋砑。（后山詩：「南朝官紙女兒膚。」）笑擲龍梭翦，銖衣寒，惹星辰昨夜，記翻與紫鸞親跨。暖玉分田，窺窗訴夢，寫愁無罅。詞仙怨吟未罷，有亭開墨妙，春好如畫。草色鶻啼，絮吳天殘霸，飄燈水榭。儘消受粉雲羅帕，酒病花醫，香初笛譜，冷泉珠瀉。

醉翁操題鄭淇若藏唐琴綠綺臺爲東官鄧爾雅賦

鈞天，蕭閒，何緣理，朱絃，千年，陶然醉翁吟，吟坡仙。刼餘焦尾無言，真趣傳，碎夢譜哀蟬，問麋桐幾人抱殘。馭娑奏雅，唐韻春研，楚蘭寫怨，消與冰絲淚彈。塞女羅兮荒山，解贈珮兮嬋娟。南風暗鳳鸞，紅心梅花斑，夜雨撫青原，大招一賦雲海寒。

高陽臺

戊午春晚，偕新寧鄭富灼、南海黃訪書、吳興周由廬、松江平海瀾、同里程覺生遊西湖，遇雨作。

漚雨珠圓，魚雲墨暈，山容水態全消。一段春情，費他淺沫濃描。輕陰可是花能護，咽空枝、鶯

語無聊。餓東風，十萬金鈴，廿五離騷。湖波蘸夢經年別，認翠烟白塔，卷畫紅橋。小被塵根，怎禁柳髮飄蕭。明朝又買吳舲去，酒醒時何處，今宵暮吹來，寒角聲聲，悽換瓊簫。

齊天樂

虞山金病鶴貽次公雙紅豆，次公賦國香慢詞紀之。頃承見寄，因憶昔年歸君杏書，亦以此爲贈，根觸成吟，寄博次公杏書一笑。

綠珠醉壓瓊肌破，珊瑚石家敲碎。搓欲圓時，拈將打處，清絕房櫳如水，一枝誰寄？怕似此江南，種來無地，玉合開殘，隔簾鸚鵡喚難起。絳雲奩豔重補，伴尙書老去，粧點多麗。客舫填詞，吳陶經樓寫韻，惠厖有閒愁同理。酒波紅膩。認點點輕翻，茜羅裙底。人立東風，麝塵題鳳紙。

浣溪沙 五月八日漫賦

脂水東流不復西，亂絲叢箔沸前溪，惱人故唱白銅鞮。自是闌邊驚鴨打，不關橋上聽鶻

唳，驚紅彈淚濕新題。

戲罷中堂蠟鳳來，輕雷塘外費疑猜，澀梯小步滑蒼苔。

撩亂陰晴鳩作主，總持風月鴉爲

媒，一春心事又成灰。

憶舊遊題葉子遺稿，依樂笑翁體。

記吳天客雁，海角鷗盟，同賦蓬飄。款語梅邊笛，奈中仙去後，詞筆無憐。茂陵幾番聽雨，多事誤青袍。悵玉筍雲埋，金奩粉蠹，夢影蒼蒼。春嬌洗愁未，只桂月娥池，流怨紅簫。殘卷霜花泪，認珍叢荃豔，塵劫難銷。（余爲重理遺稿）紫萸九日休采，秋水薦寒潮。（君物於重陽前四日）縱翦得淞波，騷魂故國何處招？

高陽臺題十眉鴛湖雙槳圖

銷夏灣頭，綠楊村裏，微波雙影爭妍。能幾番遊，滿訂斜鎖寒烟。重來只有春人隻，說鴛鴦兩字堪憐。最淒然，小別人天，一去經年。湖波圓合盟鷗夢，便聽風聽水，不似從前。手拂長條，依然三起三眠。青衫檢點痕猶濕，訴新愁，竹屋梅邊。望斜川，流水棲鴉，如此江天。

浣溪紗題哲夫端平殘磚

錢室金堂起五侯，芳林閱盡古今愁。鑿坏抱甃許窮搜。精舍八甌鑄石墨，高州六帖寫銀

鈎，海南嶽雪更名樓。

桃李東風半壁傾，一坯乾淨廣州城。小朝廷字認端平。井史搜奇傳鴨子，硯材妙製敵魚

英，六陵殘瓦怨冬青。

八 古直公愚詞

霜華腴湯坑舟中

碧天蕩漾，悵水雲迢迢，遠浦潮初。三尺蒲帆；一枝柔櫓，移舟觸動蘆孤。客懷乍舒，又暮烟灑遍平蕪。做淒涼，兀自支頤，况堪鴻雁滿江湖。回首亂山無數，奈鄉關極目，渺渺愁予。蘭蕙飄零，芙蓉悴憔，魂銷是處模糊。擁衾夢孤，甚笛聲叫起棲烏。感年芳誤了今生，夜闌心更虛。

羅敷媚

春風舊日銷魂路，兩槳門前。六曲闌邊，楊柳垂垂鎖暮烟。荒臺幽夢何曾誤，璧月嬋娟，芳草芊綿，憔悴行雲祇自憐。

前調七夕

銀河早已魂飛渡，涼月娟娟；纖步珊珊，不問蓬山路幾千。新愁舊恨從教訴，紅淚輕潛，幽

緒潛牽，一晌歡娛又隔年。

菩薩蠻

故園儘有傷心處，靡蕪沒遍山前路。落日剩孤城，秋風一夜生。茂陵消渴病，憔悴羞持鏡；
竟夕苦相思，美人惜未知。

金縷曲 夜望西貢感賦

夜汐流紅處，認依稀灣環七二，漁燈三數。依約猶聞商女唱，淒絕故家雲樹，歎長此塵封鐘鼓。誰下巫陽招楚些！只濤聲夜夜還相訴。思往事，淚如注。憑欄忽地神魂怖，黑沈沈風來潮湧，
燐飛古渡。縱有萋弘埋碧血，難驗楚謠三戶。安南時與革命，卒無成功。猛回首天涯秋暮。風雨家山何處？是正客愁無着鴉啼苦。長太息！誰告語？

摸魚兒

余少時聞葉小鸞事，甚艷之。辛亥在汕與天寥後人葉楚傖同筆硯，乘間出圖一幅相示，題曰分湖弔夢圖；蓋訪小鸞墓址之作。余贈以詩，所謂「靈芬艷跡今荒草，一段遺聞實慰吾」者也。自是以還，時欲一讀小鸞遺集，四五年來，到處搜訪，迄無所

得近聞楚僖喜獲午夢堂集，陳書及圖，開筵受賀，消息傳來，幾疑天獨厚彼矣。忽一日友人走告某處藏返生香一部，可以重價致，余喜出望外，不計阮囊羞澀，傾而與之，得書携歸寓齋，焚香展讀，覺數月積悶，一旦都消釋也。因賦此解，寄示楚僖，並索同社諸子和之。時民國三年四月望後三日。

驀驚心一場春夢，鷓鴣啼徹朝暮。（小鸞有春夜夢中作鷓鴣天五首，皆寓遺世之思。）前身合是瑤臺侶，笑謝塵寰歸去。留不住，歎道骨仙風，只自空酸楚。（天寥評小鸞浣溪紗書懷詞云：一嗟乎其仙風道骨，豈塵凡可能久留耶？空自悲酸。）返魂怎據？有清麗詩篇，芳菲詞賦，展卷恍相遇。當年事，細溯分湖鷓鴣，靈芬艷迹何處？夢猶可弔真痴絕。一幅畫圖會覩。君莫誤，問自古紅顏，誰不歸黃土斜陽如故。况乘鶴驂鸞，皈依王母，未許人間娶。（沈自炳返生香序「方且恥彩鸞之多嫁，營弄玉之有夫」，意蓋本此。吳石華題眉子硯詞有「彩鸞未許人間嫁」句。）

九 白炎中壘詞

桃源憶故人

匪石招同楚僖諸詞人小集出詞徵示則以玉茗曲「兩絲風片烟波畫船」八字分冠句首為禁體也。白雪陽春已得七闋余時將有遠行驪駒在門勉譜二解並以志別。

雨中翦燭消尊俎，絲竹漫歌金縷，風雅附庸誰與？片錦歸囊貯。烟鬢寫出青無數，波上沙鷗閑住。畫個浣紗兒女，船錄諸吳語。

雨餘苔潤遲吟屐，絲裊垂楊前驛。風弄一枝離笛，片玉吹瑤席。烟痕鬢影絲絲織，波映簾櫳空碧。畫裏紗棠雙楫，船載春愁窄。

月下笛 月當頭夜與匪石中冷聯句

學鼓催人橫琴佇夜，新寒愁泣。(中壘)天高尺五，捲晶簾挽雲住。(匪石)霓裳不信姮娥老，還暗妬嬋娟青女。(中冷)問一年幾見，山河影事，總付尊俎。(中壘)眉嫵銷魂處，記露冷風清，迥欄初度。(匪石)南飛凍雀，今宵飄泊何許。指頭佛說無量劫，渾未覺珠光太露。(中冷)怕醉後，舉杯難邀得枯蟾淚注。(中壘)

人月圓

櫻桃紅了芭蕉綠，能得幾春光。堂燕飛低，宮燕啼澀，都是淒涼。當時錯認同心結，密緒織鴛鴦。昨夜星辰，今宵風雨，來日思量。

清平樂

惺忪扶醉，壓枕穠香膩。葉葉羅衣慵繡字，顛倒鴛鴦還是。踏青嫩約消沈，鏡臺愁被愁侵。莫道春晴容易，輕雷又送雲陰。

花陰春窄，立盡黃昏月。門外馬蹄聲漸歇，莫是渠儂不識。殘妝悄展冰奩，黛痕雙壓眉尖。繡被悔教熏透，癡鬟儘自香添。

眉嫵春音社第二集賦河東君妝鏡

甚藏春雲斂，盪夕潮乾，青眼倦窺柳。（牧齋詩：「風前柳欲窺青眼。」）映水芙蓉豔，消魂夜，新妝人爲詩瘦。絳仙去後，膩翠苔銀帶重繡。（鏡錄一名統繡）試描取一片灑無影，料紅淚凝久。唐殿銅傾知否？（鏡爲唐代舊物）怎照殘歌舞，還照巾袖。棋劫鏡昏語，沈吟算，（牧齋詩：「薄暮銀鏡算劫棋。」）東風多少紅豆。凍花鳳守，待畫眉開了呵手。但金背摩挲，娥月冷，恨依舊。

歎歌瓊人渺，詠玉臺傾，瓶水豔懷古，繫柳花如夢。（河東君詩：「此去柳花如夢裏。」）芳情幻，

瑤窗曾見龍護。聽時最苦，證墜釵愁斷江渚。(牧齋獄中詩：「慟哭臨江無孝子，從行赴難有賢妻。」)半輪小劫，悟秦宮後，忍鸞佩嬌舞。休問溪堂何處？(拂水山莊有梅圃溪堂爲最勝地)想
 皺池螺淺，窺牖蟾吐。嗚咽秦淮水，衣冠恨青銅應悔鑄。繡春翠羽，悵阿環今已塵土。認殘字分
 明南國美，待重賦。(牧齋賦：「有美生南國，詩以定情。」)

又齊宮花冷，漢苑菱殘，傾國怨春黯。細馬明妃畫。江南路，蠻襟羞對冰鑑。暈潮逗淚，試問伊
 眉黛濃澹。看簾捲日暮章臺柳，倚晴翠飛糝。絲素還悲塵染，歎幾回磨洗，空費妝點。煙月愁無
 據，庭花唱風情垂老重黯。照心照膽，更暗驚秋水臨檻。記紅炬催詩，香閣冷，儼情懺。

踏莎行題方瘦坡香痕奩影錄

刻翠犀毫，題瑤鳳紙，六朝側艷新奩史。徐陵序綴玉臺篇，飛卿詩輯金荃體。疑雨疑雲，聽
 風聽水，(是編蒐羅宏富，凡大江南北風土歌謠，無不最錄，律以三百篇之旨，洵正而葩矣。)天
 涯愁恨消羅綺，蠶絲作繭一重重，春情怕淡爐烟起。

一〇 朱霞劍鋒詞

清平樂 成園消夏作

雨餘花淨，香霧朦朧冷。幾曲紅闌人小凭，亂了花光人影。翠雲低壓風簷，涼蟬曳雨聲尖。可笑一雙蝙蝠，偷茶頻入湘簾。

如夢令 卽事

缸際白蓮香細，瓶際白蓮香細。閒坐誦南華，消遣日長天氣。容易容易，又近新秋時矣！

一一 朱慕家劍芒詞

菩薩蠻

東風吹落花無數，珠簾悄卷傷春暮；回首夕陽中，絲絲柳色濃。金閨輕薄婿，作客天涯滯；昨夜夢還鄉，含情欲斷腸。

南浦別西子湖

含情脈脈，一絲絲垂柳送行舟。卅里波光激盪，明媚耀吟眸。襟上酒痕依舊，袖新詩此去別。

杭州聽南屏清磬，耳根飛度，回首黯然愁。我本遨遊成癖，愛風光隨處，便勾留。夢想西湖三載，夙願到今酬。只恨一枝斑管拙，題詞辱沒美人丘。（余于秋俠小青蘇小諸墓曾各題一詩）准明春重拾墜歡，相約水中鷗。

采桑子 旅夜感懷

天涯作客渾無賴，盼到黃昏；孤負黃昏，燈影蕭蕭獨掩門。一生悔被聰明誤，苗了情根；惹起愁根，贏得青衫澆淚痕。

十六字令 閨怨錄三十闋之十四

濃，愁絕鴛鴦痴蝶倦中。停鍼處，默默對殘紅。痴，解得相思便愛詩。腰圍減，腸斷苦吟時。啼，夫婿天涯客未歸。登樓望，忍見綠楊肥。書，遠寄檀郎訊起居。珠簾靜，惆悵淚盈裾。圖，憔悴芳姿病裏摹。臨波影，差把小青呼。萋，芳草粘天客路迷。黃鸝惡，阻夢到遼西。

暝，杜宇聲聲泣暮春。挑紅燭，小妹促眠頻。
酸，玉笛吹殘淚未乾。心頭事，特把小鬟瞞。
閒，燕子呢喃繡幙間。菱花掩，蹙斷兩眉彎。
憐，情比蠶絲死亦牽。迴文句，和淚寫紅牋。
拋，冷落雙棲翡翠巢。淒涼雨，灑上海棠梢。
傷，滴滴銅壺玉漏長。鴛鴦枕，偏不夢高唐。
燐，燭淚模糊戶半扃。愁何著，一卷牡丹亭。
愁，丁字簾前月似鈎。掩淹病，消盡舊風流。

三、臺令 成園消夏卽景

消夏消夏，恰向葡萄架下，如何退却炎威，折箇芭蕉扇揮。揮扇揮扇，招起好風一片。

梧桐影 月夜納涼

月色皎，星光耿。涼滿一庭人未眠，流螢飛入梧桐影。

一一一 朱錫梁 梁任詞

謫仙怨 詠懷

白門楊柳蕭條，嗚咽秦淮暮潮。風景三山千古，興亡八姓九朝。傷心往事可恨，披髮佯狂取嘲。桃葉桃根安在，依然流水長橋。

蝶戀花 荷亭晚興

簾外試尋鸚鵡語，戲水鴛鴦，幕地驚飛去。聽得歌聲穿碧樹，采蓮人却知何處？一片紅雲天欲暮，亞字闌干，徒倚渾無緒。往事思量休再誤，傷心記取橫塘路。

三 姝媚 與瞿庵聯句

吳趨歌舞地，（梁任）聽枝頭鶉聲，一襟愁淚。（瞿庵）陌上青驄，任柳條攀盡，不堪重繫。（梁任）去住忽忽，禁幾度雨斜風細。（瞿庵）千疊柔情，問息尋消，欲眠還起。（梁任）零落歡踪，須記。（瞿庵）有羅帕蘭香，枕藉花氣。（梁任）影事微茫，祇近來嘗遍，別離滋味。（瞿庵）瘦損腰肢，算夢到關山非易。（梁任）自笑霜華短鬢，星星久矣。（瞿庵）

一三 朱璽 鷓鴣詞

臺城路 丙辰正月十二日有柬

綠梅初破璇閨夢，無端兜伊心事。鏡霧迷鸞；梳雲束燕，換了妝成身世。春痕館裏，便貯個蘭姨，紫皇應未。舊日朱樓，半襟香色見憔悴。從前幽怨休憶，問春愁萬態，只有誰會嫁杏無媒；代桃何那，蘊釀巾邊清淚。儂心似水，想卜與芳隣，偷傍羅綺。禁得今朝，小詞填鳳紙。

燭影搖紅

吹冷冰肌，迴身自把羅裙掩。月鈎鈎夢到西樓，醒着真悽惋。那曉秋風不管，任棠花斷恩重怨。金荷瀉淚；銀蒜飄香，更長更短。一事難忘，鮫珠紅比蘭娥眼。最憐煩惱幾千絲，誰遣從頭翦。只合桃僵李代，隔蓬山者回相見。枕鴛笑我，衾鳳抱伊，睡時還顫。

惜紅衣

頑仙題柳塘詩思圖，強余繼聲，因以白石調寫之，叔問辨第二句爲韻，茲依其說。

醉眼留鶯，輕腰抱日。柳枝無力，不放東風，吹寒半塘碧。相思未解，愁損了朱樓詞客。沉寂詩思漸來，念鷓鴣邊消息。尋常紫陌，還有游人，悲春已狼藉。柔絲上下，去去自南北。可許片時呼住，好共錦箋吟歷，倩翠鬟磨墨，寫出一番晴色。

一四 余一十眉詞

虞美人探梅

羅浮仙人年嬌小，未露春懷抱。相逢一朵不曾開，負我多情杜牧訪春來。他時重到江南地，只恐成陰矣。今朝難折未開枝，拚得抱愁歸去儘相思。

滿江紅送春有感

落盡庭花，只留得幾枝空影，又做了一場花夢。春歸纔醒。草上空餘蝴蝶粉；陌頭剩有弓鞋印。更被他風雨一番催，都消盡。蕭娘遠，全無信。蕭郎瘦，常如病。借填詞消遣，聲聲是恨。月下闌干難共凭，花前樽酒會同飲。把十年舊事細思量，傷春甚。

巫山一段雲夏夜聽美人歌

明月樓頭上，涼風樹際生；玉人何處按歌聲？清脆似流鶯。
宛轉歌中意，纏綿句裏情；如何不怕有人聽？只隔一窗櫺。

醉公子紀夢

昨夜知何處，却與伊人遇；不減舊時嬌，依然柳樣腰。
眉畫春山好，苔印雙鸞小；似怪別離多，將人淚眼賒。

才入歡娛境，一霎偏驚醒；依舊是空牀，還疑枕畔香。
夢斷知難續，且起重燒燭；但記語如鶯，言辭記不清。

賣花聲夜雨

夜雨比梅酸，聽便眉攢；蕭騷浙瀝有多般，並沒芭蕉窗外種，已覺淒然。
休去倚闌干，料峭春寒。嫦娥怕客起愁端，夜夜深藏雲霧裏，不許人看。

生查子聽鶯

柳下聽鶯聲，嘒嘒清如許；中有萬千情，似欲留春住。
可惜少知音，不辨何言語；更悵綠陰

濃，不見藏身處。

一五 余壽頤 疾儂詞

金縷曲 石子夫子以自畫墨梅命題，謹填此闕。

風雪板橋路，曾記得尋詩驢背，烟橫古渡。籬落水邊無覓處，閒着一枝半吐，此應是天然畫譜。自笑胸中無點墨，只荒寒詩句待儂補。難寫出，心高古。前因落落更番誤，恨早年冰涼心地，今埋塵土。傲骨孤山三百樹，寒夜月明無主。賸鶴唳聲聲淒楚。我有舊盟終不負，且抗喉一讀廣平賦。問花意，與誰伍？

菩薩蠻

明珠入眼心先喜，秋月春風幾度矣。不語暗鍾情，年華惜此生。 婷婷仙子影，雲鬢鬆還整。 會記玉條鞭，娟娟已可憐。

眼兒媚

綠窗新月淡烟浮，蕉雨晚來收。深情似恨，癡情似醉，去夢難留。孤眠黯黯燈如豆，錦被夜生愁。重重疊疊，明明滅滅，眼底心頭。

柳梢青寄塵卽和原韻。

海上來游，追陪風雅，結合名流；瀟灑如君，深愁似我，雅意兼收。淡烟疎雨輕舟，看打槳潮頭浪頭。世外微塵，胸中點墨，著處偏幽。

霜葉飛

滬地劇戰時，嘗以畫扇遺蕞農。越三日，報我以詞，哀豔淒馨，不減蘭成江南賦也。卽用其韻，倚聲和之。時戰事暫息，惡耗猶多，流離之民，尙未安集，我輩欲哭無淚，弄此閒情，毋亦有不得已者乎。甫脫稿，門外囂然，砲聲如雷，又起于百步之外矣。二年七月二十八夜。

浮沈人海無歡意，怎能超軼塵表。瓜杵時節賦閒居，寂寂心頭悄。便趁理童年畫稿，冰絲紈扇輕圓小。有一種秋情，寫一角秋林，收拾晚霞殘照。只是鼎沸蜩螗，蟲沙民命，賸此山水空好。避秦難買武陵船，幸百夢催老，願身世蜉蝣早了。哀詞新叶江南調，擘素楸拈柔翰，野外哭聲不

知多少！

訴衷情聽鄰婦述終身事，傷之。

夕陽西下晚涼天，織語軟於絳。只是舊情難了，兩淚落人前。花底月，一回圓。思花年，七度星霜，百般酸楚，繫著心田。

水調歌頭 蕙農詞家以西神樵唱圖暨四嬋娟室填詞圖囑題，併填此闕。

天涯老游子，曷似早還山。山青無恙，更饒煙水五湖間。濯足春申澗底，洗耳聽松亭畔，弛擔且安閒。唱一曲兒妙，餘響日初闌。謝情緣，遣情興，挽情瀾。情禪參透，人生好事要全難。算有四時佳麗，伴個江南詞客，矮屋放懷寬。花笑竹生籟，雪霽月開顏。

小重山 題亞子分湖舊隱圖

落墨蒼茫烟水中，湖天風景好，畫難工。詩人舊宅白雲封，圖一幅，佳話布江東。身世我飄蓬，敝廬都賣盡，歎飛鴻。得君閒地兩三弓，菰蘆裏，便可息遊踪。

高陽臺 茸城錢劍秋得龍泉寶劍，因作秋鎗劍影圖。石子夫子代爲索題，謹填此闕。

古色幽微，寒芒隱約，千年英氣難磨。賸到今朝，偏來裝點吟窩。投時利器寧無分，黯傷懷、血

濺山河。且閒看，冷絕銀釘，癡絕飛蛾。風雲決盪今何世？正煙漫碧宇，電鑠金波。寸鐵空持，祇供俠士摩挲。七星光耀龍文繞，坐書城好鎮愁魔。夜闌時，卮酒釀心，彈缺高歌。

臺城路

代趙心壺先生挽其從子伯雅。伯雅爲吾鄉有文行者，晚號松下居士。遺言頗慕阮爲清遺民。嘗作松下居士自傳以見志。心壺年少於伯雅，嘗從之受學。

玉樓一夜修文召，先生捧書馳去。矮屋荒江，白雲紅日，曾見滄桑幾度。人間小住。只松下盤桓，自矜垂暮。世變靡常，此心莫謂無憑據。當初羣從子弟，並蜚聲藝苑，文美彪著，行輩君差；年華我少，也許門牆忝附。悲含朝露。問海上成連，遽歸何處？試撥琴絃，有哀音繞樹。

一六 吳有章漫庵詞

摸魚兒

明知蘭皋住提籃橋，而未識途徑，欲詣無從，并不能以一紙通問，悶甚，詞以寫之。

問閒鷗碧波清淺，橫塘何事難度？煙雲咫尺迷蹤跡，極目渺茫前路。回顧處有電閃雕輪飛
 逐東流去。樓臺幾許？認遠浦橋平，青蕪徑曲，知否謝公墅。離懷迥，惹起年時情緒，閒愁如夢無
 據。瀟湘去國三千里，一日幾回相聚。今更苦，算尺幅歸帆，定捲秋濤暮。風塵間阻，便一紙相思，青
 禽盼斷，無地可傳語。

一七

吳梅壘詞

金縷曲 朱梁任最錄放翁集題詞

一疊傷心稿，望燕雲神州十六，故宮誰弔？老去吟懷猶自健，心事千秋未了。屈指算愁多歡
 少。夢裏從軍真快事，舞金刀血濺紅心草。沙磧外，雪飛早。白頭愁聽猿猿叫，苦追思杭州風月，
 汴州花鳥。織就珊瑚成一網，山鬼時來長歎，又勾起幾多煩惱。六百年來塵夢短，比先生身世應
 同調。涼月落，夜風峭。

薄倖

舞香人影，早一夜天風夢冷。記醉踏梁溪明月，秋入玉臺冰淨。算玳梁修到雙棲，紅絲枉續頻伽命。便泣露盟鵲，啼烟誅蝶，不耐梧桐秋警。問畫閣臨妝處，猶淚雨黛痕淒近。碧城夫容暮

人間天上，瓊環消息西風等。指靈鴛鏡，縱蓬山替證芳因，已是薦魂醒，歡蹤似水，偏怪文園薄倖。

清商怨 題仇英秋宵擣衣圖

枯桐黃月墜小，又玉關秋了。一杵西風，碎愁和淚搗。朱鷺霜信定早，展蝶魂涼夢會到。暗摺衣皺，疊將方勝好。

霜花腴 步夢窗韻

病螢咽雨，捲晚簾纖，痕綠上衣冠。秋老霜肥，露濃花瘦，吟懷醉醒都難。冶春夢寬，又數聲啼鴉尊前。怕他時重證欒梁，茂陵焦萃，鈿盟寒。愁把玉笙呵煖，已西風瑟瑟，落葉哀蟬。消息江鄉，陰晴門巷，閒情懶付詩箋。隔溪畫船，儘玉荷分照，嬋娟。背殘英掩了重關，劍花燈下看。

浣溪紗

輕約梨雲蘸碧羅，薄脂微睡仗風搓，自將寶鏡注雙波。圓夢鴛兒驚夢早，嚙花燕子碎花多，屏山六曲奈愁何。

如夢令

一剪秋痕消瘦，兩點春痕微逗。花老蝶衣寒，尙有半籬廝守。依舊依舊，不信焉懷如酒。

虞美人

銀荷迴照江波淺，紅上梨渦面；嫩寒天氣最相思，却向海棠花下立多時。下簾又是黃昏

雨，雙燕銜春去；滿庭芳草掩重門，約住一牀胡蝶絮花魂。

壽樓春題洪昉思長生殿樂府

招清虛纖阿，問開元影事，悽豔如何。記得長生秋夕，絳河微波。題玉燕，悲銅駝，算自來歡場愁多。便錦襪留痕，香囊懺夢，愁過馬嵬坡。梧桐雨，秋宵燂，指棠梨一樹，誰弔青娥？可惜優曇身世，不如鸚哥。南內夜，無人過，掩鏡眉依稀雙蛾。祇天上人間，霓裳羽衣長恨歌。

繞佛閣題徐寄塵懺慧詞

鬢華翠斂，琴思冷澀，珠露拋碎。樓閉湘綺，夜深半穗寒燈伴秋睡。夢魂離水，題遍恨稿，空贖霜蕊。人殢殘醉，苦吟訴雨嘶風濺鵲淚。鏡澈舊時月，未了靈修芳草外。還記俊遊，傷高重掩袂。縱笛咽梅邊，誰製荷佩，紫天花墜。歎絮影萍踪，塵世如寄，展蕉心懺除愁墨。

清波引可園春禊步休穆韻。

杜鵑啼雨，已簾外落紅幾許。歲華飛羽，更無俊遊侶。莫指舊門巷，怕見漫天飛絮。近來愁賦春歸，况風色小園暮。琴言鏡語，剪雙影偷譜恨句。嫩寒庭宇，便幽夢都阻。題香墜歡渺，不是嬋娟三五。賸有花外么蟾，替人眉嫵。

湘春夜月步張孟劬韻

坐花陰，暮寒庭院沉沉。鎮日燕盡都梁，扶醉裏頭吟。欲賦蕊宮仙夢，問紫雲消息，那處青禽？記夜樓聽雨，畫簾索句，曾許溫尋。西風巷陌，朱樓十二，愁說登臨。怨笛悲笳幾度，一天砧杵敲碎秋心。銀荷照影，比淚波流恨誰深？更自念，甚江潭樹老，留鶯綰燕，痴到如今。

買陂塘步西麓韻

蕩晴波日斜風定，烟紗小閣深護。隔簾一角遙山影，依約停雲撩雨。春幾度，想陌上歸時，還是方塘路。傷高倦羽，怎草長新亭，花飛舊院，重見故宮舞。蕪城賦，休問箇儂眉嫵，當年淚濺紈素。庭槐搖落金梧老，添得鬢絲成縷。天又暮，縱遍歷靈臯，多少驚心處。閒蹤且住，看鳩鵲樓前，兩三螢火，無語自來去。

西子粧慢步慕先韻

犀劍夜光，鴿鈴花煖，浪說高丘無女。點襟紅淚不成冰，算雙棲玳梁辛苦。嫦娥負汝，怎第一良宵虛度。數佳期，賸有零星夢，冶衷何許。門前路，咫尺銀河，肯放黃姑渡。小名休向別人呼，要隄防隔籠嬰武。屏山枕處，恰年紀盈盈三五。碎秋心，蕩作情絲萬縷。

步月和清夢韻

薄暝催寒，迴波蕩曉，今宵未苦岑寂。窺人缺月，似個儂顏色。記依約聽雨課晴，尙羅襪玉塔留跡。方塘路，青鳥倘來，墜歡重覓。蕙懷消未得，零落舊家園，誰賦遙夕。朱門十二，肯等閒輕出。便秋影飛渡絳河，怕花外錦屏遮隔。無聊處，還弄數聲長笛。

醉太平和清夢韻

青娥翠娥，長歌短歌，尊前一翦秋波，歎飄零奈何。春過夏過，風多雨多，年來歡事消磨，又無端遇他。

轆轤金井和清夢韻

晚涼庭院落花多，滿地散香飄麝。一翦風來，恰穩妝纔卸。何郎俊雅，儘笑隱繡簾低亞。玉笛

迴波，柔情絮絮，夢痕休寫。花間么蟾纔下，記當年乍見，珊瑚盈把。替畫蛾眉，趁天街遊冶。綠房多暇，共幾許春朝秋夜。苦憶而今，聽楓園裏，舊時亭榭。

鶯啼序

春老倦遊，冶愁刪盡。沈君緩成見示西湖困雨詞，余方羈遊，感此淒音，不自知其悲戾也。次韻答之。

冰奩膩紅乍展，儘游仙路窘。畫堤柳，晴雪緋烟，冷落湖墅幽韻。暮寒早，銖衣瘦怯，迦陵了了，臞禪分。帶瑤思，輕點瓊塵，粲鈎珠印。碧淡簾波，翠掩鏡語，又都梁悄愴。露桃小，花入秦臺，個儂誰遞芳問。數嬌蹤，梨魂斷續，暗潮澀，春無憑準。拜長恩，刪薤愁騷，補裁歡論。呵筆燕煖，倚笛鶯慵，紫鴿正睡穩。曲徑外，綠苔如繡，鬪草人懶，漱石巖空。武陵棲隱，秋鮫淚，文犀留怨，琴絲孤負臨卣客，護江籬，采插靈均恨，紗帷鎖夕。梅英尙覆宮黃，記得那日，鬢飄。芙蓉巷陌，杜若汀洲，嘆賸金墜粉。鬢影改，娟痕星碎。慧業雲荒，冶事迷離，俊懷消損。回心院杏，同心詩幻，銀牀涼簟曾款夢，算鳩樓，門隔屏山僅。天風扶上華鬢，醉約嫦娥，照伊豔蘊。

菩薩蠻

綠波措鑑紅闌曲，花梢新露垂珠箔。獨倚碧桃吟，情隨春色深。粉梢胡蝶袖，腰比遊蜂瘦。

春思瘦于秋，教人愁不愁。

憶舊遊 示梓仲

記牽愁苕碧，懺恨花紅，索要留春。不放吳娘睡，倩闌干十二，扶起鴛魂。怕寒未經妝束，深闌悄無人。甚杜曲門荒，琴絃瘦澀，孤負桃根。前塵問梁燕，待一曲韋娘，腸斷司勳。換了芙蓉，抱曇花影子，涼夢重溫。近來慣經離別，鮫雨濺芳辰。况柳外么蟾，涓涓照澈眉黛痕。

龍山會題巢南徵獻論詩圖

倚檝楓江夜，笑撼紅簫，載雪詞仙亞。晚花寒抱蕊，湖海氣，銷入華胥林下。（勒山先生曾欲輯松陵詞而未果，君踵成之。）回眼滂滄洲，待憑弔分湖舊蘄。展秋懷，寒蕢校夢，（潘玉士刊養洲譜，有寒蕢圖。朱古微刊夢窗詞有校夢圖。）然脂暝寫。還憶醉嘯吳山，鎖篋新聲，散古香無價。洛溪雲水關流韻事，重補虹亭詞話。京洛倦遊心，載瑤冊疲驢穩跨。自低徊，遙斟北斗，浩歌銅瓦。

秋霽題王巖士淵明采菊圖

江介悲秋，正廢圃苔荒，暗鎖烟色。短策欺霜，葛巾呼雨，暮寒不勝風力。舊家信息，半叢蕙淚
 南山碧，念去國，知是落英餐盡義熙客。清夢滯影，晚節矜香，一襟芳華，留伴幽寂。想東籬商飈
 又緊，溽波愁洗鬢絲白。重九故園還記得，但酒醒後，曾共徙倚牆陰，捲簾人瘦，月吟遙夕。

十六字令題瘦鵲願天速變女兒圖

空；晨舞曇花寄此中。無人會，惆悵訴東風。

浣溪紗

一杵西風雁影移，江潭衰柳正依依；半天寒翠撲衣飛。夢影微茫難寄淚，客情撩亂怕題
 詩；翦燈心事落花知。

虞美人

美人合向橫塘住，生小嬌如許。西風巷陌可知不？尚有一雙梁燕絮，絮春愁。洗頭天氣朝慵
 起，殘夢梨花裏。清商重譜女蘿絃，誰識曲中心事想夫憐！

西子妝

彈淚折花，舉杯邀月，刪盡春風詞賦。琵琶樹下記兒家，有多少琴邊流語。喁喁爾汝，早消了

從前眉嬾。掩屏山，把翠綰題恨，年芳偷數。逢雀護，絮影桃痕，又向草臺住。天涯萍絮各沾巾，儘銷磨綠窗情緒。橫波渡處，仗飛燕商量來去，怎秋深鎮日斜風細雨。

蝶戀花

蟻蝨浮生同一夢，橫海功名，才大難爲用。試問芻尼誰作俑？可憐困坐醯雞甕！
顛倒天吳翻紫鳳，浪說通侯，不及書城擁。和淚送窮窮不動，白楊風裏銘文家。

拍案悲歌中夜起，生小吳儂，却帶幽并氣。汴水東奔湘水沸，人間難得埋愁地。又向華亭聽鶴唳，烟驛燈昏，譜盡勞生計。誰解霜裘溫半臂，少年結客談何易。

大道青樓搖策去，錦瑟雙聲，子夜同心句。春水吳艘楊柳漱，匆匆豔夢歡如絮。白馬青絲情萬緒，一箇牛衣，孤負當時語。偏又重逢深院宇，小紅不是吹簫侶。

悔向名場標赤幟，一霎天風，折了南鵬翅。三十光陰如激矢，觀河面皺而今是。識字從來憂患始，用盡聰明，笑破河東齒。咄咄書空真怪事，侏儒飽死臣饑死。

眉嬾賦河東君妝鏡拓本

算冰苔千點，雨葉雙波，消損舊眉嬾，照取春紅豆。琴河夢，菱花猶記前度。翠鸞自舞，絳柳枝

連愛成縷。笑眠起，一樣臨池裏，作（去）如是觀否？分付評量妝譜，怎潤東人老，巾幘非故。零落
靡蕪怨，清霜後，朱樓誰問仙姥？鬢華細數，賸絳雲艷，匳空補。又魂斷滄桑圓日影，怕回顧。

浣溪沙 薛素素爲王伯穀畫馬湘蘭小影，今藏周夢坡處，因題此解。

小市紅梅結比鄰，露蘭題壁已無痕，落花門巷說長春。白練裙荒憐夢雨，秦樓月黯散歌
塵；干卿底事獨銷魂？（白練裙秦樓月二傳奇，明人賦湘蘭素素事。）

霓裳中序第一 畢節路君金坡朝鑾見訪京寓，爲話南都近事，賦此。

南雲夢故國，墜葉青溪無信息，何處夕陽巷陌。記花樹試鐙，星橋橫笛，關河浪跡。料那時鶯
燕還識。滄江暮，碧城賦別，冷落舊瑤席。淒寂，鳳臺春色。待問訊西州倦客，蘭成詞賦自惜。玉井
苔荒，錦嶺雲隔，斷紅留醉墨，但鏡裏秋絲未白。霜風老，京塵衣袂，去住兩難得。

壽樓春和金坡

吹瓊簫商聲，記丁簾絮語，曾賦閒情。可念朱樓殘夜，坐花調笙。思俊侶，多飄零。料近來秦淮
潮平，縱畫裏題香，愁邊款酒，無奈對新亭。春明外，涼風生，想西陵杜曲，應有流鶯。又恐紅綉留
字，紫雲知名。楊柳色，今年青，聽笛中梅花江城，正詞客傷高，吳霜鬢星，秋滿庭。

眉樵壽石公見示近詞，拈此贈之。

看斜陽烟柳，淡月霜花，彈指歲華晚，未了羈遲恨。東華路，匆匆芳意都變。破衣漫典，怕舊時
 蒸淚無限。更淒感，鶴夢遼西醒，甚歡事天遠。回眼，蓬萊清淺。早謝堂人散，青鬢應換。零落紅桑
 影，江南地橫塘梅雨腸斷。醉歌自遣，對少年金縷愁展。又秋冷蘆洲，誰惜取，寸心怨。

淒涼犯題龐檠子遺詞依石帚四聲

玉田賦筆，經年懶，中仙一去蕭瑟，可園試酒，橫塘聞韻，俊遊空憶。（余讀書滄浪亭畔，與檠
 子同席者二年。橫山天平城南可園時有吟屐焉。）零星醉墨，更誰指紅樓信息。想當時秋風舊
 國，兩載共瑤席。彈盡西州淚，幾許騷魂，古藤陰側。桂娥照影，也依依故人顏色。漫譜吳絲，怕吹
 破山陽夜笛。問吟蹤，獨有燕子尚記得。（余有雙飛燕詞，君嘗和之。）

多麗

秦淮畫舫有名多麗者，余與姚子鵷、陳子佩、忍小集其中，文讌流連，皆一時彥俊。
 余別金陵十年矣，追念昔塵，彌增惆悵。因倚蛻巖舊律，賦此爲同人唱云。

水雲鄉，六朝遺事淒涼，甚長淮明燈子夜，依然舊日風光。羽衣輕歌翻湘月，銀屏護鬢惹天

香柔艸烟波；幽花巷陌，幾年湖海送情狂。問前度俊遊佳侶，一寐早荒唐。誰知得白頭秋士，猶近歡場。記樓臺江城畫裏，那時多少垂楊。美人歸祇留楚珮，詞仙老還辨吳航。芳墨題愁，翠尊話雨，紫萸霜信又重陽。蕩客思古懷零亂，金粉也尋常。溪山約，試盟瀕鷺，醉聽滄浪。

一八 吳虞又陵詞

菩薩蠻

金堂乍啓光明滅，羞眸斜睇嬌無力；相向劇關情，對人佯自驚。婷婷還鼻鼻，倦倚腰支好。可愛是天然，魂消鸞鏡前。

玉梅紅綻初勝露，斷霞雙臉低無語；領取此時情，柔魂都付卿。閒身慵未快，慣撚香羅帶。強訝夢難成，含羞坐到明。

淡妝濃抹皆如意，橫波暗剪秋江水。淺笑太撩人，雙蛾無限春。相逢終恨少，華思添芳草。

郎莫怨儂來，露蓋金縷鞋。

花開花落長相憶，傾城一顧憑誰惜。好夢總難尋，青春如許深。畫樓惆悵久，莫令朱顏瘦。紅淚萬行垂，教人無奈伊。

棗花簾底春無主，闌干滴遍黃昏雨。如燕那身材，從頭細想來。口脂香未改，粉澆痕猶在。鄉漫說溫柔，黃金徒買愁。

翠屏竟作蓬山隔，綠窗嬾婉何堪別。買錦繡鴛鴦，相思苦斷腸。嬌音如未歇，醉態描難及。莫漫卜他生，銷磨萬種情。

疎影

鬢軟鬢欹，似明妃遠嫁，珠啼錦怨。千載琵琶，一代朱顏，誰知比黃金賤。佳人無分銷庸福，領取春風腸斷。憶洞簫聲裏，華年屈指幾番親算。曾記那時愁態，把燕釵乍卸，鳳鞋偷換。嫩膽惺忪，薄笑佯噴，濃暈芙蓉嬌面。相思暗裏拋紅豆，掩玉鏡菱花微嘆。嘆世間翁媪全癡，却枉奈何頻喚！

望湘人 酬胡玉津爲陳碧秀作

歎平生經濟，漫託微言，（用葉水心記陳同甫語）司馬壯遊都倦。春草香名，寶兒愁態，笑我

尋芳嫌晚。海墨垂雲，晚闌蜚雪，豪情無限。記草堂酒綠燈紅，醉把練裙書遍。休道滄桑易變，儘東山絲竹，中年堪遣。况韜玉傳奇，（見張玉田山中白雲詞）正窈窕聲華擅。仙翁麗句，小紅頰艷，千載風流何遠。問可似舞柳歌桃，寫入夢窗吟卷。

摸魚兒 次林山腴和方鶴叟贈陳碧秀韻

是傾城汝南碧玉，總教人倍相護。窈窕賢才同氣味，莫問珠歌翠舞。會知否？更湖海詞人，脈脈心先注。（謂君毅）風懷幾許？笑賦罷驚鴻，傳成飛燕，都遜墻東去。（碧秀住後牆大街）荆軻論難寫壯年情緒，彈琴還看眉嫵。紅妝駿馬遊山日，那見柳娘微醋。君莫妒，正千載朱顏，持贈堪題句。（沈佺期詩：「千載紅顏持贈君。」）殷勤分付，便水繪楊枝，平津芍藥，怎比聰明語？

前調 成都亂後，余方臥病，陳碧秀來視，感成此闋。

問文園怎生善病？多時垂簾閉戶。醞釀中年情緒惡，不是傷春弔古。傳烽處，賸涼月摩訶，冷落宮槐樹。劫塵何許？看玉壘雲紅，錦江波綠，黯傷心無數。重來訪，猶認雙華如故，（庭中丹桂二株）清言更揮玉塵。花片書成驚彩筆，消得嬋娟一顧。繁華暮，甚哀怨江南，徙入闌成賦。蒼生誰誤？便畫取蕪城，低吟杜曲，難訴啼鶯苦。

前調用前韻酬方鶴叟和予成都亂後感懷之作

恨神州風雲草草，中原久失門戶。更聞蜀國哀絃咽，愁擬杜陵懷古。曾游處，歎舊苑宣華，蕉萃芙蓉樹。魂銷幾許？只碧化萑弘，鷓啼望帝，寫淒涼無數。新亭上，漸覺河山非故，清狂倦攜松塵。多少誤人家國恨，曼說皇天西顧。年華暮，臍寂寞揚雲，慣作牢愁賦。殘棋休誤，看躍馬公孫，臥龍諸葛，誰振橫流苦？

一九 吳清庠眉孫詞

齊天樂蟋蟀

一生祇有秋知己，悲吟自成機杼。昨夜風寒，今宵露重，來日零霜更苦。淒涼欲訴，問誰照銀釭？誰調玉柱？夢冷莓苔，斷腸花底月將曙。千金聲價減盡，枉牙籠繡枕，長記前度。綠草魂危，黃花骨瘦，愁絕王孫老去。歲華已暮，尙努力緣塔，含悽入戶。錦樣簷衣，可堪形影顧。

一聲聲喚秋魂醒，癡才量難禁受。寂寂虛堂，陰陰壞壁，衰草斜陽時候。西風苦驟。怪連損金

腰；當翹鐵首，可是傷心，眼前黃菊太消瘦。蕭晨初過白露，料呼燈灌穴，深夜人有。宰相風流；君王月旦，能否山河如舊？休譚勝負，便巧製金籠，恐輸籬豆，各自相憐，漫疑還自鬪。

水龍吟詠萍

絕憐身世飄淪，相逢記值芙蓉渡。江湖容易，暮春三月，東風幾度，人在垂楊，一聲玉笛，斷腸舊譜，嘆托根太淺，前生命薄，宜魂夢，隨鷗鷺。欲拾殘紅寄汝，托微波，怨詞難訴。因緣烟散，性情水冷，不堪自主。便爾開花，也能結實，怕含酸楚。采數枝留證，卿卿小影，抵黃金鑄。

喝火令別後寄阿連

萱蔻同心結，芙蓉透臂紗，洛陽街上七香車；笑指馬纓一樹是兒家。長命千絲縷，相思一寸芽，青衫門外又天涯。記得沿河十里紫菱花，記得蛟珠彈出，一曲悶琵琶。

110 呂志伊 天民詞

臨江仙別意

記得江干春送別，暖風香度薔薇。臨行握手問歸期，柳纖裙帶緩，花重帽簷欹。破浪乘風

何處去？浮橋小立如癡。目窮千里鏡難窺。海圓天欲合，船迅岸疑飛。

汽笛一聲

記得長亭秋餞別，曉霜微醉楓林。將離欲語費沈吟，衆前頻接吻，髻戟慣能禁。郎去也，車輪碾碎儂心。相思淚濕薄羅襟。白巾招展處，殘月漸西沈。

二一 呂碧城 遁天詞

燭影搖紅 庚戌感事偕徐芷升同賦。

絮影萍痕，海天芳信吹來徧。野鷗無計避春風，也被新愁染。早又黃昏時漸，意惺忪低回倦。眼。問誰繫住，柳外驕陽，些兒光綫。一霎韶華，可憐顛倒閑鶯燕。重重帝網帶春魂，花綴靈臺滿。底說人天界遠，待懺了芷愁蘭怨。銷形作骨，鑠骨成塵，更因風散。

前調 癸丑春，感蒙古事有作，用舊韻，寄示芷升。

重展殘箋，背人顛倒吟思徧。嫣紅點點燦秋棠，總是啼痕染。才喜芳菲時漸，悄寒簾且舒愁

眼含情待見，五色春曦，組成光綫。不道春來，樓空人杳，愁歸燕。阿誰鈎引玉清逸，草露瀟瀟，滿底說高句驪遠，聽鶻語替傳哀怨。小桃無主，嫁與東風，已因風散。

法曲獻仙音題吳虛白女士看劍引杯圖

綠蟻浮春；玉龍迴雪，誰識隱娘微旨。夜雨談兵，春風說劍，夢繞專諸舊里。甚無限憂時恨，都消酒樽裏。君認取，試披圖英姿懷，正鐵花冷謝，臉霞新膩。漫把木蘭花，錯認作等閑紅紫。遼海功名，恨不到青閨兒女。賸一腔豪興，寫入丹青閒寄。

南歌子

寒意透雲幃，寶篆烟浮，夜深聽雨小紅樓。蛇紫嫣紅零落否，人替花愁。臨遠怕凝眸，歸思難收，一身多病苦淹留。來日送春兼送別，花替人愁。

瑞龍吟和清真

橫塘路，還又冶葉抽條，繁英辭樹。最憐老去方回，（賀鑄）斷魂尙戀，芳塵送處。悄延佇，愁見唾茸珠絡，舊時朱戶。蠹箋暗褪芸香，不堪重認，題紅密語。苦憶前游如夢，翠裾長曳，錦襜低舞，巢燕歸來，雕梁春好非故。餘哀零怨，寫盡閒詞句。更誰見湘波蘸影，襪羅微步，春共行雲去，已

褪吳蠶，猶牽病緒，織就愁千縷。釀一寸芳心，黃梅酸雨，呆思悶倚，倦懷誰絮。

聲聲慢

聽殘臘鼓，吹暖錫簫，鳳城柳弄輕煙。檢點春衫，早又換了吳棉。啼鶯喚愁未醒，錦屏深慣倚
 慳慳。朦朧語，問人間何世？月地花天。還賸浮生幾日，儘傷心，付與淺醉閒眠。無賴斜陽，爲底紅
 到樓邊。繁香又都吹盡，費彩毫多事題箋。人空瘦，到明朝怕啓繡簾。

祝英臺近

墜銀瓶，牽玉井，秋思黯梧苑。蘸淥寒芳，夢墜楚天遠。最憐蛾月含顰，一般消瘦，又別後依依
 重見。倦凝眄，可奈病葉驚霜，紅蘭泣騷畹。滯粉黏香，繡屨悄尋偏。小欄人影淒迷，和煙和霧，更
 化作一庭幽怨。

喜遷鶯

層巒幽迴，步石逕行迴，瘦筇斜引。籟響清心，藥香療肺，病起閒身相稱。茶花半埋雲霧，植向
 高寒偏勁。天風外，盪瓊香玉蕊，落千尋頂。重省，空歎我塵浣素衣，忍說鷗盟冷。櫺拾霜紅，蘿牽
 晚翠，甚日岩棲纔穩。暫教倦影勾留，依舊歸期未準。碧雲杳，鎖篔陰十里，竹鷄啼暝。

浣溪沙

簾幙春寒懶上鉤，芳塵何處覓前游；澹煙輕夢思悠悠。珠箔飄燈人影颯，桃花樓迳馬蹄

愁；黃昏風雨徧紅樓。

風籟鳴哀，翠條撩人心緒漲秋潮；仙源回望轉無聊。去去莫教重掩袂，行行何必更停

橈；愁山怨水一身遙。

殘雪皚皚曉日紅，寒山顏色舊時同；斷魂何處問飛蓬。地轉天旋千萬劫，人間只此一回

逢；當時何似莫匆匆。（寒山非吳會之寒山寺，乃近濟南一帶之山色也。）

念奴嬌排雲殿清孝欽后畫像

排雲深處，寫嬋娟一幅，翬衣耀羽。禁得興亡千古恨，劍樣英英眉嫵。屏蔽邊疆，京垓金幣，織手輕輸去。游魂地下，羞逢漢雉唐鷄。爲問此地湖山，珠庭啓處，猶是塵寰否？玉樹歌殘螢火黯，天子無愁有女。避暑莊荒，採香逕冷，芳豔今何許。西風殘照，游人還賦禾黍。

綺羅香湯山溫泉

磺爇珠霏，硝炊玉濺，一勺娟娟清泚。泛出桃花，江上鴨先知。未喜冰泮不待葭吹，試纓浣閒

看浪起。引靈源，小鑿娥池，洗脂重見涓流賦。蘭湯誰爲灌就，也似華清賜浴，山靈薄惠。不許春寒，侵到人間兒女。道瀟腸痛疾能瘳，問換骨仙緣誰嗣。（相傳浴者輕身却疾）看聯翩裙屐偕來，證盤銘古意。

金縷曲

德婦 Dizale 夫人一見傾談，相知恨晚。據云：一青島陷後，家族悉俘囚於某國，已獨飄流至滬，言次黯然，余爲感賦此闕。

尊獨寒窗底，道相逢惺惺惜惜，飄零身世。等是仙葩散瑤闕，莫問根株同異。天也忌山河靡麗。多少罡風吹塵劫，任春紅揉損金甌碎。况我輩，何須計。幽蘭不分香心死，撫吳鉤邀君起舞，且迴英氣。一抹瀛波朝曦外，遙指同仇與子。怕來日萍蹤千里。花落花開等閒耳，只今宵有酒還須醉。殘淚拭，杯重洗。

祝英臺近題余十眉神傷集

檢脂函，拈淚管，秋影瘦荀倩。洛賦吟成，人共素波遠。可憐魂覓帷間，釵尋海上，都不是等閒恩怨。幾曾見瓊樹日日常新，冰蜃夜常滿。贏得情長，那怕夢緣短。瓣香待卜他生，慈雲乞取，好

深護玉樓仙眷。

二二 宋一鴻癡弄詞

采桑子

無端又是團圓月；倚遍高樓，數盡閒愁，容易秋風到白頭。
相思屈指都難說；歲序如流，夢影還留，便上心來爭罷休。

摘芳詞

鶯聲寂，鳩聲急，空階一片殘紅跡。催人老，教人惱，芳草天涯，一春過了。
夢難覓，情難測，瀟瀟細雨心頭滴。愁須掃，歸須早，楊花柳絮，飄零草草。

醉公子 湘中送伯升之山左

嬈嬈長亭柳，灩灩蘭陵酒；是處唱陽關，離情當水一灣。
底事重投魯，拚得長留楚；等是客爲家，思歸要早些。

女冠子第一體

良宵如此，早又酒闌人散。月來時。抱怯真無奈，含羞不自持。
嬌鶯穿柳急，粉蝶戀花癡。脈脈心中事，只燈知。

太平時

良夜迢迢低玉繩，望雙星；羅衣偷卸，若爲情，細叮嚀。
拗住銀鈎紅燭背，悄無聲。是何情態，意忤忤，問卿卿。

水晶簾

倚欄掠鬢露葱尖，病懨懨，把衣添。殘紅飛落襟上，忍輕拈。郎不歸來，明月上，斜捲起，水晶簾。

碧窗夢

挽個拋家髻，擎來勸客鍾。雲英猶是舊時容，斜抱琵琶低唱，玉玲瓏。

金縷曲 新中秋

報道中秋了，怪嫦娥新粧不整，黛眉慵掃。歲歲團圓成舊例，底事今宵偏早，甚又是閒庭人杳。碧海青天空悵望，待重來風物依然好。收拾起，心煩惱。露涼雲淡星光小，嘆平生客中佳節，

消磨草草。鵲未填橋先拜月，抵死要催人老。忍辜負樽前年少，買醉休辭長夜飲，拚埋頭狂笑壚邊倒。誰管得，雞聲曉。

賀新郎 戲和鈍根，并寄叔容。

遠道通芳訊，賀新郎詞靠金玉，超然風韻。小宋因何訛大宋，莫是宮人錯認。却自嘆年華潘鬢，縱使鏡中憐影隻，要異時別地聯秦管，兄作弟，難爲訓。滿湘，裏燭聞文陣，集賢資幾番狂吸，梨花香醞。座有鄧處湖海客，慰我天涯愁悶。且曾把紅絲親引。烽火倉皇經世變，使雲消雨歇無音信，成追憶，那堪問。

一三 成本璞 琢如詞

夢江南

春欲去，紅淚暈春潮。花意已隨人意懶，酒痕還和夢痕消。孤枕夜無聊。
春欲去，小院落花多。宋玉有情迷暮雨，洛妃無語託微波。何況病維摩。

月下笛放棹寒江，依依傍晚，烟水蒼茫。漁歌答響，用玉田韻作寄仲章。

岸約天回，帆隨日落，澗潮來處。清蒸九折，如此江山俊游路。波中漁火星，星顫最苦是連宵。細雨。歎浮生如夢，水流花落，怨春無語。無緒，斜陽暮，趁渺渺煙波，早盟鷗鷺。孤篷倦旅，誰知今日淒苦。五湖便放扁舟去，問海上三山在否。空徒倚，扣舷歌驚起，棲鴉老樹。（仁和許邁孫刻龔蘅圃舊抄本山中白雲詞此闕「恐翠袖正天寒」句多一字，今本多誤。）

金縷曲渡洞庭而泊，風水蒼茫，愴然有作。

終古寒江咽，指雲邊東流滾滾，水平天闊。亂後山川生氣盡，對此愴然欲絕。知磨滅幾多豪傑。記得年來飄泊事，便傷心更對何人說！愁黯黯，寸心結。多情自昔傷離別，更淒涼烟波萬頃，扁舟一葉。莽莽乾坤如許大，羸鬢絲得成雪。向誰灑滿腔熱血。苦憶故山風景好，祇哀蟬落葉添淒切。知我者，惟明月。

百字令秋宵被酒，露坐達旦。

夜涼風悄，逗秋墳鬼唱，一聲聲起。欲倩芳魂重入夢，早被晚風吹墜。淚灑花紅，血凝土碧，暗換人間世。茫茫此恨，伯輿終爲情死。曾記燐燐凝愁，挑燈懺夢，寫盡相思字。酒入空腸，芒角出，

未飲心先如醉。燕識簾空；鶯噴人去，回首當年事，魂歸來些，依稀月下環珮。

掃花游

羅雲織暝，釀十日春寒，落紅成陣。陰晴無準，羨雕梁乳燕，棲香正穩。怕說相思，過了廿番風信。暗低忖，恁醉夢風燈，搖落紅暈。前事休再問，記淺笑輕顰，帶圍寬盡。當年瘦損，蹙雙渦猶贖。斷霞紅印，揉碎愁魂，不展蕉心一寸。淚空搵，但絲絲此生長恨。

瑣窗寒 亡婦二十生日，以杯酒麥飯哭于墓。

缺月分雲；殘花咽雨，舊懽休記。華年暗數，又是廿番風裏。黯靈鼙、衰柳夕陽，夜臺應悔多情累。自玉人去後，香銷被冷，夢痕如水。無避，傷春意，歎草草浮生，別時容易。羅帷綺悴，便問人間何世？那知人敲斷瑤釵，翠巾搵盡相思淚。但此生此恨茫茫，再訂他生誓。

金縷曲

綠斷靡蕪路，悄無人、慳情門巷，翠鸚庭戶。不見前年銷魂侶，迸作十分淒楚。便抵死留春不住。欲買吳牋三百個，祇新來怕作傷心句。休再展，斷腸譜。繁華夢逐潮聲去，歎潘郎朱顏漸老，鬢絲如許。恨煞東風無情物，不與鶯花作主。又剗地落紅無數。待寄相思何處？是算相思都爲嬾。

娟誤。空徙倚，淚如雨。

夢斷東風路，算這番飄零盡了，落花飛絮。不道殘春隨愁去，那更留春不住，纔信道相思最苦。薄命重逢郎薄倖，是三生石上前緣誤。空贏得，斷腸句。小闌干畔相逢處，歎重來笑桃人杏，悄然無語。誤墮瓊宮華鬢劫，爲汝銷魂如許，暗觸起，羈愁無數。春去春來人事改，祇玉人去後春無主。空掩袂，恨難訴。

三姝媚

春夜方午，沈吟不寐，起步花陰之下，明河在天，疏星照水，淡烟橫空，斜月欲沒，微雨
 俄來，寒生衣袂，弔影徘徊，不謂人世，根觸恨事，感涕絕久，倚闌曼詠，爾遂達曙，譜此
 紀之。

月和花影轉，正珠箔燈搖，綠窗簾卷。日日思君，換一番風景，一襟幽怨。蝶怯蜂慵，暗繫損故
 園心眼。疏雨斜煙，河漢無塵，露痕凝泫。道是愁根難翦，有萬縷愁絲，柳枝低縮。蹴損殘紅，憶那
 人何處，夢中重見。夢未分明，又卻被玉簫吹斷。海上三山，不比天涯人遠。

芳草春夜作

惜餘春東風吹老，懨懨病起無聊。舊游回首處，綺年空換，影事誰描？思量魂欲斷，不勝悲、更覺魂銷。自魂銷。又卻怨柔腸如繭，冷淚如潮。迢迢，重泉萬里，長相憶、夢裏誰招？何時重一見，定應憐念我，絲鬢飄蕭。靈絲拚已斷，捱孤衾坐徧寒宵。怎忘得生生世世，暮暮朝朝。

徵招

茂陵秋雨琴心冷，淒涼白頭相守。病渴老相如，更情懷非舊。玉人今在否？定應比舊時消瘦。密約終虛，芳情永絕，斷紅暗袖。傷憊，枉拋殘相思淚，依依歲華輕負。淚血凝紅斑，儘和將紅豆，花飛春去又，祇空嗟日圓人壽。傷情處，碧落黃泉，只一般消受。

角招

碧雲展，茶烟颺夢初回，醉怯寒淺。花飛春晚晚，浪水愁山，幾夢天遠。柳罨高樓，弄玉笛聲聲嗚咽，轉眼流光如電。歎弱質不禁愁，早淚痕衫滿。十載賦情未滑，淒涼身世，黯黯腸先斷。窮途文字賤，酒賦琴歌，銷魂無算。風光流轉，又憑倚重泉魚雁。最難忘，夢魂中，真真喚。

二四 李凡息霜詞

喝火令

故國鳴鸚鵡，垂楊有暮鴉。江山如畫日西斜，新月撩人窺入碧窗紗。陌上青青草，柳頭豔豔花，洛陽兒女學琵琶。不管冬青一樹屬誰家；不管冬青樹底影事一些些。

高陽臺憶歌者金郎

十日沈愁，一聲杜宇，相思啼上花梢。陌隔天涯，劇憐別夢迢迢。前溪芳草經年綠，只風情辜負良宵。最難拋，月上歌簾，聲咽秦簫。而今未改雙眉嫵，說江南春老，紅了櫻桃。忒煞迷離，匆匆已過花朝。游絲苦挽行人住，奈東風冷到溪橋。鎮無聊，記取離愁，吹徹瓊簫。

滿江紅

皎皎崐崙，山頂月有人長嘯。看囊底寶刀如雪，恩仇多少。雙手裂開鼯鼠膽，寸金鑄出民權腦。算此生不負是男兒，頭顱好。荊軻慕，咸陽道。聶政死，尸骸暴。儘大江東去，餘情還繞。魂魄化成精衛鳥；血花濺作紅心草。看從今一擔好山河，英雄造。

菩薩蠻

燕支山上花如雪，燕支山下人如月。額髮翠雲鋪，眉彎淡欲無。夕陽微雨後，葉底秋痕瘦。

生小怕言愁，言愁不耐羞。

曉風無力殘楊嬾，情長忘却遊絲短。酒醒月痕低，江南社杜啼。擬魂銷一捻，願化穿花蝶。簾外隔花陰，朝朝香夢沈。

二五 李拙康弼詞

紅娘子次韻酬劍華

天末寒雲禪，庭角涼蟾墮。岸柳拖金，江梅破玉，風光正可。記當年懷愛到忘形，一聲聲卿我。鸚鵡金籠鎖；鴻雁瓊樓過。文錦傳情，華箋含怨，看看無那。却教人烟冷月殘時，醉懣懣孤坐。

二六 李焘夢小白詞

一痕沙 閨思

對着一牕明月，萬種幽思交集；欲繡小香囊，贈檀郎。還是繡叢蘭葉；還是繡雙蝴蝶；還是繡鴛鴦，細思量。

金縷曲有所別

話到還鄉語，惹渠儂玉顏憔悴，歌聲酸楚。從古歡場難爲別，况復多情似汝。知此後何年重聚？縱使精魂能結夢，只愁他夢也無憑據。誰省？夢中路。寸心深悔當初誤，歎今番去時錯字，來時已鑄。不向雪泥尋舊印，那有者般離緒。怎再敢歸期又阻？萍跡倘教留十日，更應添幾許相思苦。強忍淚，掛帆去。

昭君怨

者樣玲瓏嬌小，恰似依人飛鳥。愁極轉無言，惹人憐。問到渠儂年紀，悄指闌干十二。含笑一廻眸，會心不。

菩薩蠻

携手碧桃花下立，要將幽怨從頭說；欲說又徘徊，防他小婢來。靈心思入細，隱語成詩謎；字字悶葫蘆，檀奴解得無？

金縷曲 題楚僮吟

咄咄寒芒射，羨郎君一枝健筆，盤旋揮灑。時泣時歌時感慨，時怒時嬉時罵，一任汝性靈揮寫。醉後與酣還澗墨，似滔滔銀漢從空瀉。當紙買，洛陽價。曲高未必知音寡，休長此吟風嘯月，潛身原野。氣魄心胸如許闊，大可馳驅戎馬。况國勢江河日下，絕代英雄宜樹立，但篇章沉溺何爲者。須學彼班超也。

二七 杜羲仲密詞

滿江紅 夏聲雜誌題詞

渭北終南，可仍是漢家所有。眼見得河山如此，那堪回首。古道荒山秦殿月，亂烟殘樹隋堤柳。想男兒立志飲黃龍，一杯酒。頭顱好，莫孤負；亡國恨，君知否？看前朝奇禍，數逢陽九。華嶽巍巍接霧起；長城脈脈連雲走，借毛錐權代舉烽烟，警刁斗。

執王關中，重收拾舊時大夏。曾記得山河百二，金樓玉瓦。豐草長林居禽獸，籬關深石走胡

馬待何年重睹漢衣冠，歸王化。鼓吹力，如江瀉，烽烟起，徧朝野。看中興男子，追踪五霸。慘淡雲屯汾水外；淒涼月冷崑崙下。試鳴鞭警衆氣，吞胡聲聲殺。

金縷曲 弔亡友姚劍生

回首唐宮闕，蒼蒼蒼天荆地棘，是何風月。離外黃花顏色慘，往事那堪再說。最傷心金陵霸業，忍聽胡笳頻斷續，助秋聲悲泣還嗚咽。種族恨，重重結。相思魂夢何時滅？念年來友仇未報，眼中流血。麥秀黍離憐故國，漢室金甌已缺，更無人海邊仗節。燕子樓頭歌舞勝，嘆新亭名士前生孽。哀二帝，音塵絕。

二八 汪文溥蘭皋詞

大江東去弔廣州，死難七十二烈士，用東坡原韻。

殲良胡酷，霎那成宿草，痛哉英物！風馬雲車來往處，燐火宵飛石壁。碧血殷山，赤虹貫日，白骨噴皚雪。九京游想，鬼雄還是人傑。回憶電掣雷轟，犁庭掃穴，叱咤暗嗚發。大纛高牙空眼底，

拉朽摧枯齊滅。天妬奇功，問天不語，怒指衝冠髮。毋忘在莒，年年記取今月。

英雄寧死，要河山還我，當年之物。一十二旬軍再起，取次功成赤壁。灑酒靈旗，椎牛銅像，白者衣冠雪。招魂來下，故人多少豪傑。滿眼流水華輪，游龍駿馬，意氣風雲發。整頓乾坤餘子在，往事空譚興滅。化鶴歸來，尉佗城畔，山縷青於髮。傷心憑弔，珠江獨酌明月。

滿江紅送蛻庵北上

綠葉濃陰，春已逝斜陽又晚。來料理瓊筵樽俎，翠箋腸斷。同是天涯芳草客，還驚客裏如雲散。看王郎斫地不成歌，豪清減。歸燕杏，簾空捲，龍化也，延津劍。儘青衫澆酒，淚痕相半。意氣當年依舊在，鬢絲無那星星亂。待殷勤祖帳上東門，江帆遠。

八聲甘州 春暮愚園登樓有感

正春濃酒困渺愁予，輕雲弄晴洲。記當年油壁，琴臺品茗，釣渚臨流。無賴東風重到，獨客怯凝眸。莽蒼蒼塵感，兜上心頭。寂寞奮時啼鳥，賸柳昏花暝，懊惱清遊。面回廊千步，有否屢痕留。水晶簾瓊鈎起，又斜陽無限怕登樓。明月有，更愁閒笛，吹徹伊州。

醉江月 吳季從長沙來，爲告西池近狀，月夜倚闌，追念疇曩，愴然有作。

闌干斜凭，正淒清明月，誰家吹笛。紅豆飄零無限恨，重訊桃根消息。綆斷銀瓶，臺空玉鏡，怕把前塵憶。澆青衫是，酒痕淚點同滴。人說小杜當年，風流才調，比東山安石。因甚羅敷還未嫁，珠斛不曾量得。問洞庭湖，有幾多水，水與愁寬窄。早知分北，舊時真悔相識。

亂頭粗服，記牽蘿日暮，那回初見。不許蕭郎成禁樹，爲縛靈犀同繭。半晌含愁，幾番欲語，廻避烏龍犬。又申申冒，女嬃長舌能卷。多謝殘霸宮城，客星帝座，把赤繩牽轉。分付秋來烏鵲翼，翼翼填河如綫。無那神山，擎舟欲近，風引帆仍斷。去年今日，滄桑一霎移換！

風懷如昨，看單衣越布，蘇門長嘯。大好江山無恙否？一笑玄黃草草。射虎將軍，乘槎仙客，不分江湖老。上頭千騎，重來還問青鳥。况是依舊無郎，小姑居處，寂寞春難曉。試把環兒羅帶約，說與檀奴知道。待不相思，怎能消遣？往事愁多少。桃花洞口，他年休誤蘭棹。

大江東去憶舊

當年雛鳳，東諸侯何物，敢言金屋。再世玉京貧人道，儂也夢蕉覆鹿。繡箔愁風，清鈴泣露，兩賦河梁曲。空持方外，馬龍鸚鵡拘束。迴憶吹玉胡麻，餉珠仙珮，密意幽歡促。說是無緣鈿合在，未許成陰葉綠。不說無緣，者番勞忤，又怎青衫獨。夜來倩影，茜羅窗裏橫幅。

消息有感，集秀水詞句。

如此江山，幾人流涕把莓苔。掃寶鏡塵昏；金仙淚盡，六月長安道。曾聽吹簫，難邀夢雨，定笑畫眉人老。問長途斜陽瘦馬，止記得思歸調。老去填詞，空中傳恨，摺破麻姑仙爪。百尺紅牆，五湖秋水，何處無芳草。青兕多才，銅駝結伴，吟得井梧秋到。又疏影月明如畫，露濃風小。

柳梢青集秀水詞句。

沈沈此夜，夜來曾見，十分妖冶。凝想當時，雲鬢愁擘，畫工傳寫。兩峯依舊青青，又誰對芳容播諾。人面重門，更無消息，鈿車歸也。

翠樓吟丁戊之交，聞南北爭岳州有感，用姜白石均。

胡馬窺江，亡秦三戶，天驕未必天賜。洞庭張樂後，甚魚鳥都逃筆吹。君山飛峙，賸霧鬢風鬢，朝來凝翠。湖山麗，錦帆過處，浪鱗鱗細。細柳誰是將軍笑，棘門灞上，真同兒戲。大隄腸斷曲，對雄戍巴丘千里。醇醪風味，那得似當年，周郎豪氣。高樓外，爲招黃鵠，半川新霽。

二九

汪兆銘精衛詞

臺城路題江仁矩六朝花管齋填詞圖

旗亭誰擅銷魂句，花間夢痕呼醒。月語情尊，酒除英氣，湖海詞場分領。鄉關較勝，有隱隱鷗波，萬紅圍定。畫裏琴尊，幾時遲我繫烟艇。珠江隔年小別，記鈿箋笛譜，都負游興。之渙雙環，丁娘十索，悄憶朱闌低憑。陳屏柳井，照潘鬢江花，舊人能認。共探雲藍，碧桃開日等。

前調贈黃椒升

廿年聽雨江南客，酒醒却忘歸權。喚曲言愁，慰花博醉，都算狂遊草草。吟邊側帽，祇燕燕鶯鶯，與儂傾倒。閱遍關山，清才那似故人好。暮波憐負舊約，問玉臺寫韻，訂否遺稿？竿燕驚秋，斂蟲弔夢，併作安仁哀悼。塵寰一笑，笑圓月天涯，幾番年少。明鏡相逢，鬢絲添白了。

金縷曲

別後平安否？便相逢、淒涼舊事，不堪回首。國破家亡無限恨，禁得此身消受。又添了、離愁萬斗。眼底心頭如昨日，數襟期、夢裏重携手。一腔血，爲君剖。淚痕莫滴新詞透，倚寒窗、循環細讀，殘燈如豆。留此餘生成底事，空令多情傷憊。愧戴却、頭顱如舊。跋涉河山知不易，願孤魂、繞護車前後。腸已斷，歌又逗。

賣花聲紅葉

霜落晚楓丹，千里漫漫，斜陽如有無間。臨水也知顏色好，只是將殘。秋色陌頭寒，幽思無端，西風來易去時難。一夜杜鵑啼不住，血滿關山。

百字令甲寅七月，登瑞士碧勒突山絕頂，遇大風雪。

冰心一片，好携來長在，玉壺中住。應是仙峯天外秀，不受人間塵土。四遠微茫，一筇縹緲，白了山中路。披烟下望，青青鬢黛無數。還笑初試荷香，又吟柳絮，萬象更如許。石磴幽蘿神自峭，慣與長松爲侶。水佩生寒，風裳自捲，人與花同舞。明湖淺大，醜顏應爲君駐。

蝶戀花民國五年秋日，得國內友人來書，道時事甚悉，悵然倚聲。

雨橫風狂朝復暮，入夜清光，耿耿還如故。抱得月明無可語，念他憔悴風和雨。天際游絲無定處，幾度飛來，幾度仍飛去。底事情深愁亦妬，愁絲永絆情絲住。

三〇

沈次約劍霜詞

醉吟商用白石韻，寄懷劍芒。

一片春雲，縈我離愁萬縷，故人何處？
分付雙魚去，別有情懷難訴，問天無語。

羅敷媚 席上贈某姬

盈盈三五雙垂髻，雪樣聰明，花樣伶儻，最是泥人語似鶯。
眼波澄碧梨渦小，窈窕身輕，豚豚含情，步又回頭喚幾聲。

御街行 納涼

夜涼月白天如水，露滴荷衣碎。眞珠簾捲好風來，一角星河斜翳。高樓長笛，聲聲悽惻，引起離人淚。
流螢幾點移花砌，訝是星光墜。短檠明滅篆烟微，領略孤眠滋味。夢回枕上，新愁舊恨，拋却渾無計。

三一 沈宗畸 南雅詞

洞仙歌 有題

銀房寂寞，鎖嫩寒如水，不去尋芳耐憔悴。况日長似歲，夜永如年，那禁得翠袖熏香孤睡。晚來無氣力，薄飲些些，半盞葡萄便沈醉。欹枕悄思量，小夢荒唐，還早被罡風吹墜。纔記得分明又模糊，賸一樹櫻花，想伊柔媚。

湘簾放下，倩孤檠低照，一朵幽花向人笑。者相思滋味，懊惱情懷，怎生地寄與那邊知曉。歸期明日是，小婢寒帷，錯問歸來恁般早。鸚鵡忒多情，渴了文園，干底事呼將茶到。聽窗外風吹雨瀟瀟，算坐看無聊，不如眠了。

薄衾單枕，向邯鄲尋夢，花底迴身抱么鳳。被庭蕉打雨，簾蒜敲風，暮驚起更鼓譙樓聲動。醒來無覓處，牀背銀屏，返照蘭釭嫩紅凍。摸索墮釵痕，脂粉餘馨，又嵌入愁人心縫。鎮展轉匡牀不成眠，怕捱到天明，歸期仍誑。

紗窗淡白，有一鶯啼起，百鳥和鳴亂如涕。把銀荷熄了，寶蒜勻將，悄思想那處曉妝成未。花梢遲日上，一樹嬌棠，辜負東風尙沈睡。牆角走鈿車，一步還差，早門外烏龍先吠。爭知道相逢又非他，鎮立盡斜陽，櫻桃簾底。

銀瓶索酒，拚今宵依舊，獨醉孤眠再消受。待明朝撤去，隔歲歸來，也教你禁着幾番僂僂。

三更人靜久，忽地華燈，簇擁魚軒轉屏後。小婢笑先迎，說道歸來，怎推到者般時候。尙一晌俄延卸嚴妝，渾不管紗窗，曙光將透。

鶯啼序 自題塞上雪痕集，用夢窗韻，庚戌冬日客雞林作。

多情暗香燕子，款尋常繡戶。任猜準，曾啄巢痕，夕陽紅賺來暮。睇春倦，寒枝試蹴，棲鴉已滿西園樹。更銷凝，還怕垂楊，向人吹絮。辜負芳時，借酒潦倒，又漫天冥霧。夜初定，窮巷沈悲，故人工製純素。啓冰奩，金針鏤却，未堪摺新翻花縷。暮年心，攜證江關，舊時鷓鴣。蕢風餞草，雁字箋天，計程悵夜旅。睡未穩，寒笳橫迸，曳醒秋魂。夢窄鐙僵，標牕蟲雨，榆關雪駕，遼河星爨，哀鴻沈影沙洲宿。正微臣掩淚倉皇渡。松花自綠，江流半壁淘殘，汗血點點灰土。羈栖恨積，手拂吳鉤，願臥薪藉苧。痛迤邐，西風吹大沃野牛羊，搶（上聲）鷄爨居，駕鵝酣舞。吾曹剩有，懷中騷怨，相逢東島吟歲晏，耐繁霜，春被秦箏柱。他年歌鞞雙鬢，爲問何戡，舊人在否？

西風掠殘鳳紙，惹銀蟾瞰戶。坐閒懶，飄泊雞林，誤人邊氣垂暮。盼霜信，孤鴻叫月，珠沈海底疑無樹。儘銷磨，一（作平）片雄心，任猜泥絮。歌哭蒼茫，鬢影瘦損，耐香塵酒霧。幸無恙，寒入詩肩，玉兒來賺縑素。小游仙，揚州夢覺，媚香脣，詞填金縷。尙能狂，遙和秋笳，怕鷺鷥。斜陽耐老，

畫角還吹，問愁在逆旅。腸斷也，日邊雲合，萬里冰霜，漫怨朝陽，試歌零雨，山圍王氣，碑鏤忠靖，（
 余有弔長忠靖詩）胡雛憑眺誰能識？？ 蔘長驅淺涉投鞭渡。新亭望極，微嫌淚墜無端，正錯尙是
 吾土。南溟震響，蕩激風雲，似振枯挫芋。歎泆泆，中原多事，大好陪都，柳媚花嬌，棟飛簷舞，春歸
 詔我。流連佳日，吟壇安穩諸競病，啖蛤（作平）蚶，差勝江瑤柱。商聲分與琵琶，試檢青衫，淚痕浣
 否？

水龍吟 吟白蓮，用玉田韻。

一從解佩人歸，湘泉零落閒風露。生來自潔，何曾見慣，吳歌越舞。莫問三生，隔紅身世，付他
 鷗鷺。想夜涼風定，飯依淨社，香自在，空明處。如見玉兒須妬，幃冰紗望來疑誤。分明記得，水晶
 簾底，窺人欲語。莫是湘妃，近來新寡。臉波流素，怕娟娟倩影，翠裙化蝶，雙雙飛去。

好事近 近五月望日夜坐

槐綠漸成陰，幾陣落梅疎雨。窗際偶窺涼月，記今宵十五。香爐篆冷藥爐溫，閒來自調護。
 靜對殘燈無事，數禁門更鼓。

菩薩蠻 信封

千卿底事纏綿意？爲誰辛苦相思寄？宛轉個中詞，問春春不知。何嘗輕洩漏，出入君懷袖。喚得薄情歸，化爲蝴蝶飛。

斷腸語盡愁滋味，違心却寫平安字；畢竟不曾瞞，墨乾淚未乾。紫泥鑄小印，便是前身影；顛倒篆鴛鴦，可憐雙不雙？

烘乾蠟淚胭脂血，指痕掐作纖纖月。印臂不須盟，妾心金鑄成。唾花凝紺碧，入手須珍惜。

容易莫開函，絨時帶淚絨。

江南好題日本小紈扇

團團扇：巧製出扶桑。輕研雲牋湘水淨，薄裝黃竹楚詞涼；宜伴紫荷囊。

團團扇：持贈意云何？白羽空揮名士淚，紅牙留拍泰孃歌；一曲定風波。

團團扇：撲蝶憶前期。搏就相思攜取便，題來小字合歡宜；珍重入懷時。

鷓鴣天

自信傾城碧玉姿，小家妝束也相宜。汝南一去無消息，腸斷東風舞柘枝。情切切，恨絲絲，

下牀羞見舊腰支。含情寄語金閨伴，珍重葳蕤未嫁時。

浣溪沙 書成容若悼亡詞後

未必他生會有期，他生還恐再分離，不因情重不成痴。得嫁才人甘早逝，轉從幼婦博新

詞。零落苦雨納蘭詞。

豈獨潘郎鬢有絲，紙錢蝴蝶一般飛。傷心何況是無題。埋恨早知無隙地，含愁未敢咏新

詩。此情除是枕函知。

祝英臺近 自題亡妾趙靜其哀辭後

笛聲酸，燈影碎，落筆便淒唳。變徵含商，此曲令人醉。明知多恨傷生，語衰近識，奈無計消除清淚。甚無謂，算來中酒悲詞，總非者般味。纔下心頭，一語又鉤起。試看歷歷中原，亂愁無際，更何處覓埋愁地。

薄命女

花命薄，纔過春寒風雨作，枉把春耽閣。昨日被風吹放，今夜被風吹落；花自無言風自虐，疼煞金鈴索。

花命薄！百計求春春不應，無藥醫花病。環珮珊瑚夢杏，簾幙沈沈人靜；花影搖窗風不定，

疑是花魂醒。

霓裳中序第一 春事遲暮，燕子不來，乍丁庭除，淒然有作。

烏衣舊第宅，亂落香泥留蠹壁，新燕却無信息。賸池館墜紅樓，臺黯碧，尋踪問迹，悵好春遲暮誰惜。沈吟久，杏梁絳縷，隱約舊曾識。愁極漢宮詞客，枉費了枚生賦筆，傷心惟有雨泣。冉冉斜陽，漸上簾額。喚春無氣力，又瘦盡游絲數尺。歸來未，江南江北，麥飯奠寒食。(明日清明，擬攜兒女往亡妾殯宮。)

露華

綠牡丹一種，花瓣濃厚，碧玉弄姿，綠珠初嫁，媚烟嬌日，旖旎端莊，宋七家中無詠此者。用中碧山桃花韻倚之。

綠華去後，厭厭霜太淡，重展春魂。扶頭酒醒，不留些子脂痕。片片石華新剪，暈睡茸凝上湘裙。春水淨晴波縹色，爲灌芳根。牙牌細鐫香字，是金谷良家，碧玉名門。調鉛掃黛，幾番燕曉鶯昏。倒掛錦屏么鳳，孕豔香飛出前村。鬢髻擁因風漾，縹緲軸雲。

水龍吟 白蓮用碧山韻

碧霞冠壓芙蓉，花宮喚起飛瓊舞。瑤池舊夢，除非素魄，無人會語。淺抹東家，淡粧西子，未窺先許。慕一鷗飛近，波明雪豔，驚鴻影翩然顧。多少翠盤珠雨，孕穠胎玉谷。誰訴芳心冷淡，莫歌蓮子，秋來更苦。珮影搖波，機痕鈎月，浣沙人去，賸門前一片，橫塘淒咽，奏湘雲譜。

蝶戀花

斜日闌干妝閣靜，欲繡鴛鴦，宛轉羞交頸。描就孤鸞臨玉鏡，賺他一刻雙雙並。回首紅芳憐共命，好夢如烟，此意無人省。重向冰奩尋舊影，女牆山斷殘雲冷。

柳絮顛狂春似醉，莫遣沾泥，拾起裝羅被。細剪綠雲和雪綴，花陰留蓋鴛鴦睡。團做相思揉作淚，撒手風前，墮地還分碎。臉暈紅潮眉斷翠，低頭不覺金釵墜。

昨夜江頭風送雨，滿院香泥，竟日無乾土。梅子心酸蓮子苦，個中滋味儂和汝。短短棠梨三兩樹，調舌鶯兒，也學人言語。說到無心心楚楚，低頭暗誦凌波賦。

三三一 沈昌眉眉若詞

探春慢

亞子枉顧，因與次公詠霓泛舟至其故宅，遍歷勝溪草堂，養餘齋，瑞荆堂，聽春樓，諸處，蛛網塵封，居無人居。壁間糊嘉道時名流詩章，皆與古槎先生投贈之作。惜蠹蝨過半，不堪卒讀。坐石磴上，劇談半晌，俯仰今昔，慨焉係之。是日村中適有養神之舉，笙歌聒耳，徒亂人意。乃偕數子攜酒薄飲而返。填此志感。

村與雲深，路隨波遠，閒鷗三兩尋到。闊水通橋，長廊繞屋，花木一庭嬌好。石磴停尊坐，乍驚起檐前幽鳥。是誰糊壁清詞，鼠殘蟲蝕堪惱。何事天涯遊早，儘春老休歸，重門深鎖。舊德猶存，草堂無恙，今日纔停短櫂。世事滄桑變，愁聽這笙歌喧鬧。薄飲低吟，人生如夢初覺。

高陽臺 庚戌上巳後六日，亞子自魏唐歸梨，道出蘆中，阻風留泊，醉後賦此奉贈。

兩槳烟波，一牀書畫，倦遊人倚孤舟。十里分湖，長天秋水同浮。東風不與周郎便，誤歸期停泊蘆洲。驀相逢，只道寒暄，不道離愁。酒香茶熟人來候，况數年闊別，小作勾留。醉月飛觴，歌呼聲撤高樓。奇緣萍水無端合，儘連床共話難休。且商量，文社因緣，詩社風流。

清平樂

辛亥夏五望日，亞子偕叔度、織雲諸君泛舟來蘆。連牀話舊，致足樂也。惜一宿卽去，苦留未得，爲成此闕，以誌鴻爪。

布帆風緊，閒泛分湖艇。杯酒憑誰堪共飲，老友蘆中瘦沈。一宵蠶處蚊吟，明朝去去難留。目斷烟浮水闊，南蛇口外歸舟。

買陂塘題石子近遊圖

望江南湖山佳處，風朝月夕曾至。年華似水東流去，臘屐一生能幾。遊倦矣，借圖書癡心猶作漫遊計。烟雲萬里，看魂魄有靈，脚跟無綫，踏遍娜嬛地。靈芬老，積得買山錢未？神蘆先爲之記。胸上塊壘成邱壑，這是才人通例。天下事，算件件真真假假都如此。長公不死，料意外奇逢，夢中樂趣，一笑同遊戲。

換巢鸞鳳題亞子分湖舊隱圖

尺幅新圖，認蒼茫烟水，中有先廬。荒祠桃已謝，香塚草全蕪。楔湖一去冷分湖。廿年不問，堂空燕徂。歸生出，嘆文社騷壇無主。羈旅，此例古，淒絕靈芬底。竟家何處。衰柳依門，叢蘆拂岸，疇抱膝吟梁父。雅願南陽事躬耕，賃三間屋，妻孥聚，待君來，好聯牀共話風雨。

三三 沈汝瑾石友詞

臨江仙

小閣殘燈半燼，巖城更鼓三搗；月明低度碧窗紗，一枝花影上，猶有並棲鴉。
青鳥不傳消息，錦屏隔似天涯。鼠姑風裏夢香車，纖肌鬆玉釧，不是舊容華。

鬲谿梅令

壬辰二月九日，偕友至北墅觀梅。時趙非昔丈往吳門不值，徘徊花下，成此一解。
冒寒結伴叩柴扉，鳥驚飛。一晌花間趺坐戀斜暉，冷香吹滿衣。好花開落不多時，願春遲。
莫遣黃昏風雨苦相催，主人遊未歸。

三四 沈雲秋凡詞

乳燕飛時事有感

天帝何時醉，歎東南號稱財賦，萌生憔悴。處處山洪驚暴發，沛若江湖浩瀾，渾不管田廬傾圮。官吏橫征苛似虎，忍坐看四野哀鴻淚。還說甚，瘡痍起。吁嗟朝局今如此！最傷心路權礦政，他人越俎。乳臭軍容空自壯，日蹙金甌百里，遑肯顧廉隅簞篋。民命草菅何足算，好家居痛被織兒壞。問誰作，中流砥。

調笑

蕉萃蕉萃，蹙損幾分眉翠。秋風江上芙蓉，贏得佳人睡慵。慵睡慵睡，悄背銀缸搵淚。牛女牛女，遙隔天河無語。花間拜月深深，乞與人間巧針。針巧針巧，繡出鴛鴦懊惱。秋好秋好，孤負韶華草草。井梧月上黃昏，莫放風前酒尊。尊酒尊酒，萬事到頭何有。

金縷曲獨宿盛校避暑

如許清涼地，悄無人間門芳草，十分幽邃。性僻不堪囂市溷，難得天公位置，愛跂脚北窗小睡。生恐南柯容易醒，喚松風翦斷蟬雙翅。桃源外，有誰記。壯懷消盡名和利，笑紛紛浴塵揮汗，茶然困躓。伴我嘯歌無一物，也祇乾坤噫氣。且打疊愁情恨意，倚樹看雲科跣坐，更舉杯邀月懽。

騰醉。疇領略，箇中味。

三五 沈礪道非詞

高陽臺 題五日紀程

縮地長房，乘風宗慤，雙輪飛過輕埃。碧洛晴巒，依依笑逐人來。南朝簫管今何在？付漁樵短
 笛酸哀。帶吟魂，花雨胭脂，廢井荒臺。江山一派鮮妍畫，似天然粉本，留待刪裁。百兩芒鞋，探幽
 踏破青苔。平添多少風騷料，逐征塵俯仰低徊。判安排，十笏險塵，五斗清才。

臨江仙

鱗雲如錦風如織，微茫天路迢迢。鷓鴣弦細撥莫成調，玉階凝悵望，蟲語伴淒寥。遙憶彩鸞
 遊戲日，仙緣偏值文簫，流香暗逗藕花彫。客愁揮不去，瘦損沈郎腰。

巫山一段雲

落日婆婆影，孤燈風雨宵，萬千哀怨苦相撩；噫氣薄層霄。目斷風雲散，神傷脾肉消，花明

柳暗又今朝；身世更無聊。

憶舊遊金陵感事

記天開異境，月華夜碧，燈火宵紅。山色南朝好，頓惹鬱鬱，踞虎盤龍。此間名士如鯽，抵掌說橫縱；集十萬橫磨，氣吞漠北，雄步江東。朦朧睡初覺，歎狀盡繁華，銷盡雄風。靜聽新蟬噪，似寫愁咽恨，訴與天公。潏潏大江流水，淘去莽英雄。待沾却村醪，臨風獨酌思無窮。

浣溪紗集李義山句

對影聞聲已可憐，聞聲不見隔飛煙；鳳樓迢遞憶鞦韆。前閣雨簾愁不卷，玉琴時動倚窗絃；一絃一柱思華年。

六曲連環接翠帷，靈風正滿碧桃枝；杜蘭香去未移時。見我佯羞頻照影，洞房簾箔至今垂；故教迢遞作佳期。

侍女吹笙弄鳳凰，今朝歌管屬檀郎；重幃深下莫愁堂。冰簟且眠金縷枕，淡雲輕雨拂高唐；盡知三十六鴛鴦。

只有高唐十二峯，西來雙燕信休通；碧簾迢遞霧巢空。別館覺來雲雨夢，月斜樓上五更

鑄翠衾歸臥繡幃中。

不信年華有斷腸，桂花吹斷月中香，謝家離別正淒涼。

曉鏡但愁雲鬢改，忍寒應欲試梅

粧；朱闌迢遞壓湖光。

羅薦春香暖不知，露如微霰下前池；木蘭花盡失春期。

閒倚繡簾吹柳絮，回頭更望柳絲

絲；莫愁還自有愁時。

雲鬢無端怨別離，相思樹上合歡枝；流鶯上下燕參差。

我是夢中傳彩筆，收將鳳紙寫相

畢；楚天雲雨盡堪疑。

女冠子 風前小立

東風無計如虎，騰拏大地爲誰忙？春影偏憐瘦，楊花着意狂。

碎紅愁滿徑，揉碧認前塘。心

脾清一霎，落花香。

滿江紅 題芳墅四十述懷詩後

大好年華，強半屬愁邊閒度。問斯世英雄誰是？江山非故。海上釣鰲存壯略；命宮磨蝎棲前路。望神州曼衍混魚龍，籠烟霧。滄桑影，撐眼數；雲霄志，拊髀訴。奈迷陽滿徑，不堪展步。豎子于

今皆鼎鼎，美人依舊嗟遲暮。進君觴介壽祝君前，童顏駐。

三六 沈毓清詠裳詞

金縷曲寄故鄉諸友

草草驪歌唱，陡惹起閒愁萬斛，離思千丈。歡會儘多離別暫，何必郵亭祖帳，反贏得淒涼悲愴。悄向楊公祠畔過，正諸公一枕羲皇上。臨去也，回頭望。矯情不願他人謗，恨途中風風雨雨，轉增惆悵。越水吳山行已遍，目斷蘆花銀浪，只辜負故鄉佳釀。我是多愁多病客，恐牽衣折柳神搖蕩。此懷抱，應相諒。

金縷曲

題芷畦柳溪分枝詞

文獻淪亡久，問前朝滄桑遺影，有誰知否？偏是使君能好事，藉甚錦心繡口，閒寫出柳溪靈秀。瓜架豆棚兒女話，却低徊似唱鈞天奏。這便是，扶輪手。我儂一讀一懷疚，甚無端年來失却，考亭老友。（指朱頌平先生君詞中曾及之。）一水分湖衣帶隔，朝夕何難攜袖，誰信道斯人不

壽遙向北姚河畔望，看屋梁落月難消受。憑君筆，傳不朽。

三七 狄膺君武詞

長相思慢 秋柳屬題風雨梨花圖

靜院香消，蓬門翠減，亂飄幾片輕雲。疎簾浸影，冷砌凝英，依稀如舊黃昏。玉笛偷聞，譜春風
嫵娜，吹返離魂。綺袂絕紅塵，趁慵疎浴女精神。怨桃笑依然，燕飛如故，盈懷悵恨誰論。零脂和
細粉，聽摧殘惹草遮茵，總是沈淪。嗟薄命交枝忍分。看年年明妝褪雪，都應腸斷伊人。

漢陂塘 題亞子分湖舊隱圖，用郭頻伽自題山陰歸權圖韻。

問分湖殘陽衰柳，舊時釣侶歸未。鷗盟燕影都休了，寂寞荒村桃李。圖畫裏，有一葉扁舟，載
著雙山髻，鳴夷堪掣。看萬疊烟波，幾重風雨，沒入篷窗底。風騷者，最是吳江亞子，耆卿名字須
賜。念家山破愁千縷，詩思蒼茫雲水。歸去矣，賸亭閣無多。感慨生梨里，從頭數起，比前代靈芬，浮
家泛宅，勝迹令人記。

三八 周宗澤景瞻詞

桃源憶故人

槩子匪石以詞唱和，仿吳江鈕玉樵七律，嵌「雨絲風片烟波畫船」八字於句首，余亦效之，並用匪石韻。

雨餘柳陌行人斷，絲拂亭長亭短。風弄春禽百轉，片地羣鶯亂。烟花三月當中澣，波綠一聲河滿。畫閣傳歌非遠，船傍紅橋岸。

蝶戀花

東風着意吹春去，便又無端，容易將春誤。紅淚拋殘無一語，年來怕作傷心句。門外聲聲啼杜宇，欲住都難，恁肯留他住。芳草王孫天欲暮，明年珍重來時路。

點絳脣

小立庭除，簾前暮雨風聲透。燈昏時候，何處慵賒酒。欲泛秦淮，無奈人非舊。思量否？不堪

回首，空歎梅花瘦。

三九 周亮天石詞

鵲橋仙 七夕

愛河穩渡，情天小住，一夕風波無阻。年年只盼是今宵，盼到了魂消幾許。却緣耕織，任他離合，難得匆匆一敘。明朝分手各天涯，又悵望美人何處。

小園千傷春

當年不肯負春宵，春到儘魂消。情海春深，愛河春暖，春事阿誰嬌？今年解識春滋味，春夢去迢迢。簷際春風，簾前春雨，春意總蕭條。

浪淘沙 武昌懷古

血染夕陽紅，黃葉丹楓，舊時花草弔吳宮。王氣黯然收眼底，愁煞東風。長劍倚崆峒，鳳去臺空，遠天山色有無中。嗚咽大江流不住，淘盡英雄。

金縷曲落花

真箇銷魂矣，這連宵風風雨雨，斷腸聲裏。狼藉胭脂紅似血，欲舞還飛不起。嘆春事飄零如此，準備護花鈴十萬，奈天心沈醉潭難恃。空懊惱，風流子。悽悽慘慘情何似，一年年埋香瘞玉，誰來料理。付與吳儂身世感，薄命傷懷而已。有幾輩傾城名士，願化枝頭雙蛺蝶，怎和伊守着空枝死。才算是，真知己。

買陂塘次鐵齷韻

帶幾分離情怨緒，軟紅塵外，飛絮垂鞭公子初相識，便已芳心相許。天欲暮，君不見金鈴三百爲花護。愛河深處，有柳石窺禽，迴腸蕩氣，不肯輕輕去。些兒意，盡在傾城一顧，佳期那肯錯。誤。畫中粉黛嬌無語，春上眉梢記取。休只慮，明日裏秋風，扇捐塵土。痴懷說與，但鎮日相看，低鬟淺笑，挽得吟魂住。

卜算子

昔日送郎行，珠淚傾如雨。明日郎留妾又行，別恨從頭數。好事折磨多，日日傷南浦。倘使情天缺陷無，應許媧皇補。

釵頭鳳

砧聲切，歌聲咽，關山一派秋消息。西風緊，雲天迥，雁字橫空，憑伊帶信，肯肯肯。音塵絕，休
 饒舌，相思萬種和誰說？珠簾靜，瓊鉤冷，捲上些兒，夜深扶病，等等等。

望江南

題亞子分湖舊隱圖

分湖好！收入輞川圖。桂楫蘭橈來復去，珠簾金粟有還無，舊事半模糊。
 分湖好！清夢繞菰蘆。文獻百年張健職，水天一角著吾廬，心與白雲俱。
 分湖好！招隱半狂奴。老鐵憶游歌樂府，靈芬落魄唱吳歎，吾道未容孤。
 分湖好！風景不曾殊。秀橋過尋釣叟，陳香閣畔聽啼鵲，鼓缶唱烏烏。

沁園春

題芷畦柳溪竹枝詞

兩笠烟蓑，垂釣汾南，風景不殊。借柳溪一曲，暫爲漁隱，竹枝百詠，付與吳歎。綺膩情懷，逍遙
 身世，落落高陽舊酒徒。且喚起，珠簾金粟，重唱鴛湖。劫灰換盡菰蒲，把舊事滄桑問狗屠。記黃
 楊舉義，丹心炳耀，孫吳接踵，碧血模糊。天付遺孤，圖存不朽，正氣於今尙有無。莫但說，鐵簫鳴咽，
 吹老靈胥。

長亭怨慢

再休問青鸞音信。紅淚淘愁，黃金鑄恨。往事成塵，墜歡如夢，又誰怨。慵擡倦眼，君不見殘陽岸，花雨落繽紛。幾點是飄茵墮瀾。芳訊已人大隔絕，長日賺儂孤悶。鸞飄鳳泊，更何處心心相印。悔草草鰥誓鷓盟，枉辜負揚州何遜。試聽不如歸，杜宇聲聲來勸。

醉妝詞

來何處？去何處？太息春光遽。去何處？來何處？只是無憑據。

長亭怨慢

更何處紅牙按拍，一度思量，十分悽惋。喚起春魂，可能重唱廣陵散。宵闌夢醒，將此恨從頭算。塵海著吟身，密密被愁羅纏絆。腸斷，使狂來說劍，敲破唾壺誰管。因鸞斂鳳，禁不住，心情撩亂。正三月草長鶯啼，早又是韶華偷換。環珮杳無聲，我欲高游銀漢。

鳳孤飛

輓胡淑娟女士

春戀六橋三竺，心共湖山壽。况又玲瓏似藕，天亦妬君知否？修到人間才子婦，問何事忽忽分手？燈影書聲須記取，怕不堪回首。

一夜玉樓風緊，吹散鴛鴦偶。黯盡陌頭楊柳，何處覓金盃友？
吟舍無端驚夢白，算此恨天
長地久。瑣語寄心應不朽，好生生相守。

長亭怨慢

早知道忽忽別也，情短情長，柳絲縈惹。乍可銷魂，又教分手怎相捨。搖鞭去矣，誰勒住青驄
馬。遮莫訴衷情，只背地瞞人偷寫。慵把這歡場夢境，趁着酒闌燈燠，沈思細想，怎猜透是真還
假。怕又被陌上東風，使吹散鴛鴦舊社。弱絮故撩人，還是漫天飛灑。

減字木蘭花

綠窗紅豆，香魂縹緲春歸後。著意思量，寄與情懷字幾行。情天難補，梅心酸透蓮心苦。悔
不從前，鸞鶴三生了宿緣。

憑肩軟語，深深嵌入心窩去。欲覓春痕，人面桃花憶此門。玉簫誰引，秦樓鳳杳西風緊。拋
却閒情，盪氣迴腸過一生。

南歌子

皓月窺羅幕，清光落綺筵，金樽檀板斷腸天；那待雙行紅淚落君前？

四〇 周偉仁人菊詞

意難忘無盡烈士紀念日

恨我飄流，這成仁紀念，全未歸休。空餘滄海淚，難報故人仇，後死責，羞不羞。奔走果何求！哭此日，淮陰國士，天地皆愁。羣陰搆覺偏周，恨含沙射影，鬼蜮多謀。睢陽應不朽，武穆復何尤。傷心事，沒來由，無故壞金甌。贖祠宇，荒荒殘照，冷到松楸。

桃源憶故人

槩子尊農匪石諸子仿銀玉樵雨絲風片煙波畫船嵌字體填詞相唱和，因亦效

雨中庭院棠梨瘦，絲柳剛眠時候；風吹落花春盡，片片鮮紅透。煙籠樓閣黃昏後，波樣相思怎受。畫出痴情縷縷，船繫經年守。

四一 周斌芷畦詞

蝶戀花 和巢南匯石

寒食清明都過了，借問東皇，還剩春多少？深樹殘陽鶯語老，落紅滿地無人掃。幾輩墜歡

何草草，鬢影衣香，辜負江南好。勒住花驄歸太早，縣縣綺恨誰知道！

桃源憶故人 用玉茗曲體和匪石原韻

雨餘柳色連還斷，絲裊離亭長短。風送流鶯百轉，片語無凌亂。煙雲霧鬢山新澹，波綠陂

塘春滿。畫裏詩情縣遠，船坐江南岸。

滿江紅 題李彝士十香詞

塵海歸來，也貯得滿囊珠玉。說甚莫英雄潦倒，亂離時局。鐵尺橫敲珊瑚斷，琥珀濃溢酒波
綠，問伊誰豔體擬無題，香黃鶴。高唐夢，賦難續，茂陵病，琴空作。有義山才，調追尋芳躅。金粉飄
零桃葉恨，檀槽淒咽柘枝曲。將琵琶傳遍冶春詞，江南北。

前調 贈詹天容疊前韻

一笑相逢，最難得其人如玉。且覓醉黃公壚畔，閒評棋局。歸去厭聞啼杜宇，招涼六月淞波
綠，比當年子晉夜吹笙，縵山鶴。何日聚，俊遊續。暫時別，離愁作。記名園愛儂，流連芳躅。紅豆相

思南國夢，斜陽滿路旗亭曲，指寥天陣陣起秋風，雁飛北。

前調醉後三疊前韻

潦倒英雄，肯終闕爾音金玉。况值此蜉蝣身世，滄桑時局。貫酒新豐，嫌市遠，家藏良韞浮簞綠；約同人沈醉月明中，招歸鶴。夷采薇，遺蹤續，憚種豆，悲歌作。徒問天搔首，中庭踟躕。淒絕樽前揮涕語，奈何笛裏伊涼曲，把雄心隨夢入風雲，到燕北。

前調重陽後三日東園雨中賞菊，示一民譽侯，四疊前韻。

淡淡秋光，也穀值一篇珠玉。况又是名園雅集，茶鐻棋局。倚檻溯洄，文水碧，開樽呼吸慈山綠。問何人月夜賦歸來，令威鶴。錢相國，誰繼續？曹徵士，留著作。指離離衰草，依稀高躅。瘦菊西風彭澤夢，垂楊細雨陽關曲，把十年來往事重提，談池北。

前調答鹵香，五疊前韻。

天籟飛來，一聲聲敲金戛玉。想正是茶餘酒後，詩筒棋局。簾外斜陽紅幾許，難分浙水吳山綠。把閒情倚遍畫闌干，招歸鶴。鹵香時在蘆墟，陶冶學校，校中有鶴歸來扁額。湖堤夢，遊誰續？水村景，圖誰作？慨風流代謝，寥寥高躅。淒絕文通離別賦，奈何子野淒涼曲，任梅花驛使帶愁

來，汾南北。

洞仙歌答陸丈鷗安七十五歲感懷詩，卽以爲壽。

霓裳迭詠，正陽春時候，一霎年華七旬又。笑白衣蒼狗，過眼滄桑，還贖否幾輩功名就？
歸來鶴也有，樹樹梅花，小暑無愁劍南叟。塵夢託鷗波，欲覺聞鐘，儘世外煙霞消受。問鄉味蕪鱸
近如何歌汾水清兮，上先生壽。

蝶戀花題心俠三姝媚說部

唱出庭前三玉樹，爛熳花城，管領誰爲主？兩字相思休認錯，瑤箋曾未傳私語。暗淚青衫
添幾許？最是無情，最是多情處。惆悵春殘風又雨，天涯芳草嗟遲暮。

菩薩蠻夏日驟雨迴文

半天飛鳥隨雲亂，亂雲隨鳥飛天半。涼氣引長塘，塘長引氣涼。碧翻荷葉葉，葉葉荷翻碧。
時雨急催詩，詩催急雨時。

碧窗夢題綠蕉吟館詞箋

夢得誰家鹿，閒庭種綠蕉。秋來風雨可憐宵，隔著紗窗人影一燈搖。

惜分飛送劍華入閩

十丈春潮黃歇浦，半是離愁別緒。杯酒旗亭暮，黯然相對無言語。此去嶺南須記取，多嘆
 荔枝幾個。留得餘甘住，時時好解相思苦。

一翦梅春病

萬種春愁帶病生，不是風情，却是閒情。懸懸芳訊盼蓉城，眼在窗櫺，心在簾旌。幾度朦朧
 幾度驚，想也無成，夢也難尋。燈花無焰冷孤檠，過了三更，到了天明。

踏莎行春恨

淚掛絲絲，腸迴寸寸，樓頭濁酒澆難盡。一天風雨釀春寒，蓉城盼斷番風信。
 杏靨含愁，柳眉鎖恨，杜鵑聲裏清明近。瀾花泥絮太飄零，韶光老去無人問。

摸魚兒題大覺鄉居百絕

去分湖北行卅里，澗湖煙景更（平）好。一村柳暗花明裏，僭署漁郎佳號。秋未老，正盼得江
 鄉風味魚蝦到，酒樽傾倒。任松菊盤桓，賦詩舒嘯。靖節歸來早。休輕笑，幾度人生醉飽，英雄埋
 沒多少。欄衫破帽斜陽路，賸有冬烘頭腦。心事了，賦就那百篇未定閒情草，愁思綿渺。舍市隱成

名，田家樂事，何處覓仙島。

臨江仙題更存綠波詞卷。

翦翦斜風中浦雨，客愁煮夢成絲。無憀情緒被君知。琅玕贈我，一卷綠波詞。幾度沈吟難下筆，上頭有個題辭，似曾相識轉相思。次公入座，狂態話當時。（卷首有邵次公題辭。）

長亭怨慢題筱墅沙湖釣月圖

乍催起浙東飛雨，燈火樓臺，舊停橈處。（予五年前曾至鎮海。）十里沙湖，是誰會約水雲住。洞簫聲滿，正月冷牌門路。苦笑玉樓人，我亦欲乘風飛去。春暮，數滄桑幾劫，忽忽歲星移五。菰蒲小隱，且儉覲瘦蛟潛舞。便逐得一舸鴟夷，問芳草天涯何許？對渺渺烟波，輸與瀛洲仙侶。

四二 周雲酒痴詞

望江南讀白門悲秋集書後

悲秋集，痛淚漬千絲。剩水殘山渾不似，秣陵城外黍離離，高唱走蛟螭。

滿江紅 開鑑草堂消夏卽事

晝永堂深，風來也。珊瑚敲竹。斜陽墮，藤棚如蓋，濃陰蔽屋。曲檻涼生胡蝶舞，方塘雨過芙蓉浴；更幾頭紅鯽戲青萍，頻翻覆。杜蘅紫，藤蕪綠，離騷卷，焚香讀。喜詞人墨客，頻來不速。角酒亭中邀逸趣；眠琴月下脩清福。笑塵寰幾輩夢惜騰，功名逐。

四三 周實 實丹詞

喝火令 追悼棠隱

鷓鴣相依久，鴛鴦小別難。茜窗並坐怯春寒。那料風風雨雨，玉樹邊摧殘。淚染襟成血，琴焚曲罷彈。幾生重覩佩珊珊。記得舊時歡，記得舊時歡；記得杏花天氣，紅袖倚闌干。

虞美人 春晝

落盡酴醾飛盡絮，春去無尋處。園丁那解惜殘紅，只有杜鵑啼血喚東風。閒愁閒恨難消受，酒冷燈殘後。簾前幾度問嫦娥，却笑嫦娥無語奈他何。

前調玄武湖上看花

菜甲花時光景艷，春被深黃占。（用洪北江詩意）閒愁怎遣杜司勳，且看湖光雨氣結成雲。今朝難得春猶好，莫更傷懷抱。碧桃一樹綠黃昏，恐有微波淡月共銷魂。

浣溪紗 游玄武湖同人菊作

畢竟詩成寄阿誰？偶來湖上輒題詩。（林逋詩句）此鄉真與此身宜。游子情懷飛絮似，美人心事落花知。東風何事蕩游絲。

羅敷媚

流鶯不惜啼聲苦，春滿兒家，郎住誰家？愁對階前夜合花。鸞漂鳳泊何時了！拋盡年華，銷盡才華，只悔當時一念差。

蝶戀花

雲鬢蓬鬆眉淡掃，楊柳樓頭，極目關河杏。剛喜前宵春睡早，今朝又被黃鸝惱。纔過清明時節好，一樹梨花，莫便漂零了。問道天孫年尙小，人間恨事知多少。

如夢令

九十韶光如電，莫把芳時看賤。日日盼歸期，盼到楊花飛徧。庭院，庭院，鬪煞春來鶯燕。

浣溪紗

玉勒金鞭取次過，春情兜的上心窩，相親相遠待如何？私語愛從眉上遞，熱潮流向頰邊多，思留思去且由他。

醉太平

星明月明，鐘聲漏聲。兩人一副心情，證山盟海盟。秋清夜清，魂輕夢輕。更持軟語叮嚀，莫南征北征。

蝶戀花

草色連天花委地，欲遣雙魚，報箇相思字。縱說封侯容易事，侯封到手華年逝。紫燕黃鶯爭自媚，非醉非癡，索去昏昏睡。安得郎知離別味，飲郎一掬珍珠淚。

一剪梅

百年歲月等蜉蝣，勸不遨遊，索性遨遊。誰家並轡騁驂驅，儂怕登樓，郎可登樓。鷓鴣聲裏柳花稠，盼殺歸舟，故緩歸舟。雙雙燕子解溫柔，爭說無愁，若箇無愁。

菩薩蠻

春寒自擁重衾睡，問郎可解相思未？
 若解相思，如何輕別離。
 平安偷禱祝，手擲金錢卜。
 風送客帆飛，幾時重送歸。

一叢花 秣陵春愁

鶯簫吹徧石城隈，瘦殺幾枝梅。
 王謝風流安在也，燕雙雙，依舊飛來。
 孫楚樓邊，莫愁湖畔，愁與水滌洄。
 當年六代好樓臺，都化劫餘灰。
 剩粉零金應不少，問何異，野馬塵埃。
 梁苑苔深，齊宮草長，耕出古瑤斂。

琴調相思引 秋海棠

斂手低頭月二更，相思豆子是前生。
 柔腸斷盡，賸得斷腸名。
 灑上靈芸紅淚點，模糊處認
 不分明。朱顏何限，薄命總輸卿。

念奴嬌 詠淚

向花私問，問生前此物，誰曾流竭？
 袖底臙脂襟上酒，一例模糊難滅。
 壯士途窮，深閨春盡，况
 值臨歧別。千絲萬縷，願風吹贈湘月。
 全是人世酸辛，此中滋味，消盡腸如鐵。
 何惜一傾千萬斛，

情情猶難完結。粒粒穿珠，斑斑濕竹，一霎凝成血。恐生紅豆，又教兒女嗚咽。

昭君怨 春草

游子仗誰調護，綠偏天涯歸路。幾輩踏青來，甚情懷？
 葬送齊梁金粉，牽惹古今愁憤。日日
 雨和烟，是今年。

浣溪紗 游玄武湖，同人菊作。

橋可憑依石可蹲，女桑人柳綠初勻；使須柑酒醉湖濱。
 白裕恰宜挑菜節，繡鞋端爲踏青
 辰；最難消遣是游人。

淺草微波日欲斜，且憑詩畫作生涯，（倩人菊繪湖村圖二）可憐塗抹費才華。寄語文
 禽防打鴨，關心采鳳恐隨鴉；與卿身世總飛花。

千頃湖波繞石城，每於休日踏歌行，山靈村女總多情。三月風光歸社燕，六朝春恨付宮
 鶯，明朝能否得晴明？

滿江紅 寄宗兄人菊

鬱鬱肝腸，難禁得懷人惜別。君記否互相標榜，周郎俊發。爾醉狂歌名士氣，挽強壓駿英雄

骨到如今憔悴在江潭，歌薇蕨。古今事，雲變滅，家國恨，鵲鳴咽。好光陰，付與馬蹄車轍。漢室疇能存伏臘，晉人自解談風月，歎吾儕磨劍十年心，憑誰說！

金縷曲 七夕傷逝

心緒繁如此，况又是流螢銀燭，夜涼於水。嘗盡人天離別恨，我亦銀河牛女。算薄命從來如紙，誰把沈腰潘鬢惜？向花前悶對雙星睡。疊疊恨，細思起。零歡墮夢無些子，只剩得哀情熱淚，千年難已。紅粉憐才非易，難得鍾情如是。直拚箇鴛鴦雙死，骨化形消甘泯滅，怕他生又墮情坑裏。腸斷處，夜闌矣。

水龍吟 吟題鈍劍花前說劍圖

十年奔走風塵，竟無位置英雄地。花光燦爛，劍光騰躍，豪情難闕。狐兔猖狂，鯨鯢吞蝕，青鋒誰試？任嫣紅姹紫，嬌嬈開遍，風月事休提起。聶政專諸而後，有何人更精此技？橫磨十萬，縱橫摧剪，那時狂醉。四座皆驚，羣芳欲笑，談何容易。算風流雄俊無雙，問膽落花神未。

前調題鈍劍聽秋圖

江山如此蒼涼，惹人無限離騷意。春光一夢，柳衰梧老，西風容易。木葉敲窗，芙蓉泣雨，淒涼

滋味。任紅橋簫管，華堂歌吹，也難喚春情起。况是蛩吟蟬咽，一聲聲使人腸碎。鏡前枕畔，更無
 休息，今宵難寐。宋玉詞哀，歐陽賦苦，古今同慨。更牀頭雄劍悲鳴，驀地墮南冠淚。

滿庭芳 夜聞蟲聲，不能成寐，起製斯曲。

不盡牢騷，如聞歎息，殘更獨對殘鐙。酒闌人散，嗚咽復分明。幾輩歡場垂涕，况王孫本住愁
 城。算終夜微吟低訴，總是不平鳴。憑他千載內，勞人逐客，孽子孤臣，積重重悲憤，何事干卿。抵
 死淒淒切切，把乾坤貯滿哀情。囑今後西風殘照，休作斷腸聲。

四四 易象梅僧詞

浣溪紗

影事迷離二十年，簾錢時節晚涼天；呢呢兒女小窗前。別後思量容有意，從前歡笑總堪
 憐；明明如月不成圓。

分得些兒玉臂涼，迢迢銀漢兩相望；捻痕和月認端詳。

解懽痴情甘學佛，爲妨清夢悄添

香新詞寫出總尋常。

一夜西風鬢有絲，花開花落繫相思；於今清夢也參差。半字不曾輕道着，三生修到未嫌遲；殘漏春風月上時。

四五 林之夏 秋葉詞

金縷曲 次韻答王庾樓

莫道知音寡，又秋風王孫珍重，越王臺下。魂夢牽縈多少事，細數皇王帝霸，聽吾子漁樵閒話，豪竹哀絲無限恨，豈等閑生受蟲沙口。傷心語，休提罷。寶刀入夜光盈把，莽神州風雲變幻多端謀我。海外尋常開戰衄，小矣冰河鐵馬。耐今日推尊粧啞，猛聽鼓鼙思將帥，歎健兒多少飄零者。天涯遠，孤懷夜。

四六 林百舉 一厂詞

百字令

百無聊賴，望紅塵盡處，碧雲滿眼。吟到了東環珮句，羞譜小樓連苑。乍見疑仙，頻看頓醉，夜夜深款。驚飛么鳳，游絲奈未能綰。世上誰不癡情？况經幾度，臨去秋波轉。一本纏綿冤孽帳，便是他生須算。避妬裝疎，消愁強笑，兩下原無舛。祇今一覺，夢回客裏孤館。

減字木蘭花 美人笑爲馮春航賦。

桃花一面，頓覺乾坤春氣遍。添上微渦，攝盡騷魂骨也酥。千金欲買，猶是淺人癡見解。怪得周王，夜夜烽煙弄萬方。

瑞鶴仙 題春航小影

羽衣天外落，想曲罷淒涼，舞條柔弱。仙魂正飄泊，自亭亭不語，似嫌情縛。善才懶學，乍迷離時妝勝昨。恍輕裾窄袖誰家，狹少五陵彈雀。綽約，憐儂何日？步挽香車，坐假坊間，櫻桃笑索。紅綃真個籠着，底一春負了江雲浦月，又把芳心暗託。看猶愁明鏡欺人，留塵拋却。

桃源憶故人 效葉子用匪石韻

雨珠碎打梨魂斷，絲掛蜻蜓簾短。風拗微歌悽轉，片坐幽情亂。烟鴻一月遲三泮，波渺江

南春滿。畫幅歸途寄遠，船泊離時岸。

清平樂 題子美集

梅魂菊影，夢幻梨雲境。夜夜春情纏未醒，偏又淚粧爭靚。千秋雲紫雙傳，名山絕業何年。

好意知非輕薄，如珠語却成烟。（下半爲陸郎曲感作。）

百字令 題亞子分湖舊隱圖

中華民國三年十月，訪吾友亞子梨里，得導觀其勝溪養樹堂祖居，堂爲古榭柳先生故宅。先生在前清嘉道間，以宿學負盛名，著養餘齋詩文集若干卷行世。既讀其書，復遊其地，不禁慨然嚮往其人！亞子更出示分湖舊隱圖及記，屬爲題詞。記中頗深移居之感，窮途客子讀之增歎。竊以大丈夫志在四海，不妨自壯，故詞反慰之。養樹堂廳事聯語有：「無多亭閣偏臨水，儘有樵漁可結隣」句。祠旁老柏，大已成圍，楚僮昂藏七尺之軀，抱之猶不盡，詞句蓋皆實寫也。

兼葭深處，露無多亭閣，是真勝地。特取樵漁來結伴，想見高人風致。養樹堂階，摩娑何限，舊跡蒼花雨。吾生恨晚，詞壇未拜盟主。但是寫入畫圖，移家非遠，莫動飄流意。他日新豐猶可作，

權當岐山鳳住。磨劍十年，梨雲一室，努前向前去。祠旁老柏，亭亭兀負奇氣。

四七 林學衡浚南詞

菩薩蠻春詞

春宵獨自塞簾幙，相思兩地燈花落。莫倚小紅闌，風吹羅袖寒。
寒時愁幾許，只是無言語。鸚鵡不知愁，低聲喚未休。

海棠院落春光冷，玉階腸斷箇儂影。綠葉盼成陰，琴聲深處尋。
思量空夢憶，安得如儂意。風露劇淒清，和衣坐到明。

前調送別

芙蓉半是離人淚，紅痕染就秋江水。哀雁一聲聲，可憐長短亭。
垂楊江上住，解繫人愁住。殘照掛西山，何時君復還。

蝶戀花春夜閨思

檻外桃花千萬樹，今夜東風，不解吹愁去。落花開愁欲暮，庭前記否春來路？背對銀釭
誰共語，明月圓時，却憶紅樓雨。鸚鵡有情猶絮絮，離衾依舊人何許？

摸魚兒紅豆

記前身託生南國，千枝豔影消瘦。鸚哥啄去餘殘粒，入骨玲瓏紅透。花落久，任拋向池塘打
起鴛鴦耦。淚飄杯酒，早絳蠟燒殘，頰珠解贈，密意問誰受？銀屏裏，記曲憑伊纖手，最憐生世非
偶，星星淚點如珠落，肝膽爲君輕剖。春去後，便網到鮫綃朱實盈襟袖，相思永晝。算只解憐儂，東
風日暮，心緒尙依舊。

金縷曲春柳

寂寞郵亭路，正春風倡條冶葉，依稀無數。攀折應添游子恨，裊裊含情欲舞。問那得愁絲縷
縷。夢醒隋堤人已遠，玉鉤斜也算相思處。垂淚立，澹無語。腰肢底事輕如許，便悽清和烟和月，
閱殘今古。記否靈和前殿事，嫵媚風流僅汝，便欲寄纏綿容與。消息玉關何處問，又聲聲羌笛吹
愁去。空悵望，日將暮。

賀新涼贈知淵

自是儒冠誤，嘆平生子山蕭瑟，少陵遲暮。說劍吹簫無限意，我亦深情似汝。祇惘惘相看無語，並世尹邢君得一，倚風前惹起花爭妬。恨不盡，江淹賦。女媧有石天難補，問東皇同根蘭芷，託胎何苦。錦瑟華年聲掩抑，一段幽懷誰訴？請鴛牒從今添註，珍重人間連理縷。細思量，莫任芳時度。歌一闋，愁無數。

蘭陵王送精衛赴法兼訊璧君夫人。

月痕碧，滄海鮫人似泣。長亭近，休唱權歌，只恐春聲已難覓。江城又送客，誰遣梁鴻去國。君行矣，花外綠猗，憑共風帆送山色。雲天遠無極。賸倦侶凭欄，吹出玉笛。聽風聽水追行跡。悵曲終人杳，離樽猶滿，拚教清淚墮瑤席。羈愁亂如織。堪憶，小樓側，正海燕雙飛，風送輕翮。巴黎到日，荷花隔，值海上青鳥，問荅消息。神州回首，念世變，待戮力。

賀新郎本意贈鷓鴣與楚儉聯句

春到松陵路，怪無端天涯芳草，送君歸去。錦帳青廬人似玉，寵柳嬌花共妬。便添對鴛鴦護汝，鳳女傳聞通典籍，好錦箋玉版相依和。楚儉休漫道，芳時誤。美人自古傷遲暮，問誰家傾城名士，玉臺雙賦。浚南新婦才華原絕代，合嫁無雙夫婿。作天上人間仙侶。楚儉我

見猶憐卿應惜，倩青鸞傳與靈簫語。藏嬌屋，問何處？（浚南）

憶秦娥

東風歇，池塘草綠春三月。春三月，珠簾捲處，落紅如雪。
血；鵲啼血，年年歲歲，傷春傷別。
小闌干畔鴛鴦舌，垂楊樹下鶯啼

四八 邱志貞梅白詞

菩薩蠻題亞子分湖舊隱圖

陸郎妙質清于玉，分湖勝跡花如簇。素手出纖纖，傳神尺幅纖。
何日買扁舟，隨君覓舊遊。
汪洋天一碧，零落伊誰拾？

秋風落葉如紅雨，寒潮汎濫湖之浦。水國響飛鴻，涼雲動碧空。
世事幾滄桑，爲君進一觴。
濃情思昔日，豈不悲離別？

四九 邵瑞彭次公詞

虞美人和天梅，用南唐韻。

相思似債原難了，莫怨佳期少。啼痕彈入玉笙風，生怕有人等我夢魂中。珍珠密字言猶在，不信華年改。天涯容得幾多愁，祇有黃河如淚背人流。

擣練子

鶯燕去，舊巢空，禁受飄零幾陣風。今夜櫻桃街畔月，爲誰無奈照簾櫳。

浪淘沙

幾處玉龍哀，有悶難排。寄園涼露濕瑤階。我是銅仙辭漢闕，未必重來。醉死便當埋，莫羨蓬萊。颺車和夢夜深開，九萬里風吹不斷，飛渡長淮。

憶江南

思往事，白髮又經秋。幾處故人同夢我，醒來和淚盼歸舟。一樣枉登樓。

菩薩蠻

前身綺孽何時免，匆匆想起愁無限。情重未能歸，楊枝踈地垂。捲簾看月上，莫向江南望。嫩約已成空，相逢祇夢中。

相見歡

輕盈秀臉假紅，忒匆匆。如此韶光，得消幾番風。千行淚，千日醉，怨千重。咫尺天涯，只在桂堂東。

今宵玉宇瓊樓，挂簾鉤，彷彿月華三五似中秋。魂已斷，心已亂，不禁愁；只好人前故意強低頭。

浪淘沙

枕畔淚潺潺，塵夢闌珊，春明門外落花寒。祇恐今宵愁不得，勉強爲歡。樓角幾重闌，闌外青山，有情莫道見時難。千里月明催我去，依舊人間。

臨江仙

帳飲都門無意緒，心隨北雁南飛。殘題記在畫樓西。浪浪和篆字，玉筍一齊垂。別樣烟花忘不得，翠屏銀燭低迷。吳娥應悔嫁吳兒。芳時終是誤，奚事更依依。

木蘭花

鳳城西畔吹殘雪，一路明燈星樣列。今宵底事不歸來？爲恐孤眠寒更徹。烏絲妙句題香屑，知否別離情味切。靈簫墨會有還無？欲問纖纖天上月。

應天長

橫波蹙損愁看鏡，額上宮黃無意整。秋風靜，春雲迴，一點芳心如佛定。采香荒舊徑，夢斷
 鞭轡金井。更是夜闌酒醒，又懨懨小病。

蝶戀花

白日速於夸父步，草草相逢，又報年光暮。千萬商量留不住，不如索性由他去。樓外疏鐘
 何處度？月曉風殘，有恨無人訴。只有屏山知意緒，依稀畫我分攜處。

虞美人

游仙人去春波綠，歡會憑誰續？尊前景事不堪言；不識今宵酒醒是何年。同心結子仍依
 在，綰就原難解，伊家庭院自深深；恐怕東風吹入未能禁。

清平樂

良宵已半，提起先魂斷。欲飲心兒越亂，愁比酒杯還滿。因緣兩字難憑，何時再見雙成？只爲今生已誤，莫教更誤來生。

菩薩蠻效蕃錦集，用太白韻。

燈殘暗壁蠶催織，(汪珍)未霜楊柳秋猶碧。楊萬里故國夢中樓，(楊巍)烟波千古愁。

(李中)落花人獨立，(晏幾道)露重蟬聲急。許渾舟泊細論程，(陳造)風帆數驛亭。(杜甫)

錢唐岸上春如織，(溫庭筠)門當楊柳彎彎碧。(袁桷)花入曝衣樓，(李賀)笙歌到曉愁。

(唐求)詠詩閑處立，(元稹)雨挾清砧急。(陸游)杉木翠邊程，(唐庚)橋東北水亭。(楊衡)

浣溪紗效蕃錦集

滿地梨花昨夜風，(來鵬)未央月曉度疎鐘。(錢起)韶光如酒著人濃。(鄭準)香霧細添

宮柳碧，(秦不華)燕脂先綻野櫻紅。(梅堯臣)強抬清鏡照妝慵。(王安石)

午榻茶煙鬢鬢絲，(鄭詔)黃昏微雨畫簾垂。(張曙)春寒又到牡丹時。(陸游)難得相逢

容易別，(戴叔倫)殷勤書札寄相思。(徐鉉)夜闌清夢有鐘知。(陸游)

蝶戀花

一翦香風吹夢語，墮入春懷，種出相思樹。不道蘼蕪江上路，繞簾鎮日迎梅雨。宿酒醒時
天欲暮，分付楊絲，好繫斜陽住。百草千花無覓處，館娃宮裏聞歌舞。

紅玉輕寒春睡美，夢裏吳宮，何止三千里。一桁楊花吹欲起，離心直渡清江水。莫唱淒涼
河漢子，怕有人兒，聽了相思死。好事今生長已矣，月華天半開還未。

滿院吳煙花未醒，牆下人兒，牆上人兒影。殘月漸趨燈漸暝，玉階悄立羅衣冷。雨橫風狂
胡蝶病，隔水高樓，可有雲鬢凭？蕩子行行瓶落井，輾轆無力牽脩綆。

迢遞朱樓春事好，七貴三公，走馬長安道。門外烏啼天又曉，人生容易被花惱。不恨孤鴻
歸太早，只怕來時，沒个音書到。錦字裁成君莫笑，玉門關外無芳草。

醜奴兒令 春水

桃花雨過春潮起，樓上明眸，江上輕舟，如畫林巒帶夢浮。魚天一角東風小，綠意芳州，紅
怨漪流，中有人間萬斛愁。

菩薩蠻

江南游女新妝束，枕痕紅沁堅牢玉。捲幔看垂楊，一絲三尺強。些兒寒食散，當作梅花嘯。

不願口頭甜，寧教石闕銜。

頗黎窗冷黃昏小，畫眉聲裏春歸了。夢醒轉疑真，海棠花笑人。新詞看不足，更點雙紅燭。

郎若戀天涯，從郎索臂紗。

玉階風細花無力，滿衣紅霧銀蟾溼。吹得夢魂清，雲和三兩聲。天涯何處是？疑在闌干裏。

漸漸被池寒，知君眠未眠？

茗華小印紅絲籀，錦箋寄與誰人手？玉釧動簾鉤，此時剛倚樓。蘭宵燈影白，閒看花間集。

好句愛南唐，聲聲夠斷腸。

醉春風湖上惜春詞和梅村韻。

陌上青絲騎，橋畔銷魂樹，餘春煞是可憐生。去去去！滿院殘紅，一（平）池皺碧，伴儂顛顛。

幾點思家淚，偷灑防人覷。茶烟禪榻忒蹉跎。住住住！癡問鄰僧：「湖心紅藕，着花也未？」

前調同上，和衍波韻。

幾點催花雨，又是天將暮。誰家玉笛喚愁生？去去去！乳鴨喧萍，哀蟬扶柳，最撩人處。潮打

西陵渡，月上蘇隄路，更無心緒砌香詞。住住住！十里歌聲，半簾風絮，一聲辜負。

杏花天

煙絲跪地晴漪軟，翠樓外雙鶯低囀。夢長不奈春宵短，耽誤人家鍼綫。清明近東風漸暖，
要商略單衣團扇。盈盈欲語無人見，一樹紅梨作伴。

浪淘沙

池閣小逡巡，獨自溫存。一重簾子一重雲。芳草迢迢儂已怨，何況伊人。陌上數瓊輪，又是
斜曛，梨花無計避黃昏。知道春歸留不住，索性開門。

解語花 白桃花

歌園夜玉，夢墮朝煙，影入犀帷淺。春愁一片嬌無語，脈脈嫩寒池館。飛瓊乍見，渾不是怨啼
心眼。說當年風景依稀，洗了焉支面。舞袖鮫綃冷淡，恍神光離合，花露零亂。波微月軟，未必掃
眉人懶。仙源路遠，喜十里珠塵齊泮。該阮郎歸去重來，訝粉雲千點。

風入松

湘紋如水溼螢飛，猶未換羅衣。年時愛說秋來好，到秋來恁又傷悲。屋上銀灣悄悄，花間玉
漏遲遲。蝶傷鶯倦何消說，幽恨怕重提。已涼天氣從閒過，只小屏殘燭低迷。多事南聲橫笛，聲

聲偏爲子吹。

少年遊

十分秋意上簾鉤，人語夕陽樓。山靚如妝；波平似熨，涼夢羨孤瀉。蘭愁蕙歎從排遣，何況少年游。亂葉敲紅；幽花凝紫，小病未曾休。

南浦冬水

寒夢低高樓，一變變猶占斜陽古渡。雅冷角聲酸，荒橋小祇是相思無語。青山睡穩，何人指點愁來路？今日有魂消不得，回首綠波南浦！漫疑清淺蓬萊，怕箋沈紅葉；書淹翠羽。顧影怨傳停，菱花瘦褪了秋孃眉嫵。煙淒月苦，深情漸漸消磨去。最好黃昏天欲雪，伴我玉梅千樹。

憶王孫 吳興道中有賦

吊蘭艇子麴塵波，隔岸山情數點螺。月軟煙平不奈何？忒蹉跎！笑掩銀犀唱權歌。

醉落魄 用花外韻

一枝紅燭，蘭宵暗照移纖玉，箏絃聽撥西洲曲。花影侵衣，特地佯人撲。鴨頭波濺裙腰綠，郎君合住郎君谷，不須重問琵琶卜。明日來時，休忘鬱金屋。

探春

綠浦啼珠；紅牆佇玉，雲屏依約春聚。蝶小禁涼；鶯慵避曉，影事暗銷詞賦。寂寞吹笙，道渾不辨惜惜花霧。可憐百感瓊漿，月明惆悵仙路？青鳥蓬萊在否？也占徧靈氛，夢來都阻。潮尾牽愁，山眉蹙恨，爭奈年芳催暮。珍重文園病，怕萬一情天能補。箇點釵鈿，銀河猶挂高樹。

瑞鶴仙影

雲藍暗褪連環字，模糊密意如夢。雨餘花落，酒醒客去，吟情誰共？參差罷弄，漸涼到羅衾半縫。且拋他金鞭玉控，靜聽暮鐘動。芳思隨年減，瑟妒人長，燈憐宵永。江紅海綠，算辜伊秦娥簫鳳。莫道傷心，恁忘得千般珍重。祝春潮爲我，艇子兩槳送。

鎖窗寒 吳城春感

黑蝶圍香；紅螺寫夢，耐人羈旅。蠻春苦短，付與迷離簫語。繞江皋絮雲亂飛，子鵲啼破紗窗霧。者孤燈茅店，單衾蘭夜，是何情緒？凝佇橫塘路，問月細星殘，爲誰三五？閒愁也好，可奈斑駁催去。鎮無情絲竹損，翠波不送腸斷句。且商量一卷楞伽，聽戒鐘悲鼓。

洞仙歌

愁春未醒，恰披衣侵曉。窗眼玲瓏個人小，覺玉葱微露；銀蒜還垂，才一霎報道牡丹開了。偶然通隱語，忒殺矜持，似怕鸚哥隔簾叫。名字寫偏旁，細摺蠻牋，却不管渠儂猜到。聽閒唱鶯聲繞紅樓，也說著填詞，勝看花好。

祝英臺近 甯波城外梁神君祝夫人墓

並頭花，同命鳥，心事最憐汝。十里黃昏，草長比肩墓。茫茫萬劫千生，青天碧海，只脩到一杯荒土。邊如許，祇今蛺蝶雙飛，依然夢中路。怨女癡兒，願乞精靈護。六朝南北，無限風流，夠人憑弔；終不抵者般悽苦。

戀繡衾 過明州，追次西麓韻。

勾章城郭夕照黃，一雙睛紅百丈長。聽隔岸歌雲起，有蛾眉開鏡洗妝。春潮倒送烏篷去，小山椒紅徧佛桑。待尋鮪埼亭子，拚（去）消磨詩膽酒腸。

鵲橋仙 詠電燈，吳中里歌十杯酒有「電氣清涼」句，寫夜闌景色絕佳，故及之。

波長月妒，花奇風怯，疑是靈珠來照。香街今夜最清涼，倩被了塵心多少。光明未墮，檀藥恰滿，似惜春宵易曉。招他玉女下煙霄，也值得燈前一笑。（起世經西方電名墮光明）

巫山一段雲

燭下紅花開，尊邊綠水歌。人間醉夢勝蹉跎，鸚鵡莫輕呵。香燼遲遲漏，風銷薄薄羅。悲秋

情事本無多，揩眼看天河。

一絡索 錢唐舟次

江上已無楓葉，清歌纔歇。船孃小語太憨生，笑問我何時別。夜來寒衾如鐵，愁都難壓。篷

牕關了莫輕開，怕看見天邊月。

轉應曲 記榜人語

山水山水，數到君家第幾。一船兩槳如飛，載得離人去來。來去來去，笑汝不如瀉鷺。

疏影 九里州梅花

桐江深處，有暗香千頃，浮動煙渚。輕暖輕寒，幾陣東風，幾陣纖纖微雨。客星不耐孤眠苦，暮
喚下市門仙女。好伴伊雲水生涯，瀟夢一宵圓聚。莫訝蛾眉奇絕，倩誰攜玉笛，偷賦佳句。殘雪
西湖，落月羅浮，爭許銖衣遙妒。翠禽報道黃昏矣，花氣溼更無私語。讓山中采藥人歸，來慰者般

遲暮。

望江南

江南好！第一暮春天。雙槳桃根人似玉，半篙瓜蔓水如烟；醉枕柁樓眠。

清平樂

花開花落，畢竟東風惡。今日輕陰還漠漠，閒殺誰家樓閣。紅牆不礙靈犀，圓冰偏妒燕支。

自是愁人無寐，不消埋怨鴛鴦啼。

虞美人

門前籬个吳船小，船上簫聲悄。春風著意畫離愁，吹得楊花如雪上高樓。衍波牋子微波

語，此際惺忪否。生憐眉月一彎彎，占了良宵能有幾回圓？

唐多令孤山題壁

人影掠波斜，船兒慢慢划。暮香風來襲衣紗。慘碧明湖三十頃，開一朵白蓮花。楊柳宿啼

鴉，前頭蘇小家有六朝金粉些些。古恨今愁消不盡，來喫你本山茶。

法曲獻仙音江上

蘆雪吹絲，楓霞成纈，裝點江鄉秋意。借月懷人，將詩談夢，誰憐羈客顛顛。喚畫舸尋幽，好簫

聲十分脆。小橋裏，有重重亂煙斜照，如對我閒訴暮年心事。潮落殺紋平，羨圓鷗殘睡慵起。渺渺子懷，望天涯何止千里。且輕搖雙槳，萬一鏡歛揉碎。

憶秦娥

歌淫淫，誰家院落彈青琴。彈青琴，三分掩抑，半晌沈吟。空梁燕靜黃雲深，清江萬里愁人心。愁人心，非關此曲，也自難禁。

長亭怨慢癸丑四月賦桃花

溯揮罷長亭別淚，幾處樓臺，幾重山水。多謝嬌雲，伴人殘夢七千里。情禪懺未，誰喚得春魂起。我是病維摩，放膽共仙姝遊戲。到此訝東風有力，忘卻歲華彈指。步幃暗引，莫妒煞燕邯佳麗。試商略再駐朱顏，怕依樣飄零難避。草草訴青霓，萬一天公憐你。

踏莎行

禁火光陰，掃花庭院，簾衣鎮日和愁捲。一春無夢好還鄉，羈魂也怕江南遠。黃玉敲詩，紅燂記怨，闌干凭了千千遍。等閒消瘦不成圓，月兒爭似人兒面。

減字浣溪沙

小小微波隔畫簾，纖纖月子是初三。些些殘醉夜懨懨，豈有京塵驚倦客，祇教日日帶春醕。人間何地不江南。

十六字令 聚花寺訪西來閣故址，閣旁丁香一樹，今不存矣。

齊天樂 遼后洗妝臺

東風吹斷前朝夢，塔鈴悄聞私語。孤燕辭巢，雙虹臥水，髣髴翠華行處。蕭娘老去，漸剩粉零脂，暗銷塵土。只有西山，對人猶展舊眉嫵。十香誰記影事，鉛波傾欲化，千點涼雨。碧月秋圓，紅衣晚褪，作弄離宮朝暮。凝情懷古，已換卻回心，那時庭宇。暝色侵簾，隔城歸炷女。

子夜

屏山畫出天涯近，春雲夢冷衾波穩。花底雨沈沈，愁來無路尋。愁長人越遠，恐被東風管。索性不相思，強如未見時。

減字浣溪沙

花底簾衣一桁單，餘春無賴不成寒。狗人愁病是長安。隔院歌雲猶漠漠，誰家眉語最娟娟。

娟。少年心緒總銷殘。

謝秋孃

春盡日，楊柳尙天斜。誰信北來天氣好，判教蕩子不思家；夢彈碧窗紗。

綺羅香下斜街獨遊，小憩幾輔先哲祠。

雨斷虹腰，霞梢魚尾，吹過茶蘼風信。一院圓陰，送了一年春恨。詞客老蒲裼房空，井華美昊天泉近。試登樓閒拍闌干，西山分綠上眉暈。相如才思暗減，那更江湖夢熟，淒然雙鬢。駐笛沈吟，淺霧欲生衣潤。憑燕子催起黃昏，也無人料量金粉。看誰家俠少歸來，走香驄陣陣。

惜秋華滬上夜遊

隱隱輕雷，恍芳輪碾夢，明蟾如水。滿地麴塵，瓏鬆欲侵衣袂。浮陰暗躲朱樓，引十尺綠楊風起。韶麗，對銀花，最憐千嬌凝睇。仙苑二三里，儘脂煙粉霧，畫四更天氣。澆碧鬪，顫玉葉管絃聲賦。沈沈海樣良宵，拌一霎曲闌魚倚。知未者清涼人間無幾。

西河癸丑九月再至金陵，賦此用美成韻。

金粉地，秦淮往事會記。瓊樓壁慘，有啼烏夜深驚起。風帆依舊，擗江來，寒潮浩淼無際。石

城畔，愁徒倚。玉驄何處堪繫？樓空人去，燕歸時難尋故壘。祇餘衰柳看興亡，絲絲鉛淚如水。長
 千夢斷昔日市，冷清清明月千里。我亦中年身世，與滿天病蝶，哀蟬閒話，一片傷心秋聲裏。

霜葉飛 初七日乘津浦車過返京師，景物關情，川途換目，感慨係之矣。

灞波如妒秋衾夢，圓波顏色非舊。客行還比燕匆忙，怕落重陽後。記入夜單衣病酒，西風淚
 點黃河皺。試極目天涯，渾換徧蘆漪翠冷，楓岸紅瘦。未堪回首江南，吳鹽幾疊，玉龍哀曲吹又。
 多情不怨會期難，祇怨飄零久。對薄霧濃霧永晝，看看漸近愁時候。算穩留登高約，霜飽花腴，耐
 思量否。

水龍吟 獨遊十刹海，枯荷已盡，景物都非，愴然賦之。

空濛一鏡柔藍，仙人去後銅盤碎。微波欲語，斜陽無力，滿天涼意。立徧黃昏，盈盈不見，煙焦
 月萃。祇疎鐘暗度，幾行霜葉，猶彷彿前朝寺。憶否那番遊事，碧雲深，玉容曾醉。秋魂斷處，鴛鴦
 夢醒，悄移塵世。小海歌沈，離宮花謝，相思誰寄？怕何郎漸老，和愁歸去，下華年淚。

羅敷豔歌 潘蘭史桃葉渡填詞圖

多情最是秦淮水；載過王郎，又載潘郎；累得紅妝打漿忙。箏絃笛孔開商略，只管疎狂，全

不隄防，隔岸秋孃欲斷腸。

臨江仙 萬柳堂

楊柳樓臺何處？名園分付荒郊；都無蠻樣鬪纖腰，都無燕子彈淚話前朝。一種西風誰
主客？怨娥愁上林梢。詞人易老况金貂，搖鞭歸去聒耳梵鐘遙。

夢橫塘 頤和園

嵐光勻碧；水色撈藍，故宮離苑何處？一夜西風，看換了一（平）番今古。銅輦驚秋；金仙辭月，樓空人去。讓多情兒女，來話興亡。雷塘夢，江南賦。愁雲冷煞椒房，更漁歌寂寞，佛火淒楚。賸黛零鉛，暮化作滿天飛絮。對隱隱涼花病蝶，們外青燐黯無語。如此湖山，可憐齊付與東華塵土！

月華清 月張園聽秋

淡月依窗；微霜戀瓦，一燈搖夢紅暝。多事秋聲，作出者般悽哽。算天涯情味郎當，又付與西風催醒。誰省？有幾家客子，傷心同聽。不怨殘宵偏水，怨落木無端，欺人愁病。水遠山長，回首祇成銷凝。儘教伊響到明朝，可念我和衣閒等。休更，想寒砧咽處，鞭轡金井。

徵招 香冢在陶然亭西北小阜上碑陰題句哀豔予讀而悲焉係之以詞。

西風殘照城南路，紅鴉悄然無語。短短瘞花銘，付荒煙涼雨。秋魂還在否？恍遙夜瓊環會遇。萬劫情天，一場春夢，可憐黃土。莫漫上江亭，江亭畔誰禁（平）者般悽楚。胡蝶尙雙飛，問靈修何處？曇雲留不住，剩吟斷庾郎愁賦。角聲喚忍淚歸來，向燈王深訴。

減字浣溪沙 偶然作

河水淪漪與漢通，爲誰流怨下仙宮？雲窗霧閣忒重重。未必天涯論只赤，最難人面駐長紅，不成相憶况相逢。

滿庭芳 析津旅次

禽語宜詩，蛩聲帶梵，些些楚怨微茫。啼蘭泣菫，忘卻滯殊鄉。多謝玉璫錦字，洛神賦一十三行。何消說，生成福薄，長揖返瓊漿。清狂，當此日，都無言笑，絕少思量。倚碧闌小立，猶未昏黃。不是斜陽戀柳，怕殘柳難繫斜陽。流連處，蛾眉天遠，莫也斷人腸。

齊天樂 自題斜街惜別圖，圖中子與天梅等七人，蓋癸丑去國時攝景。

斜街花事匆匆過，西風又催人去。夢裏關山，愁邊金粉，都是尋常心緒。俊遊易誤，凭一聽荒雞，便成離阻。十萬啼痕，明珠不化化塵土。江南歸路千里，料他樓上女，目斷南浦。來歲重逢，吳

松水噴，鸞好瀝盟圓聚，何消淒楚。且拍手高歌，渭城朝雨。寫入冰奩，朱顏同惜取。

風蝶令重至滬上

綠襖潮三尺，紅銷玉一梭，人前吳語未曾訛，只恐襟痕還比去時多。有個摩登女，匆匆細馬馱；當筵不肯爲儂歌，瞋我帶他明月過黃河。（末句九月留別時詩也。）

望江南

天梅去國時，舟中和重光韻，得詞一卷，署曰浮海詞。子亦繼聲，詞語如寐如酣，本不足存，選錄數首，以當時微尚所託，不忍沒云。

思往事，白髮又經秋。幾處故人同夢我，醒來和淚盼歸舟，一樣枉登樓。

搗練子同上

雙燕去，舊巢空，禁受飄零幾陣風。今夜櫻桃街畔月，爲誰無奈照簾櫳。

相見懽同上

相思豆，種雙紅。底匆匆？如此韶光，消得幾番風。盈盈淚，沈沈醉，忒重重，只赤天涯疑在桂堂東。

應天長 同上

橫波蹙損愁看鏡，歷亂雲鬟無意整。秋風靜，春雲迴，一點芳心如佛定。采香荒舊徑，空對玉繩瑤井。最是夜闌酒醒，又慳慳小病。

浪淘沙 同上

枕畔淚潺潺，好夢闌珊。落花三尺漲輕寒，祇恐今宵愁不得，勉強爲歡。亞字幾重闌，隔斷青山。有情那怕見時難；十里明月催我去，依舊人間。

前調 同上

聒耳玉龍哀，有悶難排。斜街涼露濕瑤階。我是銅仙辭漢闕，未必重來。醉死便當埋，不羨蓬萊。森車和夢夜深開。九萬里風吹不斷，飛渡長淮。

虞美人 同上

相思似債原難了，莫怨佳期少。一船斜照送回風，生怕有人等我夢魂中。珍珠密字言猶在，不信華年改。天涯無地葬春愁，未必黃河到海不西流。

前調 同上

游仙人去春波綠，懽會憑誰續？尊前景事不堪言，知否今宵酒醒是何年。同心結子依然
在，綰就原難解。伊家庭院自深深，恐怕東風吹入未能禁。

玉樓春同上

春明門外華如雪，半夜明燈星樣列。闌干倚徧不歸來，莫是瑤笙吹未徹。烏絲冶句題香
屑，賦到陽關情更切。美人千里怨華年，三五小星三五月。（右九闕已見十一集，茲依小黃昏館
改定本重寫。編者附記。）

天仙子

山下燕支紅麗殺，狄韃倡女顏如玉。心隨孔雀向南飛。休讀曲，四絃促，遙聽寒砧聲斷續。

阮郎歸

春浮樹倚碧玲瓏，明窗了了通。斜陽不妒落花紅，由他颭晚風。憐病蝶，感驚鴻，輕盈何處
逢？玉釵聲在有無中，桂堂東復東。

采桑子

金鈴黃耳消長夜，月太玲瓏，月太朦朧；人在朱樓第九重。水香雲影誰能覓？不是驚鴻，不

是春虹，莫是飛瓊坐上逢。

卜算子

簷角月波橫，月底春煙聚。昨夜東風不算寒，怕有明朝雨。好好送卿歸，莫謾耽愁苦。莫賭黃河遠上詞，莫賣長門賦。

定風波

未必情禪怕入魔，天花吹下曼陀羅。昨夜星辰今夜雨，何苦，累伊含睇畫雙蛾。料理明珠三百珠，不抵鮫人滄海泣來多。枕破紅綃風不起，已矣！今生休唱定風波。

菩薩蠻

流鶯啼碎楊花夢，羅衾薄薄春寒重。殘月下銀屏，舊山愁外青。近來無俊語，莫是離懷苦。何不誦華嚴，閒尋燕子龕。

清平樂湖上索居卽事

疏花瑟瑟，人影銅屏隔。禪榻一鐙涼焰碧，閒話八儒三墨。關門幾幅紅箋，開門幾朵青山。不信江南蕩子，春宵直恁蕭閒。

百字令 月夜湖上泛舟

盈盈湖水，是誰家妝鏡，十分娟妙。添上一九狂月子，疑與壺天爭曉。玉膩禁寒；雲嬌怯夢，
我淩風到。瑤笙此夜，春愁吹醒多少。何不喚起梅花，斷橋西堍，同橫鷗夷櫂。別樣閒情消未盡，
除是微波能道。哀樂彫年，滄桑惹淚，分付山靈笑。俊遊難得，歸來準備吟料。

柳梢青 六月自滬上至杭州

車去如飛，吳根越角，是也還非。暝色如潮，一重重地，蘸上征衣。零歡墮恨都迷，聽啼遍千
山姊歸。此去家江，行行漸近，不算天涯。

一枝春 本事

幾尺鷗波，畫船閒低襯斜陽煙柳。停橈渡口，恰好上鐙時候。簾紋暗動，是何處玉人招手。忍
自把佛偈儒經，換了一宵歌酒。芳華易成孤負，儘珠韞鈿柱，拋殘紅豆。山魂水夢，只在茜紗窗
後。江關詞賦，算當日我儂能覈。還怕那明鏡無情，難瞞消瘦。

玉漏遲

慳松花外雨，紅絲入檻，碧絲橫路。杏靄梨雲，負了韶華百五。簾底瀟裙人遠，謾贏得燕愁鶯

苦。心事誤，煙昏霧暝，那時庭宇。江上過盡千帆，倚壁月留情，翠波傳語。歌冷香殘，無奈春期遲暮。暗憶東風嫩約，還恐怕銀箏慵訴。腸斷處，深宵徧城鐘鼓。

燭影搖紅寄天梅

好箇黃昏，酒醒忘卻江南遠。瓊簫隱隱隔東風，似帶華年怨。幾度鴉愁燕懶，綠波長紅私信短。英游漸歇，珠箔鐙殘，錦屏春賤。醉雨吟香，天涯情味都嘗徧。河橋碧樹已無多，況又芳期晚。夢裏花零月亂，暗思量柔腸夠斷。吳魂縹緲，楚寒荒寒，甚時重見。

桃源憶故人

瓊窗遙映秋痕淺，人立梧桐庭院。么蝶殘花都倦，誰唱西洲怨。城頭鐙火看看晚，多謝交厄頻勸。可惜山高天遠，閣住南飛雁。

減字浣溪沙塘上

螺子山低月下遲，萬荷喧處碧侵衣，西風消息晚蟬知。水調不堪愁裏聽，彩雲無那夢中飛，橫塘小立又移時。

高陽臺

聽罷吳歛，旋謳楚些，天涯只隔秋衾。消息無多，累人等煞青禽。高樓關得斜陽住，忒殷勤，我登臨。晝陰陰，一桁珠簾，垂到而今。孟漢風起，夫容老，比尋常時候，容易傷心。酒滯香殘，新涼鬢，偏羅襟。六張五角，休重算，倩哀蟬來和長吟。碎湘琴，不到窮途，不信黃金。

清平樂 柳花

誰家珠箔，數點晴絲落。詠盡飄零人不覺，猶道楊花輕薄。東風只是年年，韶光付與春寒。怪底天涯夢斷，夜來紅雨闌珊。

齊天樂 題更存綠波詞

綠波便是傷心水，思君暗驚春老。魚信緘愁，蠻絃指淚，悽絕中年懷抱。湘靈怨杏，料目斷蒼梧，夢都難到。且唱清商，吳天月墮一丸小。相逢疑在隔世，下斜街畔路，應長寒草。舊雨談詩，朝雲誦偈，此味窮時偏好。紅曠碧笑，算錦瑟餘哀，杜鵑能道。莫枉辛酸，迴腸宜玉醪。

明月生南浦山中聽雨

百六春韶彈指過，那更廉纖，夢雨連宵作。窗外紅芳應盡墮，有人無語鏡前坐。會記吳松停畫舸，篷背聲聲，獨自兜衾臥。此際心情誰似我，思量往事如何可。

臨江仙

誰道懷懷時節，柔情一倍芋眠。門前閒殺五湖船。煙波芳草外，無限夕陽山。祇是歡期易逝，從渠燕語輕圓。東風未肯管春寒。柳絲吹不起，來占碧闌干。

宴清都 空山臥病，卽物驚心，懷人感事，情見乎詞矣。

嫩約浮沈未，簫聲咽，他鄉遲了春事。紅蘭泣露，青梅病雨，美人千里。憑闌不怕東風，莫也怕流鶯憔悴。誰解識？依樣關山，一般心緒難寄。開中休更彈琴，數聲清怨，華年去矣。無多殘夢，三分金粉，七分煙水。江南只隔羅帳，化幾疊烏雲天際。儘夜深，劍俠尋仇，銅仙下淚。

青玉案

綠窗闌住閒煩惱，憑釀出餘寒峭。才展羅衾天又曉。女牆低處，魚雲薄薄，蛾月纖纖小。花開未必年年好，何況橫波送人老。幽怨近來無可道。香桃骨瘦，粉蓮心苦，留與西風笑。

清平樂 爲人題照

檀房深閉，闌月如眉細。金鴨香銷春去矣，非暮非朝天氣。越來溪畔伊家，到門略約天斜。記得那回相見，鬢邊簪朵梅花。

步蟾宮次更存見懷韻卻寄

江皋別夜堪惆悵，漫贏得新詞傳唱。熟梅時節最懷人，只暗底年華漸長。吳松塞沙連宵
淡，料閒煞船娘雙槳。夢魂原不怕飄零，總一味隨風蕩漾。

春風薰染春人瘦，試卻掃禪房青豆。紗窗開了便黃昏，恰門外櫻桃落久。連環密字回文
繡，鎖繾綣心情依舊。天河脈脈夜深橫，問隔得凌波轆否。

蘇幕遮

月微微，人悄悄。才得新涼，便有秋蛩叫。今夜關門須及早，落盡梧桐，莫信西風小。水雲深，
鴻雁杳。如此相思，怪底花枝笑。說與天涯應懊惱，只是無眠，夢也何由到。

減字浣溪紗

漠漠平林小小村，蓼花消息付啼痕，鑪香吹斷一絲雲。秋色入簾攔不住，教人無奈只開
門，夕陽沒處又黃昏。

如此江山蓮房

橫塘一角斜陽小，文鴛漸銷殘睡。玉簫驚秋，銅鑿呀露擎出數莖涼翠。西風又起，更何處蘭

舟清歌憐子。悄立含曠，惹他游女滿衣淚。黃蝶誰倩賦？手粉香零落後，越樣憔悴。人去房空，愁多心苦，嘗遍相思滋味。纖纖輕試，問剖盡幽懷，情絲餘幾？結束仙緣，重逢應隔世。

鳳凰臺上憶吹簫

放下簾鈞，拋開酒琖，秋心依樣迢迢。憶那番殘夢，祇是今宵。冷落定巢燕子，雙飛去樓爲誰高？西風起，將他愁黛，潑上眉梢。河橋，昔年種柳，料送盡行人，無復長條。甚隔江商女，猶自吹簫？多謝鏡中紅影，來伴我暮暮朝朝。君須記！憂能損年，莫枉魂銷。

尉遲杯懷天梅用清真韻

長亭路，正落照關斷雲邊樹。秋聲一派冥迷，疑是濃愁來處。無多涕淚，恍脉脉相思託南浦。聽高樓彈冷箏絲，夢魂還逐君去。劉郎別了天仙，知江上青峯，冶黛空聚。願乞嬋娟人樣月，重照見丁歌甲舞。憶前度千花百草，有誰倩赤鱗寄好語？恨西風忒煞關情，隔窗來問春侶。

木蘭花慢中秋

金波搖碧浪，菱影亂，桂香浮。正鸞舞才慵，鮫眠未穩，閒驪蘭舟。江樓數聲橫笛，借西風吹起一天秋。唱罷詞仙水調，與誰嘯傲滄洲。凝眸皓彩悠悠，雲葉冷，露華收。問團圓兩字，尋常兒女，

幾世能修。休休廣寒夜永，隔銀河，何況有癡牛。訴出三生清怨，照人依舊當頭。

夢江南 擬皇甫松次元韻

紗牕外，新綠暈芭蕉。料得南朝寒食過，樓臺煙雨正瀟瀟。夢斷第三橋。
春夢好，人語隔簾旌。此日江南花似海，畫船無數石頭城。娥月照吹笙。

菩薩蠻 擬韋莊

如今始信留春誤，春歸不向門前去。和淚出房櫳，花飛明月中。縷金紅衲襖，棄置何堪道，此際夢咸陽，錦絃人樣長。

醉公子 擬顧夙

樓外青螺遠，鏡裏單衣短。梁燕怯春寒，憎人倚玉蘭。一從權子去，便有朝朝雨。落盡白楊花，知君今憶家。

菩薩蠻 擬牛嶠

花開陌上人歸緩，十三箏雁和腸斷。轉眼又西風，流光如夢中。綠窗香霧薄，小立鏡花落。不識古遼陽，秋宵多少長。

喜遷鶯擬馮延巳

綠波橫，紅月小，殘夢認依稀。天涯人比燕來遲，含淚換羅衣。江上樓，樓上雨，散盡瑣窗朱戶。碧簫吹得暮潮生，不見數峯青。

多麗長秋多病，萬感畢集，用蛟巖韻寄興。

暮煙青，吟情一倍湛冥。正西風催啞絡緯，明蟾欲下雲屏。翠樓前幾行歸雁，幽篁裏數點涼螢。病骨禁秋；愁腸酬酒，金卮才放涕先零。自小別飛瓊歸後，仙夢未曾醒。空招帳，懷人遠道，送客長亭。料江頭已無碧樹，哀絃奚事冷泠。玉簾寒飄殘蛺蝶；紅衣老瘦盡蜻蜓。只是低迷；都難排遣，新詞傳唱與誰聽。算天上依然宮闕，草草渡雙星。纏綿意，隨他木葉，吹過迴汀。

甘州

正吳宮聽罷柘枝歌，盈盈惱玉昌。便臆銷翠霧，枕拋紅玉，花下鏡涼。隔影依然在眼，人已隔長江。祇有天邊月，來伴昏黃。不信扶頭酒醒，茜無情杜宇，啼出滄桑。憶當年心緒，未老莫還鄉。草青青誰家河畔？采夫容何處覓鴛鴦。休回首，一重門外，都是斜陽。

水龍吟紅葉

夕陽一片天斜，無情畫出楓橋樹。玉壺貯淚，朱顏中酒，爲誰起舞。豔欲妨花，散還成錦，可憐遲暮！聽高樓遙夜，蕭蕭槭槭，渾不是，清明雨。莫唱銷魂詩句，賣鱸魚，菱塘深處。唐宮春恨，吳江秋思，哀蟬難訴。依樣西風，前生金粉，來生塵土，那堪問訊人家消息，青黃何許。

減字浣溪紗旅思

撲面輕塵隱隱斜，有垂楊處卽吾家，不消招恨怨天涯。滿地烽煙閒病馬，一天涼意逼啼鴉，夕陽紅殺水蒨花。

鶯啼序懷天梅

梅邊舊時月色，照懷人意緒。卷畫簾，幾個黃昏，不道芳訊偏誤。記曾聽空候怨曲，蠻煙綠繞沈珠浦。怕東風吹到江南，便和愁住。最是當年，漢殿寂寞，恍雙成乍去，露盤折鉛淚流紅，茂陵衰草何處？茫茫青天碧海，儘消受非朝非暮。（四字出拾遺記）算今宵依樣星辰，爲誰延佇？
 蘼蕪跡遠，荳蔻春遲，冶情託寐語。怎奈向五更殘角，喚起幽恨，忘了吳宮，萬重雲樹。滄桑影事，鶯花陳迹，隨他心字香痕斷，隔紗窗，况有廉纖雨。危亭望極微波，化作寒潮，夜夜欲撼官渡。朱顏易改，只恐相逢，被鏡歛暗阻。謾瞻念孤鴻怖曉，病蛭暝秋，蜀錦迷離，也難深訴。斜陽故國，疏鐘蕭

寺，楓林千里關塞黑，問飄零長劍思量否？傷心休上高樓，手撥銀缸，醉魂等汝。

臨江仙

迷迭香銷春旆旋，忍寒換起羅裳，更無影事託荒唐。量愁滄海小，比恨玉絲長。絕代風華消不得，何曾悔嫁王昌。鬱金堂外是紅牆。文鴛如我瘦，蟾子爲誰忙？

細馬桃花人乍去，歌聲猶浥輕塵，無多延佇又黃昏。香迷三里霧，月上一鉤銀。早識相逢都是夢，當時不合殷勤。碧天腸斷與誰論？迢迢楊柳外，依約認朱門。

滿地江湖昏又曉，惜春情緒還賒，紅樓閉了燕無家。碧雲千里隔，銀漢四更斜。未必東風知此意，匆匆吹起飛花。閒中切莫誤年華，微波如有信，萬一到天涯。

翦翦春山螺子黛，秦銅彷彿修眉。錦衾紅燭夢來遲，龍飛真見骨，蠶死已無絲。那有新人能織素，玉簫清怨淒迷。他生緣分總難知。風懷三百韻，留作降壇詩。

減字浣溪紗

燕語鶯歌未可禁，當門楊柳最陰陰，春人偏又惱春深。小院寂寥簾不捲，夢魂尋我到重衾，雜花香裏曉星沈。

何止魂銷似去年，玉鑪烟斷起微寒，天涯已慣聽啼鴉。春雨膩於墻面酒，吳波橫上櫂頭船，不成時節又依然。（春雨二句。去年詩也。）

一萼紅

碧簾寒放，東風幾陣，吹月下闌干。蕉葉芳心，楊花瘦影，如夢庭戶依然。枕綃薄不禁熱淚，怕點點爲玉又爲烟。鏡破難圓，牀空易守，可是當年。陌上記曾微雨，問江南江北，多少青山。逝水光陰，浮雲蹤跡，回頭事事堪憐！試重聽一聲河滿，料有人比我更辛酸。何況淒涼，故宮道路三千。

浪淘沙

春水晚來添，浮動柔藍，垂楊心緒愛江南。惹出人間多少恨，只是癡癡。好語舊曾諳，歌斷吳鹽。東風吹不過珠簾；難得樓頭紅月子，圓到初三。

脈脈小重山，和露和烟，秋風情性太無端。門外疏鐘人乍醒，蓮子花殘。往事記應難，如此流年，斜陽何況妒朱顏。二十五絃人樣瑟，切莫輕彈。

醉花陰

天半朱霞飛到晚，鶯語聲聲慢。日下是長安，捲起重簾，日近長安遠。露桃開落無人見，只

是華年變。且莫怨東風如汝情懷，要被東風怨。

月下笛

瑟柱移情，花鈴繫怨，晚風吹冷，秋宵漸永，玉鑪心字猶賸。前溪幾尺多情水，照不出年時夢影。倩吳剛倚樹，黃姑隔渡，爲儂閒等。金井鴉啼靜，只一片砧聲，那堪重聽。星河耿耿，者番佳約難定。畫樓比似瑤臺遠，問翠袖何人獨凭。好仔細，細和衣袞，莫損當胸寶鏡。

南柯子

紅葉千林盡，青山一角殘。宵來爲怕四更寒，孤負下弦月子不曾看。意密書偏短，途長夢也難。海棠忍淚過秋天，報道斷腸時節算今年。

尉遲杯

和片玉

章臺路，記昔日繫馬橋邊樹。明明一樣星辰，人面更無尋處。青天幾尺，吹不得東風過前浦。喚么鶯填起，黃河，讓他魂夢來去。闌干六曲彎環，算惟有浮雲易散難聚。楝子花殘春歸矣，辜負了蜂喧蝶舞。何時向紅蕤枕畔，再相見從頭證密語。怕黃昏陌上烏啼，繞簾都是愁侶。

瑞鶴仙

玉絲塵別怨，乍驚心鏡裏，朱霞偷變。香塵夢中轉，更梅邊月冷，翠禽啼徧。殘宵漸短，莫過了東風一半。便春山依舊青青，不是那時庭院。淒斷！珠還化淚，麝已成塵，畫簾愁卷。關河寸寸，未必比天遠。祇思量如此，朝朝暮暮，禁得頻年見慣。料尊前也有人兒，忍寒到晚。

子夜

東風不信羅幃窄，匆匆似道曾相識。寒在五更頭，棲鴉啼未休。枯桑兼海水，何處思量起？香燼洞房深，吳天青到今。

綠窗人影冥濛曉，羅裙翠地生芳草。隱隱認春寒，眉邊山外山。山山青不斷，只恐花開緩。花亦有時開，浮雲何日回？

減字浣溪紗

漠漠春陰策策寒，開窗依舊出來難，昨宵明鏡尙朱顏。好夢不瞞三五月，離魂知隔幾重山，落花只當等閒看。

蘭葉芳心託短歌，麴塵風色上修蛾，陽春二月好烟波。西北樓高偏易晚，東南日出又教遲，花枝無奈綠陰何？

南浦折枝梅花

笛裏忽聞香小，嬋娟暗入，誰家詩境？脈脈一枝斜，飄零否？爭許玉匳偷並，蘭昌怨渺，瑤天滄
 謫成孤迥。無恙黃昏無恙月，曾伴那回人影。闌干只赤千重，料林間客夢，依稀未醒。消息遞應
 難，纏綿意付與青禽開等。韶光漫省，東風還比西風冷。畢竟花開須護惜，金樓歌殘休聽。

二郎神用徐幹臣韻按楊西村和徐詞第五句作五字今從之

轆塵動處，似隔了幾重花影。只燭淚紅腴，簾波綠慘，人臥春雲冷。聽到蕭蕭吳娘曲，怕舞蝶
 喧蜂都病。知璧月乍生，金鈴還繫，負他明鏡。思省，啼妝怯夜，餘香猶凝。好屬付東風，牡丹時候，
 休被流鶯喚醒。錦瑟量愁，羅屏畫夢，依舊者般情景。怎奈向宿酒懨懨，未解玉蚪聲靜。

絳都春用覺翁韻

垂楊似線，繫畫裏夢痕，江平山遠。一片綠蕪，記得年時成秋苑。桃笙猶帶湘娥怨，那更溼啼
 紅零亂。路迷滄海，碑殘碧落，舊家庭院。曾見圍香午夜，小樓隱約處，嬌歌葱蒨。颺賦漫催，芳景
 疑隨吳縣換。春波能照馬支面，照不出柔腸宛轉。最憐風雨無情，弄寒作暖。

鶯啼序

子與鈍根，聞聲，相思數載，讀其紅薇感舊記，悽馨哀豔，根觸予懷，亞子屬爲詞紀之。率成此闕，異病同呻，不自知其言之長也。

瀟湘一江恨水，似柔腸宛轉。暮帆繞十里蘼蕪，碧雲心緒誰管。玉欄外，細桃瘦損，春陰漠漠。鵲啼偏，把殘魂分付蠻牋。淚痕紅泫。刻骨難忘，那番影事。記江淹浦畔，聽簫語於芭蘆中，翠樓人正凝盼。儘天涯鸞漂鳳泊，尙銷得鏡前相見。託微波來慰滄桑，怎禁悽惋。三生璧月，百感瓊漿，算逢伊未晚。喜此際，懷儂歌罷，唱到憐子，便化梁塵，也都情願。靈犀漫阻，明珠休贈，斑驩猶繫垂楊樹。酒杯深可奈，因緣淺，斜陽在，冉長亭，切莫回頭，怕他畫簾還卷。蠶絲欲盡，馬角偏遲，又歲華暗換。試重（去）問星辰昨夜，風雨中宵，豈是尋常，斷恩零怨。銀蕤鎖夢，頽鱗沈信，文園頭白吟更苦，料蓬山咫尺，和天遠。思量且自溫存，萬一人間海枯石爛。

玲瓏四犯

玉簫浮香，似說與匆匆，芳思零亂。一片迷離，中有翠曠紅怨。殘照未忍當樓，况愁裏倚欄都倦。倩畫簾喚起芭蕉，和我寸心同捲。如今休道相逢短，怕他生更難重見。春山不在眉痕外，還是眉痕遠。憑問陌上杜鵑，可聽得天涯人慣。算柳枝無力，歌一曲，朱顏變。

鐸解令

瓊窗殘夢喚初醒，又綠徧江南萬柳。流鶯未必罵東風，只聽得掃眉人瘦。啼痕似酒點，
還如玉漏。中門一閉，使他生，總不比尋常時候。

望湘人

穀人祭酒曾於吾郡旅次，填此解，復翁和之，音尤淒戾；予天涯倦客，言愁未工，率步
元韻，常醉，夢寐觀可也。

向斜陽盡處，日日登樓，客情何限依戀。感事吟邊，懷人醉裏，攪得朱顏偷變。杵急催寒，帆低
送暝，秋山平遠。怕江南水闊烟深，誤了一天歸雁。衣上斑斑淚點，便裳腰襟角，也都流徧。只花
魂傲雨，付與竹枝同薦。紅珠記夢，碧銅鏡影，剩有柔腸如線。等甚時，彈碎琴心，抵死重歌河滿。

減字浣溪紗

細細薰風斗帳涼，碧欄干外月昏黃，冰紈香撲小南強。空有華年隨水逝，更無遙夜比天
長，當時可惜不思量。

清平樂

紅綃幾尺，上有長相憶。舊恨重重烏劍墨，一任綠楊天窄。秦桑燕草冥濛，斷腸人在深宮。便把珠簾放下，何曾阻住東風。

臨江仙

十里香街雙玉鞵，輕颺涼裊羅裙。小重山子認眉痕。海波紅似淚，花影瘦於人。可惜芳期成畹晚，渡江誤了桃根。怨猶未報况深恩。秦鬟雲外想，吳語夢中溫。

子夜嬌歌春又夏，銀雲深鎖瑤屏。半天微雨釀新晴。苔花依唾綠，蓮葉帶泥青。催得匆匆歸思切，非關啼到倉庚。烟波只傍隔江橫。斷流求寶劍，替月仗孤星。

清平樂 題方瘦坡香痕奩影集

新詞幼婦，花落微波縷。沈水燒殘圓玉瘦，脈脈討春時候。晨鈔暝寫偏忙，何曾自訴清狂。也似和凝才子，詩名嫁與冬郎。

長亭怨慢 亞子分湖舊隱圖，曾以三截句題之，意有未盡，再成此詞。

記一抹修眉浮處，（復翁取昌黎「天空浮修眉」句爲浮眉樓，見劉醇甫記）翠柳遮樓，碧梧侵戶。韻咽瓊壺，水村風味入琴趣。雁牋凝素，恍飛到湖天路。月色故依然，只少伴鷗聲人語。（陳

梁叔題分湖柳氏草堂句：人語艣聲諸港曉。
 延佇，怕烟波回首，化作淚綃紅絮。梨雲卷夢，儘孤負櫻桃春雨。問他日穩踐溫盟，可許我移家同去？有畫裏珠簾，盼煞詞家尊俎。

摸魚子 武強溪上賦竹筏

小溪頭一痕蒼玉，凌空蕩漾烟水。鱗紋隔浦亭亭綠，重認袖羅寒翠。來便逝，怕彈徹篔簹，添上湘娥淚。春潮未起，儘短荻牽情，香淺熨夢，人抱冷雲睡。溫盟好，休嘆浮沈身世。江湖畢竟非計。沿村畫斷篔簹雪，撐老幾家漁子。何況是，正葉葉輕風，暗換流紅意。蘭津悄指，笑石畔銀灣，壺中瑤席，殘影尙天際。

曲游春

予最愛蕭齋曲游春詞，因憶壬子春間，流連湖上情事，追填此解，卽步其韻。

西子歸來未？喜玉鉤雙卷，波共籠纖。柳外黃昏小，檀欒壓水，萬荷無隙。鐙火重城隔，正倦倚畫闌吹笛。等月華湧上南屏，重看一湖春色。遠陌，明霞垂碧。有隄礙輕橈，橋阻香勒。遙夜生涼，付雲藍墨漲，淚紅紗幕。烟冷催寒食，聽古寺疏鐘敲寂。只少年冶夢成塵，遺愁未得。

齊天樂牡丹

朝雲吹熱闌干影，春情故園初透。鮫淚量波，龍香搗夜，魂斷豔歌芳酒。韶光易負，看舞倦金釵，有人垂手。說起相逢，不辭延佇爲君瘦。傾城恩怨罷數，膩紅開未了，題句難就。剩月瑤臺，零風錦幄，付與尋常花柳。游仙夢久，願重倩啼鴉，祝伊長壽。軟入塵衣，客懷渾似舊。

瑞龍吟 和清真

春明路，依舊倦水漂花，斷雲沈樹。悽迷一角孤城，夕陽又在平蕪盡處。漫凝佇，曾記那時，攜手試鶯簾戶。西山綠到而今，爲誰喚起，眉邊怨語。秋病不禁游事，文鴛耽口，愁鸞慵舞。何況酒醒天涯，風景非故。銀屏子夜，吟老銷魂句。休重問湘皋微影，吳廊香步，月帶簫聲去。傷高暗結，千絲恨緒，還似垂楊縷。紅淚溼重重，燈紗籠雨，蘭宵伴客，寒衾殘絮。

踏莎行 孫爾安小照

殘月明湖，荒烟畫院，當初只是尋常見。雙成宅畔又逢君，滄桑愁壓吳船滿。白雪詩香，靄夢暖，鏡中顏色何曾變。東風萬一許相干，休教吹皺觀河面。

甘草子

將暮，撲面香塵，燈影迷瓊戶。昨夜段家橋，今日吳松路。若過那時聯牀處，且莫把長途輕

數。一自登車別君去，便悄無風雨。

虞美人 題余十眉寄心瑣語

當年雙漿鴛湖路，一片烟和雨。畫簾才放又黃昏，不見玉妝臺畔改詩人。烏絲密字重重寫，紅淚珍珠下。莫將沈醉怨東風，地久天長何處不相逢。

臨江仙 八月徐園雅集

銅鞮秋衾溫昨夢，軟塵紅煞香街。相逢無恙又天涯。十千論酒價，百一數詩牌。底事江南忘不得，個人西北偏佳。尊前可惜損風懷。吟成歸去晚，殘月戀空階。

點絳脣 用覺翁韻

回首空城，水香吹上湖濱路。暮鴉啼樹，可是雙棲處。楊柳當門，苦苦催人去。春愁貯，暗黃千縷，不抵風中絮。

齊天樂 遼后妝臺，國初諸老，多賦此調，效顰一解。

東風吹斷前朝夢，塔鈴悄聞私語。孤燕辭巢，雙虹臥水，猶想翠華行處。蕭娘老去，漸剩騰霧鉛，暗銷塵土。只有西山，對人猶展舊眉嫵。十香誰記恨事，素波吹不起，一鏡涼雨。璧月秋圓，蓮

衣晚墜，作弄離宮晷暮。凝情弔古，已換却回心，門芳門戶。坐暝層臺，隔城歸妬女。

采桑子

傾城一顧憐秋去，露粉飄殘。軟玉波寬，水殿聞簫獨惘然。嬌蟾依舊珊瑚影，茶夢成煙。今夕何年？珠箔銀鐙特地寒。

清平樂

舊攜手地，欲住渾無計。一片流花橋下水，漂盡離人清淚。高樓望斷王孫，輕莎綠到朱門。寄語辭巢雙燕，爲儂珍重黃昏！

三姝媚姑蔑舟次贈人

啼鴉聲正苦，盪微波蘭橈，紺泥沈絮。夢月闌檻，又鏡奩斜掩，小眉愁嫵。斷續春吭，彈淚入黃梅殘雨。回首華年，第一傾城，醉魂輕誤。莫賦吳娘哀句，怕夜玉紅彫，隔江柔艣。漬粉娥妝，付翠翹雙顫，假煙涼鷺。刻骨難銷，渾不是、今宵悽語。悵望瑤笙消息，香塵輾處。

玲瓏四犯杭州秋別

憑柱記年，簾衣分影，出門一笑如此。露華零亂處，轉眼哀笳裏。玉璫舊情漫寄，怕啼鳥背人

驚起浪卷空城；月明遙夜，殘緒渺難理。西湖好，銷金地。只沈雲夢冷，誰爲樓倚。野風吹不到，墜葉澆秋淚。螢花夠寫江南怨，又迴入闌干千里。銀燭底，羞重照漂香暮水。

向湖邊和樊山翁論詞之作

稚羽棲煙，連錢嘶晚，望裏翠微如霧。路入西城，款倚門嬌樹。正好春臨水，試證當花簪勝，指與暗香新句。拍遍紅牙，信文章有據。倦旅觚稜，未惜流光誤。將芍藥淚點，銷尋常兒女。故國靈芬，仗詞仙深護。遣東風長作蘭茶主，休惆悵瑤軫玉簫吟緒苦。繞砌茶痕，是一絲心炷。

浣溪沙

似水芳華閱暮朝，當時人意怨春宵，斷無閒淚澆鮫綃。荷葉有絲難作鏡，柳花如夢易隨潮，年年風雨誤歸橈。

過秦樓

雨濯殘蕪；月沈高樹，夜色遠開荒甸。愁箋照水，怨笛呼風，此意故人能見。腸斷歲晚殊鄉，噉濕羅衣，不關紈扇。繫流光一羽，玉京秋冷，鬢霜新染。還記得路隔吳波，情連越嶂，漸改舊時池館。雅翻壞堞，蛩語空牆，匝地軟塵千變。長恨年年，未堪鐙燼紅蓮，更催銀箭。只危亭倚罷，零亂天

涯病眼。

少年游慢夜坐和安陸韻

煙林升夜月，細雨敲窗乍歇。羅簾無塵，銀屏如水浮瑤闕。夢老尊絲滑，斗轉唳蜩發。望遠情傷，故人卻換新節。半榻微雲徹，還念胡雛西窟。驛路餘花，江邊殘笛縈愁骨。更斷衰鐙小，杵急寥天闊。少壯情懷，驚心黑頭成雪。

惜紅衣和孟符用白石均

水殿秋歌，朱樓夜約，暮年心力，泪語驚絃沈雲碧。南花素臉，知易負平陽孤客。荒寂，殘夢醒時，覺疏鐘初息。銅駝綺陌，匝地西風，狂塵未堪籍。捐璫舊恨，帝國限南北。咫尺杜韋天近，莫傍古城行歷。問幾家雙照，今夕月華顏色？

綺寮怨和樊山翁水榭納涼

雨過遙青如鏡，柳絲偎翠煙。傍幾曲照水迴廊，游鱗少暗戲清漣。逢迎詞仙杖笠，吟情好，玉笛驚萬山。該對花細說孤歡，香風起，亂絲迷釣船。淡殿漫懷麗娟，明妝顧步，牽裳自唱秋蓮。舊月催圓，費凝思錦機邊。神雅未辭殘社，想帝子鐘相憐。晴暉半大，高松滋，曉露人澹然。

曲玉管悲思

倚水樓孤；辭秋葉老，荒城鼓角星河動。目斷參差宮闕，都在愁中，好朦朧。晚晚年芳，淒涼人語，拍天滾滾江流湧。萬事無憑，那許着意從容，恨誰同。便有心情，只銷與殘春一夢。儘教訴盡纏綿，依然老淚西風，滿長空。念年平生悲感慘淡，相如詞賦，屈原芳草，永夕相思，不到驚鴻。

菩薩蠻

迴波不駐驚鴻影，羊車淚濕驪簾冷。眉月夜沈沈，西山天擴青。春明門外路，有夢無尋處。燕草碧如絲，愁心付阿誰？

燭影搖紅寒夜聯句疊前韻

春路迷雲，次公。暈潮蓮臉疑中酒。禁愁無那近黃昏，劍華。羅袂又雙手。次公。斷夢巫山賺瘦，劍華。倚天寒幽篁舊畝。東欄立遍，次公。繫馬誰家柳陰時候。劍華。帶雨啼妝，馨香自折宜三艷。次公。蕩波歸槳繫刀環，曲裏羞蛾鬥。劍華。嫩約浮沈怨否病相如賦情謾負。次公。相思知未半，枕重假，簪梅如豆。劍華。

氏州第一

風色江頭，留戀未久，爭如鬢點催老。廢檝橫沙；寒燈照夢，禁得浮生潦倒。殘蓼疎蒲裏，尙記當年遊釣。水若漁梁，山圍故國，夜深鷄曉。幾載關河吟興好，又誰見尊前懷抱。野渡人稀，前村雨細，識舊家秋早。渺天涯鴻雁遠，浮雲外音書不到。事向明朝，料陰晴繁星漸少。

黃鸝繞碧樹十三日遊可園爲展上巳之會

金勒城西路，垂楊十里，去年曾見。幾度清遊，又瓊枝換色，暝塵遮面。乳鶯未醒，有誰管春深淺？須記取上巳匆匆，負了芳期能展。慘碧流波似箭，數襟痕舊愁難浣。夕陽外指荒煙廢塔，猶認離苑。暗省畏吾故事，向那及漁樵賤。花時最好重來，萬紅同看。

洞山歌

小樓紅處，想浮雲依舊，無數垂楊比人瘦。怪殘宵燈火，賺取春愁，渾不是當日相逢時候。闌干休再倚，雨橫風狂，禁得思量幾回又。芳莫滿天涯，說與芳期，莫過了亂鴛啼後。聽何處疎鐘下高樓，問似水華年，那人知否？

小重山殘冬和白石

街鼓無聲雪霽時，羅屏殘夢遠皺春漪。隔年閒恨有花知。江南好，臨水忽思歸。瓊苑舊情

非，何堪銀燭背話依依，晚來嬌鳥爲人啼。愁千斛，還繞玉交枝。

驀山谿夕過天壇

荒郊萑葦，似戀煙波趣。舊客怨新秋，換當年鸞旗玉輅。甘泉廢甃，誰認羽陽宮，天無語。黃塵
聚，漸漸靈壇暮。長安亂葉，幾度驚風雨。一水隔高樓，送流光緩歌曼舞。牛羊野草，凝想碧雲深，
啼雁苦。蒼鱗怒，極目成幽阻。

梁州令 玉螭橋和耆卿韻

路入花天曉，晴暉半空流照。燕臺秋樹蒼蒼，彫闌玉砌，回首情難了。金莖露冷西風小，萑
苒增悲惱。百年來去承平少，昨日朱顏，今日又成老。

惜紅衣和孟敏

廢苑鴉啼，河橋露濕，斷腸今夕。夢老蓴絲，南花泫離色。關山便好，凝望處闌干愁拍，誰識江
上庾郎，恰年來頭白。高樓錦瑟，彈淚何人？哀絃夜深急。飄鏡舊路，萬一水雲隔。幾日吟吟閒醉，
不記瓊窗消息。怕客情輕換，絨札玉璫無益。

雙頭蓮 和樊山翁用美成韻

日落晴嵐草彫荒岸，疲馬遠嘶，開鷗未醒。咫尺帝城，幾處冷紅零碧。愴寒色，花下闌干。歌前眉黛，瑤瑟罷彈，羅衣倦理。仿佛箇儂，目斷曾相識。畫樓隔，憐此時暗裏，情懷難適。寒北塵多，西人去，負却桂堂今夕。傷高中酒，弔古題詩，晚籤又灑。好天便，有秋風，怎許俊遊息。

前調

樊山翁憐和美成，要予同作；並云：周詞後闕收句，「但只聽消息」，與前闕收句，「合有人相識」平仄正同，聽字當作平音，今從之。

萼綠華來，杜蘭香去，塘水漸低，蓮房暗老，幾曲翠痕，好對遠山頭碧。鬪顏色，風雨無多，關河依舊。搖蕩露枝，悲涼戲鼓，倚陌鈿車，不是新相識。茜帷隔，知與誰共數，長秋閒適。絳蠟殘啼，紫簫清怨，可惜誤人連夕。天涯芳草，畫裏高樓，儘縈硯滴。稍難訴，兩慊慊，到此成將息。

虞美人 孫子瀟雙紅豆圖爲樸菴太史題

盈盈一握相思子，恨迸吳杯起。江南回首已無春，不道畫中還見百年人。樓臺花底驕塵送，老淚荒波湧。好枝分染夕陽紅，惆悵玉笙聲裏聽東風。

減字溪浣沙

桂殿西頭玉作叢，
鑪烟春障隔花風，
了無閒夢費疏鐘。
歌畔未忘人畹晚，
燈前誰訊路冥濛？
天涯愁盡雪霜中！

南鄉子

夢斷水雲鄉，
自卷羅幃對玉鉿。
憶起別來滄海事，
淒涼！有雨無風夜更長。
促織叫銀牀，
彫盡秋楊葉數行。
昨日經過惆悵地，
迴廊，絡鼓清歌正夕陽。

五〇 金光弼夢良詞

采桑子 昏燈獨坐，
聞鄰家奏風琴聲頗悽婉，
令人生感，因賦兩闋。

燈昏細溯當初事，
思也深深，愁也深深；
何況今宵酒上心。
柔腸不住車輪轉，
醒也沈吟，夢也沈吟；
最是淒清一曲琴。

燈昏獨灑淒涼淚，
山也情深，水也情深；
辜負生平萬里心。
當初悔不詩書棄，
愁也難吟，怨也難吟；
不是鍾期枉聽琴。

金縷曲 年假將屆，與安瀾把酒深譚，不勝別離之感，倚此以贈。

別緒從何理，聽江干陽關三疊，行將唱矣。舊日悲歡還自訴，歷歷心頭眼底，陡添着相思情味。五日爲期期太促，（距假期僅五日）怕匆匆又惹銷魂耳。言難盡，神馳已。因緣難道慳如此，有今朝無端離散，相逢何事。各自歎歎形夢寐，總爲依留無計，空灑得英雄雙淚。夙昔情懷須記取，望音書時向征鴻寄。喜珍重，千金意。

五一 金燕翼謀詞

摸魚子 秋病

鬢絲禪榻拚孤寂，紗窗金戍深掩。青衫暗怯西風緊，兀坐灑薰銀篆。錫霧眼，且斜倚霞衾，宛轉吟身倦。藥爐烟捲，悵瘦比黃花，開如白鷺，愁酌玉鐺澆。前塵事消渴，相如偶，茂陵夜雨聽慣。新涼頻喚添羅袷，伴我燈挑竹院。拋繡翦，倩翠袖低扶，小步郎常輓。矮窩似繭，容著箇維摩，霜晨露夕，賦景增悲感。

買陂塘秋思

聽西風昨宵吹遍，寒衣思理瑤篔。驚心冷雨敲庭竹，攪起枕邊蝴蝶。愁萬疊，正藥裏因緣，宛轉撩人日。重陽遙隔，訝霧擁江城，鐘沈野寺，預做插萸節。悄悄際容易，林鴉噪夕，蘭缸底閃羅幕。幽蟲絮徹銀床畔，無那和來鄰笛。看素魄，恨雁斷汀洲，脈脈情懷惻。芳樽強挈，趁薄醉惺忪，蒼茫秋思，寫出倩鱗墨。

五二 俞鶚劍華詞

南柯子

柳眼新舒綠，桃腮乍綻紅，一聲鶯囀宋家東。回首玉人如夢，醉春風。
 入夢瑤臺客，凌波洛水仙，思量何事到人間。淒絕落花紅處，憶當年。
 暈靨珠圍領，琅璫玉墜肩，叢頭鞋子繡文鴛。嬌怯欲行還住，意綿綿。
 倭墮雙丫髻，欹斜七寶釵。春風兩小各無猜，攜手海棠花下，酌金罍。

拂扇伴遮面；橫波暗弄情，曉霞凝豔遠。山橫，魂斷粉香微度，笑輕盈。
 欲醉醺顏暈；貪眠綠鬢鬆，夢回無力意惺忪。斜眄玉郎微笑，訴情濃。
 放權桃花浪；飛墜燕子風，賣錫聲裏樂無窮。歸去最憐嬌喘，汗粧紅。
 繡帕裁連理；熏爐注降檀，夜深不耐薄羅寒。驚看水晶簾外，月闌干。
 着意須憐我；含嬌苦泥人，團酥凝雪綺羅春。容得萬般嗔恨，爲微嚬。
 聒耳嫌啼鳥；攢眉怨落花，破愁閒院賭紅牙；伴把荔枝輸與，好相誇。
 多爲伊人惱；橫教阿母噴，和嬌和淚曉粧妍。偷向縷金屏後，畫嬋娟。
 鬢畔迷蝴蝶；釵頭顛鳳凰，含情無語怨斜陽。依約耳邊聞道，莫悲傷。
 寂寂香沈麝；迢迢漏轉蟲，紅牆誰道是銀河。咫尺杳如千里，不容過。
 夢斷愁難續；心期意未休，閒吟紅豆暗相酬。惆悵憑闌望處，碧雲稠。
 繡幕常卷風；明窗向月開。避人青鳥報書來，贏得九迴腸斷，獨徘徊。
 莫報金條脫，難回玉鏡臺，臂紗錯繫怨誰來？羅袖淚珠紅透，寸心灰。
 鳳去簫聲咽；鸞分鏡影愁，他生未卜此生休。何事阿儂痴絕，不同頭。

(含情原作衆中)

別憶三秋久。逢欣二月初。春衫杏子漾紅酥。惟有見時無奈。太生疎。
 頰尾魚空瘁；叢絲繭自纏。叢絲別院奈何天。猶向桂香啼怨，教人憐。
 好夢徒餘恨；深情總是痴。人生何處不分離？爭似畫梁雙燕，鎮相隨。

醉江月 哭蔣希剛

飄蓬海外，嘆三生緣淺，重逢無日。驀地飛來驚惡耗，歲遇龍蛇猶厄。荆蠹心腸，離諸手段，底事都消歇？斯人如此，陌路也應憐惜！何況南浦依依，芙蓉贈我，後會丁甯切。勞燕分飛誰便料，生別翻成死別。一束生芻，兩行血淚，今日儂淒絕。他年儂死，更誰爲著悲咽？

賀新涼 寄贈天民

萬里通吟緒，話平生劇憐同病，十分酸楚。寂寞天涯同調少，難得知音似汝。且休怨水迴山阻，百事翻從缺憾好，怕相逢只怕相離處。牽惹起，別情苦。天心未必將人妬，但暫時風塵憔悴，古來堪數。豈有蛟龍愁失水，莫便空山老去。况如此江山誰付，我亦頻年寥落甚，嘆東塗西抹標題誤。愁萬疊，忍重訴。

菩薩蠻 閨思

迴文繡罷腰肢倦，玉函斜沈芙蓉面。無語正思惟，月明烏亂啼。欲眠鴛被冷，惆悵婆娑影。安得把愁心，照將東海濱。

勝勝慢暮春對花開飲感懷成賦。

鶻啼春老；蝶怨香沈，做愁落絮飛花。惹得人暗驚如水年華。層樓倚欄無語，甚東風吹度琵琶。腸斷處，正斜陽故國，芳草天涯。乍醉狂歌未已，看唾壺擊缺，劍吐紅霞。爲問蒼穹幾時塵斷胡沙？青鞵懶傳消息，泛銀河何處仙槎？歸去也，奈蛾眉多嫉，心事還賒。

金縷曲讀天民七祝戲寄

風雨摧腸斷，最相思故人天末，碧雲深淺。道是逍遙塵世外，醒醉由人莫管。容叔夜平生疎懶。慟哭江湖三副淚，更消磨壯志詩千卷。應許我，細吟遍。風流家世從來擅；復何心模堯作舜。端拱南面。看取平章鴛譜日，翻盡人間錯亂。教兒女雙雙如願。自此神州無怨偶，呼呼一醉歡無限。會酒勸，莫辭滿。

菩薩蠻

東風彈柳颺金線，畫堂寂寞雙飛燕。春色最關情，看來愁便生。今年三月底，猶閉深閨裏。

掩淚背鞦韆，玉釵橫半肩。

春光旖旎春晴朗，春花爭向春闈放。春愁總無憑，春情怎得禁。

應愁春易老，却怪春來早。

若道不宜春，思量祇是春。

嚴妝慢步橫塘側，手按裙帶嬌無力。羨殺水中鴛，雙雙交頸眠。

閑題桐葉句，題罷還撕去。

不怕好風吹，羞教阿母知。

庭花爛熳開無主，折來剪束調鸚鵡。鸚鵡轉調人，慣教西子嘸。

疎慵常似醉，貪背紅窗睡。

何處玉驄嘶，垂鞭笑語時。

啼鶯驚起嬌羞韻，羅幃開處朝霞暈。攬鏡自形相，無心理宿妝。

綠窗春晝午，鴛夢從頭數。

歡處不勝情，紅潮蓮臉生。

尋思解佩將誰送，玉纖揉碎釵頭鳳。心事沒人知，嘖眉只自悲。

青春能幾許，愁作東家女。

顧影是嬋娟，應教宋玉憐。

行香子重題小影

紅豆情詩；芳草哀詞，獨行吟躡躡何之。秋風憔悴，却似伊誰？似恨江郎，愁庾信，病相如。

棹無期，把劍何時說屠龍？只在天涯，人人道我，儘有堪嗤。有步兵狂，士龍笑，處沖癡。

醉太平 春遊卽事

深紅淺紅，千叢萬叢。櫻花三月春濃，奈閨中客中！
煙濛雨濛，梅穠李穠。狂教紫蝶黃蜂，也

情慵意慵。

百字令 送孫榮

河梁携手，看綠波芳草，淒迷江渚。難得雲萍逢海外，不道橫遭天妬。擊缶魂銷，攀花心醉，重會知何處？鷓鴣聲裏，萬千離緒難訴！
無奈柳底驄嘶，斜陽欲下，把酒還容與。此別應須各自勵，休似新亭悲楚。塞上驅羊，田間搏虎，努力當歸去。朝鞭珍重，贈君情意休誤。

轉應曲

春曉春曉，夢斷聲聲嗷鳥。菱花照眼朦朧，淚迸臙脂線紅。紅線紅線，繡作愁雲一片。
無語無語，楊柳暗傷金縷。曼聲誰度伊涼，嚙指聽來斷腸。腸斷腸斷，沒處安排嬌嬾。
多病多病，鬢亂釵橫慵整。青鸞西去音沈，惆悵圍屏夜深。深夜深夜，拜月紅闌干下。
芳草芳草，誰報王孫歸早？東風吹老韶華，贏得漫天落花。花落花落，蜂蝶一時寂寞。

蝶戀花 有寄和亞子均

消息頻教青鳥誤，煙雨樓台，目斷江南路。打疊相思憑夢與，夢中見了還無語。暗卜金錢
 騫聽取，天外烏啼，似道郎歸去。安得樵風來日暮，霎時吹到郎邊住。

昨恨愆期今又誤，西抹東塗，辜負郎辛苦。百草芳菲過鳩語，做愁梅子黃時雨。怨曲誰吟

腸斷句，斷續聲中，待化魂飛去。怪底春雲無覓處，門前老却珊瑚樹。

滿江紅 思歸

漢劍當飛，問何事勞勞客舍，須曉得春卿試例，不收龍馬。猿臂休隨李廣射，小人應學樊遲
 稼。看雨中風帽有誰憐？歸休罷！荒徑裏，茅廬外，松與菊，桑和柘。便對花行酒，吟哦其下。春夜園
 開桃李宴，秋朝飲逐雞豚社。更清風明月任流連，原無價。

金縷曲 爲亞子題夢隱第二圖 卷子，卽步原句。

海宇天風起，算從來才人枯寂，消磨無事。想像雲山窮變滅，淺澹愁痕而已。且喜得壺中知
 己。楚尾吳頭來去住，儘逍遙夢也何生死。塵世內，只如此。三年饑走征塵裏，最傷心蛾眉謠詠，
 與君差似。滿目滄桑空贖取，綠水青山圖史，更說甚羲皇情味。他歲若能爲范蠡，棹煙波舍汝憑

誰計。休便道，吾老矣。

又酬別亞子疊均

綠酒紅燈裏，恨忽忽情懷未罄，又將離矣。絕代銷魂勞贈與，畢竟魂銷何許？拚今夜憑欄看死。同是江南顛顛者，者分襟那不雙流淚。腸斷也，且休語！明朝一葉遙天際，憶新詞鴛鴦湖畔，閒愁怎已？秋水長天堪領略，也只蒼涼滋味，况又爲招魂而去。盼到梅花開嶺上，闔閭城走馬搖鞭起。肯忘却，殷勤意。

又茸城別道一時，君往嘉善，疊前均。

容與紅亭裏，暮吹來數聲征鐸，離腸斷矣。底事軍兒將人遠，直恁無情如許？渾不顧燕勞啼死。一夕相逢便相別，怕天孫終老河梁淚。還織甚，錦中語。碧天雲樹遙无际，便今宵清風明月，思量焉已。閒道汾湖稻蟹美，絕勝葦鱸鄉味，好讓汝持螯啖去。魂夢楓林應念我，問何時招得仙鳧起。重訴說，別來意。

又贈景秋陸，三疊前均。

潦倒風塵裏，忽相逢知音張籍，儘銷魂矣。索我詩篇懷兩袖，笑有癡情如許。怎不教吳儂狂

死。一種相思心更切，話神州只道長沙淚。時戲與，作蠻語。才華豪邁干雲際，論文章千言倚馬，逼人無已。最愛迷陽新雅頌，不減東周興味。莫便向扶桑飛去，碧樹一聲天下曉，再揮毫，要喚靈獅起。差可慰，民呼意。

又得天民手札，并示近作，填此以報。

風雨重陽近，錦江邊黃花紅樹，伊人詩興。相望相思不相見，斷夢飛魂無准，且喜有瓊枝遙贈。樂府爭誇張水部，倚新聲還數張三影。看當世，更誰並？吳儂顛顛君休問者，歸來黑貂裘敝，腰圍瘦損，醉月擎雲年少事，讓與得時優孟。算我已今生無分。仰屋著書書何有，只心肝嘔盡眠難穩。常擱住，許多恨。

赤棗子 贈周仲穆

嫻政事，擅文章，才豪氣猛狹風霜。天下山川如指掌，江東人物數周郎。

醉公子 贈周天石

到處沾春酒，一飲還千斗；自是醉中仙，舉杯笑問天。按曲偏教誤，方便賺伊願；脫手千黃

金。風流有幾人？

七娘子贈汪桐生

酒樓一見情如素，相親轉恨相逢暮。天半朱霞，風前玉樹，看來總是銷魂處。南來北去長亭路，吳姬越女愁應妬。記取花時，龍華共赴，羊車載果須分與。

南鄉子贈承玉書

風瑟瑟，雨濛濛，偶來花裏忽相逢。把酒紅樓情繾綣，思量徧，同學少年多不賤。

番槍子贈朱子湘

一吐才略滄溟窄，得意馬如飛，春風客。十年豪學屠龍，倚來天外劍三尺。甚日破胡歸，浮大白。最愛月樣精神，花樣秀格，緩帶白翩翩，傾瑤席。笑他慷慨悲歌，過江名士衆如鯽。孰箇好同伊，稱連璧？

風流子贈馮餘生

相逢共一笑，黃墟畔，脫取鷗羈裘。儘酣飲浩歌，大江東去，十年漂泊，天地浮鷗。謾相戲，君眞彈缺客，儂是醉鄉侯。紅豆一株，荔枝千顆，定風波裏，端愛奴柔。別來知無恙，驚心處，春暮鷓鴣啼愁。惆悵月明青塚，笙咽秦樓。者多情小杜，蕙芳甚處，也應夢斷，廿四橋頭。前事不堪回首，拚付

東流。

天仙子贈姚石子

笑倚瓊樓弄月明，風流天付與多情，未應有恨到今生。斑竹管，紫鸞笙，長吟細按總雙聲。

紅娘子贈李康弼

徙倚蓮花鞦韆，笑語天花墮。乍醉春風，重溫鷓鴣夢。禪心印可，問前宵星宿竟何如？只豪狂笑我。銀鑰教輕鎖，玉漏教偷過。拋枕眉攢，卷衣腸斷，欲歸無那。道今番錯也已嫌遲，且隨權閑坐。

破陣子贈陽惕生

痛哭西臺臯羽，狂吟詩膽劉叉。踏遍神州雙鬢雪，愁破胡天萬里沙。血飛霜劍花。巨耐酸鹹世味，其如潦倒生涯。偷嫁儘多劉碧玉，一去難招萼綠華。焚香心事賒。

行香子贈漆雲卿

歌妙紅綃，衣妙雲綃，正江南花發春饒。逢卿瀟灑，招我逍遙。有韋娘愁，秋娘瘦，泰娘嬌。可口冰桃，笑口櫻桃，儘銷魂良夜迢迢。美人香草，一卷離騷。是十洲仙，三湘客，五陵豪。

酒泉子贈俞語霜

載酒江湖，年少風流狂杜牧。珊瑚敲折玉尊前，一笑掌中仙。阿嬌無意藏金屋，偏又談諧偷割肉。別來最楚湘行，詞句幾人驚。

繡帶子贈陸冠春

團坐醉春風，便名姓休通；索向尊前拇戰，銀燭亂搖紅。詞筆陸雲工，絮深情刻骨玲瓏。衆中狂笑渾無語，但意氣如虹。

摸魚兒 酬楚僉汕頭

展新詞密情如訴，夜來幾度搔首。未曾相見還如此，見了怎生消受。三爵後，想耳熱狂吟，拔劍蛟龍吼，氣吞牛斗。看破碎江山，淒涼世事，付與捧天手。滄江畔，慚愧千金敝帚，銷魂枉說蟹白。離人忽聽公無渡，風雨亂鳴鳩婦。君信否？只盼望歸時，痛飲梨花酒。春申浦口，儘疊韻雙聲，淺斟低唱，笑索井邊柳。（謂亞子）

前調

亞子書來，謂風雨惱人，苦無已時；九十韶光，已將過半，而枝頭尚不着一花。人天愁恨，寧有逾於斯者。悵然賦示。

向春來淒淒浙浙，問天何事愁倒江山如此堪悲絕，錦繡甚時重造，春未老，便着意栽花，花也羞開了。鵲兒莫噪，恐紅杏枝頭，作些春意，又賺尙書惱。梁間燕，當悔今年晚到，舊巢收拾須早。深宵不少花姑恨，零落生涯怎好？憑檻眺，只滿目萋萋，綠遍天涯草，愛心似擣。待過却清明，惱晴唯有，飛絮亂池沼。

念奴嬌海上重寄春航

別來無恙，歌板地依舊風流年少。桃李精神鸚鵡舌，繞屋清音幽渺。看却魂銷；聽應腸斷，密意誰能曉？臨風宛轉，亂頭粗服都好。還笑中酒江頭，尋尋覓覓，羅袂芳塵杳。可爲狂奴狂太甚，苦苦人前避了。雲出無心，泥行何意，翻被閒花惱。一時瑜亮，畫圖空復相攪。

如此江山梅浮檻檢詩圖爲石子粲君作

阿誰風月江山主，閒來放吟今古。明聖湖頭，鄂王墓上，兒女英雄塵土，銷魂幾處。嘆楊柳藏鴉，冬青啼宇，慘綠愁紅，一齊粧點入毫素。雙雙年少俊絕，比肩憑檻，恍似鳳樓仙侶。鏤玉栽花，樹詞酌句，妙寫深情縷縷，風流堪妬。想月下尊前，若歌儂舞。興罷歸時，錦囊憑檢取。

朝天子送顧四北上

去去凌風舸，想迎處頻虛車左，雲邊住妥，似當年癡麼。似醉死憑他傾白墮，曳尾泥塗應笑我。狂怎可，只算得今生虛過。

虞美人 懷朱三粵中，並訊某君消息。

殘紅碎綠當風靡，一片春如洗。江南行客奈愁何！聽斷鴉啼，行不得哥哥。種情紅豆相思子，莫寄魚雙鯉。夜來魂夢繞山阿，若有人兮，向月正悲歌。

漢宮春 夏日寄楚儉

一夢層城，被天風吹醒，吟斷瑤箋。鳩人綠珠井畔，鏡幻嬋娟。珊瑚未老，繫相思卅六文鴛。誰料得蛾眉謠詠，艷驚鄰女三千。乍返芳魂倥傯，看繚綾小字，顛倒堪憐。因緣短長莫問，誓續離絃。雲階月殿，喜重來提筆如椽。還又值蟠桃熟候，賦傳王母池邊。

金縷曲

狂甚猜猜犬，踢毬餓畫堂橫臥，嬌貓誰遣。屈戌銅鋪輕鎖月，鸞額蝦鬚半捲。奈羅袜瑤階難刻，辛苦蓮心拋一顆，又誰知打得鴛鴦散。餘象口，麝烟篆。飄零我是無家慣，者年年阻風中酒，興還非淺。嬌媚伊人江上步，怎奈塵侵雨澣。可有箇凌波相伴？曲曲芳菲楊柳岸，卓金車莫被長

條絆珍重意，加餐飯。

洵美非吾土，甚年年風飄雨泊，欲歸猶佇。剩粉零脂塗抹盡，一任鴛鴦燕舞。又還恐蛾眉偷妬。長日慳慳無計可，只相思兩字書千箇。誰辨得，此心苦。靡蕪自綠山頭路，漫沈吟秋風團扇，比縑論素。枕冷衾寒渾已慣，說甚淒涼意緒。再莫向臨邛買賦。底苦隨鴉教打鳳，有黃金案把娉娥鑄。拚笑煞，隔鄰女。

蝶戀花 鐵厓來書，頗有所勸，并以犁舌地獄爲誡。庶此以報。

慷慨新亭

蝴蝶莊周長夢嚙，拚得生前，身後何須計。遺臭流芳無定例，紛紛笑罵徒爲耳。

名士淚，斫地悲歌，畢竟成何事？結客江湖空有誓，千金散盡誰知己？紅杏尙書

豪宕風流人自各，鐵板紅牙，妙唱何清濁。澤畔行吟愁落拓，美人芳草遙相託。春意閑，搓粉團酥，豈必皆輕薄？犁舌墮來良不惡，定休懊悔當年錯。

前調

銀漢紅牆遙不阻，耐可銷魂，只沒銷魂處。百計思量千樣語，見來半句何曾吐。九死應難

酬一願，怕殺相逢，偏又相逢屢。我尙飄零卿已誤，傷心共是沾泥絮。

醞釀芳春心幾許，一樹梨花，經得風和雨。搓粉團脂無意緒，一鉤羅袜空階步。倦倚山他朝復暮，自悔遲迴，頻把釵鈿誤。豈是鴉難隨鳳翥，生來不合雲邊住。

生小心靈能解語，紅豆拈來，戲縮同心縷。白雪閒吟調謝女，憨癡愛讀高唐賦。朱鳥窗前偷笑語，阿母無情，頻喚梳頭去。嚙指乍來花下步，綠嬌紅姘饒風度。

孤負平生應莫恕，去便忘來，來便匆匆去。無計得留春且住，蘼蕪綠遍江南路。懊惱感甄空自賦，有分看伊，無分和伊語。萬種情懷誰與訴，暗拋蓮子中心苦。

洞仙歌

金枝玉葉，自玲瓏多致。小字娉婷合天賜。妙鬢仙髻，錦織天孫。渾一片巫峽飛來撫媚。廣寒隨月姊，擘絮工吟，誇說相如賦。奇麗縹緲悵風花，脈脈秋心，迴盪得眉峯皺起。但只怪生來怎多愁？乍織綺芳年，恁般憔悴。

金縷曲

簫鼓江城裏，乍驚迴芳魂徙倚。梅邊柳底，占得年時名第一，玉煖香溫無比。怪帶着濃愁何意。絕恐人間難久住，奈風風雨雨添憔悴。寧薄命，已成例。千紅萬紫憑裝綴，恰天生疎慵意緒。

背花偷睡，媚眼惺忪嬌復困，盪得鴛心似醉。更憊憊把人閑泥。總道多情情有限，祇三分分了能餘幾。還半是，付流水。

巫山一段雲

皎潔宜隨月，娉婷合喚雲。小山薄薄逗芳春，無事總含嚬。懶挽盤龍髻，慵圍簇蝶裙。密絨

萱惹淚痕新，顛顛爲何人？

行雨高邱女，凌波洛水神。夢魂無據見空頻，幽思亂吟身。臉想芙蓉嫩，眉看楊柳新。穠芳

無賴鎖千門，春色幾人分。

金縷曲

閑逐尋芳騎，暮經過笑桃門巷，暮騰欲醉。窈窕誰家人似玉，搖佩珊珊而至，待回面已難迴避。一味含羞嬌不勝，溜春波偷覷情何際。堪笑我，接離墮。蓬山青鳥偏多事，却傳來傾城消息，十分顛顛。恨殺相憐無計可，忽地蛾眉交詈。忍打鴨驚將鴛起，知己粧臺難再得，判今生襤襪爲卿死。風浪惡，且休計。

金粉江南地，誰比得珊瑚一樹，天然佳麗。十里笙歌麋臺路，多恐蜂狂蝶恣。且喜是細車歸

矣。忽報東君將春去，看綠肥紅瘦愁何際。腸斷也，淚如洗。傷春傷別年年事，漫贏得雨絲風帽。飄零無已。打疊重來溫響意，拚割墟頭買醉。任胡婦開嘲惡戲，新舊未須論。素算吹簫無分爲秦賢。釵鈿約，忍拋棄。

滿江紅讀史雜感

虎踞龍蟠，剩半壁斜陽欲墮。忍消受六朝金粉，笙歌徹地。蟀蟋相公偏好鬪；蝦蟆天子還偷嬉。待窺江胡馬，逼城來，爭先逝。蘭蕙樹，陽臺替。嬌並妒，才無比。算春燈燕子，一身經濟。素蟒玉團優孟樣；低頭屈膝將軍事。笑仙霞嶺畔一聲雷，魂飛矣。

投筆狂吟，可繫得樓蘭首至。漫誇說風流絕代，過江名士。監紀羣嗤羊滿塞；尙書獨愛鸞棲枳。任百年兒女盡呼他，降奴耳。乘一舸，鷗夷比。携雙鬢，明妃似。羨阮郎身畔，柳枝嬌媚，豈爲珠冠酬一拜，多因駿馬拚相替。誦白川橋上乞兒詩，能無恥？

隔簾聽爲鈍劍題聽秋圖

瑟瑟素箏鳴，玉露冷，空階悄，疎桐隱約和絃操。蕊一葉隨風，打窗了峭。更譜到雨淋鈴，斷腸多少相思調。騷人懷抱，豈被天知曉。聲聲似把中情道。蟪蛄無賴，又還相吊。者煩惱，除非禮禪

難掃(君好佛學)

百字令 飲鴆後寫寄南社諸子

渺焉歸去，餘一息，猶得淒吟成調。廿六年來塵土夢，大抵悲多歡少。說甚風流，做些煩惱，悔也嫌遲了。人間何世，幾生重復修到。慚愧十載狂名，東西南北，慷慨人爭道。一味狂言成底事，不及雞鳴狗盜！生不能雄，死當爲厲，直向黃龍搗。諸君聞此，亦應撫掌稱妙。

浪淘沙 中國海中晚眺

碧水遠粘天，夕照偏妍，斷霞一抹漸成烟。十里澄波明似鏡，素月嬋娟。幽思正淒然，欲抑還添。輕風何處樂芳年，從道人間春最好，春在誰邊？

一剪梅 調亞子

連波蘇惠之詞，久未能報。乍到天南，頭風大作，苦不能耐。戲填此闕，以答見嘲，且以自療云耳。

簫心劍態意翩躚，腹也便便，口也便便。鈿車何處樂芳年？想殺從前，悔殺從前。雙聲疊韻，醉當筵，拚不相憐，爭不相憐。紅樓夢好絮纒綿，月影娟娟，人影娟娟。

金縷曲贈春航

集定公詩畢，懷思纏綿，情殊未已；因更倚金縷兩曲寄之，并爲亞子賦焉。焦桐獨見賞於中郎，良馬必難逃乎伯樂，况琅玕頻寄，血淚重觀，千秋佳話，良非偶然。意當遂其捧硯之歡，而填「身無彩鳳雙飛翼，心有靈犀一點通」之恨也。

憔悴春雲暮，第一是芳蘭當戶，幽懷難訴。生就溫磨通體媚，紅玉玲瓏萬婢。任菊影梅魂休數，好學湘靈愛悱惻，託碑題血淚，傾情素。銀燭下，黯如霧。合歡桃核終堪妬，怎禁他黃鸝輕薄，隔牆嬌詛。料是姮娥無艷福，合向仙宮獨處。再莫論鴛鴦陳語。瓊樹堅牢勞遠祝，信天花不用鈴旛護。歸只怕，歲華誤。

花草吳宮宴，憶當年聽風聽水，奈何呼徧。我亦人間憔悴者，結客江湖已倦。只檀板金尊羞願。漫擬狂生輕薄意，感悲哀同調能無戀。知我者，幸毋憾。飄零自嘆如蓬轉，待料理相逢又誤，離懷怎遣。羨殺吳江柳亞子，仙羽霓裳重見也。莫怪柔情繾綣。打疊精神憑注定，好淺斟低唱消恩怨。卽此是，神仙眷。

瑤花題窮花富葉中春航小影

偷歌碧玉，學舞瓊英，使青衣椎髻，天生佳麗，整素鬢不藉梅雲梨雪。愁噴癡語，問誰識芳心高潔。竹閣絲喧，秦樓獨倚，半簾明月。堪憐空谷幽香，共浪蕊浮花，羞弄顏色。明珠量去，謾誇羨雙艇莫愁歡極。算一夢春姿休說。怪笑紅顰翠都宜，個是天人難測。

法曲獻仙音春航蠻粧憑楊小影

柳鞦蠻腰；花嬌虵髻，女真新樣粧束。倦撥湘絃，慵歌翠榻，春風暗欺蛾綠。蕩一縷芳魂，醉微波渺難託。舊歡樂，剩冰綃汗脂凝淚，環珮冷，夢雨屢廊墜。玉怨草透心紅，似相思瓊樹千粟。輾與尋常蹋歌娘，偏貯金屋。剗空階羅袜，月姊共憐幽獨。

菩薩蠻

同心結綰青絲瓣，珍珠珥瑱明星閃。雅淡最宜時，何須粉與脂。玻璃金鏡碧，遮住秋波瞥。日暮步西園，何人不斷魂！

玲瓏皓腕環金粟，衫兒窄窄身兒束。簇伴笑難支，鞦韆欲上遲。開裁金風紙，學寫相思字。蠻語韻含胡，參軍合配无。

輕雲矮嬾蟬雙翼，蜻蛚領聳春山逼。妝重懶回頭，溜波頻轉眸。暖風飄麝屑，蛺蝶迷花繡。

款步碎聲多，紅油吉莫靴。

雙雙攜手花街晚，喁喁笑語情何限。孔翠舞煙鬟，高冠菩薩蠻。
茜羅裙率地，腰束柔條細。
耐可費形相，胸前雙鳳凰。

虞美人

冰眸蓮臉嬌無匹，雲髻光如漆。亭亭鼻鼻勝神仙，何須提筆上青天。畫嬋娟。
杏花時節金鶯惱，繡倦紅窗悄。偷攜小妹踏春陽，不知惱斷幾人腸。儘思量。
本來王謝多親故，閑裏逢迎數。參差年紀未加多，風流才調比嬌娥。也還頗。
深情掩抑渾難測，便見生疎極。木蘭雙槳憶橫塘，被人錯喚作嬌郎。顛紅粧。
雲屏忽地傳青教，煩惱添多少。女羅別繫兔絲枝，蹇修爲理怎遲遲。誤芳時。
鴛鴦錯註何須歎，此老胡塗慣。古來良願幾人酬。天教作就一生愁。幾時休。
雲英嫁了瓊英杏，門巷桃花笑。斜陽原自立多時，此生惟有夢來時。見無時。
幾生修到釵頭鳳，纖手憑伊弄。紅蓮結子苦些兒，合懽桃核個心兒。有人兒。

浪淘沙

苦爲解愁懷，典盡金釵，檢奩還怕小姑猜。百計思量朝復暮，沒個安排。錦字憶親裁，緘了還開，紅桃點點淚痕埋。轉喜落花春去也，容易秋來。

一 剪梅

題哲夫伉儷龍尾畫硯，硯爲羅兩峯夫婦故物，背有小篆曰：兩峯白蓮伉儷畫硯。羅方雅擅丹青，名盛一時；哲夫傾城亦俱善畫，今迺得此，誠千古風流佳話也。

一池消得幾多愁，花草蘇州，明月揚州。摩挲幾點墨痕留，彩筆雙鉤，小字銀鈎。三生應爲愛風流，撇了鸞儷，來伴鴛儷。丹青閒供客中遊，楚尾吳頭，驢背船頭。

霓裳中序第一

孫郎與余交最深，東瀛一別，忽忽五載；西燕東勞，相思良苦。然尺素往來，無日無之。去秋，自燕至海上，而余適歸里，書來約十日聚，以事遲出，及往而君復行矣。時方聞其負病也。世路干戈，關河險阻，由是不得通音問者，將半歲。正在尋消問息，而雙鯉忽來自蓬島，并偕曼殊合攝小影一枚，曼殊固舊識，雲塵久隔，魂夢爲勞，今并得之，喜可知矣。唯容顏無恙，而客感蒼涼，愁溢言表，讀之又不禁悽然欲絕。爲譜此闋，卽

題照後。

離腸遠樹直，李杜參商逢未得，飄泊各難爲力。漫萬里南溟，萬重蓬島，垂雲奮翼，祇塞鴻梁燕皆客。深情在，水天不阻，尺鯉寄消息。悽惻乍宵風逼，濕魂夢關山欲黑。維摩多病正憶，彷彿平生，落月顏色。亂愁翻永夕，驀海外飛來對壁。神姿好，紅絲雙繡，伴我夜燈側。

湘月憶陳大吳中

十年湖海，話滄桑還省，蓬萊流淺。健筆縱橫搖五嶽，六代文章冠冕。紫綬辭官，青蓮入幕，四座驚雄辨。滄浪亭畔，接籬斜醉山簡。悵望水壓蒼天，烟黏碧樹，萬里飛魂遠。解識美人遲暮意，贈我離騷一卷。淩落何成，臃腫却立，愁斷吟髭撚。西風鱸膾，甚時同把金錢。

愁春未醒

消磨病沈，醞釀愁潘，甚東君作惡，輕輕吹出奈何天。試問人間，那個逢春不可憐？憑他窗外，聲聲喚起，也自闌珊。第一銷魂，風風雨雨，乍暖還寒；把十分嬌紅嬌紫，暗地摧殘。蕩漾晴空，游絲千縷挽應難。多情贏得，曉鶯殘月，斷夢如烟。

沁園春壬子十一月七月初度，獨酌荒江，醉後調此自壽。

箕踞南山；鍾飲北海，放懷正該。且生休嗟此，白楊荒漠，死便埋我，綠水之涯。千古英雄，百年塵土，富貴功名安在哉？從今後，把閒愁掃盡，笑口長開。鏡前自潑春醅，任形影相酬，歌莫哀。况鴟媒无賴，欲拚未得，祝宗頻告，小住爲佳。世莫能容，天乎何愛，地下還應惜此才。須知道，只醉鄉廣大，讓汝狂來。

渡江雲花朝

中年漸近，哀怨駁多，幾歷劫塵，載歸田里，風景依稀，河山非故，遭茲良辰，能無於邑！冬郎詩云：「每遇百花生日日，未曾淒斷似今朝。」正余今日之謂矣。

芳郊新雨霽，暖空颺碧，芊綠貼成茵。輭塵香屑亂，鳳印雙鈎，笑語隔梨雲。鸞條束錦，和紫蝶舞入花津。閒繡闥，爲花生日，鬪盡好腰身。逡巡，吟邊淒斷，夢裏牽縈。絮心期无準，餘恨在烏衣歸燕，金谷蕪春。成蹊自有閒桃李，瑋翠尊來醉何人？斜日外，鴉翻數點愁痕。

桃源憶故人

見槩子匪石唱和詞，仿玉樵七律置「雨絲風片煙波畫船」八字於句首，余亦繼聲。雨中紅絃桃花淚，絲管玉樓同醉。風過幾番誰記，片片愁滋味。煙江舊是消魂地，波沒斜

陽天際。畫出六朝佳麗，船傍秦淮艤。

淡黃欄。匪石以和白石道人明朝又寒食之作送余還里，依韻酬之，卽以爲別。

黃鸝語澀，寒凝東西陌，絮亂絲繁天愀惻。重把芳期誤了，歸意空梁燕應識。奈枯寂，離君正寒食。漫商略，五湖宅，忍長條折贈淒行色。古道斜陽，洒醒人遠，墟落孤烟悄碧。

雙紅豆。亞子既刊春航集，復以子美集索題，率成一闋。

歌斷腸，聽斷腸，腸斷斑駁送陸郎；梨雲繞夢長。玉笙涼，玉人涼，一曲新聲兩擅場；（子美與春航同以血淚碑見賞于亞子）無雙譜亦雙。

齊天樂贈芷畦分南

三篙游棹曾經處，橫飛半空鷗鷺。古樹眠雲，春波皺碧，一笛漁簑烟浦。橫舟款渡，載明月高歌，大江東去。望眼溟濛，老魚吹浪瘦蛟舞。明璫素襪宛在，翠尊應共醉。瑤闕吟侶，（君新覓得葉小鸞墓）繡被籠薰，春燈顧曲，舊夢弓彎如霧。賓洲漫譜，省歸雨聽風，自成佳趣。小築池頭，（君有池上小築新詩）卷簾招燕語。

前調贈一民魏塘

柔條迎舞紅亭畔，別來故人无恙。蠟剪西窗，尊同北海，難得幽情酣暢。梅花塔上，話却後湖山，滿襟悵恨。爽挹蓬萊，拍肩天外動遐想。俊游芳興易倦，浮名忍換了。花下低唱，粉箋圖翁，蟬編課子，(來書自述如是)清夢茶烟輕颺，風籤韻響。把墨塊胸懷，與閒同放。水閣微吟，枕流魚破浪。

沁園春

沁水名園，玉臺佳詠，有個人人。乍小眉偷皺，芳心欲吐，嫩紅微笑，薄翠輕噴。杏子墻頭，梅花嶺上，占得人間第一春。新粧罷，擘紅絨學繡，幾度停針。珠簾不捲濃薰，盞一縷胡香證宿因。恰墮鞭芳陌，憑欄畫閣，偏逢叔寶，教見雙文。頻動嬌波，暗留幽意，拚不多情怎奈君。銷魂也，恨未曾眞個，空賺愁身。

玉樓春

畫橋東畔垂楊岸，環珮搖空人語遠。天風却與多情便，送出鞦韆紅粉面。重門空鎖閒亭館，莫鎖墻頭春一片。獨憐春意將愁絆，攪得愁春春不管。

畫堂春

淡霞一抹臉波光，風流名姓無雙。團情團思倚瓊窗，笑破滿庭芳。戲撲蝶穿花徑，驚看鴛浴池塘。小腰無力步徜徉，一步一思量。

占春芳

簫史去，文園病，孰个占春芳？可惜吳宮花草，等閒付與蜂狂。一顧總難忘，恨綿綿地久天长。死來拚化韓憑蝶，花底還雙。

蝶戀花

席帽曾經遊宴地，舞榭歌場，留得風流字。萬疊蓬山誰更意，相逢却在炎荒裏。心事休教春喚起，醒向墟頭，醉臥櫻花底。作個江湖老蕩子，顛狂到處成鄉里。

一曲尊前誰惜取，昨日侯門，今日倡家女。撥盡琵琶絃上語，胭脂淚似桃花雨。飄泊人天無着處，郎是雨絲，妾是風中絮。莫道輕狂難作主，相憐爭不相牽住。

滿江紅

南北東西，行處聽與亡舊話。閒只仗酒銷豪氣，詩吟遊冶。山水迎來惟恨耳，英雄見慣何奇者。看忙忙塵土亂張羅，都還假。人只被，呼牛馬，天只會，粧聾啞。讓登場傀儡做些聲價。一覺荒

唐蕉鹿夢，幾回仰視鷓鴣嚇。笑先生彈缺復長歌，歸來也。

愁淺愁深，都只是自尋煩惱。還說甚十年湖海半生潦倒。絕世聰明枉費盡，到頭名利都休了。便殤天彭壽也些些，爭遲早。花月怨，憑空造，今古恨，真堪笑。者千卿底事，情懷難掃。忙裏會無些子樂，閒來却又皤然老。算人間萬事總無如，漁樵好。

擾擾塵寰，都爲着蠅頭蝸角。謾賺得幾人歡笑，幾人離索。碌碌身還非我有，些些身外容誰獨。更嗤他兒女與英雄，聲聲哭。看破了閒情欲，那得被愁牽縛。算偶然遊戲，一枝聊託。何必花茵作幕席，直須天地爲棺槨。便沙蟲猿鶴亦何妨，逍遙樂。

憶江南

婁東好，復社擅才名。七鈔樓空春燕影；黨人碑咽夜鴉聲，亂石綠蕪平。
婁東好，古月弔梅村。慚愧風流輸老鐵；淒迷芳草怨王孫，辛苦作詞人。

滿江紅 題哲夫漢六花鑑

黯澹銀蟾，曾記得鸞嬌燕瘦。粧閣裏盤雲掃月，寶釵斜溜。篆玉烟霏蘭麝薄，淚花土蝕胭脂黝。印青苔點點憶當年，春山皺。雲雨夢，個中逗，今古恨，磨來透。自明妃嫁了，再難回首。幾見鬢

銷漢殿影，怕看眉樣秦樓秀。望滄桑未覩鬢先絲，君知否？

金縷曲

亞子辱題小影，讀之不勝搖落之感，沈腰頓減，潘鬢皆皤，况復厲氣橫侵，憤血時下，生還之日，殆無望矣，倚此却寄。

醉倒江河月，漫贏得形容枯槁，豪狂頓絕。蒲柳西風那復忍，百口讒銷病骨，况潘鬢愁多易雪。倒枕顛衾過半夜，把吟髭撚斷心如截。腸隱隱，亂鳴血。生來端合埋荒域，任粧台百般攔阻，絕裾終出。幾點吳山山似畫，尺土還須天錫者。薄命那堪消得。一事勞君應見許，憫歸魂招向楓林側。餘碌碌，更休說。

前調

亞子以父憂成疾，遠書來告，并及近事，愴然賦此慰之。時值華阿交爭，被斃二人，余亦幾遭不測，因并及焉。

楓落吳江冷，倚西風鬢絲禪榻，奈何同病。搶地呼天傷刻骨，珍重參苓莫屏者。往事而今休省。料得愁多天亦老，任淮南雞犬狂馳騁。吾欲向，豐隆請。碧雲迢遞憐萍梗，算秋來慊慊似舊。

腰圍消盡。蠻觸紛紛爭未了，堪歎南風不競，枉拚却雙雙蝶命。微倖頭顱還在，只棲遲一棹歸難定。勞雁足，寄芳訊。

洗盡閒脂粉，最銷魂桃花劍底，淒涼猶省。繡被香濃應只夢，血淚碑中倩影，問捧硯何時輕肯。刻意傷春春不管，任西風吹老檀奴鬢。還攪得，馬卿病。傷心別有人天恨，拍紅牙移宮換羽，由他咀論。紫稼秦青爭有底，費盡風流詞穎，料不過一時豪興。堪笑爲詩高叟固，也橫來說甚孔和孟。真個是，煞風景。

前調 有寄

刪盡人天恨，倩迦陵傳言玉女，今生休問。莫道郎情同露草，甘受粧臺薄倖，奈老大風流無分。悔煞當時輕一諾，累卿卿幾欲謀于鴆。料難解，黃衫憤。從來燕趙多豪俊，豈不聞黃金贖蔡，明珠量鄭。珍重蛾眉休回損，留與多情管領，看覓鳳巢安穩。一顧難酬真負負，判青襟再莫沾紅粉。容獨向，三山隱。

沁園春 報二兄札

子不云乎？斗筭之徒，何足算哉。任青銅高掛，行屍走肉，黃粱酣寢，牧豎村孩。田竇成風，錢刀

作橫，流水滔滔天下皆。君何苦，便十年懷刺，俗豈能諧。傷心蕙折蘭摧，讓枯梗豨零爲帝來。我徒然飄泊，一錢不值！不如歸去，三徑安排。酒發葡萄，筵開桃李，堂上追隨舞老萊。應共念，若浮生若夢，行樂真該。

長亭怨慢

乍相見，垂虹橋畔，細鞦柔腰，暗迴姣眼。莫道無情，玉鞭金縷自牽絆。弄珠何意，驚幾個黃鸝喚。待盡月黃昏，漫賺得千回腸斷。慘淡天涯，魂夢殘月曉風那岸。玉人似舊，奈輕絮霎時飛散。便說是杜牧三生，判重和伊銷算。怕綠葉成陰，過却春光一半。

春光好

花顏色，玉精神。暗銷魂，想是阿誰呼出畫眞眞。臉鞦輕霞藏笑，眉灣新月含嗔。嬌小溫柔夢裏不勝春。

洞仙歌

銅壺咽玉，漸春魂駘蕩，新月如鈎掛簾幌。麝烟霏隱隱，環珮遙迎，花弄影驚省風廊屢響。五更啼碧樹，深院無人，起看疎星墮三兩。銀漢是紅牆，咫尺可能通，瑤階下。轆塵疑想。這一霎歡

嫫是耶非？却恁地无情，乍來旋往。

浪淘沙題揮淚餘音爲錫九作。

載得貌如花，油壁香車，定情詩裏鬪尖叉。莫道芭蕉心不展，綠透窗紗。惆悵玉鞭斜，人又天涯；夢魂無奈碧雲遮。怪煞東風容易去，換了繁華。

強起理輕雲，來伴芳樽，百般催促出家門。還恐嬌郎心緒惡，軟語溫存。檢點別離痕，襟上猶新，紅心草長鶯銷魂。客裏孤燈禁幾個，風雨黃昏。

金縷曲

破盡青行纏，客天涯无多俠骨，雄談還健。此地從來逋逃藪，一霎風流雲散。看屠狗功名堪賤。跋扈飛揚君莫訝，算江湖舊是高陽伴。容拔劍，醉呼喚。祝宗祈死難如願，又栖栖南來北去，鬢絲愁徧。不向空山隨麋鹿，更不沙場一戰。者附贅人間何羨。紙上蒼生成底用，判顛狂老死烟花院。憑笑罵，休管。

浣溪紗

細柳輕煙雨乍晴，輕寒天氣近清明，墓前人拜墓中人。紫陌灰飛蝴蝶影，冬青叫斷杜鵑

聲，誰家少婦正輕盈？

慶宮春

巫峽情懷，洛川詞賦，十年寫盡蠻紙。拚不相思，開尊醉倒，奈他聲聲喚起。暮朝愁着，也難解愁些甚底。情鍾我輩，偏獨消磨，月明千里。畫梁借問，南飛燕子，風流只今誰是？癡狂應笑，江湖老大，負却凌波仙子。鬢絲禪榻，又何苦傷春若此。傷春胡不，早早歸來，大家歡喜。

念奴嬌贈小五

淡粧輕掠，倚窗外幾點梅花疎影。兩兩三三初弄色，不着蜂黃蝶粉。碧玉休誇，紅兜慢比，瓜字分難整。嬋娟偏好，十三十四光景。日暮五馬駝來，五銖衣薄。素髮青垂領，調得侯鯖教客醉，羞說自家名姓。酒半顏酡，耳邊火熱，春意先馳騁。嬌迴櫻口，向伊頻道吾等。

滿江紅樓外樓與可生匪石聯句

攜手高樓，且莫訴平生哀怨。(劍華)歡笑共婆娑老子，興還非淺。(可生)仙境蓬萊塵夢斷，豪情湖海淞波剪。(匪石)任尋常兒女向人誇，神仙眷。(劍華)翩翩影，何曾見。盈盈酒，空相勸。(可生)把閒愁說與畫梁雙燕。(匪石)我本飄零窮塞主，誰教攔入煙花院。(劍華)快安排高

枕臥江湄，行歌倦。（可生）

惜秋華 劫後歸來，籬菊猶存，淡粧抹翠，雅有餘姿，喚酒吟看，聊遣厥懷。

粉靨偏宜，向陶家徑裏，松煙輕染。舊日翠微，伊人帽簷曾見。憐花瘦不禁秋，却慣與霜秋酣戰。幽芳盪，湘魂一縷，誰歌九辨？
湖海俊遊倦，便重陽過了，歸休嫌晚。喚酒東籬，老子興還不淺。西風漫訴淒涼，早禪榻鬢絲愁徧。須勸醉斜陽，角巾輕岸。

倦尋芳

甲寅春暮，訪心俠於甯靜廬，剪燈話雨，共欣無恙。偶翻書篋，得五年前誤聞君死所作金縷曲，輓詞，蟬蝕過半矣，各愴然久之。因屬補填以留紀念，並出去年所攝鼓琴

小影索題，爲用夢窗韻成此一闋，蓋不勝死生流轉之感云。

筑寒易水，簫咽吳天，秋鬢驚晚。雨逼燈昏，愁入綠蕉心卷。刺爛能雄禰子舌，途窮猶白廚頭眼。渺孤懷，倩胡琴譜出，斷鴻零燕。
悵舊夢，湘江人杳，題葉音沉，燒炬樹淺。蠹紙重拈，幾點淚痕凝怨。向日深悲長訣別，今宵誰分重相見。聽雞聲，共咨嗟，十年遊倦。

淒涼犯 觀落花夢，示楚僮，並贈優游。

鶯沈燕悄秦箏逗，情苗恨葉多少。墮紅一瞬，明珠寶劍，幻塵恍草。相思有鳥，向芳塚悲鳴樹杪。最淒涼，山樵唱道，短碣淡微照。惆悵分湖曲，午夢空，返魂香杳。水雲好事，妙翻將怨紅淒調。鼓入湘靈，怕天也緣情頓老。嘆人間歷歷，恩仇總未了。

采桑子和匪石新居，居舊爲吳中某氏藏嬌所，隔隣則名優潘月樵居也。

午陰薰透疎樵碧，鶯老花窩，龍臥雲窩；倦枕芸書夢翠柯。幽吟蘭畹清如水，沍露香多，籠月涼多；鳳管聲颺隔院波。

鵲橋仙七夕約匪石可生同賦

鍼樓人杏；星槎路隔，空憶釵鈿私語。南飛有翼替填河，却不管人間愁苦。涼蟾浸水；亂蛩啼露，瓜果尙憐兒女。箭河催曉彩雲空，別淚灑一天疎雨。（是夕夜半雨）

惜秋華中元月餽

海宇澄秋，早孟蘭獻節，霏烟如霧。碾玉鏡空，雲幘渺歸何許。笙樓月正清圓，蕊一搭煤哀橫。敍。淒迷看，金輪漸缺，空喧官鼓。搔鬢悄無語，倚闌干，只欠比肩嫵。甚憐杵和絡緯，又催機杼。

仙娥縱斷塵緣，也難免闌虛吞吐。清苦暗消磨，滿襟風露。

惜分釵寄塵見慰悼亡之作，悵然賦答。

銅華掩芙蓉面，錦絃撥盡孤鸞怨。五更鐘，半床風喚也無蹤，夢也無蹤。空空。梧桐院，秋聲顛，藥鐺經案支疎倦。薄寒籠，豆燈紅，反悔從前，忒煞情濃。匆匆。

憶秦娥

刀環折，催歸咽盡啼鵲血。啼鵲血，紅翻柿葉，夜涼人寂。秋娥瘦怯秋時月，秋籬忍放秋光

入。秋光入，年年料得，伴伊淒抑。(用王夫人語意)

暗香疎影

溪山小農出其夫人所繪紅綠梅二枝，題曰：紅情綠意圖。索詞，爲賦是圖。

幾生到得，傍鏡台索笑，平分春色。莫是逋仙，醉裏看粧壽陽額。佞倚東風競艷，勝雪中寒標孤格。想潁州夜月歡長，花底教觴客。堪羨羅浮夢醒，暗香細嗅處，脂黛薰徹。並照南枝，瘦怯肥羞，各自十分清絕。春工輸與丹青手，只愁眼看將難別。笑廣平賦也溫柔，總是爲伊心折。

鶯啼序用夢窗韻

酣春笑擊穉燕，倚梅檐竹戶。弄粧影映月眉舒，煖笙柔和雲暮。拚卿醉釵，匳盡換，征帆永繫。

垂楊樹。奈河橋春換，輕狂只怨風絮。迢遞南溟，望杏夢遠，凝雙波漲霧。賴明鏡清攝離顏，客程持伴幽素。念高樓裁紅意懶，引雛睡歌牽愁縷。避刀環空織迴文，鬢驚絲鷺。鷓鴣易老，鶴夢能分，笑曾共寄旅。憐密意背燈深掩，怕較肥瘦，粉膩脂薰，半捲腥雨，芳魂乍妥。瓊瑰潛墮，圍寬秋帶寒難熨。又昏鳩泣雨常星渡，飛天鏡破，盟尋鰓舉，痕銷婺魄，黯委黃土。孤燈自倚，寸曲縈迴，似擊殘亂葦。尙耳畔呻吟驚睡，斷續蛩階，繡幙籠愁，夜蛾飛舞。思量只悔，遲歸輕別，招魂今日空賦得。數年華一一紋絃柱，兒嬌只聽扶床，且晚哀呼，阿娘省否！

垂絲釣近題亞子分湖舊隱圖

思橫雁水，蘆花明月清泚。釣侶舊吟隱，度鷗外塵夢幾。贖老槐鬪螳。人應記，有靈芬並倚。勝溪烟冷，扁舟愁過吳尾。痛澆塊壘，多少蒼茫意，分付閒身世。篷雨底，譜羽衣畫裏。（圖爲陸郎子美所繪）

摸魚兒題芷畦柳溪竹枝詞

買陂塘紫萼鄉裏，十年豪氣銷未。南鄰北里遙相望，多少舊家門第。斜照裏，共澗釣山樵，閒數興衰事。樹酣熱耳，譜漁笛菱洲，滄桑小識，風土歲時記。清溪好，雙槳菰蒲共艤，辭秦人憶蘇。

季。(昔年曾共令弟志成，坐小艇自魏塘至柳溪小駐)春橋楊柳應無恙，笑我鬢絲黃矣，高隱地，只讓汝搜松訪石歌相繼。(聞君又續賦竹枝若干首)烟塵隔水，怕百尺樓高，天風夜度，猶是惱清睡。

前調喜小柳同居賦示，卽次其遊西湖韻

照闌干首盤涼月，清光搖漾如水。閉門不解愁來處，長自欲眠還起。風露地，怕也有憑闌相望人千里。鏡花吐未，恰賓雁初來，高軒忽過，笑口笑難閉。聯牀好，不管人間許事，新聲花外閒倚。秋屏不隔春池夢，吟到黑甜鄉裏。情靡已，者一字師良，那要攻書史。催歸耳底，且莫使催歸，還應解道，隨脚故鄉是。

菩薩蠻九日和小柳韻

蚊轉涼認宵來雨，雨過猶綠秋深樹。遊子盡天涯，何人獨憶家？沈浮經歲夢，佳節愁中送。斜日岸巾多，招邀金叵羅。

一剪梅和樸庵

塵鬢霜堆鏡裏華，病是生涯，恨是生涯。一天涼意遍屏紗，白了秋花，黃了秋花。不惜登臨

醉帽斜，人也塗鴉，雁也塗鴉。歸帆數點望中賒，信又相遮，夢又相遮。

一萼紅贈一品紅，繼小柳作。

甚天風，趁笛聲牛背，吹出舞粧紅。步障驚鴻，歌梁妬燕，弓彎擎掌玲瓏。小眉斜波學語，笑打鴨何事鬧烏龍。窺鏡迷離，橫刀撲朔，誰認雌雄？
應惜天涯輕絮，墮西湖夢裏，夢也惺忪。豆蔻春纔，櫻桃淚遠，奈他狂蝶游蜂。最苦是蕭蕭暮雨，誤空階人立梵王宮。（是夕雨不能往）老我金尊能共，肯怨飄蓬。

倦尋芳送小柳還歇浦，并示樸庵。

暝隄滯雨，衰柳搖寒，人共秋倦。去去愁君，難更看花吳苑。惜別山留青滿眼，分攜樽闌霜侵面。暮潮催，趁西風一舸，五湖天遠。漫約取吟鞍重並，春到長安，塵蹄香軟。海客情懷，閒逐淡雲舒卷。有夢鷗尋烟浪裏，無生鶴語團圓畔。祇孤余，擁宵檠數殘征雁。

蝶戀花 樸庵將赴申江，賦詞留別，依韻報之。

重汝行行未住，行到江南，墜葉紛如雨。柳不禁攀秋易暮，斷魂又逐潮來去。萬里吟聲先雁度，勝侶高陽，盃酌應爭具。雪軟香蹄春著處，一枝花訊休遲誤。

齊天樂酬小柳見貽韻

層陰纔放疎陽墮，寒欺翠蕪庭戶。燕入新年，鶯迷霧曉，閒煞江城孤侶。凝情甚許，待題葉音沈，醉花人去。倦枕頻催，夜潮明月認歸路。寂寥人共枯坐，翦燈愁語盡，聽轉更鼓。絮泊生涯；萍浮歲月，誰問悠悠今古。春光動處，又香引椒杯，歌翻金縷。試豁雙眸，醒中看醉舞。

蝶戀花

簾幙重重遮不住，五夜鐘鳴，催送行雲去。鬢影衣薰無覓處，日高深樹黃鸝語。佇苦停辛朝復暮，消息沈沈，榴火紅如許。咫尺東牆應不阻，蛾眉只恐嬋娟妒。

燭影搖紅和次公倦鶴聯句均

煙鼎香霏，倦茶薦乳初醒酒。曲屏斜倚袖雙籠，寒熨調絲手。臘照冬心語瘦，誤蘭因根移翠畝。芳期無據，堆枕雲閒，凝愁時候。潤玉紅肥，額梅妝睡憑偷綰。舞環慵上水晶盤，看遍蠻腰鬥。墮夢天涯省否？嫁東風，穠華已負。江琵琶撥，零落誰憐，啄餘紅豆。

減字木蘭花次韻和南村

燭花如豆，簾鉤閒到黃昏後。鳳紙裁量，佇待西風雁幾行。眉稜愁補，去時未抵來時苦。朱

鳥窗前，誰把堊篔證宿緣？

蹋莎行題龐璧子遺集，用碧山題草窗詞卷韻。

倚樹情懷，歌梅風調，墨花淚點飄多少。客窗風雨做中宵，春嬌暗洗池塘草。（君有點絳脣，

詞自序云：「別館夢中誦夢窗夜來風雨洗春嬌」之句而作。） 蹋月清游，飛雲孤抱，斷腸只許

方回道。夢驚花外墜春星，綠蕪滿院斜陽老。

瑞鶴仙小柳自贛歸，贈以小影，卽賦。

未妨烟水隔，倩繡綠來慰天涯枯寂。虛堂墮明月，認臙仙依約，夢中顏色。青衫半溼，淚痕添

潯陽過客。悄無言，驟憶閩江暗雨，夜床愁絕。（余在閩與君同館，聯床夜話，每至語盡，相對枯坐。）

誰惜江關搖落，契稷平生，漫傳吟筆。華年錦瑟，傷鬢早，似滌白。念梅邊清影，樽邊醒眼。（君不能飲而喜看人飲。）禁得紅桑幾劫。算風流舊日旗亭，燕還相識。

五三 姚光石子詞

蝶戀花 冬夜有感

秋去冬來冬又暮，明月宵深，滿腹愁如絮。寂寞白燒香一炷，荒雞喔喔天將曙。獨坐危樓無一語，燭施更闌，有恨將誰訴！霜重天寒何處去，數聲雁向林間度。

如夢令 湖上春歸

紅瘦綠肥春去，爲問春歸何處？春奈不回頭，剩了滿天飛絮。無緒無緒，更聽聲聲杜宇！

五四 姚肖堯民哀詞

滿江紅 借笑雲登高，感成此作。

風飄雨撼，早又到重陽時節。最可歎殘山賸水，已非疇昔。香草美人無限恨，長蛇封豕聲偏急。望樓船鐵甲渡江東，降幡色。好頭顱，空拚擲。大英雄，埋草澤。只峨冠博帶，太平粉飾。慟哭西臺猶未已，相思南國終難說。恨秋容慘淡別匆匆，腸千結！

醉落魄 秋容老去，一年佳境從此逝矣，愴然倚此。

閒雲逐雁，東籬霜菊爭寒豔。千家砧杵聲難辨，秋色蕭疏，寂寞空庭院。
蘆花瑟瑟斜陽岸，

金縷曲 依韻酬笑雲

含淚聞君語，望燕雲風淒雨黯，興嗟頌鼠。鑄鐵六州成大錯，我輩悲生離黍，何處覓桃源淨土？
一樹冬青家國恨，聽邊陲又動漁陽鼓。鶉首翦，羸黎苦。劇憐塞上多霜露，歎南朝無愁天子，依然歌舞。
鍊石媧皇今在否？缺陷有誰能補？問填海精禽幾許。漫灑故宮荆棘淚，勸徐陵且進黃花醞。拋近事，談千古。

蝶戀花 閒情

粉牆回憶鞦韆影，觸撥情懷，哀雁過寒井。今夜相思和月冷，紅綃暗指胸前鏡。
杜牧揚州成薄倖，咫尺天涯，轉覺蓬山近。幽怨滿腔書不盡，如雲好夢何時醒？

五五 姚錫鈞鷓鴣詞

阮郎歸

風荷紅白漾輕枝，衣香帽影欹。羊車歸矣任人看，鞭絲柳浪寒。 綃霧薄，玉肌低，梅花一笛吹。舊遊根觸憶風前，春歸已隔年。

瀟湘夜雨

半捲湘簾，微垂錦帳，桃花依舊春風。臉波酒暈印輕紅。劇高寒瓊樓玉宇，共供奉蓋闕珠宮。愁無計，西風環佩，此處重逢。 已是幾番顛倒，織愁作錦偏工。又靈犀一點，暗度潛通。倚雲屏惜情無語，挾銀箏脈脈爲容。愁無那，前因何在，聚散太匆匆。

河傳

索笑牙簷，爭奈那剪剪清寒欲絕。待到今朝晴暖，釀花天氣，又勾起一重離別。 枝頭如玉垂垂實，霜雪凋殘，肯遣芳魂滅。惆悵年時，一笛江城吹徹。村司動，感無歇。

惜分飛

淺笑深顰無意緒，煞憶柔情如許。小立花深處，濃春都被君收去。 冉冉春雲忙散聚，記取舊題斷句。銀燭重開處，淚痕紅溼桃花雨。

南浦

初試五銖輕，正花間小步，風來疑舉。不語掩瑤窗，又惆悵窗前，拏他飛絮。娉娉瘦絕，傷春病酒都無語。霜悽風緊十三樓，一剎殘陽何許。淒清舊管閒絃，記玉手曾摻，斷雲和雨。蕭瑟閉柴扉，這情懷都付枝頭杜宇。斜陽如夢，閒愁不與同去。一曲霓裳，聽猶似當年，追歡何處？

長相思

別時愁，會時愁，離合一生雙鬢秋。骨灰情始休。恨無由，思無由，淺醉初逢一味羞。背人紅淚流。

減字木蘭花 美人笑和一

明珠百琲，閱到人間歌舞遍。獨對黎渦，忠簡平生意已酥。倩魂難買，帶醉言癡聊自解。一棹潮東，憶否雲郎與九峯？

洞仙歌贈內

蕭郎飄泊，看故園春盡，斷夢模糊記庭戶。憶分杯帳底，却扇牀頭，消受慣薄怒。佯癡情緒。簪奩應無改，宵分寒輕，猶憶憑欄尋綺語。離別信何如，陌上花開，待看取鄉關烟樹。怕歸去倦鴻

纔知還，又逼著離羣，飄飄風雨。

點絳脣 有憶

的的飛螢，照人今夜愁多少。碧羅窗曉，破夢來啼鳥。密約消春，誰遣夢先老？長安道，麴塵柳浪，無限斜陽好。

生查子 閨情

深院靜開鶯，午夢人初醒；舊恨似春潮，一一心頭省。紅雨慣飛愁，暮色蒼生暝。不語自亭亭，立瘦花前影。

導引曲 有憶

春事過，春事過，無寐聽更殘。襟上酒痕渾是淚；花前塵尾不知寒，憑遍畫闌干。空相憶，空相憶，舊約已浮沉。酒熟喬家花欲笑；歌殘白紵月初陰，黃鸝動歸心。渾不奈，渾不奈，初見月初三。劍氣欲飛春雨後；酒悲乍發穀輪間，一爲破愁顏。長相別，長相別，萬事半空花。難忘韓家潭畔路，一街香雪擁輕車，揮手卽天涯。

減蘭 五月十日卽事

珠歌翠舞，消盡沈雄春已暮。顛倒衣香，料理閒迴一段腸。春衫浣酒，舊夢重尋春屢透。乞取雲仙，整頓圖書上范船。

鞭絲鬢影，一晷斜陽愁欲醒。輸與袈裟，閒倚雕欄數過車。消魂底事，羸馬歸途人倦矣。瓊

姊蘭姨，爭駕雲駟過我前。

浣溪紗贈素珍用映庵集中韻。

疏雨重風駘蕩春，袷衣天氣最愁人；橫波蕙地放深顰。交甫相貽唾佩角，琉璃影好坐鸞

身；彩雲詩後此銷魂。

銷盡狂情更送春，茫茫愁絕渡江人；遠山煙鎖答深顰。翠袖奉卮端破道，華茵度夢未宜

身；百無聊賴說銷魂。

金縷曲午夜不寐，感成一闕，知我罪我，所不及計。

風露凝愁坐，儘無聊青天碧海，都無依據。酒被閒愁渾未得，還解柘枝徵舞，算銷却雄奇難數。詞客飄零關塞暮，莽天涯彈鋏渾無處。更莫說，狂如許。柳絲無恙春來路，但揮手俊遊已倦，不如歸去。銷盡黃金同聚鐵，只是一般錯鑄，有長揖謝君無語。我已君平甘世棄，更何須反覆雲

和雨。交道事。今如土。

前調

劍氣簫心死，問吹纔一池春水。干卿何事？銷盡黃金磨盡慧，百折千迴難止。好相結。那便
子。寶劍芙蓉人似玉，算兩般難稱平生意。此中事，難言矣。海紅籬外秋如此，有無聊斜風斜雨，
帶人天氣。江上人歸峯自綠，莫問紫雲憔悴，拚薄倖此生長已。一夢青樓何用覺，儘樊川潦倒風
塵底。已嘗遍，相思味。

高陽臺題子美集

膩手搓酥，豔歌迴雪，輕衫撇箇花陰。吳宮花草，移根又落江潯。柳絲添上螺痕黛，縉微波一
段春深。共幽尋，劍氣簫心，一例消沈。鍾情剩有屯田柳，悵漢臯珮解，漫倩青禽。海上成連，重教
問訊瑤琴。書成二妙蘭台筆，數閒情笑指詩襟。動微吟，我亦聞歌，忍俊誰禁。

減蘭示亞子

萍踪隨遇，枉擲心肝知幾許！倦客難狂，已避名場避酒場。兩雄相厄，欲作解人慚未得。江
上秋風，落葉辭枝記再逢。

賣花聲寄申公

烟破渺歸鴻，空江落睡虹，釵盟鈿約半成空。惆悵一春心事在，殘雨聲中。芳草戀行蹤，衣香散棘叢，相思彈破玉玲瓏。幸有虬髯能慰我，高唱江東。

虞美人

廉纖微雨春風細，幃捲初相見。鈿車寶馬絕塵馳，正是江南三月斷腸時。沈浮嫩約知何意，遍把闌干倚。金煙香燼漏初寒，欲起還停含意總無端。

蝶戀花

天上人間成小住，最是消魂，最是飄簾雨。綺思穠華知幾許？香篝溫護三珠樹。一瞥風花春已去，殘醉歸來，笑嚼紅絨吐。檢點酒痕狼藉處，明朝相看渾無緒。

少年遊

有恨多情相逢未嫁，誰補問情天。江浦空樽，蕙園芳草，一晌總悽迷。屢廊人去香空滿，餘迹總依依。夢也無憑，春原有主，負了惜華年。

念奴嬌

柳色長亭，更離懷添與幾聲杜宇。欲托青鸞相問訊，盼斷蘊雲千縷。津水長流，黃榆吹落，題遍相思樹。人天一晌，迢迢南北無據。消受名士青衫，美人紅淚，迸作傷心句。大樹飄零春寂寞，已穀消魂幾許。長句青邱，短吟姚合，相看傷鷁旅。會真一記，何時崔張重遇？

減蘭題曉華小影

櫻桃無恙，三年影事忽忽想。夢落江天，花裏吹笙又一年。韶華空過，結客量珠都已負。春事闌珊，愧被人呼作弇山。

浣溪紗前題

撲面西山翠似藍，酒痕和怨上眉彎；十年恨事舊宜南。挾彈韓嫣今憶否？荷鏡杜老故依然；又將姓氏署君邊。

滿江紅東槩子

幾兩湖風，吹詞客清哀如許，教打疊迂倪稿子，數峯烟雨。松塵茗甌清話了，殘陽烟柳尋詩去。看冷香咳吐滿人間，（君舊句冷香借詩吐）誰和汝。人間事，總無語。孤山侶，悄延佇。算匆匆遊袂，與亡休數。選弩誰徵吳越記，騎驢難覓韓蘄墓。（蘄王墓在蘇州靈巖）借鷓夷一舸送

君歸黃歇浦。

高陽臺題蘭芳集

茸帽欺寒，螺杯困醉，風懷銷盡而今。一角蓬山，禁他青羽沈沈。韓潭依舊如霜月，更綠楊門戶難尋。剩銷魂，花落江南，法曲重尋。成連海上憑誰憶，有汪倫送汝，千尺情深。細寫春愁，烏絲格界泥金。書成更要香魂護，拾落花薰過春陰。待明年，化作幽芳，開遍江濤。

水調歌頭

中夜閱杜十娘小說，悲愉無端，感激萬狀，因成此解，寄一廡楚僮亞子劉三。

珠淚一揮灑，暈纈夜光浮。人間幾許恩怨，千古總難酬。况是離鸞別鶴，也學寒蘭綴蕙，捐棄說靈修。一曲湘妃瑟，遺恨滿滄洲。怎歌館，四座悄，懷生秋。却幸李十一傳，樂府至今留。放眼天花十萬，能受幾番摧折。今古滿心頭，我欲弔金谷，珍重綠珠樓。

浣溪紗

碧玉青溪宛宛流，夕陽風軟柳絲柔，紅欄幾曲水邊樓。淺閣茶煙簾半捲，微薰花氣雨初收，紅橋畫舫似揚州。

繞郭青山一帶斜，水雲深處見人家。二分明月一分花。柳樣長眉螺子黛，柴窰小釀女兒茶，風窗霧閣太寒些。

賣花聲雨望

絮雨傍雕輪，簾外消魂，銅瓶菜几共溫存。樓下江櫻如醉酒，記得朱唇。春恨細於塵，飄落芳樽，畫闌憶否倚闌人。小院苔痕留屐齒，夢斷無痕。

點絳脣 閔辛亥年所作詩，有懷楚侗亞子浚南道非。

玉版烏絲，魂兒褶疊書中透，悄回首，美人天末，剪剪明波逗，祇許相思，不許長相守。新來瘦，傷春中酒，影事年年又。

菩薩蠻 白花惠贈徽墨湖筆，賦謝兩解。

險廉十斛無銷處，目神腕鬼相空語。片石貯煙雲，孤檠我伴君。俞郎勞餉與，文字同辛苦。絕業理名山，功成共汝開。

清平樂前題

龍蛇在手，自覺風生肘。紙幃銀燈相與守，腰下龍泉如否。鼠鬚斑管輕盈，牙床翠匣瓏玲。

安置吳箋百個，倩卿細寫秋心。

蝶戀花

玉鴨烟消寒惻惻，柳怨鶯嚶，祇有簾波識。不信閒庭芳草色，春歸還把愁腸織。入水釵光留未得，泥帶芹香，燕去空相憶。紅煞雕欄蟬鬢側，憑欄難覓柔荑迹。

點絳脣

九十流光，匆匆過了廉纖雨。晚霞慰汝，一抹紅如許。斷角殘鐘，商略傷春語。憑欄暮，斜陽烟柳，便是春歸處。

浣溪紗

劉三有「一天風雪藝黃精」之句，戲及之；兼示其夫人靈素女士。文字遊戲，不失雅諧，弗謂輕薄爾。

藝罷黃精自荷鋤，夕陽秋水澹菰蘆，攝生須問女相如。不信能經歸謝女，那從鈿合貯丹膏，脂痕粉印滿靈樞。

蝶戀花

寒食清明都過了，不怨花飛，但怨春開早。昨夜玉蟲蘭蕊小，一分春在孤燈悄。墮袂一九涼月皎，欲理幽歡，醒醉都難好。不信春來人不老，鴛鴦打出相思稿。

卜算子

好是畫簾疎，不隔羅衫袖。人共春愁一例憑，熨得闌干瘦。細怨與釵情，沒個商量候。自檢空箱舊酒衫，褶疊春痕透。

春夜情書懷

孤燈如水，劍作寒芒紫。才展吳箋書細字，徒覺春寒到指。屢廊明月如霜，酒闌暗惹衣香。辜負一雙翠袖，教添半臂還涼。

長亭怨慢題菊僊粧閣

判揮盡花前清淚，幾度曾來，綠陰門戶。燭跋香消，犀釵偷墮曾情緒。翦燈無語，只自把燈花數。花墮玉釵頭，便化作離愁千縷。絮語未曾窮，春水方生，芙蓉秋暮。一襟酒淚，更贏得鈿塵粉霧。莫儘問歸期，怕歸後桃源何許。算只有嬉春蜂蝶，抱春光住。

減字木蘭花戲贈鴛鴦

江州有語，不重生男重生女；是耶非耶？便算前生也復佳。天非無意，故遣冠巾成妙麗。丹火僧牕，那許中間雜女郎。（白壺遇春均有頭陀道士之號。）

浣溪紗 卽事

欵幘微吟試散行，江南設事在啼鶯；綺懷更逗小桃明。斷簡閒尋思蠹迹，暖簾晝捲放蜂行；綠陰庭院嫩涼生。

倚所思 懷人

文章事，大雅竟誰扶。千古南豐香一瓣，十年西笑願全虛。慚愧尺鱗書。（林琴南）
四年別，人海各茫茫。回首西河沿畔路，曉風殘月客郎當。呼酒問張郎。（張企韓）
歌出寒，杯底蘊塗秋。火色鳶肩渾自惜，新豐沽酒倚閒愁。長嘯看吳鉤。（馬逢伯）
江南別，樽酒盡平生。十日平原澆綠蠹，一天風雪藝黃精。一笑客何能。（劉三）

玉漏遲

吹萬新有喪明之痛，握手茸城，神采不屬，賦此奉慰，用樊榭韻。
絨纈飛新雨，尖寒薄暮，浮生何短！簞酒初傾，蠟淚堆盤花顛。短棹清遊休憶，正玉雪衰師在

眼。(去年六月，借劍華至留溪，與吹萬一面耳。)燈重翦，隔春情事，滄桑千片。鬢絲不爲秋悲，祇蠟鳳虛堂，弄梅孤館。哀樂中年，愁聽砌蟲淒淒。投杖沈吟何意，好覓取一襟蕭散。天正遠，柔楊黯澗江岸。

點絳脣 半淞園秋泛

漫理夷囊，扁舟又作尋秋計。菱花風細，涼透殘陽意。敗柳殘荷，盡付當窗見。歸猶未，一袈娑地，商略憑欄味。

浣溪沙 海上卽事

占斷長秋一角妍，微霜簾底試茶天；鈿車十里起紺煙。薄病無名如中酒，綺情略盡且耽禪，背燈筭語訴誰邊。

五六 姜胎石參蘭詞

金縷曲 答葉初庵送別韻

萬里徒奔走，數年年南轅北轍，風霜飽受。兩字功名成畫餅，怪底行踪滯久。又拜謝新詞數首，寫出胸頭無限恨，欲澆除魂壘何須酒。一日讀，千回可。詩魔慣把愁城守，怎眼前炎氛纔淨，秋風頓吼。暮奏陽關三疊曲，自是貂難續狗。縱人世別離常有，遙望太行山下路，問半肩行李誰能負？勞君折一枝柳。

前調庚戌仲秋，客都門，聞日韓併合之耗，因疊前韻，以寫杞憂。

策馬平原走，到如今雄心消盡，折磨難受。臥榻容人鼾睡後，大夢沈沈已久；况一例廣揚元首。歌頌昇平原樂事，奈盈庭誤飲中山酒。事急矣，如何可！窮邊漫恃狼烟守，且看他飢鷹攫食，雄獅猛吼。大地風雲多變幻，畫虎依然是狗，莫再說山河富有。可識海東波浪惡，竟拚將古代衣冠負。喚不醒，三眠柳。

前調感近事，再疊前韻。

挽朵烏雲走，惱東風吹回香海，寂寥難受。獨自捧心無一語，瘦骨由來病久，直欲向青天搔首。如此紅顏偏命薄，入仙鄉難覓長春酒。卿及早，回頭可。花城穩道狸奴守，儘由他沈沈昏夜，叩門狂吼。駿馬王孫如逐鹿，爭說功人功狗，料金屋安排早有。使欲乘風歸去也，恰心頭有箇人。

難負。拋不得，依依柳。

蜨戀花

庚戌重陽後三日，借荳漁映桐偶登陶然亭，斜陽一抹，無限淒涼。亭之東側，有香塚，嬰武塚各一，雙碑屹立，相傳爲道咸間遺物。碑之陰，有自署橋東居士者，爲記其顛末，走讀一過，覺字字從血淚中迸出；美人薄命，小鳥多才，得此足令千古有心人爲之迴腸盪氣也。歸檢案頭，得菱船近示秋懷韻，因填以誌之。

門外西風揉碎柳，正去悲秋，又爲人傷舊。欲妥芳魂無計可，這般憐惜心心有。鳥語花香沈悶久，淚冷千秋，夢醒千秋後。百轉愁腸如病酒，歸來影逼孤燈瘦。

前調留別荳漁映桐、菱船諸子，卽用前韻。

百戰秋霜成敗柳，惜別依依，總是難忘舊。便算長安風景可，繁華轉眼無何有。拚在天涯淪落久，一局枯棋，著著爭人後。此去汾陽先覓酒，詩魂早被蛩啼瘦。意難忘，辛亥暮春，坐懷亞子、巢南、小柳諸君，寄此代柬。

回首當年，一般般舊事，如水如煙。春申詩酒夢，粵海去來船。燕谷下，太行邊，快馬柳停鞭。誰

念吾隻身萬里，遍訪山川。者番暫息吟肩，有東吳老友，南社新編。柳州書已校，仲舉楊空懸。家國恨，滿詞箋，陶令更超然。訴不完相思况味，萍聚無緣。

桃源憶故人寄揮孫關外

天南地北分飛處，難得一春團聚。客裏幾多愁緒，未把些兒吐。少年怎把時光誤，又續江淹別賦。我最傷心難語，故國斜陽暮。

賀新涼弔史閣部墓

血鑄興亡劫，戀江城忠魂一縷，動人歌泣。何事文山偏入夢，末季又完臣節，縱拋去沙場骸骨。身後了無毫髮憾，祇當年未葬高皇側。千載下，共淒絕。舊時袍笏新朝碣，剩寒宵梅花帶淚，二分明月。我亦臨風來膜拜，別有恨填胸臆，覺萬事從今休說。十日揚州君記否？者乾坤愈逼前途窄。空弔古，唾壺缺。

滿江紅辛亥五月哭伯先

濁浪掀翻，未捉得胡天殘月。放眼去，豺狼遮道，網羅豪傑。世局幻成東逝水，壯懷擊斷中流楫。最傷心南宋，忍偏安，雄風歇。年已壯，愁思切；功未就，肝腸裂。乍相如，纔病，藥鑪無力。十載空

磨腰下劍；一棺難掩胸頭血。看豐碑高矗海雲隈，寒濤咽。

一別經年，况別後音沈空谷。回首處鬪詩聯句，賭棋填局。白下談兵馳鐵騎；嶺南袁酒論蕉鹿。忽敲門喚醒枕邊人，黃梁熟。兒女淚，痕盈掬；羈旅夢，愁成斛。縱封侯無分，不爭榮辱。舉國皆狂難着手；丈夫到死先瞑目。祇生前未了戴天仇，君應哭。

高陽臺挽隨園詩孫

把酒論交，拈花誰夢，與君放浪江天。無限酸辛，客中捱過年年。偶從別後探詩興，道乘風東海求仙。最淒然，太華峯前，一抹荒烟。（謂病晚生先逝）名場小試拏雲手，信文章有價，氣吐青氈。幕地重逢，吳門十日流連。悲歡離合尋常事，怎人生美事難全。恨無邊，纔着長鞭，又了塵緣。

安公子舟泊楓橋游重建寒山寺懷張懿孫

打槩烟雲裏，白公隄下孤舟倚。點點萍花，流不盡真娘珠淚。懶去尋秋，沒箇南朝寺。君莫笑，海外神仙吏。乘海風吹到，訪遍寒山故址。結構今何似，虧他摹寫詩中意。漁火江楓，誰省識當年愁思。一樣鐘聲，攪破離人睡。過夜半，夜色闌珊矣。祇滿天霜月，今古都成韻事。

惜紅衣莫愁湖殘荷用白石老仙韻

雪腕驚秋，冰姿謝日。更愁風力，卸盡濃妝。湖光孕寒碧。樓頭夢醒，誰夢見彈棋狂客。枯寂金粉六朝，剩殘山將息。江南繡陌，片片紅雲，香名注仙籍。傷心雁唳水國，燕飛北。自古美人遲暮，怕說舊時來歷。到已涼天氣，一例粉脂無色。

金縷曲 疊韻代贈

燕市朝朝走，入風塵歌衫舞袖，酸辛怎受。青埂峯頭秋月潔，滌盡鉛華已久。從未慣弄姿搔首。縱說千金能買笑，奈儂心淡似鵝黃柳。心匪石，轉何可。怪君繡口如瓶守，猛擡頭高歌一曲，魚龍夜吼。太息紅樓花事了，儂竟喪家如狗，算往事而今安有。醉月飛觴都惡客，敢輕將傅粉何郎負。再不唱，青青柳。

五七 姜崑杏癡詞

浣溪紗 贈子美憐影海上，用唐人句。

安得好風吹汝來，曾聞仙子住天台，霧縞雲縠稱身裁。幕上心來消未得，狂心醉眼共徘徊。

徊，爭教紅粉不成灰。

月照高樓一曲歌，水晶簾捲近秋河，玉郎沈醉也摩挲。
何？一生惆悵爲伊多。

寂寞江天雲霧裏，繁華穠豔竟如

瑟瑟羅裙金縷腰，佳人屢出董嬌嬈，紅薔薇映碧芭蕉。
銷；簾鈎纖掛玉葱條。

料得也應憐宋玉，魂隨暮雨此中

生魄隨君君豈知，斷腸烟柳一絲絲，只應圖畫最相宜。
期；栽蓮莫怪藕生絲。

每到月圓思共醉，好風偏似送佳

浣溪紗

曼睩蛾眉絕代姿，前身南國種相思，三分綽約七分痴。
遲，珍珠十斛欲量時。

碧玉年華剛十五，海紅叱出月遲

訴衷情

衡陽歸雁暮山蒼，哀咽斷人腸。訴說恩深骨肉，萬死教難忘。
秋霜，一雙紅淚，盼殺梅娘。

雲雨夢，本荒唐。問蕭郎，兩鬢

碧窗夢

玉關無主，雁字依稀，東閣呼郎，梅魂縹渺。貯靈芸之淚，拂薛濤之箋，往事休提，斷腸
 此日，墜歡重拾，屈指何年。綺夢初醒，詞成六闋。

豆蔻梢頭月，琵琶江上魂。東風遮莫怨王孫，酒漬青衫，錯認舊啼痕。
 郎按紅牙譜，儂填燕子箋。儂心宛轉逐郎前，郎自辛酸和淚替儂憐。
 日暖芙蓉帳，檀薰翡翠衾。淚珠彈落費娥襟，辛苦啣泥乳燕，畫堂深。
 嬾整堆雲鬢，愁聽出谷鶯。禦兒玉乳解朝醒，天上人間，記取許飛瓊。
 刺就鴛鴦字，偷藏琥珀香。美人腸胃莫相忘，七夕今年應笑女牛忙。
 一掬靈均淚，千年帝女愁。暮雲遮斷曲江頭，流水無情不住木蘭舟。

如此江山東掉孫關外

元龍百尺橫雲氣，碧波白鷗來去。眼底蒼茫，花前寂寞，風月今年誰主。背人悄語，數檀板金
 尊，魂消前度。怨煞東皇，佳期又背等閒誤。天地百年逆旅，齋心和劍膽，收拾遲暮。篝火狐鳴，荒
 江木落，夜半蛟龍跳舞。壯懷欲訴，仗十萬橫磨，馬鳴何處？碧血青燐，江南空蜀宇。

滿江紅 南幕弔張蒼水先生

江流嗚咽，訴不盡古今成敗。三百載猖狂胡運，天何此醉。萬里山河誰收拾？龍城飛將今安在？
 在膽斜陽一抹照西崦，傷時淚。班馬急，嗟無計，家國恨，榮寤寐。望天南孤檝，事功全棄。大好頭顱捐擲易，從容柴市精忠誓。聽蕭蕭萬樹斷猿啼，君應記。

卜算子 秋夜懷杏子

明月紙窗中，黃葉秋風裏。孤館無人解客愁，千里知心否。
 鐵笛聽淒清，夜半披衣起。獨倚危樓目已穿，何處伊人是。

河滿子 海上贈劍華

吾輩飄零慣事，相逢快訴平生。爛熳芳樽拚一醉，山前綠樹雲橫。無限傷春情緒，催人聽覺啼鶯。
 磨劍十年倦矣，行看世局紛更。薄利浮名誰與競？荷鋤自足躬耕。滌盡閒愁煩慮，尋君共誦詩盟。

虞美人次匪石韻

形骸放浪江頭醉，銷盡閒愁未。東風無緒亂花飛，燕子來歸春日又先歸。
 客邊游子飄零

慣，雨止鄉魂斷。更從何處問奇花，不見青青芳草遍天涯。

秦樓月

鶻啼夕，月華如水疎簾隔。疎簾隔，閒愁休說，落花休惜。青衫欲濕江頭客，儂情但問三生

石。三生石，心心記取，當年筵席。

昭君怨

扶病風前弱柳，此景怎堪消受。寂寞淚闌干，不禁寒。別有傷春心緒，花事闌珊無語。忍聽

杜鶻啼，夕陽低。

蝶戀花調劍華

念五年華芳訊早，燕子南歸，啼破春山曉。十里紅霞吟未了，傷心南浦青青草。李戴張冠
非異道，本是同根，顧影歛歛弔。妹妹林家人已杳，如何鎮日閒愁惱。

漁家傲 咏秋社諸子

文酒流連佳麗地，生平不解封侯事。愁去歡來雲水思，臨風遲，南樓借月酩酊醉。午夜夢
回人不寐，燈花半委和愁睡。惻耳酸腸邊角起，心無計，鷓鴣滿目傷時淚。

踏莎行春夜

底事關心；無端落淚，幾回擲筆幾回醉。晚風吹散枕函香，痴兒苦把相思記。舊約模糊；朱顏憔悴，眼前無可強人意。如何耐得五更寒，傾壺飲盡和愁睡。

鷓鴣天 邵園雅集，杜鵑盛開，醉後賦呈席上諸公。

大地春光付酒卮，杜鵑啼血上花枝。誰人移得天台種，疑向昭陽乞藥時。披香殿，莫輕離，鶴林奇色總相宜。沈郎漫擲相思子，狂殺江東姜杏痴。

眼醉媚

偶經小園，見並蒂蛺蝶一株，含苞欲吐，折置案頭，膽瓶中，晨起雙花爭放，填此寵之。輕盈鳳子，豔春駒，端合玉腰奴。繡簾開處，韓憑佳耦，握瑾懷瑜。香城恐被花枝妬，色相幻無殊。朝朝暮暮，一枝棲宿，粉頰凝酥。

霜天曉角

瓶中雙射子，右株憔悴，左枝悽黯無色，似悼亡然。嗚呼！鴛鴦同命，蝴蝶雙生，物猶如是，何況吾人。偶感近事，觸目愴懷，賦此以當一哭。

歸來謝女，蕭郎獨宿處，好夢如雲何許。朱簾捲，一凝佇。心與魂也與，狂情誰似汝，辨得人
間酸楚。月圓夜，落花語。

醉落魄 自題小影

壯心銷歇，芳樽爛漫茶靡月，東風吹染啼鵲血。舊恨新愁，待共從頭說。龍淵冒觸肝腸裂，
落梅笛裏聲哀咽。一樣相思，難解鴛鴦結。

五八 柳棄疾 亞子詞

大有 次韻酬慧子

芳夢驚迴，彩雲飛盡，更那堪往事回首。媿新詞，此才已落君後。山涯水角伊人遠，便兩地相
思怎守。任教咄咄書空，何處喃喃低咒。重重淚，青衫袖；莫道不銷魂，春光非舊。愁心一點，山下
蘼蕪開返。怕向蘼蕪偷問，遮莫是舊時紅豆。拚蕉萃沒箇人知，我儂消瘦。

蝶戀花 憶燕和慧子韻

訴盡相思千萬語，喚汝歸來，認取前遊處。最是關心傷別緒，去年今日尋春侶。莫怨江南
芳訊阻，有箇香巢，無恙還疑佇。闕盡滄桑深爾許，似曾相識渾憐汝。

點絳脣 夜雨遣恨，和慧子韻。

雨雨風風，遮斷春光渾太易。問天何意，只管昏昏睡？儂是愁人，忍聽愁聲墜。且休記埋愁
無地，多半傷春淚。

小桃紅 淚，和慧子韻。

湘竹斑斑，倩寫入湘君轉。三疊陽關；一聲河滿，爲誰留戀。澆鮫綃零落不成珠，肯穿他金綫。
惆悵心情變，洗淨桃花面。哭罷新亭，歌殘舊院，怕人瞧見。勸渠儂將就也些些，忍夢中啼遍。

虞美人 落梅，和慧子韻。

重重香雪風吹斷，羌笛聲零亂。縞衣素袂落如麻，忍見空枝依舊照橫斜。憐卿命薄渾如
影，好夢羅浮醒。霜悽月冷掩重門，翠羽啁啾歸去黯銷魂。

醜奴兒 令春夜寫感，和慧子韻。

飄零莫向天涯問，總是閒愁。便是閒愁，一往情深不自由。何人慰我傷讒意，細數從頭。忍

數從頭，往事零星記得不。

賣花聲 懷道非海上，和慧子韻。

往事夢中牽，十幅烏箋。相逢黃歇古城邊，送汝鳩茲江上去，江水如烟。秋雁更春鶻，忍話從前。倦遊身世恨纏綿，燕市酒徒零落盡，更有誰憐？

虞美人 題定庵詞和慧子韻。

千年劍俠真長計，肯老空山裏。才華如此竟虛生，盪氣迴腸禁得恨深深。靈簫去後無人矣，誰識狂奴意。傷春怨女士悲秋，感慨名家如汝杳難求。

解佩令 題竹垞詞，即用其集中自題原韻。

平陵結客長楊獻賦，嘆黃花晚節凋零盡。塵土束華，也應把蹉跎自恨，又何堪星髮揚州杜牧。小園庾信，哭窮途步兵，差近。載酒江湖，且收拾殘脂剩粉，更銷魂溫柔無分。

瀟湘夜雨 題燕子箋傳奇

小小鸞箋，多情燕子，啣來飛過紅橋。崔徽圖畫，忒妖嬈，誰更信佳人難再，偏一樣燕怯環嬌。團圓處，雙雙鴛譜，兩兩鸞綃。無愁天子，風流狎客，苦憶南朝。記薰風殿裏，真箇魂銷。收拾起江

山錦繡，分付那檀板銀簫。飄零甚！長江東去，嗚咽秣陵潮。

金縷曲

健行殂落，慧子有詞告哀，倚此和之，知天下猶有傷心人也。

啼血鶉聲苦，是年時殘陽芳草，那人門戶。望斷紅牆天一角，丁字簾櫳如故，只風景已非前

度。枉殺填橋靈鷲願，奈銀河未許天孫渡。腸斷矣！向誰訴？

芳蘭自判前因誤，數從頭蛾眉謠詠，

今番真箇海誓山盟無恙在，去矣不須回顧，看一片彩雲飛墮。我亦人間辛苦者，最關心忍續悲秋賦。知此恨，恨終古！

前調哭馮沼清

豈料真如此，驀傳來幾番惡耗，都疑非是，畢竟彼蒼渾憤憤，蕙折蘭摧底事，算江左霸才誰似？馬革裹尸原不惡，奈英雄偏向繩牀死。終古恨，有如水。交君四載風塵裏，猛回頭淒涼故國，

新亭名士。大樹勳名空夢幻，孤負燕邯俠子，只贏得名傳吳市。停苦停辛誰省識？看血痕化碧還

凝紫！歌一曲，魂來未？

百字令 夜夢慧子臥子，及亡友沼清，握手談笑，歡若生平，占此紀之。

驀然相見，有漸離擊筑，孟公驚座。料是夢魂飛到此，畢竟匆匆何苦？黃歇江邊；田橫島上，離

恨天難補。從知緣淺，已算相逢一度。那堪纔別生交，又逢死友，談笑還如故。絮語喁喁休再記，記也何曾清楚。許劍無靈，焚琴有淚，此恨終千古。青林黑塞，何處是君歸路。

前調

數年前，交亡友，沼清，卽耳梁溪。秦寶鑑，劍霜名，頃以會弔，沼清來吳門，則聞劍霜死矣，愴然賦此。

素車白馬，向姑蘇臺畔，愴懷馮異。誰料無心剛道及，君亦翩然逝矣！白首同歸，青年短命，此事休提起。憐才如我，神交數載而已。當時憑弔，明陵，斜陽故國，如薑英雄氣。哀樂中年難自遣，一卷斷旌詞裏。劉毅呼盧，信陵醇酒，豈是平生意。男兒多恨，不向沙場戰死。

金縷曲題慧子滄桑紅淚詞

杜宇聲聲裏，忍消受落花中酒，無聊情味。寫盡滄桑詞一卷，中有美人紅淚，問贏得鮫綃幾許。搗麝成塵香肯滅，便芳心寸寸爲伊死。休更作，相思語。天涯回首傷離緒，記當時孤燈客館，同聽風雨。紅豆年年勞悵望，依舊多才只汝，奈驅遣愁懷無計。莫唱曉風殘月句，怕前塵舊影重提起。擲筆罷，且休矣。

高陽臺聞某友被繫作

旖旎紅簫，溫柔碧玉，算來此福難消。兩雨風風，春光一霎飄搖。魂銷心死都無賴，盼伊人路遠難招。最傷心，馬角烏頭，夢也迢迢。雕籠英武深深鎖，嘆聰明誤汝，翠羽蕭條。如海侯門，蕭郎怎忍輕拋。黃衫俠客今何處？更誰能盜取紅綃？願將來，成骨成灰，私誓堅牢。

金縷曲憶某友留都獄中

盼汝歸來矣，恁無端檻車就道，匆匆千里。山北山南羅網遍，收拾酒徒劍侶。有魍魅攪入而喜。料得白門楊柳月，照南冠羈客淒涼死。今夜夢，可飛去。那堪舊事重提起。記當年交成刎頸，腥風羶雨。便欲從君行不得，卻曲迷陽誰語。總負汝今番非計。地老天荒盟誓在，只新詞難倩飛鴻寄。誰辨我，墨和淚。

前調送巢南入粵，和寄塵女士韻。

草草驪歌唱，送君行新愁萬疊，淚波紅漲。離別儘多歡會少，兩日傾談未暢。早一艇孤蘆閒放。况值中原鈞黨急，念楚囚梁獄心難壯。惡風起，滔天浪。羅浮天半山如掌，算從今飛書草檄，未須悲愴。戰血南天烽火地，應有遺蹤可訪。只此事兜儂心上。惹我車中新婦恨，剩尋消問息傳。

無恙。看汝去，奈惆悵。

踏莎行 秋夜懷某友

鳳鶯含愁，鶻聲帶血，此生薄倖何須說。這般負汝不分明，劫灰燒燼鴛鴦牒。
弱水千尋，蓬山萬疊，相思可有相逢日。秦淮烟月逼人寒，箇儂蕉萃傷秋色。

百字令 詠像生花

芙蓉遲暮，况迢迢遠道，涉江千里。眼底秋容誰贈我，絕妙蘭心蕙意。不似枝頭，風痕雨點，狼藉爛斑裏。孤眠伴我，銅瓶紙帳情味。豈是當日唐宮，金鏤剪綵，粧點春三二。中有美人魂一縷，獨自背燈搖曳。蕉萃年年，花開花落，飄泊渾非計。人天惆悵，銅仙無限鉛淚。

金縷曲 題天笑秋星閣筆記第一種

恨雨愁風裏，最傷心有情眷屬，無情天地。縱有青廬新婦好，難慰伊人愁緒。情至者大都如是。驀地飛來金彈狼，忍生生拆散鴛鴦侶。拚一死，全休矣！花殘月缺休提起，問誰能推原禍首？
卿真解事，情海愛河原浩蕩，無賴強分彼此，斷送盡人間兒女。容易六州成大錯，只紅絲一縷輕繫。誰作傭庖穢氏。

百字令

余在海上海子有詞見寄，卽步其韻，兼懷臥子白門、巢南汕頭、劉三武林。

小屏紅燭，正去年今夕，與君相敘。問息尋消剛一載，料理重逢偏誤。幽恨詞箋，嶢嶢劍氣，運
汝從頭絮。一燈古店，低徊往事如許。最憐絮跡萍蹤，天涯地角，哀怨誰能語。江左夷吾無恙在，

歌泣新亭何處？南國行人，西湖狂客，迢遞雙魚素。晨星寥落，海天無限凝佇。

前調題寄塵女士懺慧詞，用定庵贈歸佩珊夫人韻。

奇才如許，有青綾障外，謝家瓊樹。生小女兒谿畔路，弄月評花閒住。漱玉新詞，斷腸舊恨，誰
辨今和古。蛾眉絕世，人間脂粉如土。傷心風雨聯吟，江湖結客，往事休重數。抔土西泠留未得，
剩爾騷壇一旅。翠羽蕭條，梅花零落，迸入哀弦去。因緣文字，一編珍重曾覩。

蝶戀花得臥子獄中書感賦

未卜他生今已誤，斂斷琴焚，南浦當時路。十樣蠻箋勞寄與，幾曾寫盡傷心語。往事思量
誰記取。斷雨零風，又送春歸去。正是江南三月暮，鷓鴣聲裏留人住。

鏡裏窺儂顏色誤，蕉萃年來，總爲郎辛苦。鸚鵡前頭休絮語，背人紅淚還如雨。繡盡迴文

無一句，倩夢驚魂，只逐楊花去。盼汝今宵飛到處，秦淮水繞鍾山樹。

滿江紅 弔蔣清烈女士，用岳鄂王韻。

鷓鴣聲中，那忍見，衆芳銷歇。恨何物，萋菲貝錦，敢污清烈。媧后從來思補石，常儀豈有會奔。月。嘆從容就義，謝譏人，心悲切。拚一死，冤應雪。傳萬祺，恨難滅。痛世間底事，磽磽易缺。六月霜飛東海獄；三年碧化萋弘血。料貞魂招盡不歸來，排雲闕。

前調題劍魂漢俠圖，用前韻。

荆匕良錐，歎底事，使風銷歇。驀地裏，逢君吳市，簫聲激烈。壯士悲歌遼海曲，健兒醉踏沙場月。弔要離塚畔草連天，雄心切。沼吳恥，幾曾雪。報韓誼，終難滅。看不平棋局，唾壺擊缺。青史百年薪膽恨，黃衫一劍恩仇血。問何時恢復舊中原，收京闕。

金縷曲

哲夫作枯筆山水一小幀見贈，爲訂交之券，荒寒寥寂，忽有感於余心。爰取戴子高影事，名之曰夢隱第二圖，詞以張之；卽用三年前爲鈍劍題萬樹梅花卷子舊韻。撫今追昔，若不勝情，海內詞壇，所不敢望，二三同志庶幾和余。

披地奇峯起，笑平生鄭虔三絕。君真多事。揮灑烟雲來腕底，靈氣胸中未已。看枯木寒山如此，塵海茫茫無我席，算此身合向山中死。負汝者，有如水。故人萬樹梅花裏，記當年卜鄰有約，而今何似！恨海精禽填不得，付與淒涼眉史。儂已厭傷心滋味，只恐人間無此境，便夸娥移也非長計。圖一幅，且休矣。

蝶戀花 喜臥子出獄，用前韻。

絕代因緣今未誤，美眷如花，錦樣前頭路。豔福原憑天付與，人間刪盡相思語。十斛明珠誰換取，只羨鴛鴦，不羨飛仙去。蕩子歸來猶未暮，溫柔鄉裏留君住。

休道傳言鸚鵡誤，禳得三生，蓮子儂心苦。昨夜護花鈴上語，花開不怕閒風雨。碧海青天傷別句，此日重逢，莫再匆匆去。料理雙棲安穩處，不須更化韓憑樹。

金縷曲 寄臥子雲間，疊舊韻。

盼殺吳儂矣，恰歸來，莫愁艇子，長千十里。悽絕年時秣陵路，聽雨聽風無侶；又誰料今宵在喜。桃葉桃根雙畫漿，倘重逢，值得爲卿死。便擬逐，夢魂去。只愁倦翮飛難起，依舊是天南地北，孤燈夜雨。倘使伊人能念我，料理纏綿情語。算買棹來真長計。笠澤吳淞通一水，莫殷勤浪把魚

書寄。好同話，蟾蜍淚。

高陽臺

楚僖泛舟分湖，尋午夢堂遺址，不得。作分堤弔夢圖，以寄慨，爲題此解。

午夢堂空，疏香閣壞，芳踪一片模糊。衰草斜陽，涼風搖動菰蘆。深閨曾裏蕉窗夢，到而今夢也都無。最傷心，鏡裏波光，依舊分湖。披圖遙憶當年事，記一門風雅，玉佩瓊瑤。一現曇華，無端零落三珠。孤臣况又披緇去，莽中原哭遍榛蕪。剩伊人，弔古徘徊，感慨窮途。

金縷曲 六月六日秋俠忌辰，寄懽慧小淑，巢南索和。

六月飛霜雪，記當年軒亭道上，英姿流血。蕩虜雄心誰得似，如汝鬚眉巾幘，只短命令人悽絕。大好西湖無福分，甚一抔難葬伊人。骨又被那，虎狼猾。素車白馬成陳跡，遺恨事椒漿展拜，我儂還缺。一種交情生死感，二妙玉臺曾識。問何處萍踪此日。剩有元龍湖海士，因病魔豪氣變銷歇。誰和我，山陽笛。

沁園春 壽巢南三紀初度

十斛醪醪，壽汝元龍，豈不快哉。記桐飄墜葉，休驚時節，酒澆魂壘，且盡尊疊。初度靈均，更生

劉向，信有中原絕代才。才人慣，算逃禪底事，本是諧談。少年壯志難灰，看驃騎弓刀擁上臺。奈黃龍逋寇，胡塵未靖；蒼鵝出地，心史先埋。入洛機雲，草玄揚子，俯視人間盡可哀。君與我，好貞盟共守，古井無瀾。

斗大松陵，逝矣吳潘，誰寄千秋？有孤根崛起，目空餘子，故書讀遍，身是清流。釣雪灘荒，垂虹亭圯。文獻粉榆次第收。多情甚，便雕蟲小技，也費搜求。 卅年民史誰修，算魯國陽秋肯罷休。看遺民著錄，表揚芬烈，祕辛紀事，傳播遐陬。天假之年，人無可語，努力名山付汗牛。從今後，祝青藜無恙，書著窮愁。

高陽臺 雲間感舊，寫示臥子。

幾社名流，雲間詞客，芳踪渺矣難尋。醉白池南，無端又息遊襟。華亭舊是悲秋地，記大哀一賦愁深。更何堪，小劫人天，別樣傷心。 當年我本無家客，嘆萍踪絮跡，一例銷沈。四載重來，滄桑感慨而今。瑤琴彈斷鍾期杳，恨人間何處知音。絮心期，滿地江湖，只有陳琳。

羅敷媚 重過滙南有感

迢迢一水黃婆渡，怎不銷魂，拚不銷魂，也算人間一段春。 遊踪四五年前到，舊夢溫存，舊

恨零星，燕子歸來認淚痕。

金縷曲

巢南就醫魏塘，迂道過此，余小病初痊，冒雨往舟中訪之，復招穎若傾談竟日而別，詞以紀事。

小病愁難療，忽報道先生來也，甚風吹到，倒着衣冠迎戶外，贏得兒童爭笑。算此意旁人難告。小艇垂楊低處泊，有明牕淨几添詩料。令我憶，浮家好。深談款款何曾了，依舊是元龍湖海，容顏未老。商略粉榆文獻業，此事解人漸少，剩滿地鴉鳴蟬噪。一客東陽來瘦沈，好共君清話滿翻倒。奈別後，忘昏曉。

齊天樂 中秋夜無月

一年分外中秋月，連宵盼他辛苦。偏是無情，黃昏過了，有陣廉纖微雨，酸酸楚楚。似好事將成，又遭奇妒。天上人間，素娥今夜在何許？依舊華鐙繡戶，笑爭妍鬪影，等閒兒女。別有天涯，征人思婦。多少傷心難絮，年年此度。恨桂樹吳剛，未尋斤斧。寫入新詞，倩紅兒曼譜。

金縷曲 劍華自海外歸，留梨中旬日而去，倚此爲別，并墜南社之約。

秋雨秋風裏，算又是相逢一度。送君行矣。別後三年幾會見，見又匆匆如許。怎禁得酒闌燈死。莫更臨歧珍重道，看青衫已滿天涯淚。聽窗外，秋蟲語。碧雲黃葉天無際，慘離筵。丁寧後約，情何能已。雅集吳門期不遠，饒有風流况味。便縱酒高歌休去。大醉可中亭畔月，好狂呼幾復騷魂起。重記取，別時意。

前調

十月日湖，南社同人會於虎丘。楚僧鈍劍以事未集，並有詞馳寄，依韻和此。

匹練吳門道，算徵倖笙歌畫舫，我儂真到。慘淡東陽祠宇在，不許胡兒拜倒。付吾輩登臨還好。萬種傷心成一哭，猛山靈無語羣鳥噪。只此意，令人老。而今雲散風流早，依舊是荒江老屋，歡場如掃。贏得多情高與葉，珍重郵籤未杏，似聽見杜鵑聲叫。大好家居爭撞壞，問奇勳誰奏。相如趙，拚沈醉，此生了。

前調 劍華有齊魯之行，遲余海上，欲牽衣一別，而余未能赴。填此代柬。

驀地牢愁惹，忍輕提分離兩字，淚珠傾瀉。蹈海歸來纔幾日，怎便把儂拋捨。又此去勞勞車馬。離合悲歡成底事，問天公兀自裝鹽啞。情到此，筆難寫。緣深緣淺誰相借，使匆匆臨歧一握，

也同無價。湖海飄零翻羨汝，絕勝羈棲轅下，算此意告君休訝。只是長途風雪緊，要眠餐珍重休忘者。待明歲，早歸也。

前調

楚僖入粵，道出春江，邂逅臥子，開尊鬪酒，樂可知矣。書來索詞，填此奉寄。

百尺樓頭客，最傾心雲間臥子，東南人傑。歇浦遊誰把臂，狂殺東江葉葉；這相見何須相識，箝口莫談天下事，只高歌痛飲乾坤窄。稽阮放，荆高俠。酒家墟畔花爭發，笑人間淺斟低唱，都非英物。龍吸鯨吞無算爵，旗鼓中原大敵，似鉅鹿昆陽赤壁。笑問玉山頽也未，好商量死葬陶家側。算此樂，最難得。

前調三月朔日，南社同人會於武林，泛舟西湖，醉而有作。

賓主東南美，集羣英，哀絲豪竹，酒徒沈醉。指點湖山形勝地，剩有趙家荒壘；只此事從何說起。王氣金陵猶在否？問坐中誰是青田子？微管業，付青史。大言子敬原非戲，論英雄安知非僕。狂奴未死，鐵騎長驅，河朔靖，勒石燕然山裏，算纔了平生素志。長揖功成歸去日，便西湖，好作逃名地。重料理，鴟夷計。

蝶戀花

上巳日，余自武林發武塘，鈍劍適以是日至，覓余不得，悵悵而歸，書來極哀怨之致。詞以感之。

越水吳山芳訊阻，是汝來時，是我歸時路。刻意尋春春已暮，人生能幾華年誤。省被蘭姨瓊姊妬，便不重逢，也勝重逢處。一瞥驚鴻人又去，墜歡終竟無憑據。

高陽臺

自武塘歸梨，阻風不得達，繫舟分湖之濱，蘆中諸子握手道故，置酒相慰，至可感也。別後賦此寄謝。

浪打歸鴻；雲迷羈雁，今宵又落分湖。越水吳山，輸儂鄉味，蓴鱸。舊時鷗鷺猶堪問，愧憐才青眼模糊。任飄零，乞食猖狂，未是窮途。阻風中酒年年事，使高燒紅燭，爛醉黃墟。飛絮搏沙，歡情都付提壺。解衣推食雲天誼，奈逢迎也到狂奴。譜新詞，休悵萍蓬，且寄蘆蘆。

金縷曲題沈詠霓齊眉春泛圖

春水蘆花渚，甚君家無端收入，畫圖中去。絕代東陽誇瘦沈，濯濯靈和瓊樹；况相作潘娘眉

嫵。雙宿雙飛。底穩，笑人間無限。開鷗鷺。只恐被、鷗夷妬。算來我本移家誤。况年時江湖載酒，飄零風絮。一舸重尋歸計好，卜宅梨花深處。奈猶是他鄉羈旅。何日傍君分水住，便劉楨平視君休怒。環珮樣，謗先覩。

蝶戀花 寒夜憶內

小別居然愁寂寞，一日三秋，况是三旬約。風雨淒清樓一角，惱人只怨天公惡。因甚心情容易錯，見也尋常，去便思量著。睡鴨香銷寒夢覺，半牀繡被渾閒却。

五九 洪奂堇父詞

慶春宮 送別張硯公

玉漏沉蓮，雲帆隔樹，斷腸悄語淒聽。蠟炬愁封，蠻絃怨咽，自憐蘭絮漂零。俊遊重憶，認江水青羅瘦縈。萬千心事，可奈中宵，殘笛聲聲。舊時月色分明，換羽移宮，商略吟情。急景凋年，峭寒停夢，更堪別緒頻增。翠微霜老，儘飛上潘郎鬢尾。酒銷花歇，後夜伊誰，共翦孤鐙。

江城梅花引冬柳

舞衣零落意淒涼，對斜陽，怨斜陽；折損腰肢依舊冒寒塘。昔日繁華渾似夢，况羌笛，一聲聲，更斷腸。斷腸，斷腸，不可望。別緒長，別憾長，憾也，憾也，憾不得牽住歸韁。十里長堤迎送爲誰忙？惆悵曉風殘月裏，人去後，賸寒雅，點鬢霜。

一翦梅和蕃卿先生原韻

兩字秋心合做愁，江上歸舟，沙上閒鷗。兼葭如雪落汀洲，半舞橋頭，半上人頭。耿耿銀河淡欲浮，月照南樓，人倚東樓。西風黃葉去難留，一念思秋，一念悲秋。

聲聲慢

曉風梳柳；夜雨欺花，淒涼一片秋聲。幾點歸雅，唳秋飛傍危城。吳霜暗侵芳草，奈庾郎吟鬢先星。斷腸處，悵滄江蕭瑟，殘葉飄零。寂寞闌干獨倚，聽寒敲砧碎，四壁蛩鳴。試數年來，尊前誰最多情。思量舊歡如夢，咽回潮一夜愁生。紛萬感，付東流羅水細瀼。

綺羅香爲詞史張文豔作

膩玉欺花，嬌雲妬月，長憶朱樓歌舞。春曉蘇堤，夢曳柳絲煙縷。甚輕盈飛燕神光，更綽約流

鶯丰度。儘魂銷幾夜東風，笛聲飛繞斷橋塊。芳尊遙辭海嶼，聽唱開元舊曲，鶉啼紅雨。萬感年華，都入遠山眉嫵。倚錦帳翠袖封香，捲珠簾寶鈿流語。又聲聲子夜歌翻，斷腸癡癡（去）吟。

憶江南

無限憾，時節又中秋。忍向尊前溫舊曲，不堪花下訴新愁；明月滿西樓。

高陽臺

碎雨迷煙，曾雲鑲日，一天涼吹新愁。幾點征鴻，背人飛過汀洲。西風不管人蕭瑟，儘寒蟲啼損枝頭。最無聊，倚遍危闌，數遍歸舟。子陵城上梅花老，悵風帆渺渺，烟水悠悠。美景良辰，負他時節中秋。畫橈縱有閒歌舞，奈庾郎愁賦登樓。黯銷魂，杜牧揚州，司馬江州。

南浦

濃綠漲晴窗，對雉山薰風一曲無緒。曉日落芙蓉，高樓外好鳥一一（作平）飛去。闌干獨倚，別懷愁向鶉鶉訴。斷虹臥暑，看百丈青谿，盈盈不（平）語。思量往事堪驚，數十載栽花，幾番聽雨。回首鬢毛絲，千般憾零落庾郎愁賦。天風萬里，斷魂誰按梁州序。且斟綠醕，漫祇管聲聲歌翻南浦。

虞美人湖船曲和次公。

春風一棹晴湖上，欸乃凌波慣。晚烟吹渡闔閭城，城上王孫着意認傳停。

輕移蘭槳橫江

橫，飛絮江南路。螺痕凝黛碧如山，染得雙眉不解入時難。

晚裝初試羅衫

篷窗幾點黃昏雨，催斷流鶯語。等閒暮暮復朝朝，又被春光偷過第三橋。

夫容鬪艷香生

暝，雲壓湘痕卷。玉簫吹徹賣花聲，曲罷江鄉新月一鉤明。

越來溪畔新桃葉，寫作湘紋褶。一篙新漲浴鴛鴦，愛傍柳陰深處艤吳艤。

海紅簾卷吳歛

步，羅綺輕如霧。落紅無奈趁春潮，收拾新愁舊恨到明朝。

斜陽一抹浮烟翠，醉試新茶味。楊花飄泊棟花開，生怕畫船搖過虎丘來。

起，渺渺春江水。六朝金粉賸東流，慙說三生花草夢蘇州。

遊人艷說江南好，爭奈春將老。扁舟何處覓鷓鴣，賸水殘山竟日雨絲絲。

傷心葉底黃梅

雪，孤負春雲熱。吳娘身世似飄萍，洒冷香殘愁對可憐生。

江頭多少辛夷樹，賺得相思句。雙鴛睡傍畫橋橫，吩咐今宵好夢到天明。

見，幾日東風面。寫將紅豆寄天涯，記取橋塘西畔是儂家。

醉太平

三更四更，風聲雨聲。碧宵孤館淒清，况鐙施酒醒。
思卿憶卿，離情憾情。庾郎吟鬢星星，錯

魂銷夢零。

如夢令 和本公

蘭燼玉缸花曉，春溢翠奩心悄。纖手卷珠櫳，檀吻背人偷抱。堪惱堪惱，鈿約幾時會了。

慶春澤 題十眉鴛湖雙槳圖

雲鬢搖青，羅衫蘸綠，(用寄心瑣語原句)明湖一鏡天開。小艇鴛鴦，膩遊人醉蓬萊。登臨攜手凌烟雨，認芳蹤蹴碎蒼苔。最難忘，一擢高歌，水鳥飛來。此(作平)情可奈成追憶，恨風流雲散，玉殞香埋。盪氣迴腸，忍教瑣語親裁。青天碧海綿綿憾，想披瀝淚泡琴臺。黯銷魂芳草王孫，同是天涯。

六〇 洪爲藩白蘋詞

一剪梅海上重遊，獲麥子美譜此以贈。

太息人聞

春去江南何所之？
花化香泥，柳剩殘枝。
相逢一笑且開眉，
漫道相知，且訴相思。
萬事非君也含悲，
儂也含悲。櫻桃紅了綠梅肥，
風又淒淒，雨又霏霏。

六一 胡先驕步會詞

憶舊游懷仲通，步玉田寄元文韻。

看西山已老，落盡桃紅，飛絮飄零。
舊夢尋難著，剩心田半頃，種遍愁根。
滿地槐花榆莢，夏木葉深深。
恁只贏片紙，爲寄殷勤。
重逢竟何日？
尙記得徘徊剝海，綠陰濃處，同覓殘鶯。
忽忽又經年矣，回首暗心驚。
不語對中天，更闌燭灺涼氣生。

沁園春步曉湘見贈元韻，卽以奉答。

極目南雲，雁影淒迷，沈沈故鄉。
數深宵獨立，露沾羅襪，侵晨微步，寒薄綃裳。
夙日牢愁，者番別緒，亂後重逢今倍嘗。
傷懷甚，對朝歌麥秀，同話蒼茫。
年年碌碌如常，却儒雅溫文愧沈郎。
嘆

風花歷劫，茫茫天地，思量往事，無限滄桑。舊恨綿纏，韶光駒逝，自是人生幽怨長。更何處，探奇攬秀，詩酒徜徉。

長亭怨慢懷曠遲，用白石韻。

已飄盡春風殘絮，夏綠沈沈，遠迎朱戶。杜宇聲哀，天涯遊子，竟何許。別經年矣，最觸目青榆樹。樹底共徘徊，記去歲朝朝如此。昏暮，看殘陽入海，海國浪花無數。飛來海鶴，急將者錦函交付。切囑是莫滯歸期，任花鳥飄零無主。極目望瀟湘，拂盡淚痕如縷。

翠樓吟

劫後重來，山河易色，撫今思昔，百感橫生，適伸通索影，即贈一幀，贅以此闕。

劫後歸來，衣衫落拓，羞將瘦影相贈，別來纔幾月，已滄海更番清淺，牢愁難遣。又落盡槐黃，南風輕緩。看雛燕啄殘花蕊，墜紅成片。踰鏡，虛擲韶華，祇禿毫殘楮，儘催年箭。舊時歌舞地，已全易桃花人面，無邊幽恨。撫琴劍蒼涼，羈懷如繭。應難免沈腰今日，帶圍寬緩。

夜半樂馬纓盛開有感而作。

夕陽倏又西墮，綺霞絢彩，遙照天涯路。漸暑氣全消，暮林微舞。半鈎碧月，枝頭漸露。更看宮柳籠煙，畫樓凝霧。掩映著紅櫻兩三樹。望中暝色四合，落盡梅英，笛聲淒苦。愁未已，黃昏危樓。

凝佇。碧煙宵凝，紅魂夜媚；對茲美景名花，越增離緒。念游子憑闌悵無語。到此因念聚合分攜。了無憑據。尙未若花期可輪數，錦韶光輕易竟任空辜負。凝淚眼望斷鴻飛路，暮雲明滅迷煙渚。

臺城路 言志

古云否泰相消長，神州豈真淪墜。半屬天心，半關人事，莫喪元龍豪氣。勤修道藝，想重整河山，莫非吾輩。未是夸言，冥心孤往自能濟。他年果能如志，一帆當讓，酒長揖而逝。三楚雲山，五湖烟月，嘯傲了茲餘歲。二三心契，使日日稱尊，尋芳買醉。想此孤心，他年當盡慰。

上林春 春情

垂楊樓外晴烟靜，瘦紅明靚，寒簾無語看遊蜂，乍把閒情句引。春晝教人慵困，春眠未穩。惺忪自起品新茶，添寶鴨穠香凝。

轉應曲

明月明月，幾度照人愁絕。更深香燼無溫，千里江南夢魂。魂夢魂夢，端是將人調弄。

蝶戀花

寒雁歸來秋又半，秋影如潮，一壁秋燈暗。四砌秋蛩聲不斷，夜闌倚枕秋心黯。斑駁已去

天涯畔，水遠山遙，水外山尤遠。淚漬冰綃千萬恨，菱花鏡裏朱顏換。

行坐相隨

水精簾外西風緊，四起砧聲，敲徹秋宵冷。萬疊流雲橫半嶺，夜深月照房櫳靜。

一點靈犀

形共影，挑盡蘭膏，守定孤淒境。百轉相思還自省，陸郎消息如萍梗。

未是棄捐

海天萬里長相憶，孤擁寒衾，聽盡銅龍滴。好夢難成頻轉側，朦朧不覺秋窗白。

海國春題亞子分湖舊隱圖自度曲

春色娉娉，天外青山如髮。波光搖黛影，聽鳴榔聲裏，漁歌清越。十里分湖，三春花草，應塵網
 一時盡脫。勝迹留傳，舊遊如夢，靈芬故事能說。應念碌碌風塵，勝溪舊宅，歸夢于今未得。一幅
 輕綃，半泓煙水，畫裏湖山空闊。影事如煙，楊柳岸曉風殘月。扁舟一舸，勝游他日當達。

一枝春

西國椒香樹，枝葉芬馥，柯幹娉娉，極似垂楊，較增斌媚；秋冬結實，朱顛纍纍，尤爲可

愛。爰拈此解，賦之，即用草窗元韻。

依約籠烟，看仙姿窈窕，紅酣春雨。番風暗數，又是去年情緒。新黃淺黛，早添得遠山眉嫵。較垂楊別具風流，婀娜芳華凝聚。婆學細腰低處，過東風、裊裊遊絲成縷。蜂營蝶舞，葉底鳥翻新譜。春情漫賦，應恐怕燕嬌鶯妬。深院悄，簾幕沈沈，斂魂欲語。

海國春

歲月如駛，冬盡春還，蒹葭飛動，新綠齊苗，異鄉遠客，春色夢人，乃自度此曲，聊舒心曲，辭之工拙，不計也。

海國春還，簾外青山如笑。東風吹細雨，聽鶉聲淒緊，鶯聲廣調。細草如茵，明花擬錦，早蜂蝶紛紛恣鬧。綠展稀棗，(Sequoia Sempervirens) 碧添櫛槭，春光一剎煊耀。堪念異國蹉跎，故鄉萬里，歸夢何時能到。張儉無家，梁鴻入海，骨肉東西燕勞。破浪乘風，浮槎夢幾時醒了？翩然去也，故園松菊堪傲。

天香

海仙花 (Hyacinthus orientalis) 略似水仙花，具五色幽香，清豔絕倫，洵名芳也。

倚此賦之。

淺絳迎風，嫣紅展靨，麝塵玉杵誰擣？碧葉參差，弱枝顫鼻，玉露斷煙迷曉。黃蜂紫燕，爭看煞飛瓊嬌小。廿四番風數遍，占盡一春芳候。環珮珊珊月下，度花陰、暗香幽窈。一縷斷魂，幾許舊愁縈繞。凌波步鼻，奈遠隔蓬山夢難到。望極瀟湘，雲天浩渺。

高陽臺和曉湘見贈，卽步元韻。

目斷流雲，心隨征鳥，海天盼煞飛鴻。尺鯉迢迢，眉開喜捧瑤封。荒林落葉成淒黯，更休題故國秋容。指銀河、光巨長天，何處仙宮？夢魂不度蓬山遠，想拋殘紅豆，兩地應同。萬里相思，一年又遇西風。江關蕭瑟庾郎苦，看斑斑鉛淚都紅。更難聽、夜雨瀟瀟，滴盡疎桐。

前調答瘦湘

蕉萃江湖，飄搖海國，無端浪擲華年。三載孤心，幾回微託啼鵲。商飈異地增蕭索，望天涯、何處中原？念翩翩、浴下機雲，一晌情牽。通眉長爪嶷頭角，想三郎丰度，玉樹風前。錦字奚囊，早應題遍山川。開絨有分聆珠玉，恨識荆、今日緣慳。待春光、重伴薔薇，把盞花間。

燭影搖紅春雨

雲暗天低，琵琶簾外廉纖雨。暮山煙霧，霽遙青，依約千松樹。斜倚銀簾，又無端風鈴亂語。冷泠浙浙，落盡簷花，良宵虛度。芳草芊芊，天涯綠遍無歸路。孤燈夜擁聽殘更，鶻語聲聲苦。廿四番風漫數，嘆花深心期又誤。年華逝水，春事蹉跎，羈愁如絮。

聲聲慢 月夜金合歡 Aegio 感開感賦

黃金炫彩，瓔珞垂珠，麝塵浮動春宵。細葉籠烟，橫斜幾苗，倡條蠻熏暗沾襟袖。度花陰，新月如鉤。閒佇立，聽響沈萬籟，更漏迢迢。人世滄桑易換，儘華年慘綠，輕付春潮。紅豆拋殘，寸心宛轉紅蕉。孤燈夜窗無語，想茂陵病骨能銷。情緒惡，便迷離夢也無聊。

買陂塘 詠雁

聽丹楓颼颼亂颺，晚風天際淒緊。橫斜飛度滄浪遠，岸柳洲蘆蕭冷。還自省，算菰米生涯，飲啄應無定。瀟湘路梗，待海國歸來，年華換也，舊跡可能認。霜華重，夜月湖光千頃，流雲輪展成暈。幾回欲下還飛起，渡口漁燈遙映。眠莫穩，怕網罟重重，弋者弓弦勁。星河漸隱，便高舉冥冥，凌風振翼，碧落見孤影。

齊天樂

馥麗蕤花 *Freesia refracto* 產南非洲好望角，移植園亭已久。姿態楚楚：花白，略似晚香玉，芬馥襲人，瓶供一枝，香盈滿室，名芳也。倚此賦之。

冰姿素骨春婉孌，亭亭一枝凝霧。巧鬢籠烟，瓊肌映月，妝點流光如許。離魂怨佇，黯好望風濤，暮天何處。斷夢依稀，滿腔幽恨爲誰訴。茫茫海雲萬里，儘啼殘謝豹，歸思無據。鳳蝶翩躚，紅蕉宛轉。前度心期重誤，箏琶漫語。算爛錦年華，幾番空負。落日西沈，瘴雲迷晚渚。

菩薩蠻 仿溫助教體

珠簾寶鴨穠香重，鬢雲斜亸金縷鳳。妝竟幾多時，畫堂春日遲。垂楊樓外影，樓裏春人困。漫展繡衾單，微聞濃麝殘。

畫闌干外鶯聲急，天涯芳草無情碧。何處是遼西，屏山遮夢低。愁深眠未穩，香暖鴛鴦錦。負煞好春光，閨中空斷腸。

篆煙漠漠金爐歇，夢雲如絮明還滅。應是玉關西，廣原聞馬嘶。玉驄嘶正緊，垂柳因風定。何處賣花聲，驚殘春夢新。

垂楊委地東風軟，續來殘夢如雲暖。天際識歸帆，陸郎今日還。離情銜淚咽，反覺無言說。

僂倚畫窗前，淚痕相對乾。

禁城漏轉初更過，夢回半晌情無那。街鼓又寥寥，一鏡如豆紅。
柳枝籠夜色，初上蛾眉月。
眉月有時圓，墜歡重拾難。

當年月比人兒小，如今人比黃花瘦。新月似蛾眉，畫眉人不歸。
錦屏金六曲，綺席燒華燭，
往事莫思維，思維空淚垂。

夜來月色臨窗靜，離愁歷亂如花影。舊約指薔薇，薔薇開幾回。
更闌春袖冷，獨自沈沈等，
縷縷篆煙長，燒殘心字香。

月斜天半聞飛雁，曙光遠冒平林黯。香燼漏聲殘，綠窗人未眠。
臨妝開曉鏡，翠鈿簪雙鬢，
鏡裏貌如花，陸郎應念家。

陌頭十里垂楊道，於今處處生芳草。芳草碧如煙，一年春又殘。
小桃添綠葉，葉底雙飛蝶，
蝴蝶總雙飛，人生多別離。

繡幃寶匣開妝鏡，昔時歡意今重省。加意畫雙眉，陸郎珍豔姿。
芳心終皎潔，素骨如冰雪，
秋扇縱長捐，舊恩忘未能。

六二 胡穎之栗長詞

念奴嬌和伯蓀滄浪亭紅茶花作

暮天寒重，正冬心獨抱，窮愁無際。一角滄浪亭寂寞，偏喚春魂先起。色相莊嚴，光風燦爛，寒谷溫如此。銀燈高燭，勸君今夕休睡。應笑開後無花，花中愛菊，空和秋憔悴。錦簇香霖嬌冶甚，合稱天涯知己。未共梅兄，難邀鬢弟，只迸相思淚。有懷誰遣？伯與端爲情死。

臺城路游虎邱歸同小柳作。

一抔荒土苦花繡，柔魂未曾銷盡。樹鎖煙寒，雲凝梵響，時動游人詩興。鞭絲鐙影，過斟酌橋邊，紫蘭香徑。極目平蕪，畫樓殘柳又相認。干將蜚去不返，劍池英氣在，澄水如鏡。那得生公，重來說法，頑石禪心默印。鴛鴦夢醒，好十里山塘歸（借作去）途重問。塔映斜紅，夕陽明暮景。

前調和小柳見貽均

十年塵事分明記，寒宵倦歌金縷。髮彩魂銷，衣香夢染，羈思還悲吳楚。家山遠阻，又誰識填

詞，共嘗辛苦，樹影婆娑，感懷同惹萬千緒。當頭唯見素月，照滄浪水冷，亭榭非古撥盡燼灰，聽殘鼓漏，相對西窗延佇。春回歲莫，怪有力東風，不吹愁去。剩此離情，倩他歸雁訴。

念奴嬌 和斷腸詞催雪元均

凍林蕭瑟，看棲枝鵲冷，爭巢鳩拙。未信人間寒意透，徧闥瓊樓銀闕。道韞詩尋，惠連待賦，幾度簾旌揭。酒杯爐火，那時還得陳設。遙想氈帽茸衫，盤雕射虎，豪興誇清絕。萬里陰雲搏作絮，亂向荒郊拋撒。無恙湖山，流連光景，且證冰心潔。蒼茫回首，晚來燈影明滅。

莫愁難遣，儘北風狂吼，彤雲紛積。夜裏衾裯如潑水，聞煞幽閨刀尺。欲問天公，可知春信，草脚微抽碧。安排白戰，幾多龍虎騰擲。還念頃刻花開，仙人遊戲，脂粉汚顏色。月姊霜娥空鬥冷，應自嬋娟珍惜。偃蹇疲驢，離襠瘦鶴，形影憐孤隻。陰寒仍舊，但開三徑何益。

鶯啼序 暑夕感賦，用夢窗韻。

風荷送香荏苒，做微薰牖戶。暗燈影深竹浮烟，漸覺天氣昏暮。畫樓畔笙歌久歇，蟬聲尙曳垂楊樹。又池邊蚓歎蛙鳴，伴他煩絮。憶在湘瀟醉酒，困眼看花開似霧。訪仙境迷却桃源，有人同話寒素。手纖纖冰調藕雪，笑難絕情絲千縷。待蟾輝先望明星，扇搖霜鷺。翻教舊恨，惹入新

歡，返家更厭旅。莫再問別來無恙，劍佩書卷。已逐銷磨，楚雲吳雨。塞芳泛櫂，追涼馳馬。留連光景，今猶昔，趁斜陽共覓山塘渡。誰還省，誠當初秀色，雄名剩付虎阜抔土。流年迅速，指日清秋，悵轉蓬斷芋。且認取蕉衫留唾，翠簾餘波，好夢重尋，瘦腰愁舞。朱顏易改，離魂招未，相思灰燼，鑽藹細，任紅塵飛撲瑤琴柱。商量逃暑埋憂，汗漬成珠，淚痕洗否。

浪淘沙

時序已新秋，溽暑初收，荷花深處泊輕舟。笑語香風聲不辨，鄉正溫柔。能共幾人遊，還約紅樓，羈魂銷盡又銷愁。明月未圓光有爛，先照心頭。

三部樂梅雪和美成韻

寒氣迷濛，逗冷艷暗香，景光奇絕。水邊疎影，疑照昏黃斜月。已催到風信連番，又暈和凍合，思與花發，亂飄密灑，誤認瑤枝瓊葉。紅鑪正焙淥酒，好歲華共賞，夢遊爭說。幾曾鬪妝，素面羞簪華髮。看冰漸似垂淚睫，應也是傷春意切。獨對歎息，知玉樹難久蟠結。

宴清都庚戌二月十三日晨起喜晴用美成韻

岸隔喧衙鼓，晨曦赤，鷓鴣林外聲度。風搖錦幌，泥融繡屨，尙扃朱戶。良辰過却花朝，恨未見

尋芳舊侶。轉記得春暮江南人哀故國詞賦。鄉園萬紫千紅，肥瘦瘦酌，清課休苦。波光鬢掠山容笑動，畫船歸去。循廊遍覓題字，悵又是柔腸繞處。問小樓昨夜占星，同衾夢否。

大酺用美成韻

看玉簾垂，紗窗迴，春晚黃昏金屋。前宵明月影，照離筵尊俎，夢魂飛觸。染血啼鴉，衝泥語燕，腸斷豪絲哀竹。重逢知何處？記西川北道，魏張生熟。正花落衣衿，草縈裙帶，會心人獨。流光來去速，舊情在，傾蓋還推轂。却未解文園渴病，子美牢愁，少年時聘懷遊目。悵對青衫客，幽恨入琵琶殘曲，倦遊息華胥國。多少塵事，煩寄江南江菽，素書夜緘淚燭。

綺寮怨用美成韻

望重紅牆銀漢，旅魂還倦醒。記舊日載酒徵歌，新詩句唱遍旗亭。兼金佳時浪擲，空相對鏡白雙鬢青。似夜深送客江頭，琵琶怨，淚落衫袖盈。遠夢未遑計程，依稀遇見，吹花暗噴香瓊。漏促燈清。乍驚覺，語誰聽，追歡又招離恨，是太上便忘情。愁雲繞城，秋聲警斷雁，風露零。

鶯啼序爲哲夫題漢六花鑑用夢窗韻

看春尚留倦眼，笑銅仙瀟水。問人世幾閱興亡，飄流今見金蕊。乍入手銀蟾絢彩，殘脂剩粉

似稀墜。認前朝頻自摩挲，頓生幽思。當日修蛾，鬪巧妬好，望羊車帝子。悵真箇分別妍媸，對觀情又獨至。萬千年啼紅怨綠，早圓缺都歸彈指。念菱花新樣同裁，未知何意。香奩暫設，畫檻還臨，盡古歡寤寐。誰記省覆翻雲雨，向背無定。露葉風枝，暗合清淚，猶堪共話，牽衫著劍。秋屏重照山雞舞，舊容顏更必添憔悴。榮華易歇，銷魂太液池邊，斷腸未央宮裏。江湖醉客，綵筆干時，嬾咏吟翡翠。儘賞玩敲殘盞睡，面擁書城，五夜烟浮，半天霞起。精靈氣盪，沈沈心事，迷邦懷寶同贊歎，鬢絲涼且傍妝臺倚。空憐顧影聞聲，寫得相思寄將鳳紙。

齊天樂送倅仁赴京師

眼前相對何人物，英雄使君同操。故里聞名，他鄉識面，銷盡羈愁多少。園林况好，是越國山川，吳宮花草。把酒論文，可知春去夜寒峭。悲歡離合不定，送行微雨裏，車走龍矯。直上青雲，橫排黑霧。遙望觚稜天曉，前程自保。莫任染京塵，素衣緇了。盪氣廻腸，虎邱聞劍嘯。

聲聲慢同倅仁游寒山寺

江村漁火，寒夜鐘聲，誰人空損愁眠。文字精靈，詩名傳唱千年。今朝寺門開處，認殘陽流水橋邊。病僧在，伴荒龕古佛，共證枯禪。西竺宗風東渡，笑莊嚴彈指，花雨嬋娟。可記南朝，樓臺都

付秋烟。清游未妨惆悵，悼滄波應泛吳船。待歸去，聽城烏霜又滿天。

壽樓春登滄浪亭作

登滄浪荒亭，正江南春暮，楊柳搖青。淡蕩潮風湖水，亂花新萍。今古恨，同飄零。轉笑他山川無靈，是倦宦幽居，孱王別館，千載動芳馨。空搜討，殘碑銘。問樓臺幾許，烟銷雲局，卻好廊隨意轉，竹比人縵。游興逸吟眸醒，夕照斜漁歌前汀。共誰出，問盤重開綺筵，眼畫屏。

長亭怨慢用石帚韻題孟枚蘇州楊柳枝詞卷

漫凝望天涯雲絮，幾處春光，密藏朱戶。乍訴相思，舊時離恨，尙如許。玉簫吹斷，明月影樓頭樹，解說已漂零，誰更情人堪此。遲暮，正空庭初到，滿地落紅休數。光陰逝水，悵羈客物華輕付。便綠盡媚眼柔腰，奈無力東風難主。且同把杯凹，聽取歌殘金縷。

鎖陽臺和貞壯韻

爆竹驅寒，鏡花墜曉，相思迢遞重城。一年春好，草脚又抽青。氣盪柔腸欲斷，有詞筆難寫平生。倘將愁化，風絲雨片，和夢到瑤京。朱門深幾許，芳筵開處，猶競歌聲。奈暖送分曹，冷逼殘醒。莫道梅開香透，剩疎影水畔斜橫。憑誰向，東君問訊，無恙故鄉行？

芳草渡

又聽到，是杜宇聲聲，不如歸去。正十年游倦，狂名遍識吳楚。容易春光暮，飛天空花絮。奈望裏不見鄉關，卻被遮住。晴雨綠波乍漲，送別人呼芳草渡。且安頓吟箋賦筆，題成斷腸句。酒杯太淺，尙載得愁痕如許。便恁把一寸心香夜炷。

紅林擒近新浴

六曲屏斜掩，幾枝香半焦。冰簟灑花露，銀盤膩芳膏。呼婢攙扶持起，倦眼似閉偷瞧。此際百媚千嬌，無力欠伸腰。戲水情自遠，避影意無聊。羅衣乍換，微寒還怯深宵。暗思量前事，橫陳玉體，被翻紅浪魂又銷。

水龍吟浮萍和筱樹

幾經香海輪迴，落花飛絮三生記。風前雨後，今朝昨夜，離魂消未。除卻飄蓬，更饒舞葉，別無知己。問沾泥墮瀾，空嗟汗濁，爭贏得清如此。還念天涯游倦，去來踪，纒絲難繫。夢痕正幻，芳心不競，采春流水。塙綠平蕪，同理多少，美人名士。悵吹波吐沫魚兒，錯認作荷錢戲。

念奴嬌同貞壯佩忍游虎邱和貞壯元韻

舊游重續。峴湖山無恙，誰堪棲息。白石清泉禪悅性，卻稱頑憨雙絕。掃壁題詩，開軒淪茗，却
又浮塵歷。高空長嘯，夕陽流影帆葉。迢遞七里山塘，繁華久歇，欲按吳歌咽。荒土一杯餘霸氣
無賴，花鬢柳暈。趁此尋秋，未須逃夏，心事如明月。畫船歸去，倚樓人正吹笛。

醉蓬萊同伯蓀遊焦山

好江山無恙，樹影低曛，石光浮翠。倦眼增明，漾天空雲碎。渺渺秋心，鄉故何處，恨似東流水，
斷岸平沙，潮生潮落，曾經時幾？可有仙靈，冷風長嘯，化鶴歸來，駕鰲飛至。蝕壁苔荒，誰識前朝
字。冷入松琴，寒催竹籟，欲瀉如虹氣。且倚危樓，與君同看海門霞起。

渡江雲登北固山

舊時歌舞地，江城畫裏，山影夕陽紅。登臨迷遠目，兩點金焦，錯認作屏風。摩挲狼石，思往事
遺恨無窮。休更問，浪花拍岸，淘不盡英雄。遙空片帆飛白，萬葉堆黃。好秋光開送，何況聽譙樓
殘角，蕭寺疏鐘。欲尋鐵馬金戈去，料倦游，應喚支筇。雲起處，天涯幾陣歸鴻。

八聲甘州登金山

快江天一覽，晚秋時未覺氣蕭森。恁樓鐘狂吼，塔鈴細語，呼喚登臨。錦纜蒲帆無數，湖海昔

年心莫問恩仇事，歸臥山林。遙想搗來桴鼓，有濤驚浪駭，蛟舞龍吟。悵西風吹面，離思盪幽襟。

野花猶作紅顏色，媚歲華霜鬢未宜簪。凝愁處，愧難贈玉，空自埋金。

二郎神 曹園夜坐，與小柳話舊，用徐典樂韻。

滿天風露，爲洗出殘秋花影。正萬點星寒，半階蟲碎，坐盡黃昏月冷。待展羅衾重尋夢，轉記得當年愁病。空媚送眼波，渦旋顛暈，泥入窺鏡。誰省青衫送別，琵琶聲凝，問寂寞園林，幾曾銷受。歌舞筵前醉醒，疊疊屏山，沈沈箭水，猶似那時情景。卻又聽遠寺疏鐘，警徹畫簾深靜。

霜天晚角 秋夜曹園

碎蟬啼急，一片荒園月。水樣玻璃窗裏，羅幃掩，鏡花結。愁絕誰共說。清宵眠未得。幾杵寺鐘敲後，又驚聽征車笛。

解語花 庚戌上元用美成韻

雲遮月暗，酒賭燈明，中覆分曹射。笑擊驚瓦，銀花簇多少。鬧蛾飛下，歌南頭雅，又舞倦劍橫腰把。看輭紅飛債，衣香淡，漳塵和麝。安得都如此夜，儘嬌鶯乳燕，爭鬥妖冶。陰釵遺屐，能消否病。溟茂陵司馬，春風醉也，葉再圓玉梅開謝。更鼓催遙想，鳴珂携袖烟朝罷。

泛清波摘遍用小山韻

青垂柳眼，綠吐梅心，猶是往年春事好。畫樓西畔，又聽啼鶯被眠早。誰知道香納搵汗，紅被
 掀波，嬌困夢魂驚碎了？欲罵難言，一轉雙眸意多少。旅愁渺，香篆正熏舞衣，髮彩尙榮芳草。遙
 憶湘靈，曲終數峯江曉。路途杳，天上願比鷄飛，人間恨無鴻到。且自吟風醉月，艷情顛倒。

琵琶仙 近十年來吳中歌妓罕有能琵琶者同伯孫作

呼酒徵歌，可還似日舊當筵絃索。紅淚曾濕青衫，天涯共淪落。無限恨清狂顧曲，頓成了感
 懷今昨。鐵馬刀鳴，花鶯語滑，空嘆遼邈。問多少豪竹哀絲，奈盈耳翻教寸心惡。回想十年前事，
 杳如聽仙樂。誰尙解輕挑慢撚，趁月明起捲簾幕。此去重覓知音，怨情遙託。

連理枝用書舟韻

瞥見釵枝擲，忽又櫻脣破。暗送脂香，還同前夜，教吹燈火。正清風明月，乍涼天，笑今來作麼？
 眉黛雙尖鎖，心事連番過。指約金環，河魁星度，都無一可。弄么絃低唱合歡詞，且倚牀同坐。

念奴嬌和伯孫見貽元韻

大湖南北，歎歸家又作滄浪亭客。笠雨鞋雲衫袖淚，怕聽春鶯啼絕。倦舞纖腰，凝妝倭髻，到

眼曾相識。英雄兒女，幾年心事如雪。無奈死別生離，楊枝駱馬，翻被詩情隔。尙幸逢君重握手，共把紅梅花折。五嶽看山，百城擁卷，豪語猶能說。萬千哀樂，聽來絲竹閒適。

琵琶仙 庚戌二月二日，同貞壯、小芙、伯蓀泛舟虎丘，用白石韻。

春水初生，好風景，載得扁舟如葉。前度游跡重尋，山靈爲驚絕。纔動聽提壺喚客，奈鄉語似聞鸞鵲。綠柳翠眉，青蕪滿目，誰又能說？記詩酒裙屐翩翩，共多少芳菲艷陽節。孤負惜花心事，待錢飛榆莢。金粉氣，猶籠亂塚，看落梅擁起香雪。轉念歌徹雲停，舊時輕別。

滿庭芳 貞壯以此調記虎丘之游，依韻和之。

花步尋香，山塘訪玉，肯教辜負芳春。笙歌隊裏，今喜暫抽身。看取龍吟虎伏，佛燈火銷盡晨昏。頽垣在，題詩舊字，誰更愛羊裙。驚魂，凝望處，湖心盪翠，城角低曛。把眼前風景，酒後評論。同是江淮，乞食，結遊侶，且洗衣塵。垂楊畔，歸途緩緩，應笑鳥窺人。

琵琶仙 用白石送貞壯赴鄂韻

多少相思，有誰把賦筆書成花葉。回念當日南州，知交半寥絕。千里外湖山夢隔，又聽取杜鵑鷓鴣。綠水生波，春風動幕，離恨休說。正同上麋鹿荒臺，嘆猶是笙歌換時節。今古物華人事，

祇銷歸寞羨。君去此題襟漢上，舊約遊負了溪雪。(約君同返越中，匆匆三歲未果。)想聽吹笛樓頭，更難爲別。

齊天樂 和陳匪石有贈韻

倡條冶葉風光好，忘憂正宜池館。辣拌椒漿，甜和蔗汁，情味個中相見。前歡漫按，奈撇了重思，理來尤亂。預計愁來，勸君先借酒盃限。甘心名受薄倖，恨他生未下，今後難遣。報喜燈花，傷離燭淚，都付深宵腸斷。盟言幾款，又嬉子雙飛，鸚哥偷喚。酌劑盈虧，月華剛美滿。

踏莎行 庚戌春分坐雨，和伯蓀韻。

柳眼烟迷，花心雨潤，東風無力吹寒陣。客中容易又花朝，歸期細數螺紋印。春色三分，何人能認，還從新燕雛鶯問。相思迢遞隔重城，游絲飛惹鬆雲鬢。簾影波涵，鏡光淚潤，一庭香霧團成陣。街泥留帶踏青人，春魂銷與弓鞋印。舊日樓臺，那堪重認，江城水漲無音問。隔牆紅杏著繁花，折來寄贈慵簪鬢。

琵琶仙

春曉江南，試鐙罷尙覺東風寒劇。新燕飛掠簾櫳，尋巢舊時宅。楊柳線纔黃乍綠，暗遮映酒

旗花席。月淡吹笙；峯青鼓瑟，還記疇昔。且休管明日愁來，怕眉鎖雙尖黛痕窄。猶有隔牆深院，響紅牙歌尺。誰趁此偷聲換譜，弄玉簫近染薜澤。底事離合悲歡，蕩人魂魄。

卜算子

秋色老梧桐，盼望佳人至。露下涼宵月似鉤，正是初三四。鐙已落雙花，燭又流紅淚。不是同心不斷腸，獨自憐憔悴。

湘春夜月

尙勾留，懶涼天氣蘇州。卻把十載狂名，消受是紅樓。別有會心人遠，正餞春逃夏，忽又延秋。悵短歌斫地，長征策馬，難繼前游！空亭屨步，風聲在樹，明月當頭。露濕衣滋，還似那曲邊呼酒，痕汗香流。銷魂甚處？念去來吟弔荒邱。到此際倩伊誰料理？情絲恨縷，都挂簾鉤。

遶佛閣用清真韻

暮烟淨歛，風送冷笛，何處池館？離夢長短，未眠又起涼宵綺虛幔。翠尊乍滿，花照鬢影，秋共人遠。心事微婉，記曾指點雙星傍天岸。絳蠟尙憐別，淚顆霏紅飄斷綫，猶幸畫圖春風留粉面。借綺語參禪，機鈍鋒箭，幾時還見。正故里他鄉，山遠雲亂。自焚香繡衾空展。

畫眉翠斂，啼淚粉落，涼沁秋館。蓬鬢飄短，懶看瘦蝶尋花過。問幔。會期又滿，魚雁信杳，人望天遠，愁思幽婉。去時把手春波漲村岸。路隔共明月，夜坐無眠拈綠綫。窗紙碎，鳴蕭蕭風打面。正寒草霜枯，腰帶弓箭，此情誰見。悵寄與寒衣，香散繡亂，唱刀環寸心迴展。

拜星月慢 貞壯自武昌來 爲視眷屬略談客京師時事，悵然不怡，用清真韻寫之。

載筆歸來，挑燈情話，待拂衣塵色暗。刻意傷春，欲尋秋閒院。奈殘照，掩映籬邊菊碎金縷，水曲楓翻紅爛。減送年光，祇離人驚見。洗胭脂喚出眞眞面。澆杯酒醉倒燕臺畔。恨恨重泛吳船，也風流雲散。去何方共築忘憂館。天難問，向壁空呵歎。使夜望北斗京華，月籠烟自斷。

前調 費玉如歸話游京師某園感賦用清真韻。

夢覺觚棱，秋深關塞，滿目紅消綠暗。陌上銅駝，識當年宮院。漫惆悵，賦得瓊樓玉宇寒迴，淡月疏星光爛。轉念家鄉，好湖山難見。笑臨風照日芙蓉面。春常在，四顧妝臺畔。聽到鼓操漁陽，舞霓裳驚散。步長廊碎屣吳娃館，同揮淚，夜鶴華亭歎。便自去，開道看花，壓愁腸欲斷。

步蟾宮 茶花又放紅矣，賦寄伯蓀。

滄浪亭畔吟朋少，喜春信山茶先到。花開更比去年紅，人卻記去年時好。容顏明鏡還相

照，再休問開遲開早。臨風折取最繁枝，怕飛作霜林葉掃。

壽樓春留園紀遊，用梅溪韻。

饒園林芬芳，看珠圍翠繞，鏤檻瓊牕。正是虹收殘雨，露烘微陽。春漸老，迴人腸，卻未妨相思清狂。好草綠衫同，花紅面似，詞賦媚梳妝。天涯遠，屏山長。問誰開院落，重按歌腔。幾許新愁無主，舊情堪傷。安樂國，溫柔鄉，漫笑他郎當三郎。待携手同車，迷濛路塵蘭麝香。

虞美人送質夫倩儂仁代書郵寄金陵。

東風吹綠池塘柳，色染征衫袖。不教定子唱離歌，聽得一聲汽笛奈愁何！吟朋漸少春將老，空愛江南好。鐵車飛起軟紅塵，望眼賴他遮住送行人。

前調

清明時節瀟瀟雨，誰更尋芳去？吳娘水閣酒杯空，人面桃花猶作去年紅。東風幾日吹春老，轉瞬非年少。晚看天際有晴霞，草綠長隄來往御輪車。

清平樂酬儂仁

梅酸如許，煮酒聽雷雨。天下英雄難指數，操與使君除去。溟痕空濕琵琶，浦帆雲樹天涯。

記得名姝駿馬，曾經送我還家。

西平樂慢過滄浪亭愴然有作，用夢窗韻。

吠犬門前睡貓檐下，相見尙覺依依。題壁詩存，叩關禪寂，羈魂欲逐春歸。悵敗葉旋颺四散，衰草凝霜萬點，空庭晝靜，憑誰送却寒暄。何況狂吹畫角，驚乍聽，怨恨攬如絲。遣愁行市，怡情釣水，重說因緣，都付堆移。休更問孱王遯蹟，謫宦幽居，玩賞奇花瘦石，明月清風，豪氣銷磨舊劍枝。遙念故鄉，庭梅破萼，園柳舒條，好伴良朋，共醉新醅，閒看兔走烏飛。

絳都春用西麓韻

涼風四起，又野梅透發，著意衝寒。記否舊時？追歡深院鏡屏閒。催歸又去還遲懶，待看新月弓彎，瓊環敲冷，薰爐送煖，正蕪椒蘭。此際空嗟歲晚，奈羈愁有跡，別夢無痕。倦坐到明，傷心終是怕黃昏。春光不度關山遠，怕聽啼徹紅鵑。更誰同理，清歌遍拍畫闌。

玉燭新酬伯孫用清真韻

三年離別後，悵廢史名山，兩難成就。大隄嫩柳牽絲處，早把相思輕漏。吟詩飲酒，記共發清狂時候。歸去也，腸斷天涯，風塵亂飄衫袖。春心歷劫俱灰，問散盡千金，劍光寒否？繡箋倦闕，愁

不見故里綠肥紅瘦。蟾輝吐秀，照鬢影空嗟搔首。誰更聽河滿新聲，霓裳舊奏？

鶯啼序和叔問秋感，用夢窗豐樂樓原韻。

殘陽四沈暮景，艷餘霞散綺。亂鐙火，倒影星潢，又值秋到庭際。乍玉露金風做冷，寒威漸緊。霜天霽。聽悲笳吹動嚴城，淚與聲墜。日近長安，倦眼望處，最高樓怕倚。漫惆悵叢菊爭妍，井梧猶自搖翠。萬千家砧敲碎月，正虛度宵涼如水。對銀床愁未成眠，頓忘身世。蕪鱸念切，放棹歸來，醉臥故鄉美。休更問，覓求靈藥，笑傲蓬島，蜃化龍嘘，幻形奇事，身輕病燕，飛飛不定，烏衣門巷重相認，訴營巢舊宅今無地。誰還管得，村場話是談非，豆花遍籬啼緯。傳消遲息，塞北江南，嘆斷鴻住遲。且儘去，脣銜絨睡，買笑連番，手弄泥丸，控關百二。清商變徵，新翻歌調，分明哀樂中歲感。記霓裳曾舞仙姝袂，傷心送別王孫，草沒郵亭，霧迷帝里。

浣溪紗慢南社雅集，每以事羈未赴，戲綴以詞，用美成韻，時三年三月十日。

舊習弄翰墨，佳會徵因果。俠腸爽氣，人盡如茶火。幽賞未已，側帽簪花朵。名字書連鎖。傾蓋又題襟，擅風流文飛采。正無那，悵會少離多。儘蠻箋遞去，芳訊寄來，枉自工夫破。倦旅斷魂，銷去否真個，秀老無煩呵。誰共說相思，漫空憐今吾故我。

六州歌頭

瀟瀟暮雨，翻俠客愁生。芳春老，東風猛，水波平，掩簾旌。更有誰人共，把杯酒，披書卷，燒短燭，看長劍，證心盟。何況吳娘別後，江南好歌不成聲。望紅牆銀漢，婆眼倦微餞。街鼓催更催重城。記當年事，今何夕，寒猶峭，夢難成。熏素被，香篝潤，若爲情。到天明，花落知多少，深一碧，草無名。墮歡拾，銜泥去，馬蹄輕。空說江潮有信，還惆悵野渡舟橫。滿烟絲露淞，不定是陰晴。恰聽嬌鶯。

水調歌頭十一月八日夜作

又是立冬矣！去日苦何多。茫茫四顧來日，未識更如何。聽罷湘靈鼓瑟，游遍吹簫吳市，行脚疾蹉跎。慘綠一年少，今已髮皤皤。忽狂笑，忽痛哭，忽悲歌。□將飲我美酒，使我醉顏酡。吟得湖山詩卷，投去江潮賦筆，墨自把人磨。不覺夜寒峭，月影樹婆娑。

千秋歲

民國三年十月十八日，同黃鏡人出湧金門謁錢王祠，觀蘇書表忠觀殘碑，左壁別有殘碑二方，表忠觀碑文不知何人筆，向廟祝購拓本歸，賦此記之。

湧金門外，猶有崇祠在，聯袂樞衣拜。江頭潮退後，陌上花開罷。千載下，王圖霸業留遺愛。

我意悠然會，習墨生餘馥。碑已斷，人難再。共傳文字妙，不記河山改。重感慨，錦楓髡柳秋無賴！

永遇樂

焦山瘞鶴銘，王陶顧聚訟紛紜，而實出於皮逸少，同時陸魯望魏不琢皆有和詩，元
 年冬，同小柳鼓輪登山，今復過此，率成此闕，四年四月。

氈墨琳琅，無憑徵實，王右軍處逸少同名，冬烘頭腦，竟認顏標誤。南朝刻石，不曾多見，傳信
 傳疑陶顧。又安知詩人好事，尚留唱和詩句。狂游俊侶，前年曾記，一日摩挲幾度。沙鳥烟愁，風
 林月動，目斷魂來去。人民城郭，昔非今是，別有傷心誰訴。休重問苔痕水暈，字殘紙蠹。

金縷曲 薛濤井

萬里橋邊路，問年來春風管領，又誰爲主？井水一泓波清淺，浣淨花箋色汗，却綠潤枇杷幾
 樹。鳳泊鸞飄重有恨，早魂消葉送枝迎句。今我亦，倦羈旅。校書未覺生涯苦，儘消磨清才俠氣，
 途窮日暮。兒女英雄同感慨，往矣風流節度，更休管牢愁工部。欲上江樓窮遠目，奈門前車馬飛
 塵霧。還懶把，玉鉤賦。

暗香

開江縣城南，曠姓宅，今賃爲徵收局。後庭紅梅一樹，大可合抱，高並樓欄，交錯千枝，紛披萬蕊，曠山之雪，詎能有此寒香？赤城之霞，未足比其冷豔。山齋寂寞，方感茂華，故國迢遙，乃動時興。調廣石帚，竊比巴歌，譜入風琴，不忘越調，亦足以醒羅浮之夢，招孤山之隱也乎？

萬花一色，好倚蘭共譜，瑤琴瓊笛。細數驛程，密朵繁枝，忍攀摘。催到山城暮景，春消息，偏生吟筆。便碎擊鐵網珊瑚，豪賞奪桐席。鄉國夢寂寂。正紙帳夜寒，淚蠟堆積，杜鵑病泣。相託芳心待追憶，宜面新妝試罷，眉樣月光浮空碧。問暗暗香送暖，有誰賦得。

疏影

飛瓊碎玉，想美人舞罷，高士初宿。踏破芒鞋，尋覓芳踪，敲門尚有風竹。冬心欲共春魂返，夜夢入溪橋南北。願化身蝶病蜂愁，倩鶴慰他寒獨。誰又巡檐笑看，感時念歸侶，雙鬢凋綠。不繫鈴旛，却買胭脂，準擬移栽華屋。盟香嚼蕊當年事，記得在血腥屏曲。那更堪院落黃昏，冷逼楚腰裙幅。（光緒三十四年十二月二十三夜，在蘇州和樊山紅梅花禁體七律八首，貞壯謂爲感時之作，且步元韻。又曰和粟長非和樊山。今已七年矣，復得此二闕。自視選詞設法，未能却到好處，

而把酒臨風，引吭就拍，花神有知，當亦灑淚也。四年十二月十五日粟長又識。

卜算子

寂寞臥山城，不覺年華換。牆外紅梅牆內人，一樣春風怨。凍雀不歸巢，飛踏花枝亂。欲寄相思心已灰，天共朱樓遠。

齊天樂

予隻身往來吳頭楚尾，十五年矣。名姬駿馬，俠客文人，因緣甚盛。今來開江，山城寂處，不怡中夜，爰集定庵詞句寫之，所謂借他酒杯澆我塊壘也。

韶光不怨匆匆去，(青玉案)天涯美人憔悴。(綺寮怨)青史閒看，(百字令)黃塵撲面，(青平樂)流品如儂第幾。(調笑令)昨宵夢裏，(行仙子)唱月底仙聲，(瑤華)廣陵吳市，(金縷曲)錦瑟生愁，(鶯啼序)沈思十五年中事。(醜奴兒令)空留一劍知己，(水調歌頭)奈鶯期不定，(高陽臺)都無狂醉。(湘月)萬古才華，(人月圓)百年擔負，(金縷曲)渺渺予懷孤寄。(湘月)山程倚轡，(洞仙歌)問官閣梅花，(摸魚兒)似他身世。(太常行)試語還難，(意難忘)有相思兩字。(水龍吟)宋人歌清真滿江紅，無心撲心字，融入去聲，方協律。此闋中年字，例亦如之，都無

無字亦同。

南柯子

窗影玻璃綠，杯光瑪瑙紅。那回相見忒匆匆，卻怕重逢無語對愁慵。衣換寒猶峭，爐沈篆尚濃。賣花聲到小樓中，要使人知昨夜雨和風。

戀蝶花

試換袷衣天欲暮，曲曲屏山，望裏無層數。燕子不知春已去，庭前猶自銜花絮。芳草天涯消息誤，落魄王孫，記得歸來路。無奈斜風吹細雨，馬蹄還向郵亭駐。

三臺春興，用詞隱韻。

趁高林晨映霽旭，小樓夜聽微雨。喚短橈約伴泛西泠，記會共魂銷南浦。芹泥潤燕子銜紅縷，望院落輕籠烟霧。喜隄畔先有行人，笑語逐戲旗游鼓。看雙峯濕擁態活，萬柳絲牽情去。敗塔影浮漾翠波中，幻想化孱僧奇女。(明人謂雷封如老衲，保俶似佳人)尋芳訊迤邐六橋路，認舊日枇杷門戶。罨酒旆杏花桃赧，又風起半天雲絮。任清狂經幾漏晷，醉酣易忘朝暮。弔古宮只見鷓鴣飛，賸殘照湖山佳處。笙歌沸畫閣明燈炬。要置身神闕仙府，話塵事花月春江，更誰

知正堂公務。(廿年前上海歌伎夜出侑酒，燭籠上皆標正堂公務四字，不知所謂，今則亡矣。)

前調夏夜，用詞隱韻。

正輕虹斜帶霽日，晚雷乍收殘雨。聽柳槐續斷遞蟬聲，算遙和漁歌前浦。風威陣四起炊烟縷，亂散入高林如霧。水新漲，青草池塘，逗蛸笛更暗蛙鼓。話調冰雪藕舊樂，畫舸金尊游去。送十里荷淨暗香清，夜已半催歸愁女。流螢照閃影碧波路，錯認作星臨庭戶。怕此際感受涼多，恨難把翠綃添絮。甚敲棋孤負晝永，弄琴易傷時暮。看滿簪兩鬢素馨花，問真個銷魂何處。搖紈扇笑撲屏邊炬，記誓言應覓盟府。汗和淚留得襟痕，尙輸他稚鬢知務。

前調秋感，用詞隱韻。

悵窮居虛費歲月，滿城又催風雨。悶損人物候最關情，雁孤唳哀流洲浦。飄蓬鬢乍染新霜縷，送倦目看花如霧。有誰共攜酒登山？話往日畫船簫鼓。任疏籬菊蕊露濕，敗井梧搖秋去。夜色冷天際爛明星，怕卷幔空懷牛女。佳期滯杳渺隔川路，奈怨笛聲來鄰戶。料理就暖被寒衣，暗籠火篆香盈絮。况題糕漸我興減，佩蘭恨他年暮。事遠游否秦間君？平聽猿嘯巫峯高處。追歡笑照徹華筵炬，警夢魂輕別夔府。試吟望蘆白楓丹，盡消磨世情塵務。

前調寒夜有感，用詞隱韻。

看陰雲濃蔽，釀雪冷風乍吹飄。雨凍烏喧，各自占巢棲。透寒信冰澌江浦。誰還按鳳管，歌金縷。翠袖薄，爐熏香霧。且呼醉，拚解貂裘。夜景寂，尙聞笳鼓。記荒城、匹馬倦陟，敝館羈人歸去。望
 邑里，惟見萬重山，悵短氣英雄兒女。殘陽下，蒼蒼前路，叩暗月黃昏門戶。更想念、倚罷妝樓，話
 難了，舊時泥絮。况天涯、春草又長，鬢絲歲華將暮。快咏詩、險韻鬥尖叉。柰曾探梅花深處。空傳
 恨淚，滴雙紅炬。漫笑他、蕭瑟開府。聽雞唱、嚴柝聲催。問除却、夢酣何務。(却入作平)

玲瓏四犯

紹興犬亭山之水石，宕繞門山之東湖，柯山之七星巖，皆千年前伐石遺跡，豁囁洞，穴，厥空，織路，清潭，承乳，疊嶂，成城，雖曰人工，洵爲異境。辛酉夏，陪映齋，誠齋游賞，
 周卅載重來，故鄉如客，風景不殊，感懷何似，以清真詞韻寫之。

風景依稀，是萬壑千巖，人共稱豔。峻壁淙淵，吟賞自慚塵臉。空翠暗惹衿裾，悵望裏四山雲
 亂。况歲華髮彩頻換，能有幾回相見。叩關烹茗寒泉薦，映溪流畫船輕蕩。尋幽未盡還言別，應
 洗看花眼。誰問怪石數堆，似醉後狂飛墨點，漫更誇福地。神鬼寂，烟霞散。

前調游蘭亭用白石韻。

急雨漲溪，寒雲橫嶺，尋幽休問何許。茂林迷望眼，但訝山容古，詩筇共誰鬪賦？看鵝羣亂游前浦。未解揮毫，卻思呼醉，知否我心苦。捫碑鮮花縈路，引箠風過檻，蘭氣薰戶。永和人不見，歲月空來去。殘陽照影荒亭暗，悵零落江南行旅。還日後登臨，要題裙舊侶。

西河

泛鴛鴦湖，登烟雨樓，招伎來，皆唱譚鑫培戲本。因思夢窗在吳江，聞伎歌，清真詞故事，以清真詞韻記之。

游宴地，苔花半繡碑記。清風乍拂袖羅輕，翠漪縵起。遠雲落日送歸帆，蒼茫烟樹無際。步廊遍，闌倦倚，深情短柳難繫。微渦笑勸玉東西，未銷塊壘。更誰解按古歌聲，華年空嘆流水。鈿車寶馬過鬧市，漫爭誇蘇小鄉里。任使閨人成世，看鴛鴦比翼，紅樓遙對，弄影盈盈湖光裏。（竹垞辨蘇小爲秀州人）

夜飛鵲用清真韻

宵深睡還醒，風露淒其。紅燭乍焰猶輝，中庭月照影搖樹，陰霏寒透征衣。追懷舊歡會，正敲

詩爭簡，鬪酒寒旗。豪情快意，數更殘，亦未嫌遲。迢遞故園花信，今已到清秋，休問春歸。何況悲
笳滿地，崩榛塞路，烟重塵迷；亂山萬疊，縱登臨，望眼難齊。想高樓孤枕，爐香送暖，入夢遼西。

尉遲杯用清真韻

西湖路，看碧草色映垂楊樹。車塵碎蹴隄沙，人立孤山高處。紅樓翠舫，斜日暮歌聲遏前浦。
望遙空電閃明鏡，夜深猶未歸去。應嗟宋室偏安，還似那錢家暫自生聚。往昔來今同行樂，誰
又見龍飛鳳舞。知多少詩朋酒客，儘吟玩悲歡憶舊語。且風前雨後重尋，鷺峯攜手仙侶。

六三 胡韞玉 樸庵詞

桃源憶故人 廣廡陳諸子，效玉樵領句作。

雨餘山氣輕雲暖，絲惹蜻蜓隊。風緊征帆行邁，片刻潮能待。烟沉南浦人安在？波盪斜
陽遠晦。畫出眉峯斂黛，船小如何載。

滿江紅

古樂云亡，戎狄之聲，雜然並作。請君爲我歌一曲琵琶，胡語不堪聽，愴我元音爲填斯闕。

滿目江山，看景物依稀如昨。記舊日中原馳騁，縱橫雄略。風靜旌旗文德舞，雷喧鑼鼓破奴樂。看梯山航海盡來王，魚龍躍。鐘簾棄，蘆笳促。雅頌佚，胡聲作。把衣冠文物，都歸一灼。好尙久隨時世改，笙歌久染邊腔濁。聽琵琶羌笛動梨園，淚雙落。

一翦梅 重九示小柳劍華

佳節重陽感歲華，秋老天涯，人老天涯。西風陣陣透窗紗，愁對黃花，醉對黃花。無奈登樓日又斜，天末飛鴉，樹杪棲鴉。故鄉千里路途賒，不是雲遮，便是山遮。

阮郎歸 送小柳還申江

暮雲靄靄雁南過，愁腸織似梭。布帆挂雨渺烟波，秋潮向晚多。歸未得，意無那，思家病入魔。又堪客裏唱驪歌，離情可奈何！

蝶戀花 將歸申江留別劍華

似劍歸心留不住，一徑黃花，幾點瀟瀟雨。風緊潮平江路暮，布帆遠向煙波去。客裏知君

愁裏度，夜靜燈闌，酒是消愁具。一醉千愁無覓處，韶光休被閒愁誤。

百字令 趁津浦車過徐淮，弔漢楚遺址。

黃塵猝起，指蒼蒼煙霧，夕陽沈壑。衰柳千條鴉萬點，四面秋山如幕。鶴唳長空，龍馳大地，滿目荒城郭。不堪側耳，西風催響寒柝。試看淮水翻波，英雄淘盡，霸業都蕭索。戲馬臺前芳草外，莫問當年樓閣。芒碭雲深，呂梁濤冷，嗚咽霜天角。傷今弔古，悲歌聲淚雙落！

六四 胡懷琛寄塵詞

浣溪紗 答蓴農

問我緣何不作詞，今將心事告君知；非關偷懶故裝癡。愁緒緜緜情絮絮，斜風片片雨絲絲；

原來最怕說相思。

柳梢青 天遂爲余畫扇，填此酬之。

君自優游，廉州手腕，石谷風流。一派溪山，半天風雨，筆底全收。烟嵐雲樹扁舟，點在我團

團扇頭，溽暑都消，纖塵不染，無限清幽。

洞仙歌 楚僞鷓鴣，各以寄內贈內詞示余，反其意，填此闋和之。

卿卿仙子，住瓊宮玉宇，含笑拈花曾一語。是塵緣未了，小謫人間，故教汝嘗試般般辛楚。我語卿聽取，翦斷情根，兩字鴛鴦舊譜。免世世生生，傷別傷春，夠消受恨烟釵雨。卿若不度心聽我言，且去看人家幾家團聚。

羅敷媚

分明是個傷心地；蔓草芳郊，野水橫橋，深淺春愁比暮潮。離懷困懶何消說，花也神焦，柳也魂銷，一角斜陽更沒聊。

前調 夜雨

芭蕉葉上宵來雨，已算淒清，不設淒清，添個寒蟬抵死鳴。紙窗竹簾人無睡，坐到天明，聽到天明，愁與秋潮一樣平。

採桑子

匪石有此調，題曰：「新移居跑馬廳畔，聞之居人，舊爲吳中費某藏嬌之所，詞以記之。」

余居與君爲鄰，依調填和。

天生是調風流地，昔年（去聲）香窩，今又吟窩，占領春愁孰最多？
喃喃賡和誠多事，藏艷由他，索句由他，問天鄰家管什麼？

溪沆紗夜雨

有個愁人睡不牢，芭蕉風雨夜瀟瀟，新涼如水一燈搖。
往事悲歡都過了，管他哀樂到明朝，只難消受是今宵。

六五 孫景賢 龍尾詞

摸魚兒 戊申八月十五夜泛舟尚湖，偕病鶴賦此。

望平湖雨雲遮暮，水天涼意如許。蘋風乍縹鷗邊月，偏又淡煙籠樹。君莫賦，待喚起姮娥，借
袂凌波去。淺斟勸汝，看倒影潛鱗，墮輝警羽，清怨上詩句。三橋柳，依舊漂萍泊絮，銷沈人事無
數。青衫最惜夫容淚，還怕袖痕非故。秋幾度，爭忍說水精鴛夢渾無據。綵鸞已誤。悵甚日梅邊，剪

鏡重倚，天際念歸鸞。

西子妝慢己酉七夕，重泛湖上，借葉子同賦。

磯鳥浴波，潑雲斂夕，水面香鏡謔亂。冰盤瓜果簇觥船，會佳期拜星銀漢。閒凝望眼，正容與驚鴻乍見。傍西巖，悵曼險客去彈箏人換。煙波伴，雜佩荷衣，又恐芳菲晚。舊遊清興玉臆知，嘆年光夢痕都遠。青樓翠輦，記鷓鴣叟鵝兒同看。畫橈輕，卻趁菱陂路轉。

六六 徐自華懺慧詞

蝶戀花題扇和病倩韻。

照眼花枝腰一束，慧解靈心，淺笑鬢低綠。春色撩人看未足，試將便面新詞錄。豆蔻年華顏似玉，羨煞吳剛，豔福藏金屋。月夜垂虹吟影獨，吹簫誰和吳儂曲？

意難忘秋宵憶韻清

卸却殘妝，聽梧桐疏雨，灑上紗窗。銀釵頻剔焰，寶鴨燼餘香。愁萬種，未能降，獨自倚銀牀。因

甚的秋聲浙歷，今夜偏長。惹人觸起愁腸，憶當年舊事，多少思量。晚妝憐嫵媚，花壓鬢雲傍。明月下，按霓裳，此景再難忘。更夜靜，殷勤細語，露冷風涼。

渡江雲

霜風吹漸緊，蕭蕭落葉，寒意透窗紗。吟秋人瘦也，憔悴無言，翠袖捲簾斜。憑高凝望，惟只見隔水蒹葭。更數點碧空飛雁，一片暮雲遮。堪嗟！幾分愁緒，一霎年華。憶前遊如夢，已過了三秋佳景。孤負苦花，而今試把秋光問，問明年落在誰家？秋無語，怕教海角天涯。

滿江紅感懷

歲月如流，秋又去，壯心未歇。難收拾，這般危局，風潮猛烈。把酒痛談身後事，舉杯試問當頭月。奈吳儂身世太悲涼，傷心切！亡國恨，終當洩。奴隸性，行看滅。嘆江山已是，金甌碎缺。蒿目蒼生揮熱淚，感懷時事歎心血。願吾儕煉石效嫺皇，補天闕。

前調雪夜課兒

大地茫茫，看白戰終宵未歇。簾捲處，彤雲密佈，朔風凜冽。世界三千都變玉，霜闥一色渾疑月。喚嬌兒，且讀舊楹傳，柔腸裂！熊丸課，期望切；三遷教，慚難及。歎淒涼身世，那堪重說。舊事已

隨流水去，新愁只付鶻啼血。剩寒燈百感上心頭，乾坤窄！

金縷曲送璿卿之滬，時將赴揚州。

送子春申去，好無聊做愁天氣。風風雨雨，萍梗江湖成浪跡，十事九同意忤。誰解得用心良苦。僕僕塵勞嗟不已，問今宵別後何時聚。君去也，留難住。臨歧記取叮嚀語，慎風霜客中珍重，勤傳魚素。聞說揚州烟景好，載酒虹橋秋暮。有幾許豪遊佳句。勞我蒹葭秋水感，望伊人不見知何處。空目斷，江南路。

百字令中秋夜對月，寄巢南小淑。

明蟾如鏡，只照儂一箇，愁心凝結。悵望西溪何處是？碧海青天遙隔。瘦影微吟，清輝冷透，香霧雲鬢溼。把嫦娥問，幾家孤負佳節。那堪獨上高樓，樓高人遠，隔院飛長笛。記得去年吳苑景，同倚曲闌干碧。水調聞歌，霓裳翻譜，笑指團團月。可憐今夜，映人三處離別。

如夢令題畫

數點胭脂春透，片石磷岫雲透。烟雨斷橋西，風景可能依舊？孤負孤負，臨風一枝疎瘦。

菩薩蠻題野梅畫幅

輕烟颺雪春光冷，山邨水郭橫斜影。不傍繡簾攏，清臞隱士風。人憐花似玉，花莫嫌人俗。鎮日畫圖看，和儂耐歲寒。

滿江紅

民國元年正月二十七日，爲璿卿開追悼會于越中大善寺，譜此爲迎神之曲。

巾幗英雄，屈指算君應魁首。好任俠賣珠換劍，拔釵沾酒；慷慨喜談天下事，權奇掩盡閨中秀。痛無端黨禍忽飛來，傷吾友。志未遂，刑先受；身雖喪，名垂久。又何妨流血，古軒亭口。五載淒涼風雨恨，一朝光復神州舊。慕芳徽，裙屐喜重來，君知否？

賀新涼

慧僧先生解職歸里，武林四十二會社咸爭相祖餞，余更繪西湖送別圖，倚聲寄之。

漱澗明湖水，怎無端晴漪映碧，驟含別意。報道先生歸去也，一片帆飛天際。看岸柳蕭疎愁翠，記否年時秋慘淡，正奮身革命風潮裏。殲胡虜，拚一死。神州光復差堪喜，一年來民合政治，心勞力瘁。砥柱中流肩負重，轉瞬西風又起，忽搖動蕪鱸鄉思。棋局紛爭殊未穩，莫東山高臥灰英志。應更爲蒼生計。

摸魚兒爲楚僧居士題分堤弔夢圖

甚蕭條幾株垂柳，絲絲淒碧如許。畫堂午夢頻番冷，贏得風風雨雨。憑認取，道媚絕三姝，此是吟秋處。靈蹤一去，歎月黯疎香，花殘芳雪，都付斷魂句。瓊樓杳，誰熟返生香炷。空聞涼雁私語，湖煙湖水年年綠，不見一家詞賦。君莫苦，幸未把瑤釵玉佩埋黃土。（聞前吳江縣令干佛雲爲修墓，得玉釵佩各一事。）蒼茫不楚，問何日梨花，載將春釀，來拜小仙墓。

高陽臺七夕戲填寄閨友

梧井涼生，蓮池暑，西風容易新秋。微雲淡淡，橫空眉月如鉤。一變碧淺銀河水，阻雙星，欲度無由。盼今宵，早駕靈禽，暫慰離愁。思量畢竟神仙好，年年此夕，着意綢繆。下顧塵寰，幾家密誓鍼樓。相思更有天涯遠，歎華年流水悠悠。最無聊，獨倚雲屏，悵望牽牛。

念奴嬌中秋夜感舊寄小淑

明蟾如鏡，只映儂一箇，愁心凝結。悵望西湖何處，是碧海青天遙隔。瘦影孤吟，清輝寒透，負却中秋節。把嫦娥問，世間多少離別。那堪獨上高樓，樓高人遠，隔院飛長笛。記得年時吳苑景，同倚曲欄下碧。水調開歌，霓裳翻譜，笑指團圓月。可憐今夜，雙照淚痕同濕。

菩薩蠻題美人桐階秋思圖

梧桐雨過浮新碧，無言悄倚玲瓏石。破睡背西風，眉顰更鬢鬆。寒衣猶未擣，遠望關山碧。秋意耐尋思，吟成寄與誰。

臺城路

別廣州三十年矣。重來不勝桑海之感。會蔡君哲夫以所獲城磚見示，皆南漢以來古物。其一有成城二字，尤與君別號相印，因填此解奉貽。

顏垣衰草羊城路，重尋舊游何處？鎮海樓荒，昌華苑冷，勝跡憑誰認取。中郎嗜古，將斷甃携來，苔斑拂去，漢篆摩挲，小名巧合更珍護。陶齋無此雅趣，搗雲藍素紙，偏徵題句。爨下裁桐，柯亭削竹，一樣知音相顧。好修硯譜，便銅雀端溪而今休數。水榭簾垂，粉奩添畫具。（淑配傾城夫人，工畫居寒瓊水榭。）

鬢雲鬆

今春，余君十眉，曾約佩子與余探梅鄧尉，並夢余填詞得紅冰句，馳書見告。旋因他事，未果往，頃索題鴛湖雙槳圖，爲賦此解，卽用其語於末，以誌夢靈也。

鬢拖鴉，釵墮鳳，薄薄羅衣，可耐涼風送。雙漿經划休太重，湖有鴛鴦，恐破鴛鴦夢。黯銷魂，餘舊痛，影事前游，繪入清圖供。隔岸芙蓉曾與共，頃刻花開，淚結紅冰凍。

前調孤山探梅，寫寄十眉亭利。

嫩晴初，新雨後，料峭微風，吹起湖波縹。鄧尉探梅儂已負，放棹孤山，差喜春還有。影橫斜，香暗逗，剩兩三株，冷豔猶依舊。鶴語詩人知也否，有約遲來，惱得瞿仙瘦。

前調寄佩忍

燕呢喃，鶯慙憊，嫵媚韶光，已洩青青柳。聞說江南春似繡，萬翠千紅，做出清明候。好尋芳，宜載酒，畫舫秦淮，舊約休辜負。桃葉桃根今在否，寄語東風，莫使花枝瘦。

六七 徐蘊華小淑詞

金縷曲題懺慧詞

漱玉清音歇，歎蕭條女兒溪畔，猶留詞筆。慧業懺除焚稿矣，黃鶯歌成淒絕。更又是掌珠墜。

失，身世茫茫多感慨，抱愁懷天地爲之窄。誰解得，詞人鬱。殘山剩水悲家國，最傷心秋風秋雨，西冷埋骨。風雪山陰頻放櫂，今日只留殘碣。嘆一載空噴熱血，造物忌才艱際遇，膽裁雲縫月金荃集。恐譜入哀絃裂。

惜紅衣

往歲旅居吳淞，數繫艇石公長崎間，汪灣荷花數十頃，夏景幽寒，終日但聞泉響。每值夕峯收雨，湖氣彌清，臨去愴然欲索李隱玉表姊寫意，王碧棲詞丈題冊而未竟。病窗經歲，轉眼薰來，曉起舒襟，偶填此闕以寄意。

盆石堆冰；屏紗障日，曉來無力，強起推窗，含情鏡花碧。藥薰細裊，引軟燕簾前噴客。湛寂一枕藤陰，約溪人將息。蓮汀柳陌，來去鳴篴，舊遊半陳跡。經年興致，銷夏灣西北。載得米家書畫，烟水刺船尋歷。祇半峯殘雨，猶待碧山詞筆。

齊天樂

庚戌夏秋，道暑剗莊，晚值平湖雨過，紅香狼藉，盪槳荷叢，歸橈寫此，戲足玉溪之意。蓮颺不約斜暉住，宜招北窗詩侶。柳際波微，堤根葉細，纔看雙鳧眠處。平湖過雨，愛攜笛瓜

皮，倚流容與。瑟瑟紅衣，誰家樓上玉溪句？
 亭臯搖落又暮，涼波三十六，留聽淒舞。千點濛香，三
 更敗翠，惹得驚蟾窺顧。江妃漫妬，恁彈指西風，暗中年度。只憶深宮，有人曾怯暑。

百字令庚戌冬日游虎邱

看山舊客，正冬荒冷落，羣花都息。眼澀斜陽搖水外，塔杪登臨奇絕。小侶停詩，奚奴載甕，一
 笑閒游歷。層層林磴，幽尋穿盡寒葉。歸愛轉櫂煙流，疎牕冷語，悄隱溪聲寂。掠鬢野風，渾不醒，
 苦被垂楊承睫。折葦撻青，浮鳧弄綠，吹待千村月。一船休去，蒼州無限漁笛。

思佳客

南社頻索初稿，病榻經春，束牋未報，近見卷中捎載數年前西溪斷句，明日黃花，奚
 足供詩人一粲哉！因書此謝之。

蓮社詩人愛掛錢，中收樗櫟付吟邊。別來思舊難成眠，倦去停雲莫繫年。秋易老，鬢空妍，
 少年心事病來禪。強居唯覺溪山好，乞與鷗鳧次第眠。

意難忘薄暮，視鑑湖舊舍歸，沿河往浦灘，軒窗寫感，有寄慧僧。

遮眼高軒，正冷楓搖落，雁思初繁。驚秋無限意，撫鬢已微髡。遶北轅，折南轅，泣是未歸僧，苦

眼中紛馳長路，馬殆車煩。傷情幕外霜痕，有涼燈吐暝，市吹流喧，林陰分域界，鈴語破朝昏。思往事，略溫存。睽日定難言，漸付憑誰家管領，水陌花墩。

點絳脣題自繪越牡丹雙帶烏帳額，爲洵芙四姊作。

雲染鮫綃，金臺細葉開秋壁。越香千疊，一笑南薰力。繡幕藏姿，不賽沈香客。今難覓，夢回煙歇，狂寫雙禽息。

前調題自繪雙燕白蓮花帳額。

舊是凌波，丰姿欲共江妃賽。新來愁寄，煙態誰能繪。翠羽參差，猶作深憐意。尋無寐，野風門外，涼月應初墮。

新雁過粧樓仲可叔父命題純飛館填詞圖卷。

翠宇高寒，銀箏澀，猜疑夜夜停鸞。舊勝入破，誰念刻骨家山。髻髻仙蹤，追罨畫，低徊密記補金鑾。賸無端，瑣窗玉戶，江雨霏闌。聲情裝池半幅，有古春送眼，淺繡成斑。鄭箋無分，驚歎顧曲才難。匆匆一庭謝絮，沾題處，淩滄應笑孱。方回老，只斷腸愁句，流出人間。

聲聲慢

歲莫哀感，忽得陳柳諸賢先後手束，或約西磧之探尋，或徵勝溪之題咏；緬想世外遊儕，獨能以無懷爲樂也。因譜此曲，奉題分湖舊隱圖後。

鷗夷泛舸，鶴市吹簫，羈心早晚秋潮。且向臨邛，琴臺酷肆堪消。休標向年高意，對疎香芳雪凝銷。傷神事，况松森永久，野曠蕭條。一角西山可住，甚賦矜孫綽，資薄郗超。藏海藏山，人間無地歸燒。獨臨畫圖深悵，顧淮南小隱，能招殢情地，想帆過別墅正遙。

壺中天集南先生既刊笠澤詞徵，客有爲畫徵獻論詞圖卷，因題其後。

雲巢垂看，記當年淺鬥，茶傾籤滿。一枕茶蘼沈睡後，賸補吳儂橫卷。流納交光，浮眉高映，綽約冰花散。瓊環夢裏，也應低拜沾選。深念秋漠聆笳，炎廳障扇，辛苦商量徧。舊卷千行重疊，是新卷疎疎誰按？一髮青山，雙聲越縵，只付霜縑展。澹仙情淚，怎堪重被紗浣。

醜奴兒令楚僮居十囑題分隄弔夢圖

凝情最是堤前柳，煙也模糊，水也模糊，欲訪靈蹤意已孤。詞人怎識鴛鴦夢，吟也生疎，畫也生疎，一片蒼涼話舊墟。

花犯賦櫻花，步調和春香社諸君子。

隔蓬萊飄雲一片，胭脂洗芳霧。虎髓微動，恁闌取鉛華，鼓點催暮。北州血濺移根苦，淒情鴻鵠訴。奈轉首東隣一笑，窺人終肯顧。仙娥豈屑作穠粧，篋篋咽翠帷，依稀回護。遭碧水潛勾引，嫵春應妒。休羞看並肩綽約，只會向層臺承玉露。怎料得蓮前梅後，南天花作絮。

六八 徐珂仲可詞

花犯 春音詞社第一集賦櫻花

撫危闌，看花倦眼，斜陽遲（去）殘醉。玉窗何地，拚寸許芳心，輕負姝麗。海天恨遠孤根倚，瓊陰扶困起。便與說，佳期蓬島，啼鴉春萬里。嫣然弄姿帶東風，鄰牆畔，總是鬢妝紅紫。仙路迴，傾城色，黯銷英氣。餘寒外，翠苔更點，鶯燕妬，枝頭空繡綺。漫記省，舊家眉嫵，前塵尋夢裏。

祭天神

題李雲谷殘硯搨本。硯爲馬夷初藏，昨拓以見貽，譜此題之，題上有陳白沙銘，屈翁山所書。

倚小樓江上聽疎雨，幾塵沙，片石韓陵差可語。淵襟自接嶠南，莫道儒冠誤。問而今，剩水殘山誰是主？且守闕文章府。試回首，斜日湖濱路。人間世，桑滄淚，鵠眼無今古。更何堪，關河搖落，邱壑因循，老我天涯，硯北悲秋苦。

浣溪沙 松江重九

客裏佳辰菊已殘，晚來哀角起重關，故園消息白雲端。一蝶窺簾秋影瘦，萬鴉沈郭夕陽寒，倚樓山色有無間。

新雁過妝樓

春音詞社第十集，席次聞歌，歌者爲素娥樓春宵樓二校書，夢坡所招以侑酒者也。倦旅江關，魂銷處，襟痕燭淚頻年。賞音誰是？悽斷掩抑絃絃。壓檻行雲籠舞袖，隔窗淡月照低鬟。鬥嬋娟，素娥影怯，春盡宵闌。驚心絲繁革咽，（唐李咸用詩：「革咽絲繁歡不改。」）便倚嬌誤，拍一夢鈞天。薄暈伴笑，哀樂蕩又無端。殷勤渭城唱徹，問何日旗亭尋墜權？（時邵次公將赴京兆）惺忪語，比聽歌還勝，身世相憐。（宋周美成詞：「惺忪言語勝聞歌。」）

百字令 春音詞社第十一集，爲夢坡題湯貞愍香雪草堂圖。

笛聲吹怨，只冷香（貞愍僑居白下之琴隱園，爲王菊莊冷香山館故址）舊月宵深涼照。罷釣秋江（貞愍有秋江罷釣圖）容小隱，清福幾生修到。絳雪晴融（宋范成大梅花詩）一夜風光融絳雪。碧烟暝合，勝地疑蓬島。亂花歧路，翠禽應也啼老。金屋好與安排，惜惜琴趣，窗下凝妝曉。（貞愍夫人董雙湖，名琬，貞，工畫梅，善鼓琴，有梅窗琴趣圖。貞愍爲題七娘子詞於上。貞愍有子壽民，女紫春，亦皆以畫梅著。紫春並工琴。）大地風塵偏涸洞，且索巡檐雙笑。對此蒼茫，爲誰開落鶴夢醒（平）宜早。六朝春色，至今惟有衰草。

探芳信題夢坡靈峯憶梅圖

水雲隔，鎮別夢縈迴，西湖寒碧。想一枝瀟灑，還餘舊顏色。總然風雪相欺慣，誰耐滄桑歷。誤清游，恨遠傷高，夜闌吹笛。江城苦寥寂，記勝賞當年，幽棲今夕。橫幅披時，聊伴臥游客。盟尋香火春無恙，雁外迷消息。費沈吟，獨對空樽易泣。

秋霽丁巳中秋春音詞社十三集賦

千里嬋娟，念倦旅江城，寄與秋色。倚樹孤吟，掩燈遙想，者回臂寒鬢濕。（時內子何墨君方居兒子星六京中故乃之）冷光似滴，桂陰滿地憑誰惜。甫獨立無語，幾番簾戶照陳迹。知否

永夜，免老蟾頭，夢回瑤臺，靈藥狼藉。便消息繁絃急管，山河愁影碎南北。傾後露盤渾未拭。計自今始，圓缺一任天心，靜觀桑海，但須浮白。

祝英臺 題潘蘭史山塘聽雨圖

舊河山，新歲月，客裏又春暮。酒半瀟瀟，吳篷載愁去。總然垂老多情，聽時費淚，問今後燕鶯誰主？
悄吟竚，聲聲渾似商音，宵深引秋緒。獨背寒燈，還迷夢中路。定知明日紅樓，捲簾人起，更闌外落花如雨。

滿庭芳

春音詞社十五集，爲夢坡題句容駱佩香女士綺蘭小墨百花長卷。佩爲龔世治室，袁子才女弟子。博通經籍，工詩，著有聽秋軒詩集。清乾隆甲戌八月，至江寧謁子才，遇王夢樓于隨園，夢樓屬繪百花長卷，以行篋未携畫具，澱墨寫此，並自題一絕句於上。

近代聲名，(王安石酬揚樂道詩)近代聲名出盧駱。清時文物，楚騷心託蘭茝。真姿凝澹，(四字見吳夢窗詞)應有墨花香。(佩香自題詩)有「墨花零亂也生香」句。想見秋燈課罷，(佩

香無子，課螟蛉女以自遺。有秋證課女圖，曾賓谷爲題一絕云：「燈雙影瘦伶俜，窗外秋聲不可聽。兒命苦於慈母處，當年有父爲傳經。」拈湘管煞費評量。佩香自題詩有「湘管拈來意自長」句。蘼蕪夢房櫳夜悄，（佩香早孀）脂粉謝新妝。（佩香自題詩有「何須脂粉助新妝」句）孤芳，誰爲（去）賞？鉛華洗淨，還駐容光。只眼前春色，偏易斜陽。一任紅驚綠怨，蜂蝶鬧，本相休忘。停琴待，（夢坡出眎此卷時，方罷琴。）塵箋拂拭，年事幾滄桑。

六么令 題疏香閣主葉小鸞畫象

晚陰簾戶，櫻雨近寒食。（小鸞寒食自題）眉子硯詩有「開匳一硯櫻桃雨」句。春風百年枯蘖，苔徑成今昔。（小鸞酷愛石徑春風長綠苔）句，書書於木。笙月緜山一曲，（小鸞母沈宛君嘗於小鸞歿後，問吳中泐庵大師，師云：「小鸞爲月府侍書女，名寒簧。今在緜山仙府。」）縹緲仙凡隔。梅花標格，雲雲零落，眉硯還留舊香澤。匆匆蕉窗煮夢，（小鸞自號煮夢子，所著返生香集有蕉窗夜記）縑素煩追憶。（小鸞生前未寫真，所遺小象，皆歿後追繪）同是遊戲人間，無那滄桑歷。（子次女新華，聰慧能文，頗似小鸞。民國三年四月以猩紅熱卒於滬，不若小鸞之殉於明崇禎壬申，未遘國變也。）惆悵瓊枝露墮，芳樹猶凝碧。（小鸞謁金門詞有「芳樹重重凝碧」

句) 妝樓陳迹，汾湖照影，憑此清流證六色。

定風波 題陳佩忍綠玉青瑤館圖

倪雲林隱於吳江之黃澤湖，卽今同里之倪家匯。有句云：「依微同里接松陵，綠玉青瑤繚復縈。」佩忍故居，卽其遺址。母夫人卽孝太君，且爲雲林後裔。以之名館，殆亦不忘慈氏云爾。

留春。 輓玉英波綠到門，五湖猶是未歸人。(時佩忍客粵) 水剩山殘應感舊，回首，北堂萱草可
雨色晴光成一碧，誰識，故家喬木有松筠。誰待垂虹秋氣爽，吟賞，共君把酒試鱸莼。

六九 徐夢半夢詞

更漏子

滯鴛鴦，紅鸚鵡，粉妥冰綃微露。紗幕月，玉鐙風，楚雲銷幾重。 相思細，人千里，數遍畫闌十
二。歡昨夜，夢今宵，春情夏翠翹。

南樓令

金粉卷瀟湘，春情度一雙。惜飛花誰解愁腸？
賸有湖羅三十六，拚付與，繡鴛鴦。何處是橫塘？
蘼蕪沁夢香，曲闌干紅煞斜陽。認取晶屏蝴蝶影，
魂銷盡，儘思量。

浣溪紗之西子湖頭

別恨匆匆已十秋，渡江雲蕊也含愁，水絲牽夢過杭州。
桃葉柳枝雙繫艇，玉簫金管一登樓，露潮涼處理漁鉤。

蝶戀花過蘇小墓

一縷春魂春約住，恨草啼花，淚點無從數。春也飄零吟也苦，
幽香寂寞西泠路。白板紅橋，淒絕處，不盡傷心勾起傷心句。
夢斷雍烟聞杜宇，蕪亭影咽瓊笙雨。

桂殿秋過阮墩

春一片，水仙洲，夕陽無語翠生愁。天風吹墮湘螺影，
閣住湖波不許流。

高陽臺過曲院風荷故址

恨壁歌樓，愁堤咽水，萋萋衰草斜陽。記否游蹤，
重來前度劉郎。憑欄欲數清溪夢，問紅衣何

虞凝粧怕東風，從此吹殘，娟佩嫋裳。河山粉劫空回首，算鵲絲織怨，蝶帕啼香。悄佛魂飛，殘泥碎向空王。不堪再畫銷魂影，畫江南鐵血淒涼。任飄零，一掬離雲，一寸廻腸。

七〇 浦軍年醒華詞

金縷曲 二次北上，留別里中諸友。

轉瞬秋雲散，聽旗亭驪歌重起，此心已亂。痛飲翻嫌分手早，別緒今番又換；縱不怕風波浩漫。仗劍出門回首望，也難挨寸寸離腸斷。千里外，詩魂遠。吟箋別後頻翻玩，料諸君茗餘酒歇，應思舊伴。蕭瑟長途誰送我？秋風秋雨各半。眠不穩通宵打算。莫道家山歸未得，請夢魂飛向吟窗畔。名和字，試輕喚。

前調有憶

往事休重說，恨無端雁聲嘹唳，牽衣又別。夢斷吳宮歌舞夜，瘦影殘燈明滅，乍驚省蟾圓易缺。細檢舊箋空惆悵，剔孤檠心痛如刀切。紅袖灑，相思血。自憐落拓謀生拙，悔當初腸柔似水，情深似結。煩惱終難解脫盡，頃刻死灰又熱。縱拋却眼前花月。推住愁腸尋快樂，奈更殘和漏聲。

聲咽。翻自笑，情癡絕。

點絳脣 庚戌暮秋寄亞常

無那傷懷，花黃秋老人多病。詩肩瘦盡，雨花重陽近。君亦工愁，同向黃花問。征魂冷，天空林淨，盼斷孤鴻影。

意難忘 暑夜

天錦初裁，是五雲機上，仙子描來。青娥偷藥怨，玉杵搗霜才。花薄命，月成胎，簫管正瓊臺。知甚處，簾櫳風啓，環珮魂回。倚闌人與豪哉！有楊枝艷曲，荷葉新杯。蟾光浴寶霧，蜨影剔殘灰。新舊恨，夢爲媒，往事未須哀。聽十里藕花塘外，聲走輕雷。

七一 馬駿聲小進詞

憶王孫 連天大雨，不出戶庭，無聊作此，寫寄客星。

碧天如夜雨淋鈴，玉宇瓊樓酒未醒。風滿簾櫳花滿庭，柳青青，鸚鵡前頭學念經。

七二 高燮吹萬詞

齊天樂 題哀蟬滄桑紅淚詞後

美人脈脈臨風倚，闌干夕陽如訴。葉病成紅，花啼有淚，總是者般淒楚。誰教延佇，但蹙損雙蛾，蘊愁難吐。濕透羅巾，抱琴背立甚情緒。傷心料他無數，道滄桑影事，儂能記取。故國殘灰，蕪城宿草，舊夢重重爾許。知音未遇，便彈向空山，寂無人處。死盡南風，一聲聲更苦。

滿江紅

題汪氏味蘭齋梁大同瓦，瓦文爲「能仁寺比丘正驚，仿銅雀賸瓦五萬片，捨入法忍寺願先妣董氏十九娘超生佛界。大同元年四月，陸墓甘郎造。」四十三字。

兒女痴情，頓觸我古愁歷歷。誰信得，生天成佛，輪迴消息。此日摩挲銅雀樣，當時多少寒鴉集。看南朝天子捨生來，江山易。風雨夜，梵音寂。興亡夢，簷溜滴。撫滄桑遺物，徒增蕭瑟。羅廟埃

集。看南朝天子捨生來，江山易。風雨夜，梵音寂。興亡夢，簷溜滴。撫滄桑遺物，徒增蕭瑟。羅廟埃

賣花聲夜讀磨劍室詞集定庵句題之

吟淡口脂痕，淚也縱橫。亦狂亦俠亦溫文。一卷臨風開不得，人瘦三分。夢醒轉沉吟，細剔
 龕燈，詞家從不覺知音。辛苦癡懷何用訴，似我秋心。

虞美人淚

枕邊愁聽鶯啼急，莫遣高枝溼。古箋寫上一絲絲，多恐化成紅豆爲相思。月明滄海珠光
 冷，獨對琳琅影。些兒掬取便成河，應是情天此物未嫌多。

蝶戀花花朝日作

捲起湘簾搔首竚，寂寞閒庭，空見斜陽去。萬種愁思無着處，纏綿欲向花魂語。牆外杜鵑
 啼不住，啼得聲乾，似訴花無主。昨夜東風風又雨，梅花吹落知無數。

菩薩蠻題燕子箋傳奇

多情燕子真癡絕，憑他做就鴛鴦結。決策淨胡塵，相看面目真。丹青曾巧逗，雙搗巫山岫。
 一樣艷如花，桃紅一點差。

湘月丁未三月，泛舟西湖，遙步龔定庵韻。

夕陽如畫，媚六橋柳色，風流娟麗。柳外笙歌橋外舫，萬頃波光無際。花落愁多，春寒夢帶，不展東風意。鷓鴣聲勸，未容料理歸計。好是隄繞圍青，潭空凝碧，人影嬌扶起。祠宇園林瀏覽遍，更向禪林暫寄。山笋清甘，湖葦滑膩，迥異家鄉味。者番咀嚼，便思老我雲水。

一剪梅 初至吳門卽事

濕雲漠漠雨初收，纔別杭州，又到蘇州。金閶門外此勾留，花似顏羞，月比眉修。山塘七里要窮遊，春亦溫柔，人亦溫柔。今宵特地與妻謀，準備蘭舟，去盪清流。

醜奴兒 令遊留園

滄桑變換尋常事，昔日劉園，今日留園，多少門前車馬喧。衣香鬢影匆匆見，人自銷魂，我自驚魂，水閣臺廊總夢痕。

浪淘沙 令別蘇州在汽車中作，是日爲三月十九日。

大好艷陽天，春在誰邊？閒花野草不勝妍。驀地嗚嗚聲裏聽，何處啼鶯。令我思綿綿，舊恨重牽。回頭山色總堪憐。腸斷甲申亡國淚，都化愁烟。

憶江南 題李後主詞

情無奈，回首事如塵。秋月春花同夢過，晚風朝雨更愁侵，此境怎能禁。沉吟久，淚下太無因。萬種淒涼含思怨，一般滋味動人深，亡國有哀音。

疎影殘梅

零香猶馥，正闌珊別意，還住芳躅。幽夢淒清，寒雨黃昏，肯被東風吹逐。孤心却恨春無賴，豈願遊蜂往復。故寧甘憔悴姿容，拚耐橫空寒玉。他竟無人愛惜，萬葩齊取媚，韶華紛觸。獨有斜陽，如怨如癡，照向籬邊巷曲。杜鵑原是消魂鳥，惟冷對餘花痛哭。剩南枝月苦烟荒，彷彿傲霜秋菊。

纏綿道自題拜鵲室詞

賸錦零絲，花樣請君休笑；飾時妝原非了了。南窗自繡傷心稿，明月深宵，奇淚盈懷抱。步庭前樹底，將身拜倒，冷清清殘魂繚繞。嘖嬌喉苦向啼鵲，說身世淒涼，與爾真同調。

金縷曲

題秋棠圖，爲周無盡作，無盡又有棠隱女士小傳，敘恨淒楚，蓋傷心人也。爲填此闕。此事真無奈，沒來由動人愁影，亭亭增態。兩種秋思渾似夢，夢裏纏綿何似，忽斷送淒涼身。

世。一縷殘魂仙去也，恐夜深應化啼鵲淚。長已矣，竟誰使。斷腸莫把相思寄，到如今深藏金屋，花枝委地。縱有畫工神妙術，寫得渠儂品意，這別樣傷心難繪。天付多情吾已悔，願與君同證枯禪味。否則向，花間死。

海棠春再題秋棠圖卽爲棠隱述意。

含情脈脈常凝涕，銀燭畔，殘妝慵理。憔悴可憐儂，揮手休提起。牆陰一帶傷心地，花落去，墜歡難記。秋雨又秋風，諳盡愁滋味。

徵招題王船山鼓棹詞。

孤燈冷對婆婆影，畢竟愁腸難斷。舉目盡滄桑，可有人心思漢。故枝空自戀，祇寫出鷓鴣聲怨。地老天荒，但南無北，海枯石爛。苦憶好春歸，烟花散，一寸情懷繚亂。佇立盼佳期，比天涯還遠。殘紅看不見，想消受淚珠無算。這今我亦最傷心，怕臨風重按。

暗香落梅

空勞悵望，向水邊籬落，閒尋閒訪。偏是春風，桃李枝枝各爭放。今日與君言別，眼看這波翻雪浪。但撩來花片零星，一例深深葬。海樣情無量，更取烹茶，滌將肺臟，癡懷誰諒。細嚼殘英空

半晌我自替伊悽愴。非欲避百花頭上，不忍見奈何天，繁華萬狀。

新雁過妝樓題鈍劍聽秋圖

大好江山，斜陽外，鳴蛩如訴寒烟。雁來時候，猶賸幾樹零蟬。遙想有人，頻側耳，無言悄立晚涼天。暮淒然，誰將此景，移汝鏡前。我亦悲秋能賦，把年年舊稿，寫上蠻箋。讀向臨風，此中多少纏綿。化作商聲萬疊，應飛繞高梧疏柳邊。君聽取，怕蕭蕭瑟瑟，瘦了吟肩。

百字令題鈍劍花前說劍圖

蒼涼狂憶，記年時壯志，幾番閔論。殺賊降魔真易事，材略縱橫動聽。奇致飛霜，芳容妬月，懷抱交相并。風塵倦矣，寒光猶自難近。那信萬里歸來，悲歌抑塞，豪氣垂垂盡。絕好龍泉誰拂拭，匣裏鳴聲如恨。憑我溫柔，銷他慧俠，兩兩心同肯。名花饒舌，一朝快劍鋒鈍。（君前有石章曰：「江南快劍，」今改名鈍劍矣。）

臨江仙題姚石子伉儷浮梅檻檢詩圖

略費商量相繾綣，頻挑纖指輕輕。嫩塗學句太癡生。湖波看動盪，贏得墨敬傾。小疊吟箋携手坐，青山紅袖多情。高歌低唱兩分明。移舟楊柳下，雙槳復雙聲。

憶舊遊題周實丹烈士遺集

記年時握手，送抱推襟，情緒纏綿。各茹滄桑淚，但相看不語，灑向誰邊。秋風黃葉滿地，痛哭孝陵前。更醉裏題詩，酒酣耳熱，共擊吟箋。悽然慘難別，索夢醒燈殘，分散如烟。報道天聲動，待長驅北指，掃蕩腥羶。烽火兵戈騷屑，消息久停傳。忽霹靂飛來，頭顱亂世空棄捐。（傷心亂世頭顱賤，黃祖能梟禰正平。一烈士成仁前詩也。）

正匈奴未滅，戰死沙場，死亦安便。擊楫渡江去，見胡氛猶惡，猛著先鞭。那知義旗甫舉，罹禍劇堪憐。歎國法難伸，奇冤雖雪，應憾重泉！愁煎怕追念，把舊影前塵，反覆詩篇，讀到傷懷處，似聲聲彈出，急管哀絃。况復平生隱恨，未了海棠緣。料碧血長埋，千年定化啼杜鵑。

少年游爲春航題名小青墓作，用盧尊韻。

一杯酌爾各愴（平）神，風雨斷人魂。芳姓同留，舞衣錯認，非假亦非真。登場描出傷心稿，曾現女兒身。碎恨零愁，哀絲豪竹，一樣可憐人。

一痕沙題武林同遊照片

依舊能狂未死，惟我與爾有是。回首六年餘，景全殊。打疊吟魂一串，飛向段家橋畔。如此

好湖山，莫思遠。

浣溪紗

題西冷雅集照片

十載聞聲慰渴思，衫痕帽影各參差，紅闌干外日遲遲。

碧草鋪階長似帶，垂楊倚檻綠成

絲，沈沈庭院我來時。

減蘭題三潭泛舟照片

整襟危坐，一葉扁舟人七箇。何處停篙，卽字亭間九曲橋。

相携吟侶，印到三潭情幾許。打

槳烟波，湖水湖風莫管他。

羅敷媚題清波弄影照片

屯田妙致元龍氣，兩樣風姿，一樣情癡，各動榛苓彼美思。

文章歌舞俱超絕。艾艾期期，撲

朔迷離，對影清波逐隊嬉。

七三

高旭 天梅詞

蝶戀花和安如暮春有寄

如許佳期偏又誤，梗斷萍飄，江北江南路。織就鴛鴦賅寄與，斷腸訴盡相思語。

袖底芬芳

須領取，來不多時，便是匆匆去。隔著紅牆天欲暮，爭禁牽得癡魂住。

吐出傷心

密約今生堪幾誤，驢會難期，儂實真悽苦！綠葉成陰安可語，一春花事風還雨。

千萬句，青鳥無憑消息誰傳去，曲曲夢中尋覓處，迷離山色迷離樹。

虞美人

同里汪氏味蘭齋，藏有梁大同瓦，爲題詞以張之。瓦上文爲「能仁寺比丘正驚，仿銅雀剝瓦五萬片，捨入法忍寺，願先妣童氏十九娘超生佛界。」大同元年四月陸慕甘郎造。共四十三字。

沈吟陸慕甘郎

果能識得西來意，成佛生天矣。入家心性出家身，證到大乘境界最多情。

造，刻畫誠稀少。應知作者古名家，硬筆盤空，募兀復安排。

北人碑板喧流

遺徽銅雀猶存樣，把玩臨風悵。一千三百有餘年，卽此零星片瓦已堪傳。

俗，拓跡眞寥廓。問來掘鼠嘆無聊，祇向蒼榛蕪處問南朝。

桃源憶故人和太一均卽寄

人生最易容顏老，問殘局何時了？拚歲月輕心掉，差喜非年少。傷心滿眼閒花草，獨醒楚人皆倒，獨餓侏儒皆飽，畢竟伊誰好？

鷓鴣天用鈍根均卽寄

簾影沈沈芳信遲，啼鶯訴與落紅知。柳條堪折休輕折，折寄天涯好共持。傷往事，託清辭，繁華轉眼賸空枝。思量撒手同歸日，便是人天夢覺時。

賣花聲

聘夫與其夫人張傾城合繪梅萼海棠圖，見貽。填此爲謝。

一幅豔容光，活色生香，麝脂隊裏鐵心腸。我自愛花花不語，誰與商量？厚貺故心將，此意難忘。寄儂絹素壁間張。一種閒愁消不得，來對紅妝。

貂裘換酒仙甫感某君營救事，填一闕寄示，囑和依韻當之。

搔首西風歎，最驚心，故人牢獄，沈沈更箭。苦道人情如紙薄，交誼而今遷換；况轉眼風流雲散。細數數心期誰與說，又被人量去家山半。個中味，嘗來慣。迷茫大地何年旦？忽妖魔橫飛蝕月，蔽他眞面。一別嫦娥三年久，悄倚樓頭未見，便深閉休教哀怨。解得左驂能購汝，料終償平仲憐。

才願消滅盡，人天恨。

減字木蘭花錄別

是何年紀，前生夙世休提起！兩字消魂，繡出鴛鴦有淚痕。拋殘紅豆，腰支拚爲伊消瘦。吹

氣如蘭，臨去叮嚀別更難。

妙相逢處，可能留得香魂住。住亦無多，啼鴉聲聲喚奈何？人生何苦，情痴爭被紅牆阻。憐

爾憐儂，此願茫茫似夢中。

滿江紅 吳君小枚移書告其妹吳其德女士自殉事倚此吊之。

我與而兄，彈指忽二年離別。警驚見秋桐一葉，飛來悽絕。慘澹紅淚膿血史，淒涼黑獄滄桑月。問可權太不識人權，容饒舌。（女士未婚夫爲饒可權）芙蓉瘴，香波咽。（女士以雅片墮命）申江岸，芳塵歇。（女士留學上海）痛杜鵑啼恨，恨何能雪？秋女善悲天已醉，春暉未報花先折。（女士絕命詞有「花殘不足惜，何以謝春暉」之句）喚紅兒譜入玉參差，聲聲血。

如夢令 用天一均卽答

滿眼湖山非舊，悄聽猿啼清晝。把臂訴相思，一掬心馨薰透。消受消受，勞汝旗亭相候。

金縷曲 南社諸子會于吳門，楚僧自汕頭填一解馳至，因亦繼聲。

說與君知道，料今夜千人石上，夢魂飛到。擊筑彈箏豪士態，惹我臨風傾倒。祝陳夏風流長好。恨未狂歌驚滿座，聽斷鴻聲裏哀蟬噪。愁黯黯，蒼天老。桐梧葉落悲秋早，奈麋鹿蘇台如畫，荒涼難掃。扶目胥門傷往事，一片降旛影杳。祇古塚龍泉時叫。畢竟文章成底用？况湖山久已非朱趙。餘霸氣，消沉了！

南歌子 仙甫集所作願歌，及至日懷人之什，爲南幽百絕索題。

幽徑尋芳草，空山吊夕陽。江皋木落正嚴霜，彈到南音，嗚咽斷人腸。信美非吾土，消愁賸醉鄉，吟魂飛去落瀟湘。戲拍君肩，一笑盡千觴。（連夜夢與君驢飲。）

百字令

巢南見示永曆錢索題，且云：「僕盡精力于帝至矣，此殆天陰報有以報我耶！」其言良信，倚此寄之。

此錢堪愛，擬持澆杯酒，歡飲同弔。三百餘年無恙否？字跡斑斑深窈。何物迂儒瞿張殉後，努力如公少。老天有眼，殷勤貽以相報。回想慘澹南雲，烹龍炮鳳，哀史憑誰告？不信金甌都破壞，

剩這團團完好。德祐春枕，義熙甲子，並是人間寶。傷心帝子，精魂那日歸了！

蝶戀花 和太一韻

花正開時人已散，十斛蛟珠，便爾拋殘半。一任江南風景換，滄桑滋味儂償慣。蝶醉蜂狂

愁思亂，無賴楊花，漠漠煙籠岸。醉去東皇腸欲斷，寒簾細把春光看。

百字令 寄亞盧滬江。

江山無主，剩酒徒幾輩，天涯萍聚。一種芳菲忘不得，悔被西風耽誤。癡夢尋仇，騷魂覓食，遇合都蘭絮。斜陽滿眼，離懷綿渺如許。可奈兩地相思，迢遞浦，難訴傷心語。彈罷瑤琴同此恨，鳳泊鸞飄何處？亂世多愁，故園小病，盼斷雙魚素。碧闌干畔，惹儂終日延佇。

酷相思 春感

正值花開三月雨，恨春色無憑據。只一縷芳魂何處去？踏遍是天涯路；覓遍是天涯路。燕去鴻來經幾度，心事也何從訴。况隔着紅牆天又暮，不醉也愁無數；便醉也愁無數。

浪淘沙 題太一辟支廬詩詞集

君抱楚騷愁，湘水悠悠，高邱無女怨靈修。不怕蛟龍來攫去，吟向滄洲。一劍話從頭，匹馬

燕幽，相期殺賊覓封侯。此手原來堪草檄，與子同仇。

前調和太一用前韻

江上白雲愁，日暮悠悠，相思其奈路途修。摘取杜蘅何處寄，閒立汀洲。末路且低頭，含笑重幽，黃金斗大鄙封侯。一卷船山心不死，了了恩仇。

羅敷媚海上遲集南亞盧不至，爲寫此解寄之。

故人天末應憐我，別緒闌珊，別夢闌珊，悵望江頭一見難。低迷怕聽琵琶怨，紅豆拋殘，紅燭燒殘，明日揚舲又故山。

長相思感近事寫示亞盧集南

怨眉梢，怨眉梢，一種癡情未許描，真愁彩筆凋。魂兒銷，影兒嬌，如此溫柔要福消，他生證洞簫。

隔天涯，憶天涯，悄坐紅窗數月華，濛濛障碧紗。柳絲斜，淚絲斜，惆悵江南不見花，瑤琴一曲賒。

如夢令感事和太一

空谷幽蘭誰種，習習風吹香重。可惜着根難，當戶應愁鋤送。悲痛悲痛，難醒紅塵癡夢。

虞美人 題亞盧磨劍室詞

冷蛩啼壁聲悽楚，訴到滄桑苦。杜門休再傍危樓，怕見西山薇蕨盡含羞。十年磨劍拋難得，此意何人識！回腸盪氣寫瑤琴，悄倚紅梨幾度費沉吟。

蝶戀花

望斷蘼蕪無恙否？歲歲分飛，偏算鴛鴦偶。愁到深時如中酒，無言獨自憑欄久。訴向癡情花落後，兩兩驚心，兩兩同消受。鬢樣青絲眉樣柳，今年又是佳期負。

一剪梅

昔人悄步傍花陰，清漏沉沉，清夜愔愔。鴛鴦枕畔覓啼痕，誤盡香魂，負盡香衾。惹儂消息到而今，紅袖癡情，紅豆癡吟。半鈎微月夢中尋，不訴春心，只訴秋心。

賀郎新 遣悶和君劍韻

滿地花如雪，剛轉瞬枝頭啼恨，杜鵑聲歇。大好江山人似夢，鬧遍南蠻鳩舌，偏惹得心逾塞。酒後肯忘朝局改，待相逢往事從頭說。行行淚，絲絲血。臨風儂自傷幽咽，細思量玉梅憔悴。

更誰堪折。休道年華今老大，儘踏賀蘭山缺。笑掛去長城團月。却怪宵深猶未寐，剔殘燈看取刀頭熱。生斯世，同悽絕。

齊天樂 題吹萬叔拜鵲室詞，卽步其惠題拙稿原韻。

手拏杜若天南倚，奇情萬般傾訴。別調廻腸，新聲盪氣，燈底沉吟悽楚。幾番凝佇，似水老琵琶，欲吞還吐。同此傷心，分明弦外曲中緒。思量古愁無數，嘆寥寥作者，算伊堪取。春死鵲啼，秋深鬼唱，剩有騷魂少許。解人怕遇，喚絕妙雙鬟，旗亭開處。拍入紅牙，哀音何太苦。

踏莎行 竟憂近有江蘇日日新聞之刊行，移書索爲題詞，倚此以祝。

笛裏箋愁，愁邊覓路，濛濛一片迷香霧。不堪妙筆訴蒼涼，哀成庾信江南賦。舞蝶顛狂，鶻悽苦，落紅却被東風誤。幾曾招得古時魂，秣陵春死斜陽暮。

點絳脣 南浦思家

湖上鴛鴦，問他幾對分飛去。心期誰絮，南浦瀟瀟雨。倚徧闌干，春信無憑據。凝眸處，天涯草長，不是來時路。

羅敷媚 懷巢南武林

賞梅觀泛孤山棹，別也愁多，見也愁多，抱得芬芳奈若何！可憐同是天涯客。卿占西湖，儂

占南湖，兩地清光月漾波。

前調夜中不寐，披衣寫此。

宵深底事推窗立，星已橫斜，月已橫斜，隔著青山望眼賒。

天涯芳信如相閱，妾是梅花，郎

是楊花，飄泊東風不到家。

昭君怨見落梅，悽然不憚，輒爲譜此。

占得百花頭上，死便深深埋葬。零落滿階紅，鬧東風。一種空香清絕，把酒終難澆滅。庭院

又黃昏，替溫存。

浣溪紗 二月望夕

一春風雨未曾停，料得今宵欲放晴，要持杯酒訴平生。月到團圓偏不見，人逢離別最關

情，教他故意欠分明。

相見歡 擬南唐後主作

寒深西淺難溫，對芳樽，兩地相思一樣怨飄零。歸心亂，歸期遠，悔因循，鬢已絲絲消得幾

黃昏。

春魂。

玉簫吹徹前村，憶王孫，似把零烟碎夢向伊論。遊人病，啼鵲恨，鎖重門，蛺蝶雙雙紅瘦是。

柳梢青雨中登樓，歌此破寂，愁腸欲斷矣。

十二時辰，如癡如癡，振頓全神。瘦盡腰支，銷殘眉樣，懊惱今生。天涯芳草青青，登樓望，攪了愁情。雨雨風風，悽悽楚楚，我我卿卿。

虞美人奉到家書，有「眠食珍重」之語，慨然成此。

可憐遊子飄蓬樣，客裏添惆悵。平安兩字值千金，手把家書燈下費沈吟。男兒蓬矢桑弧志，今日成何事！思量親舍白雲遙，惹得倚門一夜鬢蕭蕭。

蝶戀花 一夜狂風，紅梅零落盡矣！閒愁偶觸，不能無詞。

薄命胭脂羞一顧，似水年華，祇怕芳菲誤。一點檀心須好護，翩翩才調天生付。紅粉飄零誰與訴，自貼闌干，欲去還留住。沈醉玉環嬌獨步，替他扶起風前舞。

前調 四月一日感事

百轉黃鸝簾外聽，芳訊沈沈，惹起春人病。綠到肥時紅瘦盡，幾時重奉東皇令。連日南風吹不定，蝶辭蜂顛，打落蒼苔徑。絕少杜鵑聲響應，奈儂愁喜交相迸。

相見歡

心期兩地相同，死聲中，惆悵年來難競是南風。春安在花無語，恨匆匆，回首粵王臺畔血飛紅。

少年遊

春光大地，神州陸沈，顧影自憐，悽然欲絕。填此寄懷亞子，鈍根太一，世無同憂患者，不以示人可耳！

碧紗窗外落花深，誰與訴春心。幾度飄零，幾回遲暮，綠葉漸成陰。剛箋離恨月西沈，舊夢渺難尋。滿眼滄桑，愁深酒淺，獨坐剔殘燈。

前調 次韻答太一鈍根

願填碧海自深深，悱惻美人心。別亦堪憐，生猶多恨，默倚畫樓陰。秋雲無賴化烟沈，好事夢難尋。風雨懷人，江湖小病，蕉萃對青燈。

青玉案

戊申春日，驅車過大安里，頓觸舊塵，有懷臥子、亞子，寫成一解，分寄櫻島梨里。
滬西城角借遊地，問此景曾忘未？不減英雄兒女氣。往年情事，半歌半哭，隱約還能記。
櫻
花照眼梨花淚，豈相憶終教不相見。昨夜夢中同把臂，聚原易散，散偏難聚，商略渾無計。

桃源憶故人感事，太一韻。

思量舊雨兼今雨，愁絕江山無主。大好頭顱牢補，拂袖婆娑舞。玉簫聲裏瑤臺女，似怨乾
坤終腐。生就容姿媚嫵，心事猶堪語。

南風綠綺勞延佇，剩有飄零幾許。露冷夜深誰伍？淚落東家女。誰恩誰怨天難補，老我淒
風苦雨。人靜燈微扃戶，鬧煞牀頭鼠。

浪淘沙 題鈍根廢雅集

小雅思無邪，敢爲君誇，沈吟無奈夕陽斜。大好江山春去也，惆悵年華！
天半暮雲遮，吹徹
胡笳，便相見亦淚如麻。而況此生能幾見，長此天涯。
虞美人 戊申六月十三日作，用鈍根韻。

人災鬼虐誰能記？生長傷心地，聲聲苦雨訴琵琶。深怕江南此後竟無花。一羣犬豕頑如土，不解冠裳苦。吳淞風起逼人寒，待到龍飛破壁笑相看。

采桑子 移居留溪，填此寄意。

安能鬱鬱常居住！去自蕭然，歸亦安便，又作移家葛稚川。人生到處堪留戀，琴寫籬邊，鳥和林間，只羨清閒不羨仙。

減字木蘭花 留溪寓廬作

此心空淨，近市塵囂殊未信。閉戶深山，漫說晏嬰免俗難。每逢斜照，略有鄰家鵝鴨鬧。獨占清風，抱膝高吟一畝宮。

清平樂 滄浪亭偶賦

來從何處？見亦愁無數。便是相逢無可語，一種心情兜住。若云不算情癡，緣何醉夢支離。繡得鴛鴦新譜，好風寄與黃鸝。

虞美人 和李後主

浮海南旋，舟中無侶，取李後主詞次韻和之，得十四闕。酒淺愁深，不能工也。

剛來便去匆匆了，心事真多少。天津橋上又西風。忍聽杜鵑淒怨數聲中。 舳樓回首依稀在，可憐人民改。酒杯難洗是牢愁。無限淚珠拋付與東流。

擣練子

八世事，本來空。彈指京華廿四風。贏得錢塘蘇小小，兩行清淚濕簾櫳。

淘浪沙

殘局不勝衰，此恨難排，無情明月照空階。一夜令威思往事，化鶴重來。 靈氣豈終埋，滿眼

蒿萊，雄圖京口幾時開。不信東南形勝好，浩浩江淮。

憶江南

傷春苦，今日又悲秋。幕地猿聲啼不住，好風吹送木蘭舟。重上媚香樓。

菩薩蠻

詞人飄泊原難免，鏡聲燕市癡無限。獨自向東歸，孤燈淚暗垂。 舵樓容我上，回首長安望。

好夢總成空，曇花一現中。

相見歡

斜陽一抹餘紅。別匆匆，料峭羅衾天末起秋風。卿揮淚，儂該醉，那時重，燕自西飛何奈百勞東。

不堪王粲登樓。看吳鉤，贏得三分春色七分秋。終難斷，如麻亂，楚騷愁，夢裏相逢月掛柳梢頭。

浪淘沙

到耳浪潺潺，客意闌珊。雪花片片着衣寒。惆悵此生誰管得，舊愛新歡。月下凭欄，浩蕩江山，壞何容易造何難。我是青蓮今再世，謫下人間。

臨江仙

餘生虎口差無恙，天驚石破天飛。酒醒何處夕陽西，取看青史，安用姓名垂。無限蒼波無限恨，關山萬里淒迷。多情更有比紅兒，腰肢瘦損，相送柳依依。

木蘭花

森嚴帝闕冷欲雪，十萬熊羆成陣列。此行梅鶴不孤清，飽聽胡笳聲夜徹。相思細嚼秋蘭屑，盼望江頭情正切。好風安穩掛征帆，重話春申城畔月。

應天長

英雄寶劍佳人鏡，未用時須理整。沙場靜，瓊樓迴，後日功名渾莫定。終南原有逕，心史
休投智井。衆醉屈纒獨醒，問天天亦病。

蝶戀花

踟躕九州何可步，吹徹靈簫，我亦傷遲暮。只合萬花香裏住，偎紅倚翠休歸去。啼鴉聲
知幾度，一種心期，欲向伊誰語。底事年年添恨緒，何曾覓個消魂處。

虞美人

沈吟夜半燈光綠，酒斷愁還續。眼前相見且休言，記取華嚴樓閣現他年。風飄浪打雄心
在，此擔何時解！海邊遙眺暮雲深，一任狂濤東捲恨難禁。

清平樂

驚濤天半，一髮青山斷。鼉榔鯨喙紛亂，幾把滄溟占滿。闌干黃海堪憑，佳期有願終成。莫
便淒淒切切，相期死死生生。

蝶戀花

暮農以所和浮海詞五解見寄。辭意悽惋，昏暮索居，悵然念舊，再爲倚聲答之。

百轉柔腸剛一步，寄到紅箋，細數斜陽暮。祇爲滄桑愁不住，鴛鴦寺主忽忽去。擊劍吹笙今幾度，啼盡鶉聲，恨事憑誰語。腸斷天涯情亂緒，記看煙柳模糊處。

菩薩蠻卽晚

宣南文讌當時共，翩翩舞瘦階前鳳。西燕與東勞，天遙夢更遙。名花該墮地，飄泊何時已。憐我復憐卿，多情似不情。

念奴嬌

巢南囑題笠澤詞徵，卒卒未報，今以一册見貽，因步堯子題詞韻，成一闕寄之。

碧闌干畔，把芬芳展玩，昔賢風遠。擬向垂虹亭長問，多少古愁新怨。月下吹簫，酒餘擊筑，彈指年華換。何圖此世，清音猶響天半。因想訪豔花南，懷人雪北，錦句詩囊滿。真個伊人辛苦甚，絕勝瑯琊千卷。白雪高辭，紅牙低唱，入扣聲聲按。儘教當做鄉邦史，乘同看。

七四 高增佛子詞

念奴嬌 十月朔日南社諸子會于吳門，悵然有懷，填此以寄。

翩然來矣，有鐵崖數子，狂吟吳下。一髮千鈞吾輩在，相與維持風雅。俗敵論交，歲寒結社，心事堪憐借。中丞祠畔，持盃各自傾寫。遙想鹿走臺荒，烏啼樹圯，陳跡餘何瓦。轉眼繁花渾不似，空付塵埃野馬。擊劍風微，吹簫聲歇，說與誰知者。登臨憑弔，料他奇淚盈把。

金縷曲 再紀南社諸子雅集吳門事，用楚儉韻。

匪兇傷吾道，怪年來頻行曠野，更無人到。聞說羣英吳下集，各訴風塵潦倒。料永結瓊瑤歡好。悄悄向夫差庭畔過，剩夕陽衰柳寒鴉噪。更何處？尋遺老。小春天氣春歸早，探寒梅數枝開也。朔風橫掃。重撥餘灰扶墜緒，幾復芳徽未杳。奈醉後苦吟狂叫。霸業飄零餘虎踞，問幾時完璧終歸趙？擲筆罷，且休了。

前調 日來連接警告，百感交集，再疊楚儉韻，以寫我憂。

一覺邯鄲道，猛回頭四郊多壘，羽書馳到。大宛康居齊入寇，憤把界碑推倒。枉金幣年年修好。鹿走中原悲劫運，讓羣雄爭向圍場噪。可容得，商山老。剝膚漫說時猶早，恨蚩蚩依然醉臥，妖氛誰掃？跨上崑崙敲法鼓，義勇軍聲何杳。思救國人前高叫。唇齒相依君解否？怕秦亡韓魏將

圖趙拚蹈海，此生了。

賀新郎 見落花有感

庭院深如許，奈而今東風吹入，又經夜雨。記得繁華曾幾日，轉眼荒蕪誰主。好一似故宮禾黍。賸有枝頭雙粉蝶，却無端飛過東牆去。花有恨，恨誰訴？幾回俯仰空廷佇，算這般滄桑歷遍，更何情緒。鎮日蒼涼無人到，簾外落紅無數，更逐水漂流何處。縱使芳心吹不滅，問何年開出中華土。思至此，倍酸楚！

虞美人 題鄭所南心史

畫蘭擲筆傷心絕，千載猶於邑。無弦更有古瑤琴，死盡騷人何處覓知音。中興望斷厓山影，有恨無人省。至今月色倍堪憐，只管年年深夜照胡天。

虞美人

家兄鈍劍，用李後主韻，成浮海詞十四闋，極淒涼哀艷之致，昔桓子聞歌，輒喚奈何，余亦恨人，誰能遣此耶？長夜無聊，和成八闋，寫示鈍劍，其謂之何？

緇塵染遍京華了，燕趙悲歌少。冷泠海水引天風，我自抱琴彈向萬山中。憶翁心史長留

在，千劫難刪改。算來同抱古人愁，更聽一聲河滿淚橫流。

憶江南

關山月，鐵笛數聲秋。水驛山程迷望眼，雨絲風片送歸舟。莫上仲宣樓。

相見歡

銀屏燈影搖紅，聚匆匆。無奈津頭不起石尤風。彈餘淚，拚沈醉，夢重重。偏又一宵檐馬響。

丁東。

東風掩上西樓，動簾鈎。簾外春寒惻惻似新秋。藕雖斷，絲還亂，總添愁。燕子啣箋喚寄曲。

江頭。

浪淘沙

嘹唳雁聲哀，陣似雲排，更聞蟲語怨空階。一樣商聲聽不得，風捲愁來。戰骨幾曾埋，狼藉

蒿萊，驚心夜半石城開。終古浪沙淘豈盡，恨滿江淮。

菩薩蠻

天開殺運人難免，東行徐市愁無限。采藥幾時歸，思君淚欲垂。雁門愁月上，月上休凝望。

笳吹響遙空，聞聲况客中。

浪淘沙

何處水淙淙，骨便珊瑚，闌風吹我最高寒。驀聽金雞催好夢，長夜誰歡。半晌倚危欄，眉鎖春山，迷陽却曲古來難。安得鯤鵬隨變化，飛遍空閒。

蝶戀花

悄向樂遊原上步，無限斜陽，只是催天暮。上苑鶯鶯啼不住，鳳凰作速辭巢去。遠水連天舟暗度，漁父重來，似聽秦人語。覓遍桃源無意緒，雲津縹渺歸何處。

桃源憶故人

龐陳諸子，用鈕玉樵「雨絲風片烟波畫船」嵌字格，余讀而好之，因亦繼聲。

雨餘桃李先春病，絲柳也縈新恨。風起長亭酒醒，片刻催寒暝。烟雲入眼鴻留影，波漾晴光如鏡。畫出匆匆神景，船遠帆難認。

水調歌頭題亞子分湖舊隱圖

吳江舊名勝，人物隱菰蘆。甚風今日吹下，喜得柳州書。道是緣圖寄意，相與徵文考獻，風雅

屬吾徒。賤子敢緘默，聊復貢區區。鷗瀟灑，風浩蕩，盍歸乎！一樽且酌且唱，涼月墮輕裾。誰擅雲
林筆意，替寫蒹葭秋思，淨掃俗塵無？祇此令人醉。夜夜夢分湖。

少年游爲春航題名小青墓作，用盧尊韻。

月明環珮訝歸魂，彩筆倩傳神。綺孽三生，芳名千古，傾倒幾多人。廣場開處珠喉轉，四座
喚眞眞。白雪徵詞，紅襟揮淚，一樣息餘身。

邁坡塘題三子遊草

碧灣灣堤圍垂柳，鴨頭游泳何處。嫣然一笑秋波溜，半面明妝窺取。呼俊侶，料拜罷忠墳，又
向南屏去。癡懷說與，問湖水清漣，溪光窄渺，月旦定誰許？相憐惜，一樣登高能賦，渠儂眞箇辛
苦。天荒地老人無恙，月下尊前傾吐。狂欲舞，道占住湖山，便是湖山主。沈吟暗妬，記十日行程，崗
嵐起伏，擱筆幾延佇。

菩薩蠻春光漸老，言愁欲愁，託之倚聲，聊寫別恨云爾。

蘼蕪綠遍天涯路，天涯遊子歸何處。少婦漫凝眸，凝眸愁上愁。綠肥紅漸瘦，花落愁時候。
已是鷓鴣天，况聞啼杜鵑。

杜鵑聲裏春光老，飛飛蝶向花枝繞。蝶自繞空枝，春歸知未知？
 斜日下西山，夢回清淚潛。流觴曾幾日，綺夢還堪憶。

七五 張光厚荔丹詞

無俗念重九後一日

桂花香裏，又匆匆過了，重陽時節。昨夜西風排闥問，何事天涯久客？零雨秋花，遊絲春夢，鹿無休歇。瘦驢蹄下，消磨多少頑鐵！十年晨案宵燈，見斬蛇射虎，幾多豪傑。馬革裹尸猶不惜，怕甚淒涼風月。乞食王孫，吹簫公子，也受窮途阨。男兒何憾，莫將往事重說！

齊天樂寄劍華三島

生來未許情牽絆，愁他絆時難斷，不料今番。江迥海去，篆出心香一（平）瓣。是誰多事把宿雁飛鴻，無端台伴。字字遙通，天風萬里吹休散。神交如此甚憾，只兼葭秋水，遙思何限。短髮科頭，芒鞋跣足，說時匡廬真面。夜深燈畔，讀慷慨詩歌，渾如無見。相會何年，望洋空自歎。

金縷曲 次韻酬劍華

心事茫茫緒，計何年芒鞋竹杖，狂歌燕楚。傷怨新愁渾未了，遺恨重添到汝。且休說夢魂
阻。錦水蓬山天樣遠，問今生那有相逢處。誰耐得，此中苦。鷓鴣高舉蝸鳩妬，附不著龍鬚驥尾，
迴腸怎數。倒枕顛衾都是病，偏不逢秋化去，血滴滴心肝一（平）付。欲向神州橫灑去，奈窮途總
把廚頭誤。天不管，向誰訴！

換巢鸞鳳友人歸國，卽題其像誌別。

風雨蓬山，看龍蛇匝地，鼓角驕天。生憎髀肉長，不耐酒杯寬。紅羊燒劫沐猴冠，更誰許他，三
年五年。煙塵滿，又歸去馬前韓范。休慢，時已變，東海潮高，磨我刀和劍。一卷陰符，滿船明月，從
此將軍歸漢。南北東西縱輪蹄，陣雲彈雨司空慣。將綠水與青山，血花紅濺。

如夢令 前題

不怕竅鸞囚鳳，只怕魯和鄒闕。這樣好頭顱，能有幾多相送！珍重珍重，往事而今還痛。

鷓鴣天 代題友人像送友

疾雨驚風馬上來，都門人看斷頭臺。飄零一樣思張儉，又到蓬山第二回。歸去也，曷徘徊！

君休棄甲笑于顛。自知生是西飛燕，橫直東勞不久偕。

謁金門 前題

狂風雨，吹得夢魂無主。掛上倭刀三尺許，又潛歸故土。知道重逢何處，留個影兒贈汝。終日看君君自覩，只悄然不語。

七六 張光薰 穉蘭詞

蝶戀花 懷檢淚

一夕匆匆人兩地，水樣流年，近况知何似？目斷孤鴻天外去，屋梁月落頻追憶。夢裏尋君何處是，幾度欲拋，總覺拋無計。把晤艱難離別易，寄書千里還迢遞。

雨中花

二月春光如畫，思去年同游冶。海素房櫺，海棠庭院，暗記雕欄下。此景思量疑昨夜，怪底分離乍。無限江山，無窮歲月，何日杯重把。

如夢令

嘗透病愁滋味，難遣情懷如醉。漸覺帶圍寬，又減却眉邊翠。蕉萃，蕉萃，怕與菱花相對。

秦樓月

秋蕭索，榕湖風景爭如昨。爭如昨，容光蕉萃，花光寥落。水紅淨盡蟾波闊，雕欄往事思量

著。思量著，不堪悄捲，西風幺幺。

望江南

寒瓊屬題廣州拆城發見黃益之殘軀，軀文永州團練口口使黃損口口即平生願作樂中箏者也。

軀一角，名姓職官詳。埋沒城根千載后，忽同焦尾遇中郎，文字吐奇光。平生願，願也太風流。裙上放嬌榮，幸死，領南詞祖足千秋，殘甃抵琳瑯。

七七 張長心無詞

少年游爲春航題名小青墓作，用盧尊韻。

湖山風雨暗傷神，花落美人魂。春去難留，衣香又見，脈脈訴情真。
管絃聲裏當年淚，原個
女兒身。舊恨新愁，青衫紅粉，畢竟可憐人。

七八 張昭漢 默君 詞

虞美人 金陵懷古

秋沈鐵甕鍾山碧，形勝都非昔。故宮憑弔剩荒涼，禾黍離離回首倍神傷！
六朝金粉融春
雪，搖落秦淮月。夕陽衰草送江潮，幾代興仁閒話付漁樵！

漁家傲 七夕

浩淼銀河年一渡，新愁舊恨從頭數。夢墮西風天欲曙。銷魂處，鵲橋迷斷歸來路。
清淚幾
行難付與，釀成叢桂淒聲露。修到神仙徒自苦。君悟否？人間何地相思訴！

笑指長空懷渺渺，牽牛也爲鍾情老。密網自投還說巧。乾坤小，人間未必彌煩惱。
斜月一

鈎輝滿抱，無窮哀豔都鈎了，醉筆頻搖星斗皓。歌且舞，酒痕墨瀋青衫好。

河滿子 中秋月色不佳

瑤碧輕籠薄霧，涓涓風露淒清。底事姮娥多悵惘，廣寒醉倒螺觥。愁鎖瓊樓高處，雲屏掩怯生。
 鶴唳哀沈天籟，無端詩夢難成。古鼎添香聊寄傲，焦桐咽作秋聲。立徧曲闌干外，有花影數枝橫。

青玉案 秋日紀游

瓊樓十二寒如許，我欲御風仙去。無意招秋秋自駐。月波凝雪，醉霜紅樹，清絕偕游處。涼颼吹散愁千縷，悵惘休吟別離賦。倚劍問天天不語。飛鴻明滅，亂山無數，人在圖中步。

七九 張啟漢 平子詞

蝶戀花 星沙晚春

郭外蘼蕪青欲遍，浣盡紅塵，亂撲驕驕面。十里花開隨意遠，星沙春盡腸應斷。誰道瀟湘

歌舞艷，滿目輪蹄，花落無人見。鬢影衣香都盡散，昔時王謝今時燕！

木蘭花慢

前闕意有未盡，續填此廣之。不自知其哀以思也。昔年此際，集南社之吟朋，廣蘭亭之韻事，今非其時矣，屯良遠在海上，見此，得無淚下耶？

盼杜鵑血淚，都點滴上莓苔。正花片澆紅，柳絲綻綠，恨緒紛來。春光正依人暖，罵東風偏着意安排。流蕩雲邊新月，驚翻池上春雷。暗香傳不到深閨，梁燕語頻催。只滿戶蛛絲，空庭草色，猶認吟杯。豪情半隨逝水，任餘波還突過秦淮。待把錦書付與，剛腸已斷千回。

揚州慢

此白石自製中呂宮調也。中有云：「自胡馬窺江去後，廢池喬木，猶諱言兵。」及今讀此，尚有餘痛，況身櫻其禍者乎？余因倚聲和之，以冀與邦人士同聲一哭。

山外雲光；水邊帆影，儘人細數前程。渡重湖八百，遍村樹煙青。歛飛燕歸巢野幕，曲鄉荒徑，無處非兵。更紅塵飛鞚，遙鞭都指湘城。滌江株里，祇星星燐火傳驚。似拂妓墳邊，空靈岸側，堪

寄蘭情。現續有陳人在，淒風冷雨聽鶉聲。念當年詩料，而今悲緒環生。

南社詞集姓名籍貫考(一)

- 一 丁以布，字貢之，一字仙芝，號展庵，浙江杭縣人。
- 二 丁三在，一名三厄，字善之，號不識，浙江杭縣人，以布兄，已故。(以上兩人前後次第誤倒)
- 三 王德鍾，字玄穆，號大覺，別號幻花，江蘇青浦人，已故。
- 四 王漢章，字吉樂，山東福山人。
- 五 王橫，字瘦月，安徽歙縣人。
- 六 王鍾麒，字毓仁，一作郁仁，號无生，別號天僂，安徽歙縣人，寄籍江蘇江都，已故。
- 七 王蘊章，字蓴農，號西神，江蘇無錫人。
- 八 古直，字公愚，號孤生，別號層冰，廣東梅縣人。
- 九 白炎，字臥羲，號中壘，河北宛平人，已故。
- 一〇 朱霞，原名組綬，(詩集誤作長綬)字佩侯，號劍鋒，江蘇吳江人，已故。
- 一一 朱慕家，原名長綬，(詩集誤作洪綬)字仲康，號劍芒，一作劍鋒，別號太赤，今以劍芒行，江

蘇吳江人，霞弟。

一二 朱錫梁，字梁任，一字夫順，號緯軍，別號君仇，江蘇吳縣人，已故。

一三 朱璽，字鴛雛，號孽兒，江蘇松江人，已故。

一四 余一，原名其鏘，字秋槎，號十眉，今以十眉行，浙江嘉善人。

一五 余壽頤，字祝廕，號廕閣，別號次儂，更名天遂，字顛公，號大顛，江蘇崑山人，已故。

一六 吳有章，字鏡予，號漫庵，江蘇武進人。

一七 吳梅，字瞿安，一字耀齋，號霜厓，江蘇吳縣人。

一八 吳虞，字又陵，號愛智，四川成都人。

一九 吳清庠，字眉孫，江蘇鎮江人。

二〇 呂志伊，字旭初，號天民，雲南思茅人。

二一 呂碧城，字遁天，號聖因，女士，安徽旌德人。

二二 宋一鴻，字心白，號癡萍，江蘇無錫人，已故。

二三 成本璞，字琢如，號天民，湖南湘鄉人。

二四 李凡，原名哀，字哀公，一字叔同，號息霜，別號息翁，亦稱黃昏老人，後披薙爲僧，釋名演音，法號弘一大師，天津人。

二五 李拙，字康弼，號康佛，今以康佛行，浙江嘉善人。

二六 李煇夢，字小白，廣東梅縣人，已故。

二七 杜羲，字宥前，號仲慮，一作仲宓，河北靜海人，已故。

二八 汪文溥，字幼安，號蘭泉，別號懺庵，江蘇武進人，已故。

二九 汪兆銘，字季新，號精衛，廣東番禺人。

三〇 沈次約，字劍霜，一字劍雙，號秋魂，江蘇吳江人，（詩集誤作吳縣）原籍浙江嘉興，已故。

三一 沈宗畸，字太伴，號南雅，廣東番禺人，已故。

三二 沈昌眉，字長公，號眉公，江蘇吳江人，已故。

三三 沈汝瑾，字石友，江蘇常熟人。

三四 沈雲，字秋凡，浙江嘉興人，（詩集誤作嘉善）遷居江蘇吳江，已故。

三五 沈礪，字勉後，號道非，別號嚶公，江蘇松江人，原籍浙江嘉善。

三六 沈毓清，字詠裳，江蘇吳江人。

三七 狄膺，原名福鼎，字君武，號雁月，江蘇太倉人。

三八 周宗澤，字景瞻，湖北襄陽人。

三九 周亮，字亮才，號天石，今以亮才行，浙江嘉興人。

四〇 周偉仁，一名偉，字人菊，今以人菊行，江蘇淮安人。

四一 周斌，字志頤，一字芷畦，號漁俠，浙江嘉善人，已故。

四二 周雲，原名世恩，字一粟，號淇伯，別號酒癡，江蘇吳江人，原籍浙江杭縣。

四三 周實，字實丹，一字桂生，號無盡，別號和勁，江蘇淮安人，已故。

四四 易象，字枚丞，號梅僧，湖南長沙人，已故。

四五 林之夏，字涼笙，號秋葉，別號黃鬚，福建閩侯人。

四六 林百舉，原名鍾鏢，號一厂，今以一厂行，廣東梅縣人。

四七 林學衡，字浚南，號懋公，別號庚白，今以庚白行，福建閩侯人。

四八 邱志貞，字梅白，浙江諸暨人。

- 四九 邵瑞彭，字次珊，號次公，浙江淳安人。
- 五〇 金光弼，字夢良，江蘇吳江人，已故。
- 五一 金燕，字翼謀，江蘇太倉人。
- 五二 俞鏗，字劍華，號一粟，原名側，字則人，江蘇太倉人，已故。
- 五三 姚光，原名後超，字鳳石，號石子，江蘇金山人。
- 五四 姚肖堯，字民哀，江蘇常熟人。
- 五五 姚錫鈞，字雄伯，號鷓鴣，別號宛若，今以鷓鴣行，江蘇松江人。
- 五六 姜胎石，一名若，字參蘭，號枕仙，別號證禪，今以證禪行，江蘇丹陽人。
- 五七 姜崙，字君西，一字俊兮，號可生，又號杏癡，別號淚杏，今以可生行，江蘇丹陽人，胎石弟。
- 五八 柳棄疾，原名慰高，字安如，更名人權，號亞盧，別號亞子，今以亞子行，江蘇吳江人。
- 五九 洪奐，字堇父，浙江淳安人。
- 六〇 洪爲藩，字白蘋，號北平，今以北平行，江蘇儀徵人。
- 六一 胡先驢，字步曾，號懺庵，江西新建人。

六二 胡穎之，字栗長，號力漲，浙江紹興人。

六三 胡韞玉，字仲明，號樸庵，一號樸安，今以樸安行，安徽涇縣人。

六四 胡懷琛，字季仁，號寄塵，安徽涇縣人，韞玉弟。

六五 孫景賢，字龍尾，江蘇常熟人。

六六 徐自華，字寄塵，號懺慧，女士，浙江崇德人，已故。

六七 徐蘊華，字小淑，女士，浙江崇德人，自華妹。

六八 徐珂，字仲可，浙江杭縣人，已故。

六九 徐夢，原名儂，字雲石，號凍佛，別號半夢，江蘇宜興人。

七〇 浦軍年，更名武，字君彥，號醒華，江蘇無錫人，已故。

七一 馬駿聲，字小進，號退之，別號夢寄，廣東台山人。

七二 高燮，字時若，亦作慈石，一字黃天，又字志攘，號吹萬，別號寒隱，江蘇金山人。

七三 高旭，原名扈，又名堪，字天梅，一字慧雲，號劍公，別號鈍劍，江蘇金山人，燮兄子，已故。

七四 高增，字卓庵，號佛子，別號大雄，江蘇金山人，旭弟。

七五 張光厚，字天民，號荔丹，四川富順人，已故。

七六 張光蕙，字稚蘭，一字蘊香，號琅姑，別號心瓊，女士，四川營山人。（詩集張光萱女士之姊）

七七 張長，更名一鳴，字心蕪，一字心撫，號洗桐，浙江桐鄉人，已故。

七八 張昭漢，字默君，號涵秋，今以默君行，女士，湖南湘鄉人。

七九 張啓漢，字平子，湖南湘潭人。